

Cm. P. 1029

1.5.8.5 7 Decem^{bris}



CIMELIA 8072

Crim. R. 1029

Hist. 4033.

VI. a. 32

Heidenstein Moskau ver


Heidenstein

Sim. F. 8072.

9.5

REINOLDI
HEIDENSTEINII
SECR: REGII, DE
BELLO MOSCOVITICO
Commentariorum

LIB: SEX.



CRACOVIAE
In Officina Lazari, Anno Domini,
M. D. LXXXIIII.

Bibliotheca Collegij Majonis Universitatis Cracoviensis

105

REINOLDI

HEIDENSTEINI


33 CR. R. 11. 12

1110. NO. 11. 12

CONTINENTAL



LIBRARY



CRACOVIAE

In Officina Typographica

M. D. LXXXIII

SIGISMUNDO BATTORI
DE SOMLIO, PRINCIPI
TRANSILVANIAE,

REINOLDVS HEIDENSTEINIVS.



ISTORIAM SVIS LEGIBVS
scribere Sigismunde Princeps Il-
lustrissime, & maiorem utilitatem
communi hominum vitæ affert,
quàm cuiusquam oratione explicari
potest; & maius quiddam esse vi-
detur, quàm non modò ab eo ex-
pectari debeat, qui inter continua
negocia in aula versetur; verùm etiam quàm vulgò ho-
mines opinantur. Qua enim in re singulis ætatibus pluri-
mi homines doctissimi, ac non modò doctrina atq; ingenio,
verùm ocio etiam abundantes elaborarint, quod tamen
paucissimi in ea præstiterint; quis non summam difficul-
tatem in causa esse dicat? sed tamen historiarum non
vnum idemq; genus est: diuersitas in sola tractandi ra-
tione, ac orationis ornatu posita videtur; ab eadem au-
tem re difficultas omnis esse. cæteris enim rebus omnibus
fere inter se conueniunt; hac sola summus historicus à
mediocri, seu vt rectius dicam, historicus à narratore
differt. Nam & res dignas cognitione hominum quæli-
bet historia scribere se profitetur; & eas ad veritatem
quàm maximè scribere existimari vult: easdem verò sen-
tentiarum grauitate, & verborum luminibus exornare,
ac non modò rebus ipsis, verùm sententijs etiam & verbis
magistrum vitæ agere, præclarum quiddam est; nec ta-
men omnis historiæ proprium. Nam vt de cæteris ta-
ceam, ei, quam commentarios vocari iam obtinuit, quæ
iustæ historiæ quasi subseruiens, ea quæ illa exornet, sim-
pliciter

PRAEFATIO.

*pliciter ac nudè scribit; quis nescit iure ab omnibus pro-
pemodum concessum iam esse, ut etiam sine ullo orationis
ac praeceptorum ornatu, quam verissimè saltem quæ gesta
sint, narret? Hoc igitur scriptionis genere, bellum, quod à
patruo tuo Stephano Poloniae Rege, cum Ioanne magno
Moscouiae Duce gestum est, à me per textum, non tam ut
ab historico, quam à qualicumque narratore, ad te nunc mit-
to. Quanquam minimè hic quidem me fugit, huius etiam
generis commentariorum propriam quandam esse elegan-
tiam ac dignam homine erudito puritatem. quæ nisi ma-
xima difficilimaque essent, minimè, qui princeps in hoc ge-
nere est, Caesar tantam laudem consecutus commentariis
suis fuisset, ut ne imitatione quidem à quoque exprimi posse
iudicentur. Verùm hæc quoque, quæ ego quidem ipse in me
requiro, si quis alius præterea in commentariis hisce re-
quirenda putabit; is vellem perspiceret, quam non modò
breui tempore, sed quam alieno etiam ac impedito, inter quæ
quot aliarum rerum occupationes in aula non solum ne-
gociosissima, sed et quæ nullo certo in loco consistens per-
petuis quodammodo prosecutionibus circumfertur, scri-
bendi mihi fuerint. Id certè consequar, ut quò minùs à
me ad hasce res scribendas studij allatum videbitur; eò
libentius alij, qui possunt, ad easdem ornandas se conse-
rant. Reliquis duabus rebus, quas historiae propositas
esse supra ostendi, rerum gravitatem, ac narrationis veri-
tatem, videor mihi non debere dubitare, cumulatè omni-
bus eos satisfacturos. Non enim indignam eius belli co-
gnitionem iudicaturos homines opinor: quod cum eo ho-
ste gestum est, cuius potentia non vicinis modò nationibus,
verùm remotioribus nonnullis formidolosa iam erat; quæ-
que qui etiam non metuebant, antequam victus esset, vix
tamen vinci posse iudicabant. Tibi quidem Sigismunde
Illustrissime vel iucundissimam futuram certò iam mihi
promitto. Accedunt ad bellicas, domesticæ res: quæ ut
tempo-*

PRAEFATIO.

tempore ac natura ferè cum bellicis coniunctæ fuerunt; ita à me etiam disiectæ non sunt. Verùm potissima ac propria cuiuscunque historiæ laus veritas est: de hac nihil necesse est me dicere. Primum enim minimè de remotis à memoria nostra rebus scribo, in quibus vel errare facile possim, vel fingere, si quid velim, nullius memoria iam refellente: sed edo hæc ijs cognoscenda, qui ijs ipsis rebus, de quibus scribo, interfuerunt; ut res per huius belli tempus gestas, ijs, qui ab illis abfuerunt, eorum, à quibus administratæ sunt, viuorum & præsentium memoria teste commendem. qua in re utrunque fuit, ut & ego facilimè ea à multis, qui ijs interfuerunt, cognoscere potuerim; à veritate autem vlla in re recedere non potuerim, tot hominum conscientia constrictus. Accedit huc, ut publicorum actorum, quibus res, quæ hisce libris comprehenduntur, magnam partem testatæ sunt, pro eo loco, in quo sum, summam facultatem habuerim: Ita quæ singula, si alicui obtigerint, magnum momentum ad cognoscendam veritatem attulisse ei videantur, ea mihi vniuersa ferè fuerunt. Habes de re: nunc cur ad te potissimum eos mittam. Primum Sigismunde Illustrissime, cum de rebus à patruo tuo clarissimo Rege gestis scriberem, cui rectius dicare eos debebam, quàm tibi, nullum reperiẽbam: ad quem nimirum non modò magna pars gloriæ huius propinquitatis iure, ac quasi hæreditate pertinere videbatur; verùm quem ad similitum rerum gloriam iam incensum non minori contentione ipsum etiam olim aspiraturum omnes expectarent. Itaque iam ante mea sponte tui obseruantissimum, ad hanc tamen voluntatem meam non minus summa quoque de virtute tua expectatio me adduxit: qua caue existimes quicquam illustrius esse. Tantum enim in omni optimarum artium genere studium, tantaque indoles, quanta ea in te esse nouimus minimè vel obscura cuiquam esse possunt, vel Transil-

105
PRAEFATIO

*nanice tantum finibus se tenere. Ab hoc igitur tuarum
laudum fonte, ut aliquam meo etiam huic labori laudem
hominem illarum studiosissimum haurire non moleste me
feras: singularis vero erga te observantiae meae qualem-
cunque hanc significationem ut gratam tibi esse patiaris, ita
te rogo; ut quamvis pro summa tua humanitate tua
sponte id facturum te non dubitem; ego
tamen maximi beneficii loco ac-
cepturus id sim.*



REINOLDI

R. HEIDENSTEINII
SECR: REGII, DE
BELLO MOSCOVITICO

Commentariorum

LIBER PRIMUS.



STEPHANVS REX, QVO confirmata foris cum finitimis omnibus pace ac amicitia, dissidia ex electionis studijs inter partes exorta facilius componeret, ac in tranquillo statu remp: collocaret, ad plerosq; vicinos Principes literas dedit; quibus more inter principes recepto regnum sibi delatum, suamq; & in illos beneuolentiam, & cum omnibus pacis studium declarabat. In hisce ad Ioannem Basilij filium, magnum Moscouiæ Ducem, Stephanum Grud-senscium Polonum, & Leonem Bukouiecium Lituani cum literis mittit: se prouidentia diuina ac ordinum studijs ad regnum ascitum: id ita gerere instituisse; vt cum omnibus principibus Christianis pacem & amicitiam coleret: eodem animo erga illum quoq;, vt finitimum & christiani nominis principem esse: si quæ inter ipsum ac regnum Poloniæ magnumq; Ducatum Lituaniæ a maioribus vtriusq; traditæ controuersie intercederent; de ijs ex æquo & bono amicè inter eos agi posse. Respondit Moscus: & si audierit Maximilianum Imperatorem in Regem electum; quò minus tamen cum ipso quoque gratia ac amicitia sibi essent, non se recusare:

placere sibi, vt maiores legati more maiorum mitterentur: interim ab iniuria & maleficio vtrinq; abstineretur. Rex responso hoc accepto, ad domesticas res componendas, maximeq; Gedanensium motus sedandos totus conuersus, Thoruniæ conuentum habet: in eodem legatos etiam in Moscouiam pacis tractandæ causa mittendos ex Senatus authoritate decernit. Fuere ij Stanislaus Kriscius Masouia, Nicolaus Sapieha Minscensis Palatini, Theodorus Skuminus Palatij Lituanici quaestor. Quibus rebus perfectis, dissensionibus ac in iisdem perseverantia Gedanensium permotus, armisq; ciuitatem persequi coactus, primum copiis illorum vrbe egredi ausis per Ioannem Sborouium aulici militis praefectum, quem ad exercitum cum imperio reliquerat, ad Dirsauiam fusis, ad urbem castra promouet. Quo tempore Moscus occupandæ Liuoniae tum maxime oportunitatem se nactum ratus, ad vim atq; arma astum adiungit. Regebatur Liuonia sub nomine administratoris à Ioanne Chodkeuicio: in praesidiis pauci Poloni, pleriq; Lituanici nominis praefecti erant. à quibus immoderatus indigenæ habitus, simulq; non satis in illis praesidij contra potentiam Moscouiticam existimantes, ad res nouas ferè spectabant. Non ignarus harum rerum Moscus miserat in Liuoniam Magnum Holsatiæ Ducem, quem cum iam antè ad se transisset, promissis, ac affinitate deuinctum tenebat. Rumorem de eo tradit, fore, vt si vltro Liuones se dedant, ad exemplum Ducis in Prussia beneficiario iure Liuoniam regendam ei traderet, vt authoritas ac administratio omnis penes Magnum, penes se nomē collati beneficii ac maiestas Imperij essent. quibus rebus adducti prouinciales, hinc odio seu tædio externi imperij, illinc spe & nimia cupiditate eiusdem linguae ac nationis magistratus, simul à factiosis quibusdam ac nouarum rerum cupidis impulsis, praesidia ex
arci-

arcibus & opidis ferè omnibus ciiciunt : ipsi Vendam, vbi tum Magnus erat, confluunt : nomen insigniaq; regia illi circumdant : inq; verba eius sacramento se adiungunt. Moscus interim maximo exercitu coacto, in Liuoniam nullo impediante, præfidiis omnibus pulsas, ac plerisq; arcibus à Magno occupatis penetrat: acceptisque in deditionem Marienhausio, Rosittenio, Ludsenio, Duneburgio, Kokenhausio, Ascherotum vsq; sine maleficio, vt initio rerum gerendarum clementię fama colligeretur, progreditur. Confluxerat Ascherotum magnus vtriusq; sexus, ac omnis conditionis hominũ, maximè autem matronarum ac virginum, numerus : erat ibidem Landmarschalcus, vir ætate, & summis olim in prouincia ea gestis honoribus venerabilis. Moscus omnibus, qui arma ferrent, promiscuè trucidatis, imbellem sexum Tartaris constuprandum obiicit. Inde Vendam recta proficiscitur : qui ibi erāt fama tantę immanitatis perterriti portas clauscrant. Egressus pro illis deprecator Magnus, composito ad humilitatem habitu, ac genibus illius supplex in genua prouolutus adrepēs, conuicio ac verberibus ab ipso Duce in os ingesto excipitur. Cũ tantũ abesse ab eo intelligerent, vt Magni autoritate salui esse possent, vt ne ipse quidem periculo vacaret, hostili fraude circumuentos se videntes, ira, metu & desperatione incensi, puluerem tormētarium fundamentis subdunt; quo succenso magna vtriusq. sexus, omnisq. etatis & conditionis hominũ multitudo, ac flos ferè eius, quę reliqua adhuc erat nobilitatis Liuonicę, absumptus fuit. Accepta ita in potestatem Venda ac Rumburgo, quod Vendę imminet, eodem tempore per deditionem positus iam vniuersam Liuoniam, Reualia & Riga, paucisque circa eas castris exceptis, in potestate habebat. Pernauiam siquidem post discessum Henrici interregni eo tempore interceperat : Veissensteinium nobile castellũ opere

opere ac natura munitissimum de Suecis: Naruam verò Derpatum, Felinum, ac Marienburgum aliâque nonnulla iam multo ante partim de Episcopo Derpatensi, partim de Marianis Liuonicis ceperat; ab iisq; primum initiis profectus, cum continuas deinde impressiones in prouinciam faceret, vt in Sigismundi Aug: ac regum Polonię fidem ac ditionem prouinciales tum se conferret, plurimis detrimentis eos adegerat. Eâq; res, cum ad superiores controuersias, quas de Russię locis quibusdam cum Magnis Ducibus Lituanię habebat, accessisset, perpetua deinde inter ipsum ac Reges Polonię belli causa fuit: quod aliquando quidem per inducias positum, vt plurimum tamen varia fortuna, tam in Liuonia, quam Lituania gestum, in hunc vsq; Regem transmissum fuerat. Cæterum Moscus abducto secum Alexandro Polubenscio Chodkeuicij legato, cæterisq; præfectis, in Moscouiam se recepit. Ex itinere literas ad Regem dat: quibus vt à Liuonia omninò abstineat, Regi præscribit. iisdem ad Prussum quendam Augusti Cæsaris fratrem, nulli ante hac cognitum, qui Koinicij & Marienburgi quondam, & in reliqua Prussia late imperitasset, genus suum referebat, quo ad ipsos Prussiæ fines ius Imperij extenderet. Legati, qui ad tractandas pacis condiciones mittebantur, iter coeptum nihilominus prosequerantur: nouis in itinere mandatis acceptis, vt de iniuriis induciarum ostentatione factis quererentur: satisfactionemque postularent. Dum ad Gedanum Rex castra facit, exercitum in Liuonia Lituaniâq; per ostentatam pacem, maxime autem propter difficultates ærarij, quæ initia regni eius exceperant, nullum parauerat: sub ingruentis tamen hostis famam, nobilitatem Lituanicâ literis euocauerat, militareq; per ducatum eum imperium Nicolao Radiuilo Palatino Vilnensi, Gregorio Chodkeuicio qui antè illi præfuerat defuncto, tradiderat.

rat. Hic non exigua cum voluntarij militis manu, Seelburgum peruenerat. Interim verò & Gedanenses ad humiliores æquioresq; conditiones multis malis victi, & maiora timentes descendere cœperant: cumq; electores duo, alijq; Germaniæ Principes quidam suas pro illis preces per legatos interponerent, recepit Rex in fidẽ ciuitatem; tum verò ad bellum Moscouiticum, quod iam multò antè animo agitarat, totum se conuertit. Ad quod suscipiendum, secundum acceptas iniurias, ac Liunioniæ recuperationem multæ causæ illum hortabantur: quarum hæc vel iustissima, quòd egregio aliquo facinore, non modò de sui regni hominibus, verum tot aliis, quibus Imperium Moscouiticum summa cum immanitate coniunctum, vel formidolosum erat, vel graue, bene mereri; eamq; ad posteros nominis sui famam propagare studebat, ex qua omnes non modò Regem, sed dignum etiam regno fuisse cognoscerent. Preterea verò ad maiores res, quas cogitandas susceperat, & de quibus misso in urbem Paulo Saionskouio cū Gregorio XIII. Summo Pontifice communicarat, si prius Mosci potentiam fregisset, aditum se habiturum sperabat. Hoc animi proposito, in mensem Ianuarium Varisauiam comitia edixit. Agebatur autem tum annus septuagesimus septimus, supra Millesimum Quingentesimum. Rediit interim in potestatem Duncburgum à Borissio Saua, ac Vilhelmo Platero receptum. Hi in omnes occasiones intenti, cum cōmeatus inopia laborare præsidarium militem animaduenterent, per speciem officij ac comitatis militaris esculentorum, ac poculentorum nonnihil, ac in his vini cremati, quod inopia veri maximo apud Moscos in honore est, vas ei miserant: de quo cum ad ebrietatem Mosci bibissent, illi, qui id futurum cogitarent, noctu scalis admotis, in vallum, quo solo castrum cinctum est, & in ipsum castrum euadunt: Moscos

scos ex somnio & mero vix se colligentes deturbant: castro potiuntur. Non multo inde tempore interiecto, Vēda etiam huiusmodi ratione recuperata fuit. Erat sub Matthia Dembinio ex rusticis Lotfinis fabrilis artis peritus quidam, qui sororem Vendæ in Moscorum potestate habebat; per cuius visendæ speciem & rusticorum commerciorum libertatem cum sepius Vendam venisset, oportunitatem nactus, ceram clauibus opidi impreferat, adq; eiusdem exemplum alias parauerat. rem ita instructam ad Dembinium detulit. Cumq; is die constituto, quem festum Mosci agebant, sub opidi portas cum Ioanne Buringio, ac tumultuaria militum manu accessisset, ab vna parte scalas Buringio admouente, ac à Lotfinis ipsis, qui Vendæ erant, concursu facto, reliquos portis reclusis in opidum immisit. Dum Varšauiam ad comitia Rex contendit, nuncium in itinere accepit, ab iis rebus, quas tum agitabat, alienum. Limes regni Polonici & magni Ducatus Lituanici magna ex parte Borystenes est; qui in Moscouia ortus modico in occidentem flexu, in meridiem deinde & Pontum Euxinum magnam aquarum vim trahens fertur: superior fluminis pars, ad Lituaniam pertinet: ad inferiorem diuersarum gentium confinia concurrunt: præter Moscos & Polonicæ ditionis Russos, nonnullæ Turcicæ præfecturæ attingunt: non longo etiam interuallo Valachi ei imminēt. In hac tot nationum nec satis pacatarum colluie, non potest adhuc quamuis à tot seculis pax consistere. Itaq; immensa ibi camporum spacia, multi agri inculti, ac deserti ob latrocinia vel metum iacent. Confluere huc ad prædas ex hostico agendas solent; cum ex aliis gentibus, tum Polonis quoq; & Lituanis, vt quisque est egentissimus, vel rerum capitalium damnatus; quosq; vel fortuna eorum, vel leges in patria esse non sinunt. superioribus tamen temporibus, cum publicè bellum

bellum non esset, etiam ex primaria iuuentute quidam loca ea petebant, odio quietis, ac ne situ, ac ocio torperent, virtutis exercendæ causa. Magnam partem in aquis ac flumine piscatu ac latrociniis viuunt: hostemq. vt ex quoque plurimum prædæ sperant, ducentes, barbaris tamen, vt maiori inter eos Christianorum numero, ac Tartaris præsertim infestiores sunt, magisq. Poloniae regibus operam nauant. quòd infimam Poloniae partem, quæ ad flumen pertinet, tenent, à loco Nisouij appellantur: interq. reliquos Kosakkos: ita enim communi nomine vocantur omnes tam equites, quàm pedites, qui ad latrocinia in finibus exercenda, incursionibusq. hostiles ditiones vexandas priuato instituto, ac voluntaria militia coeunt: hi & numero & virtute plurimum ferè valent. Inter hos cum vixisset aliquandiu Ioannes Podkoua, natione Valachus obscuro alioquin loco natus; sed corporis viribus præstans, & qui soleis equorum ferreis manu disrumpendis nomē inuenisset; partim vitæ ac studiorum similitudine, partim promissis facilè homines ex præda viuentes ad inuadendam vnà secum Valachiam, imperiumq. eius sibi tradendum adduxit. Petrum Palatinum Valachiae nihil tale expectantem occupant, & prius sede Imperij exuunt, quàm ille vlla arma imminere sibi suspicari potuisset. Quod cum Rex intellexisset, & præterquàm, quòd sine auctoritate sua alieni fines bello tentati essent; Petrum, cuius dignitati fauebat, restitutum vellet, cum per Poloniam, tum in Transiluaniam ad fratrem Christophorū principem, vt auxilio suo Petrum iuuaret, literas misit. qui cum alas aliquot equitum & peditum cohortes Stephano Battoreo Andreæ fratris filio duce auxilio ei misisset; Podkoua Nimirouam Polonicum opidum recipere se coactus in Nicolai Sienauij Castellani Kame-necensis, qui finitimæ in Russia militiæ præerat, pote-

statem venit : ab eoq. ad Regem missus fuit. Postquam ad comitia ventum fuit, primo die solēni sacro peracto, altero de rep : sigillatim de Mosci & Tartari iniuriis ad ordines Rex fert : bellumq. ne cum his, aut cum vtro horum velint, rogat. Cum Mosco bellum iussum, cum Tartaro in præsens dilatum. Hic sub discessum Regis Henrici, sollicita ac in omnia alia intenta repub: fines incurfarat, populationibusq; ac rapinis, omniq; immanitatis genere vexarat : obsidionis Gedanensis tempore magna manu facta prædas egerat : illis ipsis comitiorū diebus, fama nuptiarum, quas Constantinus Ostrogia Dux Palatinus Kiouiensis, propinquæ suæ faciebat, excitus, in Voliniam excurrerat : Ducemq; Ostrogia obsederat. Pacato tumultu Gedanensi, exercitum, quem sub Gedano habuerat, in Russiam Rex ad fines tuendos miserat; iamq; aliquot turmæ in Voliniam peruenerant: quarum imperium cum de Tartarorum excursionē rumor interim allatus esset, Ioanni Sbarasso Palatino Braslauiensi, extra ordinem tradiderat. Ex iis quidam non longē Torcino in agmen hostium, vt aduentu exercitus nondum cognito, incuriosius prædas agentium inciderant, prælioq; subito contracto superiores discesserant, vnde de appropinquantibus copiis certior Tartarus factus, cum delectos ab exercitu contra Sbarassum misisset, qui ex instituto eorum, quid virium, ac animi hostis haberet, explorarent: liq; ad Ciaflauiam in nostros incurrissent, fortiter impetu eorum à nostris excepto, mox se receperant; Tartarusq; pactus inter cætera à Duce, vt de amouendis à finibus Nisouii apud Regem laboraret, quorum latrocinia solam bello causam obtendebat, recesserat. in præsens tamen hæc dissimulari placuit. Ex hoste enim inope & vago quemnam magnopere fructum expectari? Cum arma potius Turcica ad ipsius iniurias prouocarentur: qui solum in quo insiste-

insisterent, suum: ipsos fiduciarios possessores esse diceret. Ex Mosco quò maior eius potentiae fama, eò maiorem gloriam in praesens, nomen ad posteros parari: urbibus ac opibus florentissimam olim prouinciam Liouoniam, & cum aliis oportunitatibus; tum maris commodis affluentem victoriae praemium peti. Ita contra Moscum susceptum bellum, simulq; vt in hostico exercitus haberetur, scitum, priori intra fines continendi militis, ac propulsandi hostis ratione domesticis incommodis, ac superioris aetatis exemplis refutata. Proxima huic cura de pecuniis fuit. Delecti fuerunt è Senatu primores, qui quanto in bellum milite, quanto in militem stipendio opus esset, dispicerent. scitum tributum in singula iugera floreni vnus: cereuisiale item in opidis & urbibus, quo in singulas tonnas duo de vigesima cuiusque precij pars exigeretur. Maius id fuit, quam vllum ante hac quisquam meminisset: consensere tamen omnes praeterquam Krakouiensis, Sandomiriensis, & Siradiensis Palatinatum legati; quòd nulla eius tributis sciendi mandata se à suis habere dicerent. Noluerat nobilitas vel bellum vel tributum sciscere; nisi de iudiciis simul, quae iam Sigismundi Augusti temporibus postulare coeperat, in interregnis autem ipsa sibi sanxerat, perfecisset. Antiquitus à iudiciis municipalibus ad conuentus Palatinatum, ad quos quodque municipium pertineret, inde ad Regem in comitia prouocatio erat. Cum à Sigismundo Augusto propter tenuiorem valetudinem infrequentius iudicia haberentur, vt ex suo corpore constituere sibi iudices liceret, nobilitas petierat: Restitit Augustus, dum vixit. vnde illa à Rege id impetrandi spe deiecta, tempore interregni priusquam in Regem Henricum eligeret, inter alias hanc quoq. de translatione iudiciorum conditionem ei tulerat, isq. acceperat. Post discessum igitur Henrici, nobilitas per singulos

gulos Palatinatus, ut cuique, maxime expedire visum fuerat, ex suo ordine, qui causas appellationis iudicaret delegerat. qua ex re cum, quod evenire necesse erat, magnam omnium rerum perturbationem consequi Rex animaduerneret, in causa minime amplius sibi integra, pro re nata optimum ratus, si ad unam formulam omnia reuocaret, sanxit hic, ut non per singulos Palatinatus iudicia haberentur, sed in singulis Palatinatibus maioribus bini, minoribus quibusdam singuli ex nobilitate quotannis delecti primum à Martini usque ad Pascatos Poloniæ maioris nobilitati Petricoviæ: minoris deinde à Pascatos usque ad messum Lublini ius dicerent; itaque omnia priuatarum rerum iudicia penes nobilitatem deinceps essent; publica, iuris item Regij atque fisci iudicia, in eo quo antea statu fuerant, penes Reges manerent. quemadmodum & earum terrarum, quæ suis legibus, ac diuerso à cæteris iure vterentur. Moram huic rei nonnullam afferebat, quod nobilitas à munere iudicandi senatorium ordinem exclusum volebat: hi contra tenderent, iniquum esse, dignitatem suam, quæ commodo sibi esse debebat in iniuriam suam verti; & qui alios in nobilitate, honore anteirent, à communi nobilitatis corpore in re publici iuris, & ad omnes pertinente seiungi. obtentum tandem, ut tam ex Senatoribus, quam reliqua nobilitate, pro arbitrio nobilitatis rebus iudicandis præficerentur. Inter Regem quoque & nobilitatem controuersia nonnihil fuit, quod nobilitas regias quoque vrbes rebus à se iudicatis teneri vellet, superioribus etiam temporibus quasdam causas earum iudicasset. remisit nobilitas: inuentaque ratio fuit, ut quia iam causas aliquas huiusmodi iudicasset, easdem in iudicium vocatas denuo in iisdem comitiis Rex cognosceret. Cumque magistratus quoque ac præfectos regios ad iurisdictionem suam pertinere nobilitas vellet, quod

quod cum ij fere res iudicatas exequerentur, frustra sibi iudicia tribui diceret, sine vlla in eos, qui res à se iudicatas exequerentur, iurisdictione. assensit Rex, vt quatenus rerum iudicatarum executio à magistratibus cæterisq; officiis peteretur, authoritati iudicum parerent. supererat certamen inter ecclesiasticum & ciuilem ordinem: cum hic eodem, quo reliquam nobilitatem, ecclesiasticos iure vti vellet: illi iudicia hæc nobilitatis, quæ cum diuersæ religionis hominibus communicari intelligebant, multis nominibus suspecta sibi esse, obligariq; se illis nolle confirmarent. Ostendit his Ioannes Samoscius Cancellarius, non maius periculum eos suscipere, si in iurisdictionem consentiant, quam si cum obtemperare ei nolint, pœnis deserti vadimonij, & contumaciæ coërceri se patiantur: quod in Palatinatum iudiciis eò usq; factum antea fuerat, vt præter alios Archiepiscopus in maiorem fere centum quinquaginta millium condemnaretur: Addidit consilium, vt quoties ecclesiastica res in iudicium veniret, ad sex ex nobilitate ecclesiastici ordinis totidem, qui pari authoritate de ea cognoscerent, adiungerentur. quorum si pares sententiæ extitissent, ad Regem in comitia ampliaretur. Res per aliquot dies ducta, eum tandem ad modum composita fuit. Agitatum in hisce comitiis & de proscriptionibus fuit. Moribus gentis Polonicæ, qui creditarum cæterarumque priuatarum rerum condemnantur, iis si sententiæ iudicis non pareant; multa dicitur: quæ si spreta fuerit, priori triplo maior dicitur: si ne tum quidem obtemperatur, manu militari in bona missio decernitur; contra quam si quis se opponat, à præfectis proscribitur. Quod olim accerrimum contra decoctores telum fuerat, luxuria temporum, per eamque multitudo obæeratorum labefactauerat. itaque vulgo contemnebatur, resq; magis multorum sermonibus ia-

etata fuit, quàm noua remedia vlla ei allata. Auditis
deinde externorum principum legatis Georgius Fride-
ricus Marchio Brandeburgensis ad valetudinarij agna-
ti sui Alberti Friderici, Alberti Prussiae Ducis filij curam
admissus fuit. inuestitura, quam vocant accepta, solen-
ne iuramentum Regi praestitit. Adfuere ei in caerimoni-
is iis Saxonie Electoris, & Virtembergici principum le-
gati. Brandeburgensis Electoris legati cum principis sui
nomine tanquam ad simultaneam inuestituram ius pertinen-
tis vexillum contingerent, nobilitatis nuncij contra pro-
testati, quod primis illis inter D. Sigismundum & gen-
tem Brandeburgicam conuentionibus ea Marchionum
Brandeburgensium stirps feudo comprahensa non ef-
set, quae postea priuata auctoritate & ordinibus infcis
acta essent, rata se non habere ostendebant. Aderant
& Pomeraniae Ducum legati, principumque suorum no-
mine in Bithouensem Leoburgensemque tractum ius
maiestatemque regni agnoscebant, literasque inuestiturae
accipiebant. Legati interea, quos ad Moscum missos su-
pra demonstrauimus in Moscouiam peruenerant, a quae
Mosco suo ipsius ingenio feroci, tum ob rem in Liuania
prosperè gestam multo etiam superbiore, contumeliis
ludibrioque excepti indignissime habebantur: multa in
nomen Polonicum & Lituanicum contumeliose ab eo
dicta factaque fuere: cumque ex instituto vtriusque gentis lau-
tia vtrinq; legatis, qui missi fuerint, prebeantur: emere vi-
ctum, nec moris sit, nec si velint, in Moscouia possint: non
nisi sordida ac vilissima quaeque cibaria per summam indi-
gnitatem iis ministrari iussit. In colloquiis deinde cum le-
gati non nisi de induciis agendi mandata se habere signi-
ficassent, trium annorum inducias iis dat: literas autem
quas legati obsignare debebant, sine vlla conditione
pure perscribi iubet: alias deinde, quas ipse legatis trade-
ret, sub signo suo subijcit: in iis hasce condiciones adie-
cerat

cerat; vt vniuersa Liuania vnà cum Riga & Churlandia, quæ in potestate Regis adhuc erant, & quidquid vsque ad fines Prussiæ pertineret, Rex sibi cederet: Liuonem nullum præsidium suum implorantem, multò minus ciuitatem vllam reciperet, vllaue ope auxilio suo iuaret. Hasce cum ex more iureiurando placita confirmare deberet, amotis iis, in quas legati antè iurauerant, solas profert: iureiurandoq; in eas se obstringit: atq; ita nullo amplius de his tractandi loco relicto, ex Moscua abire legatos iubet: nouisq; eodem tempore in Liuiam copias missis acerrimè Vendam oppugnat: quæ sub exitum comitiorum audita omnium animos ad bellum Moscouiticum iam conuersos ira, ac indignatione eò magis accenderunt. Venda tamen à Moscis frustra oppugnata fuit. Nam cum per aliquot dies tormentis vehementer muros verberassent, aliquam etiam partem muri diruissent; Dembinus ob exiguitatem præsidij vrbi metuens, cohortatus suos, vt eam secum ingrederentur, cum tenere non potuisset, quod illi propter inopiam commeatum, & non exoluta stipendia minus prompti ad pericula suscipienda essent; & quia magna ex parte equites erant, minus etiam virtutis suæ locum in præsidio fore putarent; tandem vt propius saltem secum accederent, si fortè excubias & castra hostium turbare possent contendit. quod cum impetrasset, noctu silenti agmine eos ducens, paulò ante lucem sub portis vrbs sistit: ostenditq; quod ab hostibus iam videri cœpissent, à tanta hostium multitudine facile circumueniri posse: itaq; potius vt viros fortes ac militares deceret, urbem ingrederentur, virtuteq; sua urbem contra hostem, & vrbe se tuerentur. ita urbem ingressi eidem salutis ac præsidio fuerunt. Muris enim qui diruti ab hostibus erant, magna cura subituario opere noctu expletis, omnibus in locis fortissi-

mè hosti occursum fuit. Itaq. vere iam imminente Mosci soluta obsidione, præmissis primùm tormentis discesserunt. quos Alexander Chodkeuicius præfectus Grodnensis, cuius Ioannes Chodkeuicius patruelis vicaria in administranda reliqua Liuania opera utebatur, quam uis minus commoda valetudine esset, contractis tamen undiq. ad Seeualdum copiis aliquandiu persecutus, adipisci tamen haud potuit. Sub idem ferè tempus Magnus Dux Regis fidem secutus, à Mosco discessit. Adolefcens hic summo genere natus cum Churoniæ & Osi-liæ Episcopatum in Liuania teneret, perditis quorundam consiliis, ac promissis Mosci & adolescentia adductus, cum per ætatem ipse rebus suis consulere non posset, ad Moscum transierat. Ab eo fratris patruelis filia in matrimonium ei tradita, speq. iniecta fore, ut suo beneficio totius Liuniæ regno potiretur, ad Reualiam obsidendam magno cum exercitu missus fuerat. à qua infecta re discedere coactus, tempore obsidionis Gedanensis iisdem cum promissis in Liuniam, quemadmodum supra dictum est, remissus fuit. ubi territus crudelitate Mosci, quodque ademptis ei, quæ tenebat in Liuania castellis ad fines Scythiæ deportare eum in animo haberet, per indicium cognito, cum quanto in periculo versaretur cogitaret: transeundi ab eo consilium cepit: paulatimq. è potestate eius se subducens Lempsaliam, indè propius Rigam ac fines regios se recepit: Regemq. per Ducem Churlandiæ crebrosq. internuncios ac literas, ut in fidem se reciperet sollicitabat. Rex in earum rerum incertitudine, cum & varia de discessu eius iactarentur, ut neq. an fratri eius Regi Daniæ, ceterisue propinquis ipsius consilium id eius probaretur, aut fortune eius curæ omninò essent perspectum habere posset, de deditone nihil quidem tum cum illo constituit: fide tamen publica versari eum in Liuania se passurum

furum ostendit. Postea profecto in Liunioniam Nicolao Radiuilo Palatino Vilnensi, eidem vt cum Duce Magno, quod in re præsentis è repub: esse perspexisset, ibidem constitueret, permisit. Hic cum in Churlandiam venisset, ad eumq. Magnus accessisset, in fidem illum cum omnibus ditionibus eius regio nomine recepit, inq. verba regis sacramento adegit. conditiones deditiois hæ fuerunt, vt quas teneret possessiones, eo quo alij beneficiarij principes sua possiderent iure, à Rege ei permitterentur: aut pro illis aliæ non deteriori conditione pro amplitudine generis & familiæ eius aliquo alio in loco darentur. Vbi de euentu legationis Rex certior factus fuit, mittit statim ad Moscum Georgium Haraburdam, qui non aliter induciis iis teneri se velle Mosco renunciaret, quàm si de Liunia conditionem, quæ nec à legatis accepta esset, remisisset. Moscus retento Haraburda, legationem interea ad Regem, quæ ad rata habenda pacta induciarum, iuramentoq; confirmanda cum adduceret, destinat. ac præcipitante iam æstate exercitum alium multò priore validiorem, maioriq; apparatu instructum, ad Vendam, quam à nostris interceptam ab eoq; postea obsessam supra ostendimus, mittit. Priusquàm vltius progrediar, pauca hoc loco de principum Moscorum origine, potentia, moribus gentis, totiusq; imperij statu præmittere placet. Antiquissima Imperij Russici sedes primum Nouogardiæ, inde Kiouie, posterioribus verò temporibus priusquàm Moscouiam transferretur, Vlodimiriæ etiam fuit: cuius hanc ob causam hodie adhuc titulos Moscouiæ titulis Dux antepōnit. Genus principum ad Varagos annales Russici referunt: gentem vt plerèq. prisce, nunc obscuram: sed tamē quam vltra marinam fuisse iidem annales testētur. Ex ea tres fratres ascitos primò à Nouogardiensibus, qui Slauiam tum fuerint receptos, imperium Nouogardiæ condidisse,

didisse, eique Ruricum natu maiorem fratrem præfuisse, reliquis duobus alias Russiæ partes Bialoieserensem, & Isboriensem obtigisse tradunt: Ruricus ex Olga Plescouiensi Suentoslaum deinde filium habuit. Hic magno cum exercitu in Bulgariam ad Danubium usque progressus, deuictis Bulgaris & Græcis, quibus tum Bulgari parebant, cum agros & cultum, & copias prouinciæ adamasset, sedem imperij in ea sibi delegit. Iaropolcho filio Kiouiam, alteri Olego Dreulanos administrandos reliquit; Nouogardiam Vlodimiro Malci cuiusdam Lubkani, ut annales habent, filio ex ancilla Olga Plescouiensis suscepto concessit. qui cum à Iaropolcho regno pulsus trans mare fugisset, auxiliis maritimis comparatis reuersus, cum quæ primæ obiectæ ei fuerant ditioes, tum Kiouiam deiecto Iaropolcho occupauit, tenuitque. Ab hoc omnes deinde principes Russiæ, profecti traduntur. Nam cum duodecim filios reliquisset, diuisa inter eos omni Russiæ imperium ac domicilium imperij Kiouiam maiori natu Suentopolcho tradidit. Huic sine liberis mortuo, duo alij fratres Iaroslaus, & Isoslaus ordine in regno successerunt; Post eos Vlodimirus Monomachus Vseulodi Vlodimiriæ Ducis filius, cuius hodie adhuc magnum apud Russos nomen est, ex eadem stirpe potitus imperio fuit. quod interpellatum quidem interim ab Vseulodo Suentoslai ex Olgo nepote, & Igoro pronepote qui auitum regnum recuperare conatus fuerat, penes Vlodimiri posteritatem nihilo minus remansit; sequentibusque temporibus Andreas Dux Susdaliensis ab eadem Vlodimiri stirpe profectus, foedere cum vndecim alijs cognatis Ducibus inito, deiecto Micislao, qui ex Monomachi posteris regnum Kiouia tenebat, Micislaum filium ei imposuit. hic primus sedem imperij Volodimiriam, principatumque in Susdaliensium domum transtulit, quem qui tenebat, et si

etsi imperiū in reliquos agnatos Duces non habebat; magni tamen Ducis nomine utebatur, dignitateque ac honore cæteris, qui comiter quasi maiestatem eius colebant, antecedebat. cumq; honor is antea vel successione, vel reliquorum omnium studijs vni deferretur, nonnunquam vi ac armis occuparetur; posteaquam in Tartari potestatem concesserunt, ab eo peti coepit. Imperij autem Tartarici circa annum ab orbe condito VI. M. DCC. XXXII. quemadmodum Russi annos numerant, à nato autem Christo ducentesimo vicesimo quarto, supra millesimum in annalibus eorum mentio fit. quo Tartari contra Cottianem Ducem Poloufciorum cum exercitu progressi, Russiam vastarunt. cumq; Cottian Micislaum Romani filium Ducem Siernouienssem seu Kiouienssem: utroq; enim nomine in annalibus appellatur: qui filiam eius in matrimonio habebat, & complures alios Russicos Duces in auxilium euocasset, die xvij. Mensis Iulij ad Kalkam magno prælio eos Tartari superarunt: vndecim Russicos Duces: Heroes, ut annales appellant, equitum forte genus quoddam, ad septuaginta interfecerunt: multos captos egerunt. Reuersi deinde Batti duce tredecimo anno post quadragesimo quinto nimirum supra VI. M. DCC. subiugatis primum Rosanensibus & Vlodimiriensibus, cæterisq; ferè omnibus Ducibus, vniuersam Russiam sibi subiecerunt: & quamuis non raro deinceps quoq; bello cum iis Russi contenderent; tributariam tamen semper ferè inde habuerunt. Ab eo igitur tempore magni etiam Duces à Tartaris Russiæ dari coeperunt. Dabantur autem ferè quemadmodum ostēdimus è Susdaliensibus. Moscorum Ducum, atq; ipsius adeò ciuitatis æqualis temporum Batti ac vastationis, quæ ab illo Russiæ illata est, memoria in annalibus eorum extat. Inter alias enim vrbes Moscouiam quoque

que à Batti expugnatam, ibidemq; Philippum quendam Palatinum & Vlodimirum Georgij magni Ducis filium captum à Tartaris tradunt. Anno ab orbe condito XII. S. VI. M. DCCC. Andrea Alexandri filio magno Duce mortuo inter Michaëlem Iaroslai filium Tuerensem, & Georgium Danielis filium Moscouiæ Ducem, de principatu magnoq; Vlodimiræ Ducatu contentio fuit: quem cum vterq; à Tartaro peteret, Tartarus primò Michaëlem retento penes se Georgio, inde aliquo tempore interiecto xxv. anno supra VI. M. DCCC. Georgium regno confirmavit: indeq; ad hoc vsq; tempus, quamvis aliquando Russi vniuersi Susdaliensem iterum dari sibi à Tartaro peterent, perpetuò tamen in Moscouiæ Ducum familia honor is permansit. ex quibus cum proauus huius, qui nunc rerum potitur, Basilus Basilij filius post patrem & patrum Constantinum imperasset, conspiratione à Demetrio Georgij filio cognomento Siemacha Duce Seueriensi, Ioanne Andreae filio Mosaiscense, Borisso Alexandri filio Tuerense Ducibus contra eum facta, regno ab iis exutus, luminibusq; à Georgio Seueriense orbatus fuit: verum à Nouogardiensibus adiutus regnum recuperavit, pacatèq; deinde id obtinuit. Successit huic Ioannes filius; qui primus eam ad quam nunc excreuerunt, potentiam fundauit. Ducem Tuerensem, quamvis vxorem ex ea domo haberet, regno pepulit, principatumq; obtinuit; haud multò post & Nouogardia magna per fraudem capta, in seruitutem eam redegit, & alios principatus tentare coepit; eoq; potentiæ peruenit; vt cæteris ducibus metu concedentibus, nemo qui cupiditati eius resistere auderet, reperiretur. Idem Tartarorum iugum primus excussit, coniugis Sophiæ Græcæ è Palæologorum genere, quam mortua Tuerense super induxerat, ingentis spiritus mulieris vocibus impulsus,

pulsus. Haud dissimili deinde ratione filius eius Basilius potentiam, cuius pater fundamenta iecerat, in immensum ferè auxit. Ad ea quæ pater pepererat, Smolenscen. Ducatum maximum, ac quicquid Seueriensis ditionis reliquum erat, adiecit: Kasanos mari & terra tentauit; principes omnes agnatos ditionibus suis exutos, tum Plescouiensē ciuitatem maximam in seruitutem redegit. Successit ei in imperio hic, qui nunc rerum potitur; Ioannes. qui & ipse regnum amplissimum à patre acceptum, fortuna ac industria adiutus multò id fecit amplius. Kasanenſe & Astrakanenſe regna à patre summis viribus oppugnata cuniculorum et puluerum maximè, quos cuniculis in urbium oppugnationibus subiecerat, nouo ijs temporibus apud illas gentes artificio adiutus, in ditionem redegit: mariq. omni Caspio vnà cum ijs in potestatem accepto, ad Persidem ferè imperium protulit: Liouonię maximam partem per dissensiones Liouonum occupauit: Suecos multis sepè cladibus affecit: Polotiam temporibus Sigismundi Augusti cepit; cumq. Selymus Turcarum imperator Tanaim flumen cum Rha flumine maximo, quem Rusſi Volgam sua lingua hodie appellant coniungere statuiſſet, vt classe ex Ponto Euxino aduerso Tanai in Rha inuectus, Astrakanum in ostio fluminis Rha, quo in mare Caspium influit, situm, ac per id vniuersum mare Caspium potestatis suæ faceret, Turcæ quoque victi fama ei quæſita fuit. Nam cum Selymus à Sigismundo Augusto per Ibraimum Chauſium, qui ex nobili Strassorum familia in Polonia natus, à pueritia impietate Turcica imbutus, ac maximis deinde præmijs ob ingenij elegantiam affectus fuerat, per ditiones eius transitum exercitui postulasset, is verò à Sigismundo Augusto negatus ei fuisset, Selymus nihilominus per Tartariam ad perfodiendum spaciū Isthmi, quod inter duo hæc flumina angustis-

C

simum

finum est, iamq. Moscouitico solo continetur, exerci-
 tum misit. qui cum per vastissimas solitudines iuisset,
 Tartaris ipsis inuitis negotium administrantibus, ac
 ante viarum incommodis attritus Moscis obiectus fu-
 isset, nullo operæ precio perfecto discedere coactus fu-
 it. Ita repente collecta potentia non finitimis modò
 omnibus, sed remotioribus etiam quibusq. nationibus
 terrori Moscus iam erat; eoq. fastus in tanta finium, ac
 rerum gestarum amplitudine processerat, vt omnes a-
 lios principes præ se contemneret; nullamq. gentem
 esse existimaret, quæ opibus ac potentia contendere
 secum posset. Cum ante hac Knesiorum, Ducum scili-
 cet nomine, magni cognomento, quo eos, qui ipsis pa-
 rebant, præirent addito, vsi essent; Pater huius Basilus
 repetito ex interpretibus Slaucis sacrarum literarum
 nomine, primus Ciarium, quod Regem eorum lingua
 significat, appellari se voluit: eoq. à Maximiliano eius
 nominis primo Imperatore appellatum se iactabat.
 Ad religionem Christianam à Basilio quodam Archi-
 episcopo Constantinopolitano nomen Russicum per-
 ductum, sacrisq. Christianorum initiatum ipsorum an-
 nales, ac Byzantinâ etiam historia habet. Ita q. vt pri-
 mo religionis authore Græco, ac frequentibus deinde
 inter Græcos & Russos per Mæsiâ ac Illyrium, quæ à
 Slauonicis eiusdemque linguæ gentibus tenebantur,
 tum Kiouiam, quæ per Borystenem cum Ponto Euxi-
 no coniungitur, commercijs, cum literas Græcas tum
 ritus à Romanæ ecclesiæ institutis diuersos magna ex
 parte retinent; vt non pauca tamen ex illis ipsis cum
 tempus, tum Metropolitaram ac aliorum Episcoporum
 principi suo obsequendi studium deprauarit. Leges
 quibus vtantur, paucas admodum habent: eamq. ferè
 solam, vt principis voluntatem pro lege obseruent. De
 eo ita illis persuasum est, Metropolitæ maximè opinio-
 nem

nem hanc eorum iuuantibus, per principem tamquam interpretem Deum secum coniungi: ac prout de Deo meriti sint, ita principem vel benignum in se vel asperum esse. Ita q. voluntati eius non secus ac diuinæ, seu turpia seu honesta, seu mala, seu bona iubeat omnibus in rebus parendum pro fidei decreto habent: ille q. vitæ ac necis omnium q. rerum summam in suos potestatem obtinet. Quod vt ad potentiam comparandam conficienda q. bella maximum habet momentum: vnum omnibus rebus summa cum authoritate præesse: omnia imperia solum administrare: eundem & consiliorum dominum, & rerum omnium authorem esse: exiguo temporis spatio copias quàm maximas cogere posse: fortunis ciuium ad potentiam suam stabilendam pro suis vti: & quemadmodum iis rebus maximè authoritas ac opes Mosci creuerunt, ita crudelitas quoque eius ac dominandi asperitas vehementer confirmata est. Ita q. cum infinitos penè variis cædibus sustulit: tum maximè Andream fratrem patruelem, ob nouarum rerum suspiciones quasdam cum liberis omnibus ac vniuersa familia, vna sola filiola quam Duci Magno deinde locauit, relicta exquisitissimis cruciatibus necauit: nobilitatem Nouogardiensem amplissimam, quam fratris rebus studuisse suspicatus fuerat, funditus penè excidit: popularium quacumque incederet sæpè magnam stragem fecit; cum vt turbæ hominum miserorum gratiam ac misericordiam eius implorantes illi sese obtulissent, à satellitibus minutim eos concidi, vel maximo numero sub glaciem, qua magnam partem anni lacus ac flumina consistunt, mergi iuberet. de quo cogitanti eò magis mirum videri necesse est, quomodo quæ à cæteris principibus indulgentia ac obsequio in suos vix parari soleant, in tanta nihilominus immanitate singularis erga cum

populorum charitas atque incredibilis, quæ eorundem in principes suos est fides, existere possint; ac non modò seditiosè nihil ferè cōtra eum ab iis suscipi, sed & in præfidiis tuendis incredibilem constantiam præstari: paucosq; omninò ab eo transfugere: non raros autem repertos hoc ipso bello, qui vel maximis præmiis propositis fidem tamen erga principem vel cum periculo suo iis anteposuerint. Huius rei cum aliæ non nullæ causæ sunt, tum maximè præter eam, de qua supra dictū est, duplex religionis opinio. Nam & omnes, qui in religione ab iis dissentiunt, etiam eos, qui Romanæ ecclesiæ ritu utuntur, barbarorum loco habent, ac tamquam pestem aliquam detestantur, nihilq; omninò cum iis commune habere fas ducunt. ex qua existimatione illud quoq; profectum est, ut Princeps quoties externos legatos audit, in pelui aquam admotam habeat, qua manus quasi illorum contagio pollutas subito abluat. Et suæ religionis institutis eandem, quam Deo, principi suo fidem se debere edocti, nō minùs vel constantiam eorum laudant, vel relictis corporibus animos in cœlum protinus emigrare, ac cœlesti beatitudine frui prædicant, qui fidem erga principem suum ad extremum usq; spiritum retinuerint, quàm qui ex discipulis seruatoris nostri in singulari erga illum pietate atque fide ad mortem usq; perstiterunt. Superstitionem alunt imperio suo principes; dum ad nullas exterarum nationes, nisi si quos in legatione atq; ita quidem mittant, ut singulis legatis singulos custodes ponant, nec cuiquam remoto custode cum aliquo colloqui liceat, quemquam commeari: aut externos etiam promiscuè commercia cum suis agitare patiuntur. Ita fit, ut quasi perpetuis ignorationis tenebris oppressi aliarum gentium humanitate non perspecta nec percepta omninò dulcedine libertatis, præsentia melioribus, cognita dubiis an-

biis anteponant. Accedit ad hæc metus amorq; ac cura cuiusq; suorum, quæ magnos etiam animos, libertatiq; assuetos facile debilitant. Quos enim exercitibus aut præsidijs præficit, aut vlli omnino muneri adhibet, eorum coniuges, liberos, propinquos, & quæ charissima quisq; habet, obsidum loco semper retinet: in eosque omnia cruciatus exempla edit, si quis illorum ab eo desciverit, aut si qua res non ad nutum, aut voluntatem eius facta sit. De rebus tamen creditis, contractibus, alijsue priuatis rebus pauca quædam apud ipsos iura scripta sunt. Poenarum tria omnino genera ijs nota sunt. Mortis, cuius infinita foedaque genera: multarum & fustium; quæ tamen in immensa principis potestate, non minus frequenter, quemadmodum dictum est, pro libitu eius, quam pro merito plerisque irrogantur: carcerem ad custodiam magis quam poenam habent: exilia planè ijs ignota sunt. senatum, cum pro libidine omnia administret, in speciem magis habet. Magnam is partem ex Knesijs constat; quo nomine Duces, ut ostensum est appellant, primæuorum Ducum à Moscouiæ principibus oppressorum posteritatem, aut quos princeps pro cuiusq; meritis, aut sua in quenq; gratia in nomen vel ordinem cum legit. Nobiliores cum alijs insignibus à vulgo distinguuntur, tum quod patris nomen titulis alijs ad exemplum Principis soli præscribant. magnificum hoc apud illos, eoq; ad æquales, aut inferiores solum vtuntur: ad principem non modò patris nomine vsurpando abstinere, sed ne suum quidem nisi propria linguæ eius enunciatione quodammodo corruptum, quo non modò seruos eius sed quasi homunciones non homines cum illo comparatos se significant, ponunt. in exercitu paruum tympanum ad ephippia singuli item suspensum gerunt; quo quoties agmen sisti vsus est, à primo impulso, sonoque

noq. à proximis excepto & cæteris deinceps tradito, exiguo temporis momento totus exercitus consistit. Metropolitæ senatum non ingreditur: consilio tamen eius quoq; nonnunquam utitur; aut quo maiorem sibi apud populares venerationem conciliet, uti saltem se simulat. Militiam more cæterarum gentium ex equitatu & peditatu compositam habet; equitibus tamen Tartaris Nohaiensibus maximè utitur. Nulli sanè rei magis quàm munitionibus fidit. Itaq; & opportunissimis locis intra lacuum aut fluminum ambitus pleraq; fitas habet; præfidiisq;, apparatu, commeatuq; & omnibus rebus necessariis diligentius ferè quàm quisquam alius princeps eas instruit. Ei rei iam ab eo tempore studere cœpisse videntur, quo humilibus adhuc rebus eorum non multum viribus contra potentiores vicinos poterant: sed locorum ut plurimum oportunitatibus sese tuebantur; iisdemque intercipiendis crescebant: postea quòd semper, quoties prælio cum vicinis maximeq; Polonis decertassent, inferiores suos discedere animadverterent, nec multum in prælio virtuti suorum credere se posse re ipsa edocti essent, necessariò retinuisse. Castella ferè omnia, ut in magna lignationum copia ex materia multis ingentibusq; trabibus congestis exstructa apud ipsos sunt: quæ eadem cespite nonnunquam vestire: omnia autem crebris propugnaculis ac turribus distinguere, fossis præterea, quibus nativæ defunt, manufactis, valloq; ac ceruis circumdare solent. quæ res efficit, ut non solum opus ad speciem inelegans non sit, sed ante hoc bellum, quo pleraq; candentium globorum incendiis à Rege expugnata fuerunt, ad defensionem etiam tutius, maioremq; quàm lapis oportunitatem habere crederetur; quòd tormentorum ictibus facilius & resistat materia, et si quando iis pateat, non tamen, quod in saxo accidere solet, magnam muri stragem secum ferat.

rat. quæ tamen ad Liuoniam pertinent, ex lapide etiam
muros habent. Præsidia nobilitati singulis annis pro ar-
bitrio indicit. Ex ea descriptos perq; munitiones distri-
buit non longius anno in vno præsidio continet. Ad-
iungit his pixidarios ex plebe stipendiarium militem.
Præfecturæ item annuæ sunt. Præfectos ternos plerunq;
designat, primum qui præcipuam curam munitionum
gerat; cuiq; nullum omnino in casum extra munitio-
nem egredi, ne dum pernoctare licet: reliquos duos pri-
mo custodes ponit. quorum alteri, si id vsus postulet, in
eamq; rem mandata à principe habeant, excursiones fa-
cere, munitionesq; excedere permissum. Eos sua lingua
ad Polonicorum Palatinorum exemplum, quamuis nec
perpetuus is honor sit, & vnus saltem castri imperio, eo-
que inter plures communicato terminetur, Voiuodas
tamen quasi belli Duces appellant. Aurum, argentum,
cæteraq; metalla naturæ an quærendarum rerum e-
arum inscitia illorum iis negarit, non facile affirmari-
vtuntur sanè omnibus hisce importatis. è Perside seri-
cum, vestem pictam, gemmas, vnionesq; habent: cum
Germania aliisque remotioribus occidentis oris arma,
tormenta, puluerem tormentarium, argentum etiam
atq; aurum suis mercibus, pellibus pretiosis, quibus ma-
ximè abundant, lino præterea, cera & corio magnam
partem permutant. eius negociationis Naruam, postea
quàm in potestatem eius peruenerat, posterioribus tem-
poribus sedem Moscus constituerat. Angli etiam Nor-
uegiam, Lappiamq; ac totum quasi septentrionem cir-
cumuecti per mare glaciale viam sibi patefecerunt, qua
Voloda fluuius ex penitiori Moscouia se effundens, por-
tum D. Nicolai eo in mari efficit. In moribus gentis
præter fidem in principem, laborum inediæ cæterorum-
que in commodorum, quorum est tolerantissima, pati-
entiam, mortisq; ipsius contemptum probes. homines

cæteroquin in libidinem proni sunt, nec foeminarum solum amoribus dediti, quam ob causam & impuberes ferè matrimonia contrahunt, sed & puerorum: ingenio fallaci, adq; dolos ac fraudem praua consuetudine verutissimo: non minùs fortassis ad bonas artes prompto futuro, si qui iis imbuat, extiterit. Rex Varfauia digressus ad Russicas res componendas Leopolim contendit. Antequam discederet Krakouiensis, Sandomiriensis & Siradiensis Palatinatum, quos in sciscendo tributo à reliquorum omnium consensu se sciunxisse suprà ostendimus, conuentus edixerat. In itinere cognoscit Siradiensem Palatinatum mox assensum: reliquos duos in recusando tributo perstare. Subsistit hanc ob causam Sandomiriæ: eoq; minoris Poloniae senatores omnes euocat. Ex horum sententia Palatinatum eorundem denuò communem conuentum Korcini habet. Assensi hic tandem & ij fuerunt, remittente Rege de tributo cereuissiali, vt vbi duodevigesima à regis, & ecclesiasticis, vicesima quarta à nobilitatis subditis exigeretur. Leopoli Tartaricas legationes Rex audiit: ad eas rogatu Tartari Turcarum Imperator suum legatum adiunxerat. Facta cum Tartaro pax fuit ijs conditionibus, quibus sub prioribus regibus eam habuisset. attulerat literas à principe suo scriptas, in quas pacem postulabat: in ijs de finibus non nihil adiecerat, & de Nisouijs accuratius sibi cauerat. Rex non receptis literis, ijsdem quibus maiores sui legibus eam coluissent, se quoque pacem cum eo obseruaturum, donatiuaq; ab illis dari solita daturum verbo respondit. Ita per totum Moscouitici belli tempus pax à Tartaro fuit. Ne verò à Nisouijs quoq; per absentiam suam quid turbaretur, exemplo & metu continendos existimans de Podkoua capitis suplicium sumit: Amurathe Turcarum Imperatore vt sibi dederetur, per legatos deposcente. Illud autem

tem vt faceret, eò grauiores causas habere se videbat, quòd Kosakki prioris expeditionis successu nondum ab instituto deiecti, eiusdem Podkouæ minori natu fratre Alexandro in Valachiam reducto Petrum Palatinum denuò non sine proprio periculo deturbârant. Alexander enim cùm viuus in hostium potestatem venisset, palo suffixus: Nisouiorum pars à Turcis intercepta Constantinopolim in catenis missa fuit. Idem tamen Petro quoque tamquam per ignauia ac socordiam toties deiecto calamitosum postea fuit. Etenim sublato è medio Mahomete Bassa, qui principem inter purpuratos locum tenuerat, Achmetis, qui in eius locum successit, studio de principatu amotus, inq; eius locum Iancola quidam è Saxonib. Transiluanicis oriundus; sed qui non modò nationem Valachicam, verùm genus etiam principum Valachiae eumentitus fuerat, provinciae impositus deinde fuit. Compositis hunc in modum reb. Russiae, Cracouiam Rex proficiscitur. Venit eòdem Moscouitica legatio. eius ætate atq; dignitate princeps in itinere morbo extinctus fuerat. Reliqui, missis obuiam qui exciperent, ex more in urbem atq; hospitium, indè ad Regem deducti, verbum se facturos negarunt, nisi prius Rex aperto capite assurgens de valetudine & statu principis sui percontatus se esset. Rex cùm præter rei indignitatem non committendum sibi arbitraretur, vt ad hostis barbaro fastu elati, & qui tantos iam spiritus atq; arrogantiam sibi sumpsisset, vt vix ferri posset, superbiam obsequio aliquo suo quid adderet: illi verò in sententia perstarent, ac potius infecta re discessuros se confirmarent; permisit vt inauditi in hospitium, indè in Lituaniam lentis agminibus se reciperent. Animaduersum indè fuit, tributum quod in Comitibus Varfauiensibus sancitum fuerat, non modò prædicatione nonnullorum inferius, sed ipsi bello in cuius

vsus

usus ab ordinibus deputatum fuerat, par non fore. Rex quòd nec comitia eo tempore habenda sibi censeret, ne si nihil rerum gessisset, inani belli simulatione pecuniæ quàm maximæ cogendæ rationes quærere à nonnullis iactaretur; nec priuatos nobilitatis conuentus cogendos; ne illud toties præter instituta maiorum usurpari à se nobilitas queri posset; cùm iudicia tùm à nobilitate obirentur, per eos interim conuentus, quid de tributo illo polliceri sibi posset, necessariò nobilitati proponendum existimabat; quòd non deessent, qui magnitudinem tributi eius in immensum oratione augerent. Indè ad omnes. vicinos principes legatos designat; qui & amicorum erga se beneuolentiam magis, firmissq. sibi adiungerent, vel maleuolorum consilia distinerent. Præcipuè cum Augusto Saxoniae ac Ioanne Friderico Brandeburgensi principibus Electoribus consilia belli communicat. Hi indignè ferentes barbara crudelitate tandiu in nomen Germanicum à Mosco fauiri, ad bellum pro Liunionibus suscipiendum, quibus illi tanto terrarum interuallo ab illis oris disiuncti minus adesse possent, amicè eum hortabantur. à Brandeburgensi bellica etiam tormenta quædam dono ei missa fuerunt. Ad Turcam ubi legati venissent, Mahometes prudentissimus trium orientis Imperatorum consiliarius, & in Regem haud malè animatus, cùm de instituto Regis intellexisset, fauere se conatib. eius dixit, faustaq. ac felicia ei precari: magnam tamen rem suscipi; magnas vires esse Moscouiticas: neq. secundum suum principem vllum in orbe terrarum potentiorẽ eo principem se existimare. Dimissis legatis ad domesticarum rerum curam Rex conuersus fuit. Instituti regni non posse prorex creari dicebatur: itaque si quid per suam absentiam in hostico accidisset, cum primoribus è senatu se communicaturum pronunciauit. pacem publicam

eam seuerè sanxit; maximè Kracouiæ; ne quod alijs temporibus acciderat, inter dissentientes de religione tumultus aliquis oriretur. Edixit si quis in vrbe opido-ue insolentiùs quid fecisset, præsertim si dubitationem iuris cognitio habitura esset, ad suum aduentum in custodia haberetur: cum aliàs ordinaria iuris publici ratione in recentibus criminibus vis vnà cum præfectis, magistratus vrbanus cognoscere, interq; eos si non conueniat, Rex consuli soleat. Dum Kracouiæ Rex est, nunci-
us partæ à nostris ad Vendam victoriæ allatus tanquam totius belli omen secum attulit. Obsederant eam denuò, quemadmodum suprà demonstraui-
mus, Mosci longè maioribus quàm antea copiis & quatuor præcipuæ authoritatis Palatinis, Petro Tatouo, Basilio Voroncio, Petro Chorossino, Andrea Scholkanouo ad eam missis. Dum per aliquot dies frustra urbem oppugnant, nostris sui colligendi, & cum Sueciæ militiæ præfecto Georgio Boiie consilia communicandi spatium dederunt. Confluunt Stropam, vbi Buringius tum erat, Andreas Sapieha earum, quæ tum in Liuania erant, copiarum legatus, Matthias Dembinus; ex Liuonibus præter Buringium, Nicolaus Korffius, Platerus, ac alij nonnulli cum equitum aliquot manu. iis ad Gouiam flumen medio inter Volmariam & Vendam loco Suecicæ copiæ se adiungunt. Indè digressi hostem instructa acie sub signis ad Vendam expectantem adoriuntur. Cum accerrimè à nostris pugnaretur, Polonis, Lituanis, ac Suecis ad vlciscendas hostis iniurias; Liuonibus ad libertatem: omnibus ad laudem & gloriam inter se cohortantibus, hostium equitatus pellitur, Tartaris maximè in fugam effusis. sub noctem Palatini militem ex fuga colligere; castrisq; continere coeperunt: hortari-
que vt pro inueterata gentis gloria, & ratione sacramenti militaris extremam potius fortunam experirentur,

tur, quàm castra apparatusq; bellicum à principe suo fidei eorum commissum defererent; verùm augente periculo ac nocte metum, eademq; pudorem ac flagitium tegente, ob eaq; non patiente se contineri multitudine, Palatini duo Petrus Chorossinus & Andreas Scholkanous, qui equitibus præerant, vnà cum equitatu in fugam se eiecerunt: reliqui duo, quibus tormenta commissa fuerant, soli ferè in castris relictis insigniora tormenta bellica amplexi, vt castra & instrumentum militare, fidemq; erga principem suum ad extremum spiritum retenta à se testarentur: itaq; à nostris postridie summo mane castra ac munitiones irrumpentibus inuenti, viui in potestatem cum castris munitionibusq; ac tormentis ad triginta deuenerunt. Aliud documentum fidei non minus insigne, qui onerandis tormentis præerant, pixidarij dederunt. Apud Moscos hæc administrandorum tormentorum ratio est, tormenta terra defodiunt, ante ea atq; os adeò tubi iustæ altitudinis fossam ducunt, in hac qui onerandorum curam habent, delitescunt: ad os tubi funis aptatur: hoc cum implenda sunt in fossam deprimuntur, cum exoneranda rursum laxantur. Erant tormenta maxime insignia vnum lupi: alterum accipitris: virginum duo: totidem falconum imaginibus atque nomine: quædam præterea Sueco adempta cum eiusdem insignibus. Horum qui administrationi præerant, cum plerisque suis interfectis, cæteris dilapsis nostros tantum non castrorum potitos viderent, cum spe tuendorum tormentorum vitæ simul amore abiecto, collo funibus, quos à summitate tuborum dependere ostendimus, inserto, vtrò mortem sibi consciuerant. Insignis ea victoria fuit: hostium multi cæsi, capti non pauci fuerunt, exigua omnino nostrorum iactura. Tormentis, quæ diximus, amissis, iisdem insignibus & nominibus alia & complu-

complura præterea conflare mox Moscusc iussit; ad potentiam suam ostendendam pertinere existimans, nihil à fortuna ademptum sibi videri, quod non breui à facultatibus suis insigni cum accessione expleri posset. sub idem tempus Reualienfes opem ac misericordiam Regis implorantes, vt aliquo numero frumenti se iuua-
ret, à Rege petierunt: in maximas angustias tot anno-
rum bello ab hoste redactos: commercijs ferè omni-
bus exclusos: intra mœnia compulso ab agricultura
longo iam tempore se prohiberi. His centum frumen-
ti onera donat. Priusquam Cracouia Rex discederet de
Duce exercitui præficiendo cum senatoribus delibe-
rat, qui cum ostenderent, vel in perpetuum munus hoc
alicui eum deferre posse, vel extra ordinem vnum aut
plura bella mandare; plerisque tamen, vt in id saltem
bellum aliquem legeret, placeret, Cracouia Varfauiam
discedens Nicolaum Milecium Palatinum Podoliæ, eò
ad se euocat. Hic cum paulò ante excessum Sigismun-
di Augusti Bochdanum in Valachiam reduceret, ac præ-
ter opinionem à Valachorum Turcarumque maximis
copijs circumuentus fuisset, exercitum magna cum lau-
de incolumem in Poloniam reduxerat, indeq; magnam
virtutis & scientiæ rei militaris gloriam sibi pararat. Mi-
lecius valetudine, qua tenui vteretur, & alijs quibus-
dam difficultatibus se excusabat: tandem in eam sal-
tem expeditionem imperium accepit. Itaq; constituto
cum eo, quos quotque turmarum præfectos ac centu-
riones scribi vellet, domum vt se pararet, Rex eum dimi-
sit. Indè Grodnam mouit. maxima autem afficiebatur
Rex difficultate, quòd & pro magnitudine suscepti bel-
li pauca omninò pecuniæ ex tributo collectæ adhuc
erant, & vt maximè integræ conferrentur, minimè ta-
men tanto bello pares fore videbat. lis omnibus rebus
quanto potest studio occurrit: pecunias partim mutuo
D sumit

sumit, partim quas in fisco habebat priuatim suas, exponit. Militem passim per Poloniam scribi iubet: mittit ad fratrem Christophorum Principem Transilvanię, vt Vngarorum veteranorum cohortes aliquot & alas equitum scribat. Christophoro Rosdrafeuiro & Ernesto Veiero in Germania militis conquirendi negotium dat. Lituanici proceres, cum de difficultatibus ijs cum illis communicaret, prout quisq; opibus maximè valebat, voluntarium militem offerebant; quotq; singuli adducturi essent, edebant. quorum numerus cum ad decem millium ferè accederet, non parum ea re, atq; alacritate Lituanorum recreatus, eò maiori animo ad reliquas res administrandas aggressus fuit: constitutisq; ita pro tempore rebus ijs Vilnam accessit. Palatinus Vilnensis, Nicolaus Radiuilus, cui imperium militare in Lituania à Rege traditum antea fuerat, postea etiam abdicata à Ioanne Chodkeuicio Leopoli administratione Liuonię, eiusdem prouincię cura ad tempus demandata, Christophoro filio pocillatori regio, & aulicę militię per Lituaniam præfecto exercitum, qui in Liuonia fuerat, tradiderat. Is cum ad Derpatum excursionem facta, agrumq; hostium longè lateq; populatus, Kirempesium per excursionem cepisset, euertissetque, sub hoc tempus ad Regem & patrem Vilnam venit: venientem exercitus emerita stipendia flagitans sequutus fuit. Ibidem alia, quę vsui bello essent, apparare Rex instituit: tormenta bellica ad modum quendam, quem ipse vsu atq; experientia accommodatissimum cognouerat, fundi iussit. Kaunę pontem fieri imperat, quo in sequentibus expeditionibus vtatur. Is ex singulis nauibus componebatur; quę deinde tabulatis ita inter se coniungebantur, vt quoties opus esset, separari, curribusq; singulis vnà cum tabulatis impositę, binis iumentorum iugis non incommodè in quemcunque locum trans-

transferri possent. simul quod neq; copiae omnes conuenissent, nec frigora, quae in regione Trionibus exposita eo anno ultra solitum ad Ioannis permanferant, vt nec vllae herbae ad id tempus se effunderent, recessissent, Lituanicis causis, quae in longiorem iam diem prolatae erant, cognoscendis operam dedit. Inde Basilium Lopatinscium cum literis ad Moscum mittit: ijs iustum bellum illi indicit: causas belli hasce denunciat; quod ostentatione pacis prouinciam Liunioniam bello ac incendio vastasset: legatos suos contumeliose habitos, ad extremum duplicibus induciarum literis elussisset: eodem tempore nouis in Liunioniam copijs missis Vendam oppugnasset: sua legatione ad priores iniurias nouam contumeliam ac ludibrium adiunxisset. Remisit sub idem tempus Moscus Haraburdam, quem haectenus retinuerat, nullo alio responso, quam quod paulo post suum hominem ad Regem missurus esset, qui ijs de rebus ageret. Itaque sequutus eum mox cum literis quidam fuit. Postulabat hic, vt inducias, quae ante perscriptae essent, Rex obseruaret: de Liunia si quid controuersiae superesset, de ea amicè per arbitratore, quos vtrinque nominassent, secum conueniret. Negabat Rex, quemadmodum iam ante fecerat, posse se huiusmodi inducias vlla ratione admittere. Nam de Liunia quod adjiceretur, amicè de ea inter ipsos disceptari posse, frustra & ridiculè adjici: semel enim receptis iuramentoque firmatis inducijs, in quib. omni Liunionie iure cederet, nihilque amplius petiturum se eius profiteretur, si postmodum de ea ageret, cui dubium esse posset, contra proprium iuramentum se venturum: & vel eam ipsam ob rem causa cadere debere. Quod si in Lituania Russiaque pacem sibi cum Rege esse vellet: in Liunia armis de iure disceptari: nouam quidem hanc induciarum rationem sibi videri: ac etsi intelligeret temporibus Sigismundi

Augusti atq; interregnorum obtrusas aliquando huius
 modi ab eo inducias fuisse; se tamen cum faciendæ no-
 uæ sibi sint non nisi iustas facere velle: neminem tam
 barbarum aut imperitum rerum esse, qui non videat, si
 constitutis melius rebus suis per Liuoniam, in Lituania
 bellū redintegrare velit, per huiusmodi inducias, quan-
 docunq; illi integrum id futurum, quibus de cessione
 Liuoniæ conditionem adiecisset; qua bello in Liuonia
 gerendo à Rege violata, nunquam illi belli in Lituania
 instaurandi causa deesse posset. Nuncio hoc dimisso
 Tartari postulata cognita fuerunt. Hic sub idem tem-
 pus ad Regem legatos miserat, quòd bellum contra
 Moscum suscipi intellexisset, ex foedere, quo Regibus
 Poloniæ operam suam contra quosvis hostes, vnico
 Turcarum imperatore excepto nauare tenetur, ab alte-
 ra parte irruptionem in Moscouiam facturum se osten-
 debat: petebat donatiua: Nisouiorum iniurias coërce-
 ri postulabat. Responsum huic fuit, quòd operam su-
 am contra Moscum polliceretur, facere eum officium
 suum: donatiuum datum iri: Dantur autem aliquot
 aureorum millia & certus vestimentorum numerus:
 Nisouios colluuiem ex varijs nationibus collectam nec
 in potestate Regis esse: atque ex ipsis Tartaris & Turcis
 non raros sese illis aggregare: datum nihilominus ope-
 ram iri, quantum eius fieri possit, vt iniuriæ illorum pro-
 hibeantur. à bello tamen cōtra Moscum contrā quam
 promiserat omninò abfuit, alio contra Persam, quod à
 Turcarum imperatore tum gerebatur, auocatus. Ade-
 rat & Gottardus Churlandiæ & Semigalliæ Dux, confir-
 mationemque feudi sui & inuestituram petebat. Eum
 Rex Disne sistere se iussit, interim ad senatum ea de re
 retulit. Exercitus indè vt sub principiū mensis Iulij Sui-
 rum conueniret edixit. Venerat iam Vilnam Vngari-
 cus peditatus Christophori Transiluaniae Principis Re-
 gis fra-

gis fratris missu: eiusdemq; delectus iusta equitum ala: Polonicum militem Milecius, qui & ipse sub idem tempus ad Regem redierat, cum segnius à quæstoribus ac exactoribus expedita re pecuniaria, ob auctoramenta tardiùs accepta moræ nonnihil à milite interponeretur, vt quàmprimùm ad edictum conueniret, acriter urgebat.

R. HEIDENSTEINII
SEC. REGII DE BELLO
MOSCOVITICO

Commentariorum

LIBER SECUNDVS.



VILNA PRIDIE CALENDAS Iulij Rex profectus Suirum inde venit. Ibi Lituanici equitatus partem vidit; qui cum vniuersus omnibus rebus esset ornatissimus, tum maxime, qui à gente Radiuila, & Ioanne Kiska structore regio adducebatur. Ibidem de summa belli constituendum ratus, quas potissimum partes cum exercitu peteret, ad consilium retulit. Litواني omnes ferè Pleiscouiam per Liunioniam eundum arbitrabantur; quòd & propter vrbis amplitudinem atq; nomen dignam iudicarent, quæ etiam maximo cum labore, ac periculo peteretur: & quòd minùs contra vim munita putaretur: muri vetustate neglecti: nihil vt loco tutissimo ac à metu belli remoto in ea prouisum, non magno labore ac periculo potiturum ea Regem sperarent. Rex con-

trà existimabat. Nam cum vnum id potissimum bello hoc agendum sibi proposuisset, vt Liunioniam ab hoste in libertatem vindicaret; intelligebat, si in terram Liunioniam bellum transtulisset, præterquam quod in regione crebris urbibus & castellis munita, eademq; tot annos vastata propter comineatus inopiam ac frequentes obsidiones, difficiliores tardioresq; progressus belli futuri essent, non modò prouinciam, cuius liberandæ causa bellum suscepisset, hosti ac suis denuò vastandam se obiecturum: verum Lituaniam etiam, quæ ad Borystenem pertinet, in ea loca omni vi belli conuersa, præsidio nudatam hostilibus incursionibus interim se expositurum. Alia etiam via per hosticum Plescouiam si iret, contra rationem rei militaris iudicabat, tot hostilibus præfidiis à tergo relictis per infesta omnia atq; in uia tam longè in hosticum progredi; vbi nec si quid offensum esset, facilem receptum, nec è propinquo subsidium habiturus esset. Polotia oppugnanda vtrunq; consecuturum se præuidebat, vt, cum ea ad Dunam flumen posita esset, proximosq; ad Liunioniam & Lituaniam aditus haberet, & ordinem seriemq; rerum gerendarum secutus vltèrius deinceps in Moscouiam promotis armis ac quasi circumita Liunia, omni ab ea hoste intercluso, integra potiretur; nec simul à Lituania longius discederet; ac vtriq; tam Liunioniæ quàm Lituaniæ contra excursiones hostium præsidio esset. Accedebat huc, quod cum secundum Liunioniæ recuperationem vel maxime animo Rex agitare, vt Dunæ fluminis nauigationem, qua sola portus Rigensis continetur: quæque & ad tuendam Liunioniam excludendumque ab ea hostem magnam oportunitatem, & commerciorum negociorumq; exercendorum facultatem insignem habet, Lituanis Liunionibusq; expediret; id si Polotia potiretur, magna ex parte effecturum se videbat: ab eius præsi-

præsidio maximam partem Dunæ infestari : indè auxilia commeatusq; Kokenhausium aliaq; in Liuoniæ castella summitti : excursiones fieri : Vilnam Rigamq; mercatura prohiberi. Quod deniq; nuperrimè ab hoste Polotia capta esset, quò recentior in animis hominum cladis eius memoria obuerfaretur, eò ex commutatione rerum præsentio rem lätitiam, maioremq; gloriam recuperatæ fore. Alij Polotiensem oppugnationem difficiliorem prædicabant, quàm vt initio rerum gerendarum suscipi debere videretur : esse eam & loci natura ac opere munitissimam : commeatu, tormentis, puluere, omniq; bellico apparatu vt arcem finitimam, & quam primos belli impetus excepturam hostis non dubitasset diligentissimè prouisam : Pleseouiam nec ad resistendum vires eas habere, & quò à metu belli remotior esset, eò omnia in illa neglectiora. Multum autem in ipsis initiis momenti esse, quibus in vtranûs partem facilè homines impellantur : plurimùmque ad totius belli opinionem, & futurarum rerum spem pertinere ab initio non offendere. Rex nihil cùm existimaret esse quod non virtute superari posset; quò maiores difficultates propositas intelligebat, eò & bene gesta re ad cetera belli persequenda alacriores omnes futuros confidebat : et si quæ incidissent difficultates, longè tamen minoribus iis, omnibus à tergo pacatis, & domesticis opibus propinquis, se occursum. quibus de causis cùm prius consilium omittendum non existimaret, intelligeretque famam susceptæ expeditionis longè lateque ad diuersas nationes perlatam; exercitum præterea ex variis gentibus collectum haberet; ac verò non bellum modò, sed causam etiam belli omnibus probatam vellet, edictum, latine prius scriptum, inque Polonicam, Vngaricam & Germanicam linguas translatum, quòd ex iis ferè gentibus exercitus constabat, proponit;

quo Mosci in se iniurias, quibusq; causis permotus bellum aduersus eum susciperet commemorat. quod diuersis in locis typis deinde editum vulgo extat. Præmittere inde aliquem cum parte copiarum placuit, qui ex instituto rei militaris, quoad reliquus exercitus subsequeretur, hostem compulsum intra muros contineret, viamque reliquo agmini patefaceret: quod autem præcipua auctoritas ac vis imperij penes Polonicum Ducem in castris esset: neque dum omnes copiae Polonicae conuenissent, retento ad exercitum Milecio, Radiuillum cum filio Christophoro ac Lituanicis copiis quibusdam Polotiam præmisit. cum eodem Gasparem Bekesum cum equitatu Vngarico & cohortibus aliquot ire iussit. Suiro deinde Disnam mouit: ea agminis ratione, ut cum imminerent viæ à dextra Krasna, Susa, Turoulia hostilia præsidia ab ea parte Milecius cum exercitu Polonico: in primo agmine Ioanne Sbarasso ire iusso, tenderet: Rex læua iter faceret. In itinere aliorum Lituanorum procerum Trocensis maximè & Polotiensis Palatinorum, Castellani item Polotiensis, quorundamque priuatorum elegantissime ornatae copiae Regem asssectæ, censæ ab eo fuerunt. Fuerant per aliquot dies continuos profusæ pluuiæ: eæ tantam grauioris belli instrumenti, ac tormentorum præcipuè ducendorum difficultatem attulerant, ut iumenta quibus in propriis curribus Rex utebatur, remittere necesse haberet, quo celerius promouerentur. quæ res initio expeditionis oblata illorum, qui Pleseouiam tam longo itinere eundem censuissent, opinionem vel tacite refutabat. Disne equitem ac militem Polonicum, qui tum ferè omnis conuenerat Milecius elegantissime in speciem instructum, & in turmas cohortesque distributum sub signis decurrentem Regi ostendit. Equites thorace & galea ferrea tecti, præterq; hastam, acinace, veruto, ac binis sclo-

scloppetis ad ephippia aptis omnes armati erant; ita ut decurrentes non minorem quam ipsi pedites, quorum propria arma sclopeti sunt, fragorem ederent. Eodem quæ nondum conuenerant, Lituanicæ copię venerunt: in his Ioannis Chodkeuicij Castellani Vilnensis, qui grauiſſimo morbo tum tenebatur, quo non multis diebus poſt extinctus eſt, nongenti lectiſſimi equites: Ioannis item Chlebouicij Castellani Miſcenſis & aliorum. venit ſub idem tempus cum Chriſtophoro Roſdraſeuio; & Erneſto Veiero Germanus etiam miles; cuius & ſi publice ſcribendi facultatem non habuiſſent, ac raptim ſaltem nomina dantes quosdam adduxiſſent; erant tamen ij & animo omnibus pares: & genere armorum atque uſu rei militaris reliquis non multo inferiores. Erant omnino vniuerſæ copię cum genere & numero hominum, tum exercitatione armorum eæ, ut Milecius pro ratione ſuſcepti belli aptius ferè compositum, meliusque inſtructum exercitum cum confirmare non dubitaret, quam quenquam alium uidiſſet eorum, in quibus vel imperitandi, vel domi, ac foris parendi ſtipendia feciſſet; ac ab vna aliqua parte vel equitatu vel pediatu plerumque laboratum animaduertiſſet. Cenſis copiis Churlandiæ Duci, quem Diſnam dilatum ſuprà oſtendimus, poſſeſſio Churlandię Semigallięque; Ducatus ſolenni more confirmata, ipſeque in clientelam & fidem receptus fuit. Conſulti de eo ſenatores Litواني, quorum magna pars aderat, & qui ex Polonicis præſentes erant, omnes ut correctis conditionibus, quæ cum Sigismundo Auguſto Rege pro eius temporis ratione non ſatis commodè tractatæ exiſtimabantur, res finiretur, cenſebant. In eandem ſententiam à maioris Poloniæ, Ruſſiæ item, Pruſſiæ, ac Maſouiæ ſenatoribus abſentibus per literas reſponſum fuerat. Minoris Poloniæ ſenatores plerique, qui tum fortè Lublini iudiciorum cau-

fa conuenerant, quò deo tempore appellationum iudi-
 cia, de quibus suprà dictum est, prima tum ibi habeban-
 tur, in comitia rem differendam censuerant; veriti, vt
 videbatur, ne in Polonorum senatorū paucitate contra
 Lituanos iuri in eum Ducatum regni satis caueretur.
 sed & indignum Regi videbatur, diutius eum ducere,
 cuius post semel datam fidem nunquam dubium ani-
 mum: semper eximium studium, obseruantiamq; erga
 se perspexisset: neque principis hostibus finitimi in illo
 Liuoniæ statu ius, suumque beneficium in suspenso re-
 linquere satis tutum arbitrabatur. Itaque perfecta res
 iis potissimum conditionibus fuit, vt illo fidem obsequi-
 umque suum Regi pollicente, iusq; iurandum in verba
 Regis præstante, quo nullius alterius quam Regum Po-
 loniæ maiestatem se culturum profiteretur: Rex è con-
 trā patrocinium ac tutelam eius contra omnes illi reci-
 peret, de iurisdictione, quam in suos habet, vt ad con-
 uentum Liuoniæ, quem si reliquam Liuoniam Rex ad-
 iungeret, instituturus in ea esset, prouocatio ab eo esset,
 cautum fuit. Tendenti ad castra Milecius obuiam mi-
 sit, qui intra tentorium eius illum deducerent: apud
 quem aliquantis per dum vocatur, moratus, inde ad tri-
 bunal adductus, signis militaribus ac vniuerso exerci-
 tu circumfuso, solenne iusiurandum Cancellario Re-
 gni in verba ei præeunte Regi præstitit. Hostis interim
 Plescouiam cum exercitu progressus partem copiarum
 in Liuoniam præmiserat. Hæ Duna flumine ad Koken-
 hausium, quo vt suprà ostendimus, potitus fuerat, ra-
 ptim transmissio, ac centum quinquaginta circiter Du-
 cis Churlandiæ equitibus, qui cis Dunam in statione e-
 rant, repentina excursione reiectis, Seelburgenseq; Du-
 cis Churlandiæ, ac Birsensi Christophori Radiuili agro
 vastato properè trans Dunam se receperunt. exercitum
 qui in Liuonia fuerat, Christophorum Radiuili Vil-
 nam

nam stipendiorum causa secutum supra demonstraui-
mus. Interim Ioannem Taluossum Castellatum Sa-
mogitiæ, cum iis, quas raptim contrahere poterat, co-
piis in Liuoniam Rex misit. Philonem Kmitam, qui Or-
fæ præerat, ad Borystenem, ne quid ex ea parte ab ho-
ste detrimenti acciperetur curare iussit. Iam exercitus
cum Palatino Vilnensi Polotiam præmissus Dunam pon-
te Kaunæ ex nauibus, ea, qua dictum est, ratione facto
ad Disnam transmiserat; nihil hoste contrà suscipiente,
quo transitu cum prohiberet; vel quòd ex instituto di-
sciplinæ Moscouiticæ sine mandato principis ex præsi-
dio miles egredi non audeat: vel quòd superiorum tem-
porum successu elatus, exercitus, qui Suirum conueni-
re dicebatur, famam contemserat. Duna paulum pro-
gressum continuæ siluæ aliquandiu moratæ fuerunt.
Nam ex quo Polotiam Moscus ceperat, sedecim ferè an-
norum spatio, quo in potestate eius fuit, eam partem a-
gri, quæ à Duna flumine atque Disna Polotiam tenden-
tibus prima occurrit, desertam ac incultam reliquerat;
vnde frequentes densissimæque arbores vt in solo fer-
tili interea temporis enatæ fuerant. Verum peditatu Vn-
garico securibus siluas cædere instituyente, ac celeriter
opus perficiente, exiguo temporis spatio difficultates
eas superauit. Polotia antiquitus suos Duces habuit,
subque annum à nato Christo DCCCC. LXXX.
vel vt Russi tempora numerant à condito mundo CC
CC LXXX VIII S. VI. M. Rochuoldo Duci pa-
ruit; qui à Vlodymiro magno ob negatam ei in matri-
monium filiam Rochmedam, vt Moscorum annales ha-
bent, bello petitus, vitam pariter cum duobus filiis ac
imperio amisit. Indè in Monarcharum & principum
gentis Russicæ potestatem concessit; quorum extincta
stirpe ea, quæ in Australi Russia regnabat; Lituaniis, vt
quædam aliæ ditiones Russiæ cessit. Iagellone apud Li-
tuanos

tuanos primum, inde apud Polonos regnante, cum Andreas frater eius Polotiae dominatum, sub idem fere tempus, quo Jagello Cracoviae insignia regni accipiebat, arripuisset, copiis aliquibus missis recepta mox fuit; continueque inde in fide Regum Poloniae, magnorumque Ducum Lituaniae ad annum LXIII. S. clo lo, permansit. quo a Ioanne Basilij filio Moscoviae Duce capta expugnataque fuit. Regio Polotiensis ad centum quinquaginta circiter millia passuum in longitudinem, totidem in latitudinem patens cum vbertate glebae, tum fluminum atque lacuum copia nulli cedit. Fluvios navigabiles complures habet, praecipue Dunam; qui in Moscovia non procul a Turopecia ortus Rigensem portum efficit, omniumque Septentrionis fluminum amoenissimus fere ac pulcherrimus est, secundum eum Dryssam, Vsuatam, e Moscovia: Disnam, Vlam e Lituania: a Smolensco Casplam in eundem Dunam omnes influentes. Plerorumque Lituanicorum & Russicorum castellorum is fere positus est, ut ad ostium aliquod humilioris fluminis, quo cum maiori coniungitur, sita sint. quae ita sita sunt, quod maioris fluminis propinquitas pluribus communis est, a minoribus fluminibus fere omnia nomina indita habent. Hinc Polota non magnus alioquin fluvijs arci atque vrbi: vrbs regioni nomen dedit. Antequam in Mosci potestatem veniret, vna arce atque vrbe Polotia & castro Ieseriscia tota illa regio continebatur; caeteroquin opidis & pagis non infrequens. Polotiae opes propter summam oportunitatem Dunae fluminis eousque excreuerant, ut Vilnam caput Lituaniae diuitijs antecederet. Ieseriscia versus Moscoviam in lacu, ex quo fluvijs Obola oritur, sita, ab vna sola parte angustissimum aditum, & quo vix expedito iter sit, habet. Postquam a Mosco occupata fuit, utrinque castella aliquot excitata, praesi-

præsidiaq; constituta fuerunt. partim agri fluminisq; ac nauigationis vel retinendæ vel turbandæ hosti causa; partim ad excursiones, quæ vt in dubia vtrinq; possessione frequentes fiebant, prohibendas. A Rege Sigismundo Augusto Disna ad eiusdem nominis fluuij ac Dunæ confluentem: Voronecium ad flumen Vsciam: Lepclium in insula lacus, qui à Lepelio fluuiò efficitur, versus Lituaniam conditum fuit. Quoniam autem ad hunc locum ventum est, non alienum videtur, pauca de natura situq; eius narrare. Tendunt per eam Lituanix partem duo diuersa flumina: quorum vtrunque nauigabile est; ita inter se coniuncta, vt non plus millium passuum quinq; interuallo distent; eademq; in duo maxima ac longissimè distantia maria exitum habent. Lepel, de quo diximus, in Vlam fluuiũ itidem nauigabile exonerans, cum eo in Dunam indeq; ad Rigam in mare Balticum effunditur: alter Beresina in diuersam partem raptus cum Borystene in pontum Euxinum deinde erumpit; ita vt si pacatæ gentes essent, in quarum potestate fluminum horum cursus sunt, in tanta eorum propinquitate, transportandarumq; ex vno in alterum mercium, cõiungendorum deniq; eorundem facultate, Septentrio vniuersusq; Occidens facillimè cum Oriente commercijs iungi posset. sed Dunam Mosci antehac: Borystenem ijdem Mosci ac Tartari cæteri; de quibus suprà dictum est, infestum nunc faciunt. Cæterum Sigismundus Augustus Vlæ quoque ostium castello munire aggressus, Veneto architecto quodam vnà cum operis ab hostibus interfecto, non sine detrimento deiectus fuerat; cumq; hostis eundem locum munire instituisset, ac Augustus magnis à Radouicio summissis copijs, ac summa vi diu frustra eum oppugnasset, tandem sequenti æstate per Romanum Sangusconem Palatipum Braslauiensem, dum Moscus

E vetus

vetus præsidium noui inducendi causa deducit, rece-
 perat: superiorem verò eius partem Lepeliq; fluminis
 cum Vla confluentem imposito castello Ciasnacia iam
 antè communierat. simili ratione Moscus vltra Du-
 nam quinq; castellis exstructis, totius orè eius possessi-
 onem sibi firmauerat. Sokolum in via Plefcouienfi in
 fluminum Dryssæ & Nyssæ penininsula quadam Litua-
 nicis castellis Disnæ & Dryssæ opposuerat. Niscerdam
 ad lacum cognominem triginta à Sauolocia passuum
 millibus: Sitnum in Lucensi via ad superiorem Polo-
 tæ partem. Kossianum deinde loco ab Obola flumine
 velut circino circumducto: Vsuatam ad fluuium iti-
 dem cognominem ac nauigabilem in Dunam ad Su-
 rassum ex aduerso Casplæ fluminis influentem: illud
 contra Vlam, hanc contra Vitepscium & Surassum ex-
 citarat. Cis Dunam Turouliam, ad cognominis am-
 nis caput, quo in Dunam influit. Sussam verò singu-
 lari consilio Lituaniam versus in lacu, qui Turouliam
 emittit, loco munitissimo, aquisq; vndique circun-
 dato, agitans iam animo bellum Lituanicum, Vilnam-
 que opinione præcipiens sedem bello futuro posue-
 rat; itaq; natura antè munitissimam opère communie-
 rat, omniq; apparatus bellici genere instruxerat; pau-
 ca, vt præsidia instructiora eo haberet. His Krasnam
 superadiunxerat, superiori in loco itidem ad Lituani-
 am spectante. Kosakki igitur Lituanici Francisco Suko
 duce ad belli suscepti famam in finibus globo facto
 Krasnam noctu repente scalis admotis adorti præsidio
 munitionibusq; ac satis magna comæatus copia vnà
 cum castello potiuntur. Ab altera parte Kossianum vl-
 tradunana arx simili euentu repentina excursione Ko-
 sakkorum capitur & deletur. Palatinus interim Vilnen-
 sis Polotiam cum ijs, quas circa se habebat, copijs per-
 uenerat. quas hostes conspicati subitò copias suas ex-
 tra mu-

tra munitiones productas sub portis instructas ostendunt; nullaq; iusta pugnandi facultate data intra munitiones se recipiunt. eque tamen pugnandi auidus sub ipsa moenia in eas prouectus vnum atq; alterum hastis transfixit. Eodem tempore Vngari & Lituani Sitnum, via quæ Plefcouiam ducit, subito Polotia excurrentes, vt re improuisa & repentina eam incendunt. Cùm Polotiam Rex iret, à læuaq; Sokolam castrum hostile haberet, veritus ne maioribus à Plefcouia subsidijis summissis, commeatui ac subuectionibus nostris incommodi aliquid ex eo hostis afferret, an ad id oppugnandum ex itinere diuerteret, cum Milecio deliberabat; verum postea sæpè maiorum rerum gerendarum opportunitatem in minutioribus oppugnationibus consumi cogitans; ac ad Polotiam caput prouinciæ properans, celeriter consilium omisit: ternisq; castris, quem admodum Milecius cum expedito equite præcurrens ea designarat, Disna Polotiam peruenit. Dum Poloti- am exercitus contendit, Mosci Polonos & Lituanos, quos à multis annis in squalore & compedibus habuerant, cum cruciatu interfectos adq; trabes alligatos secundo Duna terrorem venientibus id allaturum rati, obuiam demittunt. Rex Ioanne Samoscio Cancellario & Gaspare Bekesio solis assumptis, Milecio interim exercitum curante priuato cultu, subsidijisq; contra eruptiones loco oportuno dispositis, urbem circumuectus situm loci cum ijsdem cognoscit; simulq; eodem in loco, à qua potissimùm parte oppugnatio instituenda sit, deliberat. Constabat Polotia duabus arcibus, vna in editiori loco posita, eademq; media: altera quam selopetariorum sua lingua Mosci appellabant: & opido Sapolotta. A meridie Dunam habet, qui modico versus Occidentem flexu, recta indè Rigam tendit, ad eam que mare influit. Polotta recto è Septentrione cursu,

paulum versus Orientem sub arce scloppetariorum,
 inde rursus in septentrionem declinans, radicesq; col-
 lis, in quo superior arx posita est, complexus, eandemq;
 ab opido separans in meridiem versus paulo infra eum
 locum cum Duna commiscetur. Media, quam diximus,
 arx in colle altissimos despectus habente posita, à me-
 ridie, ut ostensum est, Duna flumine: à septentrione &
 ortu Polotta fluuii opidoq; Sapolotta: ab occidente
 sole scloppetariorum arce, vndiq; monte, cui imminet
 prærupto, altissimisq; fossis ac vallo, quouis ferè artifi-
 cio factis firmioribus continebatur: muros & propu-
 gnacula ex aliquot inter se deuinctis validissimorum
 roborum ordinibus firmissima habebat. scloppetario-
 rum arx inferiori loco occasum versus in colle tamen
 modice accliu posita ab oriente breui ponte cum supe-
 riori arce coniungebatur. Opidum cum olim cis Polot-
 tam sub colle, quem scloppetariorum postea arce Mo-
 scus communiuit, fuisset, deletum in oppugnatione ab
 hoste fuerat. postea cum confirmata iam possessione
 propter commerciorum usum, quorum loco tam opor-
 tuno summa facultas est, restaurare id institueret; quod
 ab illa parte maxime oportuna oppugnatio ei fuerat,
 veritus ne inde rursus nostris pateret, trans Polottam
 fluuium atq; summam arcem in locum inter vtrunq;
 flumen medium transtulerat: ut positu eius quasi trian-
 gulari, vnum latus Duna, alterum versus summam ar-
 cem Polotta fluuius, tertium fossæ turesq; tuerentur.
 Regi dubitandum non videbatur, quin à media eadem
 que summa ac munitissima arce ordianda oppugnatio
 esset; propterea, quod quicquid in reliquis oppugnan-
 dis laboris ac temporis sumeretur, suprema salua, nec
 receptu hostibus nec obsidionis ex ea sustinendæ spe
 defutura nulla de causa sumtum iri appareret: ea verò
 expugnata occupato loco superiori, eodemq; munito,
 ac in

ac in quem omnis commeatus apparatusque bellicus collatus ab hoste esset, opidum quoque ac alteram scloppetariorum nullo negotio in potestatem peruentura. Accedebat huc, quod ab opido difficiliorem deinde arcis oppugnationem transitus fluminis Polottæ, qui radices collis, in quo arx posita erat, complecteretur, facturum videretur. Bekefius nihilominus opidum Sapoltotam, quod secundum Dunam flumen euntibus primo loco occurrerat, prius tentandum censebat; quo expugnato, & si in arcem deinde hostes se reciperent: tamen præterquam quod incommoda obsidionis omnibus in vnum locum compulsis ea res auctura esset; spem præterea illis, nostris laborem minuturam, animosque addituram: nec difficiliorem multò, quàm ab ijs partibus futura esset, ab opido oppugnationem futuram; cum flumen Polotta, quod impeditam eam facturum videretur, omnibus ferè locis vado vix crurum tenus transiri posset; atque erat sanè ea humilitas fluuij id temporis. Regem vt in sententia perstaret, Samoscius cum primis vrgebat; quod cum iterum cognoscendius causa solus propius sub eum locum, in quo opidum antea fuerat, & quem Posar illi sua lingua ab incendio opido tanquam bustum vocabant, successisset; longè indè faciliorem ascensum, neque fossarum & collis eam altitudinem, quæ ab alijs partibus erat, esse animaduernerat; arcemque scloppetariorum in colle ab imo accliui ita positam, vt à summitate collis, quæ ad exteriorem partem pertinebat, tanquam gibbus aliquis enatus telorum commodè adijciendorum ijs, qui in arce erant, facultatem præpediret. Dum cum Milecio, & senatoribus reliquis amplius deliberare Rex vult, Germanus miles priuato consilio Polottam transgressus, locum ab opido auersum contra summam ac scloppetariorum arces ad Dunam castris capit.

Veritus hinc Rex, ne ex æmulatione nationum dissidij aliquid oriretur, vt ad opidum, quo loco Bekefius cum Vngaris constiterat, munitiones agerentur, permisit. Inde regiis castris trans Polottam flumen medio inter eum & lacum quendam spatio, infra locum, quem à Germanis occupatum diximus, locus deligitur. eoq; binis castris exercitus à Milecio traducitur. Vniuersorum castrorum totiusq; obsidionis hæc ferè erat facies. secundum flumen à Disna Polotiam euntibus versus opidum Sapolottam ad Dunam flumen primi Vngari confederant, loco ad commeatus excipiendos, cum primis oportuno; quòd inferior fluminis pars pacata erat, omnesq; subuectiones in eum ferè locum concurrerent, tum Duna etiam ponte nota ratione ex nauibus composito ibidem stratus esset. Infra Vngaros cis Polottam Nicolaus Radiuilus Palatinus Vilnensis cum Christophoro filio, subq; eorum imperio stipendiariæ copię Lituaniæ, inde diuersæ voluntariorum, quicquid reliqui erat spatij Polottam vsq; diuersis castris compleuerant. Ultra Polottam inter flumen & lacum quendam, quemadmodum ostendimus, regia castra erant. In his senatores ac equites Poloni magna ex parte erant: præter hos Nicolaus Christophorus Radiuilus Marschalcus palatij Lituaniæ, quiq; tum per absentiam Marschalci Polonicicomitatus vniuerso regio præerat. Medium castrorum locum principia senatorumq; tentoria amplexa erant, quorum vt quisque potestate & honore antecederet, ita locum Regi proximum ceperat. Hæc cum terni tentoriorum ordines ambientes binorum vicorum paribus inter se spatiis distantium seriem efficerent: bini etiam ad eosdem aditus portæque relictæ fuerant. totidem castrorum portæ erant excubiis stationibusque militum firmatæ. Exteriorem castrorum partem currus circumiecti, catenisque ferreis inter se deuincti more gentis Poloniæ munie-

muniebant. ad quos in maioris impetus aut periculi expectatione fossam etiam ducere, egestumque aggerem curribus oblicere, atque ita munitissimi opidi faciem castris circumdare solent. Supra regia castra Germani loco, quo antè ostendimus, confederant. Ad Polotiam exercitu iam existente à Marchione Georgio Friderico in Prussia duce quingenti lectissimi pedites superuenere; qui quemadmodum ipsi voluerant, inter Germanos loco iis assignato, iisdem cum Germanis castris recepti fuerunt. In eadem causa alij quoque fuerunt, è Podolia aliisque extremis regni finibus; qui cum propter locorum longinquitatem maturius adesse non potuissent, ad Polotiam reliquum exercitum assecuti sunt; in his è voluntariis, Constantinus Constantini Ostrogiae Ducis filius cum lecta equitum ala; ac alij quidam. Bekefius interim Sapolottam opidum oppugnare coeperat, actis que ad moenia vineis, tormentis iam quatiebat. Mosci desperata opidi defensione, & quòd in omnes casus hæc à principe suo, qui in præsidiis sunt, mandata accipiunt, omnibus rebus exportatis opidum incendunt, ac in summam arcem se recipiunt. Proferuntur munitiones ad arcem flumenque Polottam, quod radices montis, in quo arx posita est, ambire supra ostendimus, magna Vngari militis virtute; ut est summi genus laboris ac tolerantiae; cum per partem opidi opus institueretur, ac sæpè in sepulchra atque cloacas, aliaque foedissima queque incurreret. Ita instituta oppugnatio erat, ut Vngari ad dextram ab ea parte, qua opidum fuerat; modico ab his interuallo Poloni; inde Lituani pedites, quos Stephanus Sbarassus Palatinus, Eustachius Volouicius Castellanus Trocenses ac alij quidam voluntarij adduxerant, oppugnarent. medio inter hos loco inferius aliquantò non longè à flumine Polotta ducenti lectissimi Vngari pedites à Samoscio scripti excubabant, eo ferè

positu, vt reliquo Polonico & Vngarico peditatu supra eos duobus locis inter se oppositis collocato, ducenti hi tanquam summum angulum trianguli tenere viderentur. ab altera arcis parte trans Polottam, qua sclopetariorum arcu coniungitur, Germani, quos eo loco confedissee dictum est, e suis castris munitiones versus arcem agebant. Bekefius primò tormentis quater arcem instituit; quòd ubi minus succederet, propterea, quia cum ex materia constarent, potius perforarentur aliquibus in locis muri, quàm sternerentur; candentes globos iacere cœpit. Genus id est incendiorum in superiorum temporum dissensionibus ciuilibus Vngariæ à Rege ipso institutum: cum ea, quæ ab aliis ex diuersis incendiorum nutrimentis excogitata essent, magis ad speciem & terrorem comparata, quàm magnam ad inflammandum vim habere videret. Globi igni excocti dum planè eum imbiberint, ita in tormenta mittuntur, vt inter eos & puluerem tormentarium, iustum spatium arena aut cinere primùm, inde recenti ac humida herba compleatur, ne puluis ignem ex globis rapere, ab iisq; inflammari possit: itaq; in aduersos muros eiiciuntur: quæ res quòd globi lignis impacti diutius lateant, candemq; ob causam non tam facile, atq; flamma opprimi possint, magnum ad incendia excitanda vsum habet: eaq; ratione Pharum Gedanensium Rex exusserat. Hic tamen hac etiam minùs proficiebatur, propterea quòd cum altius aliquantò iacti essent, eadem ratione muros tantùm peruaderent: cum in inferiorem locum ad fundamenta murorum, vt hæere possent, adigerentur, in cliuum ferè, qui arcem sustinebat, quiq; ita prominebat, vt aduersus locus, in quo tormenta regia erant, & si & ipse non humilis, inferior illo tamen esset, impingebant, soloq; accipiebantur. Simul Zephyro vento per complures dies flante continui ac effusissimi imbres

imbres erant. ex his Polotta amnis tantum aquarum conceperat, ut qui antea pedibus non incommodè tranfiretur, tum ab equite sine periculo, transmitti non posset: pontes autem omnes ferè, qui inter bina castra erant, interrumperet. Vnus tamen ab initio statim, postquam accessum ad Polotiam fuisset, à Ioanne Borne-missa ad molendinum quoddam exustum sub publicis aliquot sub aqua repertis, trabibusq; aliis super eas iniectis, inter munitiones ipsas ac propugnaculum, quod oppugnabatur subitario opere factus perstiterat. Cum què per vnum pontem non satis commodè miles ad oppugnationem iturus videretur, Bekefius cymbis aliquot piscatoriis depressis nouum in eo pontem effecit. Verùm eo etiam paulò post continuis tormentorum iectibus in eum directis ab hostibusmerso, vnus relinquebatur is, de quo dictum est, quem & pars aliqua molendini ab incendio relicta à tormentis hostilibus tutabatur. Bekefius igitur cum et tormenta & globos candentes frustra admoueri animaduerneret, ut quisq; maximè impiger in proximo constiterat, præmiis maximis propositis, ut facibus ignem muris subiicerent, hortatur; perq; pontem ac aduersum collem rectà ad arcem mittit: iis ex Polonorum Lituanorumq; munitionibus alij mox summittuntur. Occurrebat singulari militum nostrorum virtuti omnibus locis eximium hostium in defendenda arce studium. Inprimis magno incommodo nostros afficiebant ingentis molis trabes in superiore parte muri, cuius latior ambitus, quàm inferioris erat, iam antè in eum casum ab hostibus constitutæ; quæ leui impulsu in nostros deturbatæ, ac per clium prouolutæ magna cum strage, ut quosq; arripuerant, secum ferebant. tantus verò in restinguendis ignibus omnium ardor erat, ut non etate confecti, non mulieres, non pueri, vel laborem vel periculum recusarent; quò minus &

nus & magna copia aquam aliaq; opprimendæ flammæ suis supportarent, & in succedentes nostros profunderent. cumq; omnibus ex partibus, directis in arcem ac propugnacula tormentis, à nostris peterentur; accidit, quod dignum admiratione visum est, ut non pauci extra muros funibus demitti se paterentur, aquasq; ab aliis subministratas superiori ex loco pendentes ad restinguendos ignes, qui foris admouebantur, defunderent: iisq; certissimis nostrorum tormentorum ictibus sublatis, non deessent toto illo tempore oppugnationis, qui priorum in contemnendo periculo virtutem imitarentur, inq; locum eorum, qui exanimati fuerant, succederent. Inter hæc pluiæ ac tempestates, de quibus dictum est, adeò obsessis erant secundæ, ut vulgus militum carminibus, quibus aliàs gens ea praua superstitione dedita existimatur, motas crederet; quæ & incendia morabantur, itaq; fossas omnes compleuerant, ac solum inundauerant, ut nusquam ferè consistendi locus militi daretur. Desiderati in oppugnatione hac sunt aliquot viri fortes, ac in iis Michaël Vadasius, qui multis in præliis fortiter versatus, ac ob virtutem militi Vngaro præfectus fuerat, dum ad tormenta Polonicarum munitionum cum Stanislao Penkoslauio ac aliis præfectis Polonis consilia communicat, globo tractus fuit. Non leue tamen hostes etiam incommodum acceperunt. cum quoties ad restinguendum incendium conferti vnum in locū concurrissent, tormentis, quemadmodum dictum est, in eum directis, crebræ in illos ei iaculationes fierent; ac non globis modò frequentes interimerentur, sed fragmentis etiam lignorum ac trabium, quæ globi secum rapiebant; quæq; maiorem ferè quàm globi ipsi stragem edebant, non pauci opprimerentur. Ad oppugnationis difficultates accedebat summa commeatus & subuectionum angustia; quæ à sola ferè

ferè Disna, & ab inferiori parte fluminis sustentabantur. Vilnam enim versus, quæ amplius ducentorum viginti quinq; millium passuum spatio indè distat, Postouam vsq; quæ paribus inter Vilnam & Polotiam ab utraq; interuallis sita est, omnia hostis vastarat. tum verò propterea etiam minùs commodè subuchi indè poterat, quòd Susa in potestate hostium adhuc erat; cuius in præsidio qui erant, superioribus diebus Kosakkos Lituánicos, quos Krasnam interceptisse suprà ostendimus, securius agentes noctu oppresserant, castrumq; incensum solo æquarant: & tum vias subuectoresq; nostros Vilna venientes infestabant. A superiore parte fluminis propter Turouliensè præsidium nullam etiam in partem liberæ frumentationes pabulationesq; erant. Excurrerat cum leuioribus tormentis aliquot eò Franciscus Sukus, spe magis terrore, quàm vi eius potiundæ: sed Polotia integra satis fiduciæ spirituumq; hoste habente re infecta discesserat. Ex aliis partibus versus Pleseouiam & Lukos per centum ferè millia passuum densissimæ ac inuiæ siluæ erant. Ad hæc Moscus, quem cum exercitu ad Pleseouiam peruenisse suprà demonstraui-
mus, cum obsideri Polotiam intellexisset, lectissimam totius exercitus partem Borisso Seino, & Theodoro Seremeto ducibus subsidio obsessis miserat. qui cum tunc Polotiam in omnes vias nostris intentis peruenire se non posse existimarent, Sokolæ substiterant; ac & si Polotiam non accederent, ad Disnensem tamen viam excurrerant, frumentatoresq; ac pabulatores nostros excipiebant. Miserat initio contra eas copias Rex Christophorum Radiuilum cum lectis aliquot equitum alis; ei Ioannes Chlebouicius Castellanus Minscensis se adiunxerat; cumq; hostis aut intrà munitiones, aut suo loco se contineret, nec iustam pugnandi facultatem daret; nostri tamen in eos inuecti sub mœnibus equestre præ-
lium

lium cum ijs fecerunt, quo vtrinque aliquot caesis, ac ex nostris Nicolao Kamenscio nobili equite interfecto, captiuis aliquot Moscis abductis, ad Regem reuertunt. qui ibi quoque maioribus copijs rem gerendam ratus finem oppugnationis Polotiensis expectandum statuit: in praesentia equitum stationibus aliquot contra eas collocatis. Augebantur incommoda haec, quod viae largissimis continuisque imbris ita corruptae erant, ut iumenta cum eluctari e luto non possent, pleraque labori immorerentur, omnesque viae cadaueribus equorum complerentur. Ita enim solum pingue ac per se humidum, omniaque adeo aquae penetrant, ut ne sub pellibus quidem in ipsis procerum tentorijs locus, in quo consisti posset, relinqueretur. Quibus rebus fiebat, ut cum undique a commeatu interclusi nostri essent, nec mercatores etiam initio hoc rerum in eam vastitatem castra frequentes secuti essent, eò usque, annona ac pabulum potissimum excresceret, ut quod inauditum antea in Polonia maxime fuerat, singuli modij auenae denis taleris emerentur, qua generosiores saltem equi sustentarentur; reperirenturque ex Polonis & Vngaris, qui mortuorum equorum carnibus vesci non dubitarent. quod per se nouum & insolitum, non tamen tam mirum videbatur; quam quod corpora eorum morbo ex ea causa tentari non animaduernerentur. In communibus omnium angustijs maxime premebantur Germani; non modo quod inter frequentes vrbes bellum gerere assueti minus a necessarijs rebus ad eas difficultates parati accesserant; sed quod eo etiam loco castra faciebant, ad quem vltimo commeatus perueniebat; in fronte Vngaris, inde Lituanis, ab ijs regijs castris positis. ad quos ut propius Disnam versus quique horum confederant, commeatum inde venientem primo loco peruenire necesse erat. Prussici tamen, qui a
Marchio-

Marchione missi fuerant, vt in maiori earum regionum necessitatumq; peritia cum curribus, tum commeatu alijsq; necessarijs rebus optimè à principe suo instructi erant. In hac omnium rerum difficultate summa tamen erat constantia Vngari præsertim militis. ante alios Bekefius, qui alioquin grauib; articulorum doloribus, ac ventriculi imbecillitate vehementer conflictabatur, minimè ob hæc animo fractus, nunquam melius se valuisse iactabat: semper apud tormenta esse: ibi cibum sumere: ibi quiescere: itaq; inter pericula se versabat, vt qui proximè circa illum obuersabantur, ac in his Ioannes Kurofius, tam propinquo è loco, vt sanguine suo illum aspergerent, non pauci interimerentur. Polonicus etiam peditatus & si nuper admodum scriptus erat, nihilò secius tamen animo nec ipse se demittebat. Cum tantum vndiq; difficultatum circumstaret, eamq; ob causam ad consilium, quid deinceps facto opus esset, Rex retulisset, huiusmodi plerq; sententiæ dicebantur, vt quod iam antè sermonib; à plerisq; agitatū fuerat, corona facta omnibus ex partibus vniuersi exercitus omnib; viribus oppugnatio tentaretur. Id ea de causa Rex non probabat, quòd si id frustra susceptū esset, in quo summam spem omnes ponerent, vt deinde tanquam omni ea consumpta, præter discessum nihil reliquum haberent, verebatur. Itaque alia prius omnia tentanda existimabat. Vngarum militem maximis præmijs propositis, vt muros denuò subeat, excitat: equitem vt quisq; maximè manu strenuus erat, vt vnà cum pedite, misso equo, muros succederet, hortatur: cum primis eius rationem habendam docet, ne quemadmodum antea fecerant, priusquam vires planè incendia sumerent, se reciperent: sub muris deniq; telisq; hostium mortem pro gloria gentis opinioneq; fortitudinis militaris oppetere præstare, quàm infecta re ab

F

oppu-

oppugnatione discedere, contumeliamque hanc accipere. Ita miles magno ardore sub moenia arcis tædas, quæq; in eos usus iam antè preparata erant, alia præ se ferens succedit. Et cum tanquā inclinante fortuna pluuiæ sub id tempus paulum quieuisset, ignis fundamentis illatus, murorum latus id mox corripuit: idemque longè latèque amplexus, totum eum diem cum extingui non posset, populabatur. Erat hic Augusti vicesimus nonus. Interim cum incendium excitatum latissimè colluceret, verereturq; Rex, ne ex vicinis locis maximè autem Sokola, ubi lectissimam partem exercitus Plescouiam à Mosco coacti confedissee supra ostendimus, hostes ipsis ignibus exciti, ad liberandam ab incendio arcem atq; suos concurrerent: ac ex arce simul eruptio tentaretur, exercitum vniuersum castris productum, iusta peditum manu præsidio castris relicta, sub signis in campo constituit. Ipse aulico equitatu præsidio assumpto, quò melius in omnes partes animo occurreret, Polottam transgreditur; quod & Sokolensis via illac duceret, & eruptio si qua tentaretur, ab illa parte maximè timenda esset. Territi his rebus Mosci de ditione agitare cœperunt: decemq; de muris se deicientes ad nostros transfugiunt. Eos dum Bekesius ad Regem mittit, Vngarus miles, vt cæteros à ditione deterreret, ne per eam expugnatæ arcis gloria victoriæque fructu ac omni laborum suorum præmio priuaretur, trucidat. Præter cætera enim, cum arcis tam famosæ, tum præcipuè ædis D. Sophiae, quæ in illa est, vetustissimarum opum, argentearum statuarum, amplissimorumq; priscorum Russiæ principum donariorum, quæ in illa fuisse dicebantur, fama ingentis prædæ spe militum animos compleuerat; qua illi incensi omnes acerbitates, quò ea potirentur, æquissimo animo perferrebant. Cum iam aduersperasceret, magni & laboris & periculi

periculi videbatur, in tam præruptum collem per flammæ euadere: durabat enim adhuc incendium, nec nisi per id vlla alia via militi in arcem patebat; hanc ob causam in sequentem diem rem differri placebat. Interim dum in castra Rex se reciperet, ex Vngaricis stationibus nonnulli inter se ipsi cohortati globo facto, per pontem, de quo dictum est, in aduersum collem contendunt, per quæ flammæ nondum restinctas semiambusti in arcem euadunt. His Poloni pedites non pauci exemplo inuitati se adiungunt. contra eam partem, in qua incendium excitatum erat, subitario opere fossam Mosci duxerant, per eamque minoribus tormentis dispositis in omnes casus se communierant. à quibus nostris reiectis, per quæ flammæ indè, quò temerè progressi erant, recedere coactis, Mosci hoc successu elati, longius eos insecuti sagittis à tergo feriebant. Interim ducenti Samoscij pedites, qui præsidio, vt dictum est, ponti erant, per quem in arcem ibatur, repulsos conspicati, auxilio nostris accurrunt, Moscosque se recipere cogunt. Rex cum paulum versus castra progressus fuisset, ac interim irruptionem hanc militis conspexisset, ad ferendam munitionibus opem, in Sokolensem potissimum viam intentus, quæ vsui sint, disponit. Idem Milecius facit: equoque descendens, ac multos è nobilitate, qui idem fecerant, secum trahens, munitionibus tormentisque præsidio accurrit. Non deerant sibi eo tempore hostes, ex quibus altioribus turribus, præsertim verò mediæ arcis vt longè cæteris altioris, creberrimas in omnes partes eiaculationes faciebant. ab ijs dum Rex cum Samoscio fortè colloqueretur, vterque non leue periculum adiit. Nam cum fortè Samoscius à colloquio eo equi mutandi causa se conuertisset, ac eques quidam in ipsius locum incautiùs se intulisset, globo penes ipsum Regem exanimatus concidit. Motum hunc nox

suppressit, insignemq; simul animorum mutationem attulit, ut de maxima spe, quam ex diei illius incendio conceperant, in aduersum casum deiectorum. querebantur omnes hostium animos hoc successu auctos, nostrorum imminutos. inde inter nationes quoq; diffensiones oriebantur, cum Poloni in Vngaros culpam temeritatis conferrent, ab iisque initium factum dicerent: & postquam in arcem perruptum fuisset, non satis animose altera ab altera rem gestam diceret. Has ob res sequentis diei antemeridiano tempore solo ad confirmandos militum animos dato, iterum oppugnationis coepta fuit. Pridie Mosci, quemadmodum ostensum est, ex propugnaculo, quod conflagrarat, se subduxerant: cumque is positus eius esset, ut in summo duorum coniunctorum laterum, quae utrinque quasi tutabatur, angulo collocatum esset: Mosci angulo, & quod inter duo proxima opposita inter se propugnacula, ad quae ignis nondum peruenerat spatij intererat, omni deserto, propugnacula eadem inter se coniunxerant: interim vero spatium ad eundem locum, quem antea reliquerant, recipiendum nactos se rati, repetere eum coeperant. Hac re ad Regem delata, qui nullum sui rursus ibi communiendi tempus iis dari volebat, mox militem sub vallum rursus succedere, hostesq; deiecto locum occupare iubet. Ita pars ea montis subito Vngarorum impetu capitur. ab ea deinde quemadmodum iussi erant, secundum proximum latus munitiones proferunt: Petroq; Racio nobili equite Vngaro iis praecunte, propugnaculo, in quod primum incurrerant, ignem iniiciunt. ex quo cum incendium ortum per totam noctem duraret, nostri maioribus etiam aliquot scloppetis, quibus hostes infestabant a fronte dispositis, eousq; per totam noctem continuo opere fossas perduxerant, ut sub auroram ab hostium munitionibus non multum ab-

tum abessent, adque inferiorem loci eius angulum, in quem nimirum fossa ab hostibus pridie ducta desinebat, ferè pertingerent: latera autem hostium ita nudarentur, ut ne intra præsidia quidem sua tutò consistere possent. His rebus ab omni defensionis spe hostes interclusi ad deditiois conditionem redeunt: mittuntur communi omnium Boiarici generis, ac militum nomine legati, qui vitam ijs, qui in arce sint, paciscantur. Impetrant, ut singulis cum vestimentis, quò quisque velit se recipere posset. Episcopus, quem Vladicam illi vocant, Cyprianus, & Palatini, qui in arce erant, soli deditioem dissuaserant; mortemque subire præstare, quam viui in potestatem hostium se traderent, contendebant. iamque antè pulveri tormentario ignem subijcere, communique incendio arcem seque & omnes, qui in arce essent, absumere conati, à militibus prohibiti fuerant: & tum sententia eorum communi reliquorum omnium metu repudiata, illi tamen in D. Sophie se contulerant, non prius quam vi inde abstraherentur, decessuri. Rex retentis apud se legatis, mittit qui Episcopum & Palatinos ad se adducerent. Adducti in faciem procidentes more suo Regem salutant; vnus præterea Petrus Voinscius alterum ex ijs Basilium Mikolinscium accusabat, quòd opera eius ad principem suum delatus, inque vinculis habitus fuisset. Rex non cognitionis tempus hoc esse ostendens Laurentio Voinæ quæstori Lituaniæ, qui curam eorum haberet, tradi eos iubet. Mittit inde, qui arcem accipiant, partim Polonos partim Vngaros. Altero die cum rei diuinæ operam dare ante omnia Rex vellet, proque obtenta victoria grates Deo agere, fæctore proietorum passim cadauerum, quæ insepulta hætenus Mosci reliquerant, arcem ingredi prohibitus, Moscos, qui in arce ad hoc tempus remanserant, educi iussit. Ei rei præponuntur, qui ab iniurijs

militis eos defendant: decedentibus duplex locus assignatus fuit. in alterum, qui in regis ditionem atque fidem venire: in alterum, qui in Moscouiam redire vellet, concedebant. Vtrisque liberum de se commodisque suis statuendi arbitrium permittebatur. maior pars reditum in patriam & ad principem suum eligebat, insigni in vtrunque fide ac perseuerantia; cum eorum nemo esset, qui non ad certissimam mortem, & exquisitos cruciatus proficisci se existimaret. Pepercit tamen ijs Moscus; seu quod extrema necessitate adactos existimaret; seu quod aduersis rebus, ut de animo, ita de crudelitate remiserat: perque vicina praesidia Lukos, Sauolotiam, Neuelam, Vsuiatam, eos distribuit; in quibus deditionis Polotienfis ignominiam virtute delerent. Ne à milite iniuriam acciperent, summam Rex curam adhibuit; itaque accidit, ut cum inspectante Rege ex arce digredientes, quidam in tanta multitudine facile latitum se ratus, aliquos spoliaret, eum Rex ipse claua in illum inuectus, notaret. Ea res tantam illi venerationem in animis hostium faciebat, ut quò magis clementia atque fides ignota hominibus durissima seruitute oppressis essent, eò magis in illo virtutes hasce admirarentur. Reperiebantur per aream arcis dispersa corpora nonnullorum militum nostrorum; quos illi, quod in tanta victus atque omnium rerum inopia euenire necesse erat, in subiectis arci sclopetariorum hortis herbas, quibus extremam famem tolerarent, legentes oppresserant; ac intra munitiones suas abstractos immani cruciatu lacerabant. Maxime in Germanorum vnum atque alterum crudelius, quam in cæteros sauitum ab illis animaduvertebatur. Crurotenus lebeti impositos igni circumiecto feruenti aqua viuos coxerant, manibusque eorum fune per lacertos traiecto à tergo reuinctis, ventrem totumque corpus eorum

eorum crebris in longitudinem per id factis vulneribus ad scissi thoracis modum foedissime laniant. Fremebatur passim hanc ob causam à militibus. Rex tamen fidem semel hosti datam nulla ratione violandam ratus, iis qui in Moscouiam redibant, duas alas equitum, qui ab iniuria eos tuerentur, adiunxit. Postridie supplicationes ob rem prosperè gestam, cum in arce etiam, quam diximus, ob causam haberi non potuissent, in castris habitæ fuerunt. in Poloniam etiam de iisdem habendis edicta missa. Præda minor expectatione ac fama tam opulentæ arcis reperta fuit. Repererat in ea Moscuscus auri argentique non modò publici ac sacri, sed privati etiam maximam vim; quam nobilitas mercatoresque Polotieneses sub periculum oppugnationis in eadem ad summum congefferant; sed capta vrbe gazam omnem paucis donariis relictis in Moscouiam secum auexerat. Omnis militi concessa minimè tamen spei eius satisfecit. Non minori ferè in pretio, quàm reliqua præda, bibliotheca ibidem inuenta apud homines literatos habebatur. Erant in ea præter annalium libros, plerique Doctores ecclesiastici Græci, ac in iis Dionysij Areopagitæ de hierarchia cœlesti & ecclesiastica libri Slauica omnes lingua; quorum plerosque à Methodio & Constatino in eam linguam è Græca traductos ipsorum annales tradunt. In ecclesiasticis enim institutis à cæteris ferè eiusdem etiam ritus gentibus hoc vel maximè Mosci differunt; quòd conciones apud populum, quibus is erudiatur à Sacerdotibus nullas haberi patiuntur; sed quæ à veteribus doctoribus Græcis tradita sunt, in suam linguam hanc ob causam traducta, studio seque conquiritur è scripto publicè pronunciant; seu quòd homines nullis literis eruditi suo ingenio minùs confidant; seu verò, quòd propius vero videtur, ne pro curiositate ingenij humani noua inueniendi studio ab

antiquitate ac veritate recedatur. Apparatus bellici maximè autem pulueris tormentarij tantum reliquum fuit, vt licet per omne id obsidionis tempus magna eius pars absumpta fuisset, nihil tamen adhuc ad longissimam quamvis obsidionem tolerandam defuturum iis fuisse videretur. commeatus etiam atq; pabuli satis magna copia inuenta ex labore & inopia exercitum breui refecit. Sed dum è tot incommodis sibi quisque primò prospicere contendit, iurgia inter nationes Polonicam & Vngaricam orta eò usq; proruperunt, vt cuncto facto strictis vtrinq; gladiis mutuò in se irruituri consisterent. Iam antè miles Polonus circulari: fremere totis castris: contemni virtutem suam ab Vngaris: eos omnibus se anteferre: fructus victorię prædamque omnem solos interuertere: pro illorum laude & commodis bella suscipi. Inter quas gregarij militis dissensiones, senatorij etiam ordinis, ducumq; ipsorum offensiones nonnullæ exstebant. Nam & Mileccio cum Palatino: Vilnensi etsi arctissima necessitudine coniuncti inter se essent; ex communione muneris alienationis nonnihil intercessisse videbatur: interq; eundem & Samoscium, & si non minor necessitudo inter eos intercederet, ne satis tamen alter ab altero amaretur, dubitatio suborta videbatur; cum hic si quid ad rationem muneris eius spectans attingeret, offensum eum iri existimaret: Milecius pro mutua necessitudine non satis auctoritatem muneris sui iuuari à Samoscio arbitraretur. Angebatur maximè animo ea dignitate atq; auctoritate vir, quòd à Beckesio aliisq; exteris non satis maiestas tanti magistratus, cuius in regno hoc summa semper auctoritas fuisset, obseruari putaretur: imperijq; militaris maiestatem in se imminutam videri molestè ferebat. Acuebantur dissensiones hæ à magistratuum, qui defuncto Ioanne Chodkeuicio amplissimi vacabant, petitoribus;

qui

qui ut à quoq; vel iuvari vel destitui se existimabant, ita alios in eum animabant. Militi quò dissidia inter eum tolleret, quòd præda expectationi eius non responderat, donatium Rex dedit. Tenebantur adhuc in agro Polotienfi præsidiis hostium Sokola, Turoulia, Susa, aliaq; castella quædam; quæ nisi prius quàm indè discederet, deiecisset, pacatam se regionem eam obtinere non posse Rex intelligebat. Maxime à Sokola & Turoulia timebat; quorum cum illa à læua ad Pleseouiensem viam pertineret, & iam antè summissis indè copiis firmata fuisset, ne id posthac rursus fieret, maioribusq; copiis indè aliquid tentaretur, verebatur. hanc quòd ad Dunam flumen posita esset, itidem magnam totius eius regionis infestandæ oportunitatem habere videbat. Sokolam Milecium mittit. Hic equitatum peditatumq; Polonicum, & militem Germanum secum sumit. Turouliam Bekefium cum Vngaris mittere in animo habebat: interim cum Martinus Kurcius cum Kosakkorum manu Palatino Vilnensi operam suam detulisset, is adiuncto ei Constantino Lukomscio præfecto Vlenfi missus eo fuit. Mosci, qui in præsidio erant, quòd per eos dies tormenta atque ignes cessare animaduertissent, id quod erat, Polotiam in potestate Regis esse coniectura existimantes, ne quicq; retinentibus eos præfectis per auersam portam se eiiciunt, fugaque castrum deserunt. Palatini qui in eo remanserant, ad Regem adducuntur. Sussam, quòd omnium esset munitissima, in eaque Moscuscus maximum apparatus belli, comheatúsq; haberet: & tamen citius Dunam in solo Lituanico posita præsidiis aliis excisis, omniq; comheatu intercluso, vtrò in potestatem ventura videretur, in præsentia tentare non placebat. quibus rebus perfectis, quæ ad statum provinciæ stabiliendum, diuinarumque rerum curam pertinerent, administrare Rex instituit. Templum
arcis

arcis & si satis amplum esset, pro captu etiam loci magnificè ex lapide constructum, quòd tamen à Græci ritus hominibus teneretur, quorum & magna multitudo esset, in eo què ius ac possessio antiquissima videretur, eius formulè Episcopo Russico, qui antè iam templi eius titulum Vitepsciè ipse agens vsurpabat, permisit; maxime verò quòd eius quoque rei rationem habendam sibi existimaret, vt cum longius bellum in Moscouiam proferre in animo haberet, intelligeretq; quantum ad animos hominum in omnes partes permouendos religio posset, ne religionis amore, si eam relinquendam existimarent, à deditionibus absterrentur. Ad Romanè ecclesiæ vsus nouum designat. Huic agros & possessiones, ex iis quæ maximè vicinæ erant, amplissimas addicit: certisque prouentibus annuis ad perficiendam fabricam ac sacerdotum vsus, dum ager è vastitate ad culturam perduceretur, è portorio interim assignatis, Societatis Iesu sacerdotes in eo collocat: quorum & pietatem, & in reducendis ab errore hominibus diligentiam probabat; quamquè eò magis necessariam futuram ibi iudicabat; quò maior in hominibus illis ac maximè agrestibus non modò diuinarum rerum omnium ignorantia, sed impietas tanta esset; vt cum ad colendos agros hominibus non abundarent, plebs rusticana moribus suis ad proprias vxores, communes alias filiis infantibus duceret; cum his, quò pluribus liberis domum complerent, interim concumbebant, filiisque deinde, postquam ad iustam ætatem ij peruenissent, eas tradebant, fossas munitionesquè ab exercitu institutas Vngarum militem complere iubet. Murorum partem deiectam, quomodo restitui velit, arcemquè ipsam qua ratione muniri, demonstrat. Pecuniam, quæque alia vsui sint ad eam rem designat: præfectos constituit. Regebatur Polotia antiquitus, quemadmodum & Kiouia à

uia à legatis regiis : Palatinorum honore ac dignitate ,
 cum per vniuersam Lituaniam non plures quam duo
 Palatini, Vilnensis ac Trocensis, totidem Castellani es-
 sent, carebat. Postea amplificato senatu Lituanico, non
 modò Polotiæ & Kiouix ducatus, sed & Vitepscia di-
 gna visa est, quæ à Palatino administraretur. Polotiæ Pa-
 latinus erat, cum à Mosco caperetur, Stanislaus Douoi-
 na; qui cum vxore Petronia è domo Radiuilorum in
 Moscouiam abductus, cum per aliquot annos in serui-
 tute & compedibus vitam traxisset, non prius indè re-
 diit, quam ab Sigismundo Augusto, vxore eius in capti-
 uitate mortua, aliquot aureorum millibus redimeretur.
 Cum de coniunctione inter Polonos ac Lituanos sub
 Sigismundo Augusto conuenisset, ac quò Lituanico-
 rum senatorum numerus Polonicum æquaret, complu-
 res per Lituaniam Palatini ac Castellani creati fuissent;
 quia agri Polotiensis non nihil in potestate adhuc erat,
 ad Palatinum Castellanus etiam adiectus fuit. quo tem-
 pore in illa Mosci ex eorum temporum successu non in-
 factis modò, verum dictis etiam insolentia id quoque
 non irridiculè ab eo dictum perccebit: nihil Augu-
 stum Regem ex capto Palatino incommodi accepisse,
 qui pro vno quinque iam haberet: decem pro duobus
 habiturum, si ad priorem palatinum alterum ei aufer-
 ret. Douoina quoad vixit, titulo ac dignitate Palatini
 vsus interregni tempore decesserat. Cum in regnum
 Rex venisset, annitentibus Lituanis, ne suorum senato-
 rum numerus minueretur, Nicolaum Dorohostaisium
 Palatinum Polotensem crearat. Eidem nunc Polotiam
 administrandam commisit: Horodnicium quem illi
 magistratum vocant: quique arcis munitionum curam
 habet, Francisco Suko tradit. præsidium ex equitatu pe-
 ditatùque qui quotque permanere debeant, describit.
 Sigismundus Augustus nobilitati Ducatus Polotiensis,
 quæ

que bonis exuta à Mosco fuerat, aliis in locis bona possidenda ea lege dederat, ut si quando recuperatus ager is ab hoste foret, iis rursus cederent: Rex bonis eorum illis restitutis, hæc ad sexennium nihilominus, dum sua ab hoste vastata rursus excolerent, permisit. Milecius interim Sokolam cum exercitu, ut dictum est, contendens in itinere cum viarum proximis pluuiis inundatarum, tum commeatus maximis difficultatibus afficiebatur. Tormenta Rex Dunam secundo flumine Dryssam usque ad cognominis castello illi fluminis cum Duna confluentem demiserat; ab eo loco per Dryssam Sokolam usque trahebantur. Cum ad Sokolam fluuius Dryssa etiam nonnihil exercitum moraretur; quod ponte, quem Kaunæ ex nauibus factum supra ostendimus, alter ad Polotiam exercitus in transuehendis commeatibus uteretur, nec alterius tam subito expediendi ratio iniri posset, Ioannes Sbarassus Palatinus Braslauiensis cum parte equitatus flumen tranat, auersusque à Sokola parte Plescouiam versus in excubiis confidet. ad reliquum exercitum traducendum Nicolaus Vrouecius claro loco natus equitum præfectus operam suam Milecio detulit, rateque ex robustissimis trabibus, iisque catenis ferreis aliisque firmissimis vinculis inter se deuinctis ab eo effecta, exercitus transductus fuit; nihil aliud hoste moliente, cum non difficulter transitu impeditos prohibere potuisset, quam quod excubie eorum more suo ad terrorem nostris faciendum obequitantes diuersarum gentium, quæ sub imperio Mosci sunt, Kasanorum, Astrakanorum, aliarumque nationum copias suo quasque nomine citarent. Propter viarum malignitatem & iumentorum proximis ad Polotiam incommodis amissorum inopiam currus miles nullos secum deuehere potuerat. Itaque non metatis castris, fixis tantum secundum Dryssam flumen
tentq-

tentoriis confedit. Germanicus peditatus secundum
 Dryssam, Polonicus versus Nissam fossas munitionesq;
 quæ diuersis locis cœptæ deinde committerentur, ad
 castrum agere instituit. Hostis, quod nostrorum non a-
 deo magnum numerum videret, & cum superioris ob-
 sidionis tum itineris incommodis debilitatos: suos om-
 nibus rebus integros, simulato metu, quemadmodum
 ex captiuis postea cognitum fuit, intra munitiones per
 noctem se continere, curatisque interim corporibus o-
 mnibusque rebus ad eruptionem paratis ante lucem e-
 os adoriri in animo habebat. Fortè accidit, vt Dobro-
 solouius, qui tormentis à Milecio præpositus fuerat, tres
 globos candentes, quorum supra rationem demonstra-
 uimus, experiretur. Ex his duo cum incendium fecis-
 sent, ab hostibus suppressi fuerunt: vnus cum imo fun-
 damento adhæsisset, non animaduersus haud multo
 post, quod muri ex abiete & arida materia facti essent,
 latissimum incendium sustulit. Quod cum Milecius con-
 spicatus signum tuba, quo ad arma capienda omnes
 conuocarentur, mox dedisset, Mosci inopina re turbati,
 simulque nostros irrupturos existimantes, cum restin-
 guere incendium non possent, ac tantum repentini pe-
 riculi obiectum esset, diuersis portis trepidi se effun-
 dunt. Scremetus cum parte equitatus Pleseouiam ver-
 sus se recipiens in Ioannem Sbarassum Palatinum Bra-
 slauensem, qui ab ea parte hostem obseruabat, incidit.
 viusque cum iis, qui circa illum erant, in potestatem eius
 peruenit. Qui ab altera parte cum Borissouo Seino se
 ciecerant, in Germanos inciderunt. Hi cupiditate vici-
 scendi tot annorum iniurias, quibus in nomen Germa-
 nicum crudelissimè Moscus sæuisset, cuiusque recens
 exemplum nuper capta Polotia vidissent, omnes in iis-
 que Seinum interficiunt. Qui reliqui in arce erant, sup-
 plices vitam rogare cœperunt: sed irrumpente milite

G

Germa-

Germanico ac omnes promiscuè cædēte, desperata salute cataractam, quæ ex superiori loco portæ imminebat, demittunt: conclusosque in arce ad quingentos milites Germanos interficiunt. Interim Rosdraseuius Germanique quidam ac Poloni impigrè portam effringunt. qua patefacta tum verò pars cæsa fuit, pars rerum omnium desperatione adducta vltro in ignem se præcipitans conflagrauit. Magna vbiq; cædes fit; vt multi, ac præter ceteros Veierus veteranus præfectus, cum se multis prælijs interfuisse dicerent, nusquam in vllius prælij loco densius strata constipataq; inter se cadauera se vidisse confirmare non dubitarent. Multi inter occisos obeso corpore erant: ijs focariæ Germanorum apertis corporibus ad notas vulnerum medicationes, ac in his Seino quoq; adipem detraxerunt. Hinc Moscus epistola quadam sua, de qua infra dicemus, ad Regem scripta, inter alia cum hoc, tum quòd candentibus globis in oppugnando se vsus esset: alterum tanquam immane crudelitatis facinus, alterum quasi non virtute atq; acie, sed artificio quodam contra se niteretur, Regi exprobrat. Etiam in præda operæpretium factum fuit; argentiq; signati apud plerosq; Boiarici generis referti loculi reperi, militem superioribus incommodis attritum non refecerunt modò, sed & locupletarunt. Milecius cum exercitu ad Regem reuersus magnum captiuorum numerum, quorum partem publice Regi, partem amicis donauit secum attulit. Rex præfectis plerisq; centurionibusq; ac militibus etiam, quorum paulò insignius facinus extitisset, cum præfecturis, quæ tum vacabant, tum alijs militaribus donis ob virtutem donatis, quæ in quæq; statiuâ copiæ ducendæ essent, præscribit. Indè Disnam proficiscitur. Hic quod vltèrius in Moscouiam proximo anno bellum promouere constituerat, tormenta omnia, præter ea, quæ refectione opus haberent, relin-

relinquit. Indè literas ad Moscum mittit; quibus ipsius instituto, quo ille post Liunioniam vastatam vsus fuerat, de successu expeditionis certiorum eum facit. Hæ eo tamen argumento scriptæ erant; vt non tam successu rerum secundarum efferri, quàm tot hominum innocentium clade commoueri se testaretur; eiusq; rei causam omnem in Moscum ac illius in se iniurias conferret. Dum ad Polotiam Rex erat, legatio ab Henrico Ordinis Teutonici magistro eum conuenit. Initio regni cum huiusmodi nonnullæ difficultates Regem excerpissent; quæ quominus in tempore bello Liunionico occurreret, prohibeturæ eum viderentur; Radiuilus Palatinus Vilnensis, qui tot annos tanto cum sumptu ac periculo sine vlllo fructu in Liunionia bellum geri videret, Adolphum Holsatiæ Ducem excitarat, qui fiducia rio seu feudi iure Liunioniam à Rege peteret, defensurumq; se in ea bellum contra Moscum polliceretur. Huius æmulatione Ioannes Chodkeuicius Castellanus Vilnensis Magistro ac ordini militiæ Marianæ Teutonice idem ostentarat; missusq; ab eo Ioannes Taubius Liuo illi persuaferat, si peteret, traductis in sententiam per largitiones primarijs aliquot senatoribus, non magno negotio eum assecuturum. Rex primò Vilnam legatis reiectis, in comitijs hisce de rebus agendum ijs ostendit: mutui interim mentione extra conditiones iniecta, quod in bellum hoc princeps eorum conferret: qua de re cum illi mandata nulla se habere dicerent, ad principem autem suum relatuos se recepissent, Varsovia deinde missione flagitata, nulla alia re acta discesserunt. Rex consensu Disnæ nauigio, secundo Duna non parum fluminis eius amœnitate delectatus Drucam: indè terrestri itinere per Braslauiam Lituanicam Vilnam venit. Accedenti Andreas Caligarius legatus Pontificius tum complures ex nobilitate obuiam pro-

fecti fuerunt. Ciuitas Vilnensis tota in gratulationem effusa, compositaq; oratione illum excipiens, duobus è locis maximè ante hac securitatem ac negotia sua interpellata commemorabat; vno à Polotia, altero à Kokenhausio. illud incommodum benignitate diuina, ac virtute sua Regem amouisse: alterum quoque vt à cervicibus suis remoueret, se illi precari. Inter alios Mosci quoque dediticij obuiam ei progressi panem ac salem, quibus suum principem venerari in more habent, ei offerebant. Moscus nuncio amissæ Polotiæ ac præsidij Sokolensis cæsi accepto, Plefcouia in interiorem Moscouiam se recepit; ac re ipsa fortè tum perspiciens, vnicum regni robur fortes ac fideles populos esse, ex itinere ad eos, qui Susæ in præsidio erant, literas præter morem eius scriptas misit, easq; diuersis perferendas dedit: Intellexisse se Polotiam ac Sokolam Dei permissu in hostium potestatem peruenisse: qua re cum vndiq; eis interclusis non facile subsidio veniri possit; hortari vt tormentis præsertim ac puluere reliquoq; belli instrumento, quod secum deferre non possent, corrupto: imaginibus & sacris, ne à barbaris: eo enim ille numero omnes, qui in religione ab eo dissident, habet: ludibrio habeantur, in terram defossis, quacunq; tuta ratione se recipiant; non quòd de fide eorum dubitaret, sed ne virtutem eorum, quam ad maiora superstitem esse velit, fortunæ ac hostium crudelitati obijciat. Peruenerunt hæ literæ ad Milecium, qui de tormentis potissimum ac apparatu bellico sollicitus, qui ad deditionem hostes hortaretur, misit. Eadem autem cum in Palatinum Polotensem etiam incidissent, ipse quoq; eò accurret. Hostes pacti, vt singulis cum vestimentis discedere sibi liceret, castrum tormentaq;, & quicquid in eo apparatus bellici erat, tradiderunt. quibus rebus perfectis Milecius in tres partes exercitum distributum in hiberna deduxit.

deduxit. Primis Christophorum Niscicium legatum: alteris Martinum Kasanouium: tertijs Sigismundum Rosnium præfecit. Iam antè Constantino Ostrogiaë Duce excursionem in ditiones hostiles, quæ ad Borystenem pertinent parante, Nicolao Seniauiio stationum Russicarum præfecto, Rex mandârat, vt cum ijs copijs, quæ in Russiæ finibus sub imperio eius excubabant, cum illo se coniungeret; inq; hosticum à Kiouia transgrediretur: verùm Seniauiio longinquitate locorum impedito, & adulto iam autumno, non prætermittendum id gerendæ rei tempus Dux ratus, collectis ex clientibus suis, quorum satis magnam copiam habet, aliquot millibus hominum, alijsq; ex iuuentute compluribus se ei adiungentibus, cum filio Ianusio & Michaële Visnouecio Castellano Braslauiense Borystenem transgressus fuerat: expeditissimisq; quibusq; turmis præmissis, ac his longè lateq; vagari, & terrorem in omnes partes circumferre iussis: ipse cum reliquis copijs Cernkouiam vsq; excurrerat: quam castris metatis magna vi oppugnare aggressus, cum præsidio firmo eam teneri, idq; & animis & omnibus rebus alijs ad defendendum locum paratum esse videret, se à peditatu tormentisq; imparatiorem accessisse: reliquas copias maximis itinerum & tempestatum incommodis afflictas, missa obsidione vicina circum loca omnia diripuerat, totaq; Seueriensi ditione vastata, ac populationibus ad Starodubam, Radchoftiam, Pociopouiam vsque per leuiiores equitum turmas factis, præda ingenti acta discesserat. Simili successu Ioannes Solomirecius, qui post mortem patris extra ordinem Micislauiensem præfecturam administrabat, Iaroslauum opidum, pagosq; complures diripuerat. Philo etiam Kmita præfectus Orsanensis, cui turmæ aliquot equitum assignatæ erant, coacta ad eas non mediocri finitimis è locis cuiusq;

iusq; generis hominum manu inditiones hostiles transgressus, duobusq; circiter millibus pagorum incensis, ac ad Smolenscam populationibus prouectus, præter agri solum nihil ijs in locis reliquum fecerat; indeque magna cum omnis generis præda, nullo detrimento accepto suos reduxerat. Rex cum alijs necessarijs de causis maximè verò vt bellum persequeretur, comitia habenda sibi intelligeret, eaq; iam in ante diem vicesimam tertiam Nouembris Varsauiam indixisset: interim, quæ ad Lituaniæ securitatem pertinerent, quæq; in omnes casus contra hostium impressiones opponenda iudicabat, cum senatoribus Lituaniæ constituit. qui eorum præsidio prouinciæ domi remaneant, qui comitia obeant, inter eos comparat. Vilnæ Radiuilum Palatinum Vilnensem, qui cum imperio militari erat, relinquit. simul magistratus, qui vacabant, distribuit. Quibus Radiuilos præ cæteris complexus ad Episcopam Vilnensem, quæ Georgio Radiuilo designata iam antè erat, Palatinumq; ac imperium summum militare, alterum item prætorij militis, quorum illud Nicolaus pater, hoc Christophorus filius obtinebant, Christophoro Castellatum Trocensem, & sigillum minus adiicit: Noogrodensem Palatinum alteri Palatini filio Nicolao; vtrunq; præterea Marschalchatum, Nicolao Christophoro maiorem, minorem Alberto alterius Nicolai, qui ante hunc Palatinus Vilnensis fuerat filijs: Castellatum Vilnensem Eustachio Volouicio, qui Castellanus Trocensis fuerat vnà cum sigillo maiori dat: abdicante se eo Palatino Vilnensi, vt minus quod Volouicius habuerat, filio Christophoro traderetur. Præfecturam Samogitiæ quæ ardentibus multorum studijs amiebatur, Ioanni Kiskæ confert. Vilna inde Grodnam mouet; vbi venationibus, quo vno voluptario labore ex alijs laboribus maximè reficere se solet, dies aliquot dat.

dat. Moritur ibidem Gaspar Bekeſius, de quo ſuprà dictum eſt, non minùs inimicitiiſ, quas cum Rege acerri-
mè olim exercuit, quàm virtute ſua clarus. Natus hic in
Transilvania, ac in familia Petrouicij nobilis Baronis
educatus, adulta poſtea etate Ioanni Sigismundo Tran-
ſilvaniæ principi adeò gratus exitit, vt cum ſine hære-
de decederet, hunc ſucceſſorem designare non dubita-
ret. Cum Rex popularium ſtudiis, prælatus ei fuiſſet, æ-
mulatione inter eos exorta, dum ſtatum Transilvaniæ
turbat, Fugaraffio atque aliis caſtellis à Rege exutus ad
Maximilianum Imperatorem in Germaniam ſe contu-
lerat: vbi copiis aliquot coactis vi deinde ac armis inua-
dere principatum conatus fuerat. Verum proſtigatus à
Rege iterùm in Germaniam ſe receperat. Poſtea cum ad
Regnum Poloniæ æmulum aſcitur, iamq; extra om-
nem inuidiam altiorem in locum virtute conſcendiſſe
intellexiſſet, conſcius ſibi magnitudinis animi eius, v-
num elegerat; cui & maximè ſe crederet, & à quo com-
moda ornamentaq; omnia expectanda ſibi ſtatueret;
ſuamq; illi fidem atque operam vltro detulerat. Rex-
q; non modò omnem erga illum offenſionem ex ani-
mo depoſuerat, ſed benignè ſuſceptum, opibus etiam
ac dignitate amplificauerat. Moriens coniugem & du-
os impuberes filios Regi ac Samoſcio commendauit.
Dum hæc geruntur, in Polonia non iidem omnium ſen-
ſus, variiq; ac diuerſi animorum motus eſſe. Erant non
pauci, qui cum ampliſſima quæq; à Rege polliciti ſibi
fuiſſent, ac verò in tanta publicarum rerum difficulta-
te non poſſet vel effuſiſſima Regis liberalitas omnium
expectationi ſatisfacere, quòd quæ ſperauerant, non
conſequerentur, alieniori ferè animo ab eo erant. Cum
q; quilibet è nobilitate in electionibus Regum ſuffra-
gium ferat, magna erat multitudo eorum, qui quòd
ſuffragio ſuo in adipiſcendo regno Regem ſubleuaſ-
ſent,

sent, ipsum Regnum debere cum sibi arbitrabantur: videntefq; Radiuilos tot honoribus auctos: Milecio summae authoritatis magistratum traditum: ijs Samosci-um necessitudine coniunctum: tot honores ac dignitates coniunctis inter se affinitate hominibus congestas, angebantur animo, eaq; in suam perniciem comparata interpretabantur; & quod beneficio non afficerentur, iniuriam rati, summa in ea rep. facultate, in qua quæ quisq; sentit, pari libertate dicere possit, omnia suspecta facere, cunctaq; vel præclara facta Regis sinistrè interpretando corrumpere conabantur. Iam ab initio cum Leopolim Russicarum rerum causa proficisceretur, non deerant, qui collecta gaza à Sigismundo Augusto relicta tedio presentium in Transilvaniam recipere se eum in vulgus fingeret: postq; Suirum diem exercitui edixisse eum intellexissent, nihil horum gerendi quicquam contra hostem animo suscipi, cuius potentia maior esset, quam ut ullius viribus labefactari posset: sed quæri colorem tributarias pecunias, quas in immensum oratione tollebant, interuertendi iactabant. Nonnulli altius prouecti Reginae animum tentare coeperant: ostendere sperni ætatem eius à Rege: diuortium ab eo agitari: missum ea causa Petrum Volscium Episcopum Plocensem ad summum Pontificem: non minus eius regnum esse, quam Regis, ut quæ & ipsa tanquam vetustæ Iagellonicæ stirpis ac de regno optimè meritæ prosapia iisdem comitiis Regina appellata, iisdemque regni sacris initiata fuerit; quo illa in partes traducta gratiosum ad vulgus nomen nacti, eò maiorem facultatem rempu-
turbandi, ac consilia regis impediendi haberent. Querebantur ferè, non satis fieri conditionibus à Rege, cum regnum ei defferretur, in Transilvania acceptis: homines aduenticios in honoribus & præfecturis collocari; Bekesium potissimum, cui Landskoro-
nensem

nenſem præfecturam Rex contulerat, notantes. Ad-
hæc Duccem Churlandiæ non ſuo loco & tempore de-
terioribusque è republica conditionibus quàm antea,
poſſeſſioni Ducatus eius confirmatum traducebant.
Quæ cum pleraque tempus refutaſſet: maximeq; Leo-
polienſem profectionem, Suirenſemque expeditionem
faſſiſſimè in inuidiam vocatas aperuiſſet, literis de co-
mitiis allatis, iurgia inter nationes Polonicam & Vnga-
ricam exorta in maius exaggerabant: externos homi-
nes induci: à quibus contemni imperium militare: vim
ſummi magiſtratus eneruari: Iam capta Polotia noua
tributa Regem in conuentibus & comitiis petiturum:
ſed vt omnis Moſcouia in poteſtatem ditionemque ve-
niret, in tanta amplitudine finium, quam tantæ molis
adminiſtrandę rationem, quam vtilitatem fore, cum in-
terim longè magis neceſſariam præſtabilioremq; reip:
vulnera curationem requirerent? Quidam vt tres par-
tes prouentuum capitanealium à præfectis exigeret,
Auguſtanæ cuiuſdam conſtitutionis, quam illi in eam
ſententiam interpretabantur, authoritate poſtulan-
dum cenſebant, cum ſi id fieret, perpetuò finem tribu-
tis id allaturum dicerent. quæ cum in vulgus moueri
Rex animaduertiſſet, ac liberiùs omnibus, quàm antea
occurrendum arbitraretur, primo, quo agi de rep: po-
terat, comitiorum die Ioannes Samoſcius Cancellari-
us, accommodata ad rem præſentem oratione: ſi vllum
tempus fuiſſet, quo pro maximis in remp: beneficiis nu-
mini diuino gratias agerent, id hoc potiffimùm eſſe do-
cet, quo tam præclaram victoriam ab eo hoſte adepti
ſint, quem propter ſummam potentia, virtutis bellicæ,
victarumque ab eo gentium opinionem, formidaſſent
omnes: nemo vinci potuiſſe exiſtimafſet. Contigiffe id
tamen ſingulari benignitate diuina: hoſtem non mo-
dò victum: ſed prouincia Polotia, quæ victoriæ huius
perpe-

perpetuum monumentum futura fit, ac superiorum victoriarum eius dignitate spoliatum penè esse: omnes eius triumphos, quos per tot annos de Liunionibus & Suecis, quos de Kasanis & Astrakanis subactis, quos de Tartaris, de Turcis denique Tanaim & Volgam iungere Caspiumque mare in Euxinum Pontum immittere tentantibus, deque tot aliis bellicosis & barbaris nationibus habuerit, hac victoria ei detractos in hoc de illo triumpho prælatus iri. Quæ cum quanta sint, inquit, erga nos Dei beneficia intelligamus omnes, eadem nisi constantia ac virtute tueamur, inertia nostra fructus ex iis percipiemus nullos, ex quibus si rectè benignitate hac diuina utamur, maximos percipere possumus. Magnum est, quodque superioribus temporibus vix sperandum nobis videbatur, amplissimum agrum ab hostibus tot annorum spatio possessum, & quo maxima ex parte opes Lituanicæ quondam niterentur, receptum: hostem tot prosperarum rerum successu elatum in perpetuo victoriarum cursu repressum: auersa arma eius in vastitatem ac perniciem ditionum harum intentata. Omnia hæc nisi reliqua, quæ restant, belli eius perficiamus, vereor, ut non modò utilitatis nihil nobis attulisse, sed ne optanda quidem tanto cum labore ac sumptu fuisse videantur. Hostem habemus potentissimum: cuius quæ quantæque opes sint, & nemo ignorat nostrum, & tot deuictæ ab eo nationes testantur. Hunc moderatène vel hanc amissæ provinciæ contumeliam ferre vel quieturum putamus? Fremit ille iam, & tamquam fera aliqua intra septa conclusa omnes amissa recuperandi, & acceptas iniurias vlciscendi exitus ac rationes quærit. Demus huic vel cunctatione nostra vel pace cum eo facta, colligendi sui, acceptaque incommoda ac domestica vulnera, atque inscientiam eius, quæ hoc bellum nudauit, sanandi spatium; quis

quis omnium tam securo est animo, qui non multò maioribus viribus ad sarcienda incommoda irruiturum in nos prospiciat; quem nec propter potentiam difficultas vlla à bello reuocare: nec in pace propter perfidiam vlla iurisiurandi religio retinere possit? Serò nimirum resistendi ei rationes tum queremus, quem iam trepidum & perculsum si non leui momento impellere, facilius certè superare possimus. Quod vt non esset nobis verendum, illumque accepta iniuria vel omninò quieturum, vel nihil ab eo periculi expectandum nobis esse Deus nobis fidem faceret: Quis enim alius tantæ rei idoneus author existat? at nōne tanta gloria bello hoc parta, quæ deinceps de nobis hominum existimatio futura sit, commouebimur? aut vlla ratione opinionem bello hoc collectam tueri nos posse, si in tantas res gerendas ingressi in medio earum cursu destituere eas videamur: quenquam deniq; futurum existimabimus, qui non fortunæ potius successus hosce, quàm virtuti tributurus sit? Sunt enim quæ virtute ac ratione administrantur, cum exigua iis fortuna interueniat, eorum & media primis & exitus vtrisque consentanei: fortunæ vt cæci sunt impetus, ita vltima rarò primis respondentia. Quod sunt, qui in tanta ditionum amplitudine difficultatem earum administrandarum verentur, nec expetendum latius imperium putent, quod sumptu ac labore magno partum, reip: vsui nulli esse possit; mirum sanè videri debet, eo in rep. animo quenquam esse, quo in sua sit nemo. Quis enim omninò est, qui non decem possessiones, quàm vnā malit? grauiora sunt onera amplæ rei familiaris: eadem maioribus commodis opportunitatibusque pensantur. Reipu: verò nostræ ego hanc rationem esse video, vt si nervos rerum gerendarum habere, si statum hunc ciuitatis tueri velimus; nouum omninò regnum necessariò ei adiungendum sit.

Nam

Nam cum ditiones omnes, quæ ad eam accesserunt, in ciuitatem iisdem legibus receptæ sint omnes; nulla in prouinciæ formam redacta; nulla tributaria facta: itaque in pari omnium libertate, onera etiam exæquata sint inter omnes; iis si leuari volumus, quàm eius rei facultatem habebimus, nisi instituto maximorum quorumcumque imperiorum, nos etiam nouum ei imperium adiiciamus; in quod tributis vectigalibusque in eo constitutis, grauior communium onerum pars deriuari possit. Erat Russia antè, cum primum armis victa esset, tributaria: non parum tum subsidio eius subleuata respub: fuit: Lituaniæ quoque magnum Ducatum, cum antiquis legibus à Regibus Poloniæ regeretur, plurimum per seipsum ad submouendum Moscum, Tartarumque valuisse meminimus: coniuncto eo cum regno, quantum ad publica onera accesserit, sentiendo vnusquisque experitur. Quod si qui inopiam ac familiaris rei angustias inertiae suæ prætendendas existimant; ij si voluptatibus, luxuriæque modum faciant, ac quos in inanes vel perditas res sumptus prodigunt, in meliores vsus conuertant, vel præclarissimarum quarumcumque rerum gerendarum necessariis adminiculis minime se destitui re ipsa perspicient. Alios, qui domesticas res constituendas arbitrantur, non reprehendo: si tamen cogitent iidem, præterquam quod intestinorum incommodorum sanatio semper potestatis eorum futura sit, oportunitatem belli aduersus Moscum, qualem nunc habeamus, non semper nos habituros; potiore etiam salutis quàm aliarum rerum curam esse debere. Sunt & qui minus hæcenus satisfactum sibi existiment. Habent ij nunc campum cum virtutis suæ illustrandæ tum demerendi Regis: proficiscantur in bellum: operam studiumque suum reipu: præstent; àque virtutis amantissimo Rege amplissima quæque expectent:

Etent: si vel ætas, vel valetudo, vel fortuna cuiusquam
 id non permittunt, non desunt rationes in togata etiam
 ac ciuili vita bonis artibus emergendi: obtrectationi-
 bus, ac preposteris remp: turbandi studiis nemo, quæ vir-
 tuti, ac bonis artibus debentur, præmia consecuturum
 se speret. Hac oratione habita, & si minimè nuncij dubi-
 tabant, quin & bellum & tributum vltèrius sciscerent;
 quòd in priuatis conuentibus victoriæ hoc successu læ-
 ta, ac in spem futurorum erecta, frequens in eam senten-
 tiam nobilitas inclinàrat: tamen vt aliorum de se opini-
 oni satisfacerent, ex iis, quæ publicè iactari animaduer-
 tissent, cùm de aliis quibusdam tum de conditionibus;
 quibus non satisfactum à Rege diceretur, & de ære præ-
 fertim alieno publico dissoluendo mentionem inferūt.
 Docebatur, si quas antea in regnum pecunias ad tuen-
 dum, dum veniret, regnum Rex præmisisset: quas secum
 attulisset: quas in militem, qui ante aduentum eius me-
 ruerat, erogasset: in sedandos motus Gedanensium: in
 hoc ipsum denique bellum de priuata sua insumisset;
 expenderent: si quid deinceps facere institueret, consi-
 derarent, vt nihil nimirum priuatum, nihil à publico se-
 cretum haberet, verùm omnia sua, ac vitam ipsam reip:
 impendere non dubitaret, facile constiturum, rectè ne
 quid in illo resp: desideraret. Nam quod ad vectigalium
 quorundam luitionem pertineret: si priuati commodi
 sui fructum aliquem sequeretur, satis perspicì, longè
 maiori cum emolumento eius futurum; si in eas res,
 quarum prouentus non exiguus sit, redimendas, quàm
 in bellum pecunias conferret: verùm ita animo para-
 tum esse, vt in præsentì reipub: periculo, priuatum emo-
 lumentum publicæ vtilitati ac dignitati postponere
 mallet. De tribus capitanealium prouentuum partibus
 ab initio cùm proposuissent, responsum fuit, non con-
 tineri id verbis constitutionis Sigismundi Augusti, nec

H

contra

contra leges publicas, quibus à verbis constitutionum recedere prohiberemur, in eam sententiam verba trahenda, quæ nobilitatem omnibus virtutum præmiis spoliata in agros atque familiaris rei studia cogeret. Quem enim posthac fore, nisi iis præmiis ad virtutem excitetur, qui operam suam in bello, in legationibus, in publicis muneribus obeundis reip: præstare velit; qui nullis commodis propositis, dignitati ornamentisq; patriæ seruiat? Cum & de militaris imperij imminutione exterorumq; honoribus agitatum fuisset, ostendit Rex, nulla se in re magistratus eius authoritati derogatum voluisse: præfecisse se Bekesium Vngaris, non vt sua authoritate bellicarum rerum quid administraret: sed vt Ducis imperio subesset, interpretisque munere ad militem Vngarum apud ipsum fungeretur: externo milite necessitate adductum in bello hoc vsum, quod regnum hoc vt equitatu non modò comparari cum cæteris regnis posset, verum plerisque ferè præstaret: ita à pediatu minus instructum adhuc esset: aliorum exterorum opera in Transiluanicis rebus, ac priuatis ministeriis se vti. Multa de hoc genere, vtendùmne opera exterorum esset, cum inter nuncios nobilitatis disputata, tum à senatoribus ipsis multa in eam sententiam dicta fuerunt, non esse improbandum, si qui pro aliena rep: periculum ac laborem suscipere, sanguinemque pro laude ac dignitate eius profundere velint: non esse sapientis, quòd exterorum periculo consequi possit, ciuium sanguine quærere velle: hac ratione maxima imperia primùm coaluisse: indèq; ad summam amplitudinem prouecta esse: hoc ipso in regno multas primarias familias ab exteris profectas esse: inter alias clarissimam Tarnouiorum domum ad externos originem suam referre: alliciendos potius, qui suam virtutem ad reip: dignitatem aggregare velint: posseq; id commodo reip: fieri:

mo-

modò id prospiciatur, ne vel legibus vel magistratibus à ciuium corpore se sciungant, sed iis vtrisque vnà cum reliquis ciuibus pareant; vel eò potentia excrecant, vt ciues ipsos opprimere possint; vel honores iis mandentur: sed illi quidem in priuatis ministeriis versentur, publicis honoribus, ac magistratibus soli ciues præsint; quodq; in aliis rebus: obseruatum sit, agris ac eius generis commodis virtus eorum interim remuneretur; in honoribus capiendis ciuium præcipua conditio sit. Silentium indè ea de re fuit: peditem quidem externum nemo erat, qui necessarium esse negaret. De Churlando ostensum, Ducatum eum à Sigismundo Augusto Rege: cum Liuania primùm ad regnum se adiungeret, longè grauioribus è rep: conditionibus Duci collatum fuisse: rectè atque ordine, quod priorum regum auctoritate iam antè affectum fuerit, meliori reip: lege à Rege transactum; quod diploma ipsum prolatum testaretur; itaque nihil alienum à moribus & exemplis maiorum factum, quibus omnium temporum receptum fuisset, vt quæ à superioribus regibus feuda constituta iam essent, ea posteriores, si nihil in iis mutarent vel adicerent: noua etiam, si quæ ipsi adiunxissent iniussu ordinum senatus consilio adhibito conferrent. Legationis Episcopi Plocensis cum in senatu mentio facta esset, causa eius vulgata, quæ iam in prioribus comitiis in senatu proposita fuerat, suspicionem diuortij agitati & ipsam sustulit. Ita nullo repugnante, quod priori anno sancitum fuerat, in hunc denuò tributum iubetur. Præfecti consilio inter se habito reddituum præfecturarum suarum alteram quartam, qualis Rauam in ærarium publicum inferretur, vtrò Regi detulerunt; conditione adiecta, ne auctoritas perscriberetur, vel in exemplum deinceps traheretur. Postulatum inter alia à Rege fuerat, vt per legatos bellum gereret, ipse à periculo ar-

morum abesset ; quod cum animi sui magnitudine indignum Rex iudicaret, ostensum præterea fuit, quò plures voluntarij, si in conspectu regis operam nauaturi essent, inuitarentur ; ac ad minuendas controuersias, quæ ex Polonicorum & Lituanicorum magistratuum emulatione existere possent, præsentiam eius non modò utilem sed penè etiam necessariam futuram. Leges in comitiis hisce cum aliis de rebus, tum quæ ad feuda beneficiariorum principum, ad imperium militare, pœnasq; scelerum pertinerent, à delectis ex utroque ordine conscriptæ quædam, non tamen perlatæ fuèrunt. Id solum Nisouiorum in officio continendorum causa, literis quibus tributum promulgabatur, adiectum fuit, ut usq; ad futura comitia extra ordinem animaduertendi in eos potestas Regi esset. Constitutum superioribus comitiis fuerat, ut qui reipub: causa in bello abessent, iudicia interim in illos nulla redderentur ; nisi contra quos vel rerum iudicatarum executio peteretur : vel qui vim fecisse dicerentur : aut qui ad certam diem de pecuniis non solutis iudicium se suscepturos cauissent. Exceptiones hæc variis calumniis in perniciem reorum nonnulli conuertebant : modò maiorum lites in eos, quos arripuerant, torquendo : alias longissimi temporis spatio penè intermortuas suscitando. Itaque interpretatio in hisce comitiis adiecta fuit ; eæ ut causæ rei iudicatæ atque vis solæ exceptæ intelligerentur, si quæ recens iudicata aut facta diceretur : obligationes autem in diem certum conceptæ, quæ intra proximum decennium interpositæ essent. A comitiis Rex Milecium, qui ab iis abfuerat, ut ad sequentem expeditionem se paret, operamque in bello eo nauet, per literas hortatur : ille excusat. Dum Varfauia Rex est, nuncium redactæ in potestatem Niscerdæ, de qua supra diximus, accipit. Moscuscum primò Polotiam cepisset, nobilitatem, atque

ex agris plebem omnem in Moscouiam deportarat: postea inueterata iam agri eius possessione, spatio temporis amorem pristini dominij exuisse eos ratus, nonnullos, ac in his Kossonium quendam non corpore modo, verum animo etiam ultra agrestem valente, cum filiis fratribusque itidem robustissimis hominibus pristinis sedibus reddiderat. Hic statim ac in potestatem Regis Polotiam rediisse intellexisset, quomodo cum aliquo munere ad prius imperium rediret, cogitaret. Kosakkis Polotiensibus, quo statu hostium res Niscerdę essent, ostenderat. cumque hi eo, quod illis constituerat, tempore, missu Palatini Polotiensis Niscerdam accessissent, munitionesque, quemadmodum à Kossonio acceperant, nec dum perfectas reperissent, sine negotio potiti ea fuerant. Kossonius nihilominus more suo inter Moscos fortuitum Kosakkorum aduentum existimantes, sine ulla suspicione versatus, Sauolociam eadem ratione tradere nostris voluerat. Iisdem Kosakkis diem, quo ad Sauolociam accedant, præscribit; seque turrim incendurum, ac dum ei rei Mosci intenti sint, in arcem eos inducturum, constituit. Sed re interim detecta cum duobus filiis in conspectu Sauolocię palo suffixus fuit. Sub idem tempus in Vtuiatę repentina excursione opprimendę spem Kosakki adducti fuerunt. Iis Nicolaus Sebridouius Floriani, qui Castellanus Lublinensis & prætorij exercitus præfectus olim fuerat, filius, cum hibernorum Vitepsciensium otium ferre non posset, se adiunxerat, relictoque equite fallendi hostis causa, per notas semitas à Kosakkis ductus eò excurrerat: præsidium custodijs & omnibus rebus firmatum repererunt. Hostes nihilominus subito aduentu eorum exterriti, subiectum arcis opidum incenderunt.

R. HEIDENSTEINII
SEC. REGII DE BELLO
MOSCOVITICO

Commentariorum

LIBER TERTIUS.



VARSAVIA GRODNAM PRO-
ficiscenti Regi, ac in futuram expe-
ditionem omni iam cura incum-
benti duæ potissimum difficulta-
tes occurrebant: rei pecuniariæ al-
tera, quæ tardius expediebatur: al-
tera delectus. prioris enim expedi-
tionis incommodis afflicti, iumentisq; ac instrumento
omni per tempestatum & itineris iniurias priuati, diffi-
cultates tam longinquæ militiæ pleriq; præ oculis ha-
bebant, ac ob id pauci omninò nomina dabant. qui e-
tiam ex his minus à bello abhorreere se videri volebant,
temporis tamen angustia, quo minus ad id parare se
possent, excludi se arbitrabantur. Pecunia vtitur partim
priuata sua, partim à priuatis mutuò sumpta, quæ ad
certam deinde diem solueretur. De delectu Samoscus
sibi curæ futurum promisit. Hic quamuis in togato
munere versaretur; tamen quòd patrem Castellanum
Chelmensem Prætoriano exercitui præfuisse, reliquos
etiam maiores suos plerosq; bellicis rebus claruisse me-
minisset, quòd gloriam à maioribus traditam retineret,
ac domestica hæc studia ipse quoq; non intermitteret,
& ante hæc semper, & in superiore expeditione mili-
tem aluerat, fortesque viros aliquot circa se habuerat,
& tunc communicata re cum Rege equitem peditem-
que scri-

que scripturum se professus fuit. Re vulgata, magna multorum animis alacritas innata fuit: passimq; à plurimis nomina data: Ad hos Vngarum militem à fratre Christophoro Transilvaniæ principe scribi curat. Cum ante hac peditatu non multum Polonia vteretur, propterea quod nobilitas ferè omnis equis merebat; pedestrem militiam, quæ laboris plus, dignitatis minus haberet, negligeret: atque ita peditatus omnis ex opidana plebe, ac operis præsertim constaret, genere hominum non modò rei militaris imperito, verum otio etiam opidano ad perferendum laborem belli corrupto: externus autem peditatus sine maximo sumptu alii non posset; superioribus comitijs ratio quædam parandi peditatus agitata fuerat, vt ex regiarum possessionum asscriptitijs vicesimus quisque in militiam reciperetur; qui ita in militiam venissent, ab oneribus operisque rusticanis ipsi posterique eorum immunes essent. Hoc delectu iam vti visum fuit, missiq; per agros centuriones præfectiq; passim fuerunt, qui robustissimum quemque ac labori militari ferendo aptissimum legerent. Grodnæ ex propinquo iam consilia belli agitare Rex instituit, ac Vilmæ interim tormenta, præter ea, quæ reparanda erant, noua suo modo alia fundi iubet. Propendebat iam Rex animo in magnorum Lukorum oppugnationem; quod tamen quò diutius hostem celaret, ex instituto Ciasniciam diem, quo conueniret, exercitui, edixit. Nam cum id opidum secundum flumen Vltam in capite duarum Lucensis & Smolenscensis viarum ita situm sit, vt paribus ab vtraque vrbe spatiis distet, ac Lukos quidem indè tendentib, Vltiata flumen: Smolenscam euntibus Kaspla se offerat, ad hostem anticipiti cura distinendum cum primis opportunum id videbatur. Suprà demonstrauius missum à Rege cum literis, qui de euentu obsessionis Polotiensis certio-

Moscum faceret. Humanius hic acceptus ab illo, quàm quisquàm antè eum, mensæ etiam adhibitus, ac bombicina veste donatus fuit. Eum autem priusquàm dimitteret, à duobus legatis suis Ioanne Theodori F. Novogrodiæ. Mikita Georgij F. Micislauienfi ducibus, & Romaniuicio Sacharino ad Nicolaum Radiuilum Palatinum Vilnensem, & Eustachium Volouicium Castellanum tum Trocensem literas dari iubet: cum controverfiæ duorum summorum principum eò progressæ sint, ut suscepto bello Poloniæ Rex Polotiam expugnarit: magnus Moscoviæ Dux vicissim ad vlciscendam hanc iniuriam toto animo exarserit; se cum reliquis primoribus ad principis sui pedes se proiecisse: omnibus precibus ab eo petiisse, ne in sanguinem Christianum sæuire velit: ijs illum permotum à bello adhuc sibi temperare: nunc idem ipsis atque aliis Regis Poloniæ consiliariis apud suum Regem contendendum esse, ut ad pacem stabilem cum magno Moscoviæ Duce constituendam eum flectant: inprimis ei persuadeant, ut & ipse cum milite regrediatur, & militi tam in Lituaniæ quàm Liuvoniæ finibus imperet, ne maleficio aut iniuria vlla Moscos laceffit: eadem magnum suum Ducem recipere: reuersurum ad sedes suas, suosque à vi & iniuria vbique cohibiturum: interea vtrinque elaborandum, ut missis oratoribus, pacéque & concordia constituta, depositis à principibus armis metu omnes liberentur. In extremo literarum excusant, quamobrem Basilius Lopatinskius, per quem bellum Rex Mosco denunciârat, adhuc detineatur: operam se daturos ostendunt, ut quàm primum ad sedes suas vterque reuersus fuerit, cum mandatis de pace sine mora ad Regem remittatur. Fecerat hoc Moscus exemplo Sigismundi Augusti temporibus à Lituanis introducto; qui si quando legatos Rex ad Moscum mittere destinasset, ad Moscovitic

cos proceres literas prius dabant, quibus ut à suo principe fidei publicæ literas oratoribus, qui venturi essent, conficerent, postulabant. Re deliberata, in hanc sententiam ab senatoribus, quos diximus Lituaniis, responderetur: diligenter se de pace Regem appellasse: illum ut Christianum principem pacem atque concordiam inter vicinos, ac Christiani præsertim nominis principes omnibus rebus potiores habere: bellum tamen cum id maximis illius in se iniuriis prouocatus non nisi pacis causa susceperit, tamdiu etiam dum æquæ pacis potestas à magno eorum Duce sibi fiat, gerendum sibi intelligere: legatos verò, ut quos ad principem eorum mittat, causam nullam ei videri: potius non committendum sibi censere, ut quos ex suis quemadmodum antè fecerit, iniurijs atque ludibrio eius obiciat: si ille legatos ad Regem mittat, patienter Regem quæ dicant, auditurum, atque æquo cum responso eos dimissurum. Haud multò post Moseus ipse cum eiusdem argumenti literis alium ad Regem nuncium mittit. Dimittitur is cum eodem responso, quod prior à senatoribus antè acceperat. Mittit nihilominus denuò aulicum suum Ioannem Nassokinum cum iisdem postulatis; qui cum & ipse in eandem sententiam publicè iam responsum accepisset, ostendit postea, alia se præter superiora mandata habere, quæ priuatim exponat: facta potestate commemorat, principem suum moueri plurimum clade hominum innocentium christianorum: qua de causa & si sciat contra suum maiorumque suorum morem id à se fieri: constituisse tamen de dignitate sua publicæ concordie id dimittere, ut de pace ipse legatos ad Regem mittat: id vnum postulare, ut induciæ interim sint, nec ulterius cum exercitu Rex progrediatur: legatos Vlnæ expectet; quòd id à maioribus quoque ipsius magnorum Moscoviæ Ducum honori
semper

semper datum fuerit, ut non nisi in regni ipsius, aut magni Ducatus Lituanie sede oratores eorum audirentur. Rex eodem omnia illa pertinere intelligens, ut tempus gerendae rei extraheret, respondit: si quos legatos mittere velit, dicendi quae velint, potestatem libenter se ijs facturum, benigneque auditurum. Quod certo in loco expectari a se legatos velit, nullo id ceterorum principum Christianorum exemplo peti. qui quandocumque visus sit, quemcumque in locum legatos mittant: commune ubique esse ius legatorum, nec certo loco finiri: posse se ubicumque futurus sit, vel in castris ipsis, in quibus inter strepitum armorum, vel maxime legatis opus sit, adiri. Detecta sub huius aduentum res fuit, quae omnium animos vehementer in se conuertit. Gregorius Oscikus claro loco natus & ante iam sub interregni tempus consilia cum Mosco agitarat: & tum per literas communicare cum illo non intermittebat. Attulerat ad hunc literas a Mosco Nafsokinus, quas cum ille per speciem pellium, aliorumque mercimoniorum Moscovicorum licitandorum aditu ad Nafsokinum quaesito accepisset: frequens praeterea eadem causa interposita, ac secreto nonnumquam petito cum eo fuerat. Enunciata haec res a Mireuio quodam ministro Oscici Martino Ribinio fuit, qui Andreae Sebridouio Pocillatori regio nomen in militiam dederat. Is rem ad magistratus, magistratus ad Regem detulit. Mireuius, quod praesente Rege res accidisset, ad Albertum Radiulium Palatii Marschalcum, statim vocatus, custodiae traditus fuit; ultro indicat, quae cum Ribinio antea communicarat: eorum omnium Bartholomaeum quendam ministrum Oscici conscium ostendit. Rex quatuor solis primariis consiliariis adhibitis rem deliberat. Ex ijs Palatinus Vilnensisprehendendi eius, si in vrbe sit, negotium suscipit. Ille Trocis tum esse dicebatur. mittuntur mox

tur mox eò frequentes aulici, qui comprehensum retrahant. adducto in Marschalci ædibus libera custodia circumdatur. Datur aliis negotium, qui diuersorium ac res eius perquirant. reperiunt in arca quadam alba diuersorum senatorum anulis signata, nominibusq; scriptura eorum ementita, subscripta: plerorumq; item signa senatorum ad verum expressa; quibus ille maioris fidei faciendæ causa, quò cum aliis proceribus consilia ista miscere videretur, apud Moscum utebatur. Alij Kouareskum in prædium ipsius duob. à Vilna milliariibus, vbi tum Bartholomæus is erat, missi, materiam, malleos, ac cætera cudendæ monetæ instrumenta, referunt. Bartholomæus consilia cum Mosco illum sociare, literasq; ab eo accipere, & iam ante interregni tempore bis ad Moscum missitasse fatetur. His de rebus cum senatores nonnulli ad eum missi essent, proditorem negabat: signis alienis ad contractus subiiciendos, & priuatum quæstum in iudiciis se vsum fatebatur: monetæ crimen in Iudæum quendam, cuius opera & signa illa sculpta haberet, conferebat. Adductus in iudicium ipsisq; proditoris & rei monetariæ instrumentis in iudicio exhibitis, respondere iussus fuit. Negabat defensor eius respondere eum teneri communi nobilitatis iure, quo in quemquam ex nobilitate, nisi legitime prius in ius vocatum, quæri vetetur. Cum varieres hæc à senatoribus acciperetur, ac quidam non minuendam exemplo libertatem nobilitatis censèrent: apud plerosque plurimum tempus valuit, vt Rege in belli administratione, ac castris ferè versante, non tam ordinarij quàm militaris iuris cognitio videretur. ad hæc eos solos præscriptione hac iuuari posse, qui integra fama essent, ostendebatur. quorum scelus in tot flagitiis & propria confessione manifestè teneretur, eos vita sua priuilegio nobilitatis, ac ipsa adeò nobilitate se ipsos indignos

indignos fecisse. Itaq; iussus respondere, libellum, quem ante in hunc casum composuerat, publicè recitandum dat. In eo consilia se cum hoste agitasse: eidem spem per occasionem Regem interficiendi fecisse fassus eò decurrebat, ut egestate, ac æris alieni magnitudine impulsus id spectasse se diceret, ut ab hoste pecuniam aliquam hac ratione emungeret: supplexq; veniam petebat. De confesso supplicium more maiorum, ac de iudæo item sumtum fuit: ministris ob indicium vite gratia facta. Venerat interim Vilnam Vngaricus peditatus. Hunc Rex Postouam terrestri itinere ire iussus, ibidem cum tormentis, & reliquo grauiore belli instrumento nauibus impositum secundo flumine Disnam; inde cum aliis tormentis, quæ Polotia rediens antea ibi reliquerat, per aduersum Dunam Vitepsciam præmisit. Vilnæ Paulus Vchanseus, qui ad summum Pontificem à Rege missus fuerat, ad Regem reuersus, ensen notis caerimoniis dedicatum à Summo Pontifice Regi obtulit. Profectus inde Vilna, ad Scidutum villam quinq; cis Ciasniciam millibus passuum, octaua circiter Mensis Iulij die peruenit, reliquisq; copiis per vicinos agros sparsis, ipse eo, qui demonstratus est, in loco, consedit. Ibi dum copię alię, quę expectabantur, conuenirēt, de belli administrandi ratione, ac quò potissimum hac expeditione cum exercitu se conuerteret, ad consilium retulit. Tres potissime hac de re diuersæ sententię erant; cum alij Pleseouiam: Smolenscam alij: tertij Magnos Lukos eundem censerent. Prima quæ Pleseouiam, iisdem quibus antea, cum ad Polotiam iretur, rationibus ducebat: iisdem etiam, quibus tum impugnata fuerat: quòd iter in hosticum longinquius: quòd terga tot castellis hostilibus nullo in propinquo præsidio relictis nudarentur: quòd Lituania hostibus obiceretur: maximè quòd à Pleseouienſi via longius iam recessum esset; iterum non tam repu-

repudiata quàm in aliud tempus dilata fuit. Qui Smolenscam eundum censebant, loci imprimis celebritate, & amplitudine: rerum eo loco gestarum fama: instituto deniq; belli res ablatas repetendi mouebantur; & quòd eo præsidio adiuncto, tota Seueriensis ditio longè amplissima vnà in potestatem ventura esset. Dicebantur contra hæc ab ijs, qui Lukos petendos suadebant; à Duna flumine, atq; Liuonia, quorum liberandorum causa bellum hoc potissimùm susceptum esset, Smolenscam eundo longissimè recedi: cùm Liuonia præterea Seueriensem ditionem nec vrbium frequentia, nec loci atq; maris opportunitatibus, nec vicinarum gentium cultu, comparandam: Lukos sitos in præcordio quasi Moscouiæ, loco & ad hostiles ditiones quascunq; postea petere visum esset, infestandas: & siue per Smolenscam Lituaniam, seu per Plescouiam Liuoniam ingredi hostem volentem pari intervallo vno solo exercitu ibi collocato prohibendum opportunissimo: pares enim ad Smolenscam & Plescouiam aditus habere: vnde ipsum Ducem magnum huc plerumque exercitus suos cogere solere; quòd in omnium circumiacentium ditionum pari vicinitate eam deinde quæ opportunissima ei videretur commodissimè ex hoc loco inuadere posset. Rex, quem admodum ostensum est, iam antè in hanc sententiam inclinabat. quòd autem tanto ante temporis interuallo referendum publicè hac de re non existimârat, ea de causa acciderat; quòd ne quâ vel ad hostem consilia interim emanarent, aut tempus vel res aliqua noua interueniret, quæ mutandi ei consilij causam adferret, præcauendum sibi intelligebat. Hinc studiosè Ciasniciam diem ad conueniendum exercitui edixerat; vt ibi & in re præsentī, loco ex quo tam Smolenscam quàm Lukos commodissimè ac paribus ferè spatiis perueniri posset; cum consilio constitueret; & hostem quàm posset ma-

ximè ab hac cogitatione auerteret. quam ob causam in literis etiam, quæ ad illum scribebantur, præter Liouniæ ac Polotiæ, Smolenscæ quoque titulum, tamquam quæ regij olim iuris fuisset, accuratè eximebat; vt dum ab ea parte hostis timeret, illam quam Rex potissimum patere sibi volebat, neglectam relinqueret. Dimisso consilio eo, copiis recensendis, operam dare Rex cœpit: primòque equitum Polonorum, qui ad Gedanum, ac Polotiam meruissent, atq; proximè in hibernis fuissent, turmis vocatis, cum Rex præter superiorum temporum consuetudinem, maiorem quàm ante hac in recensendo milite diligentiam adhibuisset, perque angustum pontem transgredientes in proximum collem sub ductus singulos ipse spectasset; paucissimis tamen equi adempti fuerunt; cum vniuersæ, & militum, equorumque & armorum genere essent ornatissimæ. Post hæc quæ tum primùm nouo delectu in militiam nomina dederant, productæ fuerunt. Inter eas, quæ à Samoscio, quemadmodum supra ostensum est, cum equitum tum peditum copiæ scriptæ fuerant. Erant in iis senatorij ordinis nonnulli; alij euocati, qui militiam, cui magnam ætatis partem studuerant, longo iam tempore intermissam repetierant: qui exercitus ipsi pro legatis rexissent: non pauci, qui magistratus, præfecturasque: alij qui officia ac honores in aula gererent: magna verò primariæ iuuentutis multitudo. Equitum duplex genus erat, alterum grauioris armaturæ Husarorum, ea qua supra ad Disnam vti illos ostendimus: Kofakkorum alterum leuioris. Hisce loco pharetræ, & Coryti bicubitalia scloppeta ad humeros aptarat, breuiora ex cinctu suspendenda dederat, acynace ad latus finistrum & venabulo ex veteri instituto relictis. Peditem maxima ex parte è finitimis Vngariæ locis, nonnullum etiam Varadino remotioribusq; locis, aliquem præter
ea ex

ea ex Polonis, qui superioribus proximis bellis iam stipendia fecissent, plerosque tamen nouo delectu contraxerat. Cumque ad famam benignitatis, qua peditatum ex iisdem locis Vngariæ superiore anno stipendijs suis scriptum ad Polotiam habuerat, sub idem tempus plures indies confluerent, separatim his quoque per Iohannem Thomam Droicuium præfectum Premisliensem necessarium suum stipendia descripsit. quæ cum omnes copiarum cultu etiam à cæteris diuerso ac habitu armisque atratis in duplici ducis luctu, qui ad uxorem Christinam Radiuilam vnica ex ea filiola orbatus fuerat, ab omnibus iis veste mutata vterentur; fiebat vt hac quoque re præcæteris conspicuæ essent. Pridie quàm Ciasnicia Rex moueret, quòd eum diem legatis, qui Vilnæ apud eum fuerant, ad quem expectaturus illos esset, Rex præfinierat; summa celeritate nuncius à Mosco venit; nec expectato solenni ornatu, qui obeuntibus legationes ex thesauro Moscouitico præberi solet, quòd is cum impedimentis subsequeretur, ne diès antè exiret, communi cultu præter morem gentis eius legationum Rege salutato literas reddidit. Quando Regem adduci non posse intelligeret, vt legatos pacis causa ad se mittat: se de iure moreque maiorum suorum & suo concordia causa discedere: Oratores primarios homines suos iam mittere: ante quintam aut summum sextam decimam Augusti diem affore: postulare, eos Rex Vilnæ expectet. Nam vt alio loco, quàm in ipsa aut regni aut magni Ducatus Lituaniæ sede oratores sui Regem adeant, recepto superiorum temporum omnium more refutari. Responsum, Regem legatos, quos alter superior nuncius quàm primum missum iri confirmasset, adhuc expectasse: vt Vilnæ audiantur, multis sibi nominibus integrum non esse, longius iam Vilna ad exercitus suos progresso; quibus cum, quod militem sine

magno suorum detrimento intra fines suos habere non posset, quò videretur, moturum; si quo tamen loco oratores Mosci ad se peruenissent, quæ dicerent non grauatè auditurum. Hoc nuncio tali cum responso dimisso, postridie Rex è statiuis, quæ in agro Ciasniciensi habebat, Lepelam, indè Vlam castella propinqua excurrit: vt in re præsentī munienda nè an delenda essent, statueret. Exercitum dimensis antè itineribus Vitepsciam mouere iubet; ad eumque biduo post, in secunda à primis statiuis castra recurrit. Aliæ eo die à Mosco ad Regem literæ afferuntur, eodem penè quo superior proxima epistola fuerat, argumento: legatos se summa cum potestate de pace agendi mittere: postulare, vt pro more maiorum Vlnæ audiantur; quòd si impetrari non possit, tamen intra fines vt expectentur. Responsum ad hanc etiam epistolam fuit: cum oratores venissent, quæ dicerent, Regem cogniturum: si iusta atque æqua atulissent, neque in ipso belli ardore fidæ iustæque paci non locum relictum iri: Interea cum exercitu Regem progressurum; ipse quid sibi de legatione sua faciendum esset videret: se vnum præstiturum, & oratoribus eius, & eorum orationi si iusta foret, quocumque in loco conueniretur, locum apud se fore. Adiuncta regijs literis altera ad nuncium, quem Ciasniciæ apud Regem habuerat, epistola à Mosco fuerat: quam cum resignandam alij existimarent, Rex integram ad hostem remisit. His castris ac deinceps plerisque proximis cum Rex de belli administrandi ratione quotidie ad consilium referret, & castra hostilia duo Velisium ad Dunam flumen, Vtuiata ad amnem cognominem sita ad Lukos hærenti à tergo in hostis potestate relinquenda regi non viderentur; eoque magis, quòd iam antè Dunam omnem potestatis suæ facere cupiuerat; ante omnia Velisium, vt rebus omnibus firmitus, & ad omnia

nia momenti maioris oppugnandum ratus, Samoscium cum iusta exercitus parte eò mittit. Huic ad copias, quas ab eo ipso adductas antè expositum est, maiores alias cum Polonorum Vngarorumque equitum ac peditum, tum Germanorum equitum scloppetariorum, ac in his Georgium Farensbekium Daniæ Regis Marschalcum, qui patriæ Liunionæ operam nauandi studio cum aliquo equitum ac peditum Germanorum numero sub idem tempus ad Regem venerat, attribuit. Deposcebant easdem sibi partes Lituani. Respondebatur ab altera parte, quòd nullus esset Polonicus Dux, Lituanicum penes Regem manere oportere: quòd ad limitanei militis Ducem pertineret, ita moribus maiorum comparatum esse; vt militiæ imperium summum penes Ducem exercitus, domi iurisdictio omnis circa Regem penes Marschalcum regni esset: absente exercitus Duce partes eius Marschalcus in castris exciperet: Cancellarij munus in consiliis publicis, iudiciis legationibusque; introducendis, precibus ac meritis singulorum ad Regem referendis versaretur; ad eundem, quoties Marschalcus abesset, eius quoque potestas omnis rediret: limitaneæ militiæ præfecti non tale munus esse, vt cum illis magistratibus comparari posset; quod ab initio priuatim à Ducibus introductum, deinceps etiam commendatione Ducum conferatur. Diremit controuersiam; quòd res celeritate opus habebat: qui autem ex Lituánico exercitu ire eò debuerant, nondum aduenissent: Samoscius non modò copias suas instructas iam haberet, verum ab omnibus aliis etiam rebus esset paratissimus. itinerum enim ac locorum, in quæ iretur, difficultates animo prouidens, cum fabrorum aliorumque opificum, qui bello vsui essent, ac tormentorum campestrium non exiguum numerum adduxerat: tum pulueris tormentarij, commeatus ac pabuli maximam

vim compararat; iamque antè è Præfectura Knissinenfi
 vnum in locum omnia comportata secundo Memela
 fluuio Kaunam, atque indè aduerso Vilia flumine Mi-
 chaliscos: Michaliscis terrestri itinere Postouam, indè
 Disnam, & mox Duna flumine Vitepsciam præmise-
 rat. Iisdem temporibus à Themefvariensi Bassa, qui
 quòd per totam Vngariam, fama belli peruagata erat,
 & in proximo Vngarorum delectus haberentur, ne a-
 liò quàm fama ferret, id erumperet, subueritus fortè
 fuerat, legati nullis certis cum mandatis speculandi
 tantùm causa ad Regem venerunt. Vitepsciam Samo-
 scius cum venisset, biduum ibi commoratus, militem
 omnem eò contrahit. Interim quæ ad disciplinam mi-
 litarem tuendam adq; itineris rationem pertinebant,
 constituit, edictisq; sanxit. Simul tormenta, quæ à Re-
 ge acceperat aduerso Duna flumine cum reliquo gra-
 uiore belli instrumento præmittit. His præsidij causa
 Stephanum Lazarum cum peditibus, cui præerat, Vngaro
 læua ire iubet: tormentorum ac reliqui apparatus bel-
 lici Stanislao Kostkæ Succamerario Culmensi cura de-
 mendata. Primo agmini Lucam Dzialinium Koualen-
 sem, Brodnicensemq; præfectum affinem suum præ-
 ficit. Huic Nicolaum Vrouecium, quem primò à patre
 suo disciplina militari imbutum in proxima expeditio-
 ne Polotiensis sub Milecio cum ala equitum militare iuf-
 ferat; nunc quòd non modò in periculis obeundis ani-
 mi magnitudinem eius, sed & ad quosuis militares la-
 bores tolerandos promptitudinem perspexisset, circa
 se habere instituerat, adiungit. ea itineris ratione præ-
 scripta, vt iusto interuallo reliquum agmen præcede-
 rent. cum reliquo exercitu medius ipse incedebat; Sta-
 nislao Solkeuio, postea Palatino Belsense sibi legato;
 qui & antea in Podolia sub Nicolao Seniaui Palatino
 Russiæ contra Tartaros pro legato exercitus rexerat. Il-
 lum

lum impedimenta sequebantur. quæ agminis pars maiorē ferē, quā reliquæ difficultatem habebat; propterea quod si in tanta carrorum & seruitiorum multitudinē, qua in regionibus vastis carere exercitus non poterat, mutuo ea inter se implicarentur, vehementer eam rem exercitum morari necesse erat. Huic rei ita occurrit, ut vniuersorum impedimentorum agmen in tres ordines distribueret: & quo quæque turma aut cohortes ordine incederent, eodem impedimenta, ut quorum quæ essent, incedere iuberet: singulis carrorum ordinibus à fronte & à tergo iusta peditum manu præsidio attributa: quod quò diligentius obseruaretur, nec inter se currus implicarentur, cum procederent impedimenta, initio in pacato ad Vitepsciam à se facto, inde ordinum ductoribus tradito, per vices binos semper inspicere iubebat. Extremum carrorum ita incedentium agmen selectissimæ cohortes peditum atque ultimo loco alæ aliquot equitum claudebant. Matura iam in agris, quā exercitus iter faciebat, frumenta, ac maximè pabulum erat. cum autem Regem Samoscius cum reliquo exercitu eadem via subsecuturum sciret, in partes certas vniuersum agrum eum, per quem iter erat, descripsit; quarum vnā exercitui, qui cum illo erat intendam permisit: reliquas sequenti alij exercitui integras seruari iussit; quæ res diligentissimè à milite obseruata fuit. Regi eadem die, qua Samoscius mouerat, Vitepsciam venienti Lituanicæ copię tam stipendiariæ quā voluntariæ se obtulerunt, eo & numero & ornatu, ut superioris anni detrimenta nemo agnosceret. simul Polonicæ copię nonnullæ quę è longinquiorebus regni locis tum primū ad exercitum peruenerant, vtriusque item generis tam voluntariæ quā stipendiariæ censæ fuerunt. Samoscius Surassum interim, quod extremum regiæ ditionis opidum erat, subitario opere

per Kasplam flumen ponte facto peruenit. Hic vt tormenta, quæ aduerso Duna tardiùs subsequebantur, expectaret, militemque ex itinere reficeret, ac de reliquo itinere consilium caperet, diem vnum substitit. Velisium frequentissima olim vrbs fuisse, nomenq; à magnitudine, cuius hodie adhuc indicia amplarum fossarum vestigia quædam ab accolis ostenduntur, accepisse putatur. Sub Lituanorum imperio per pagos totus ille ager habitabatur; postquam Moscouiæ Duces alibi occupatis Regibus Poloniæ ditionis suæ regionem eam fecissent, castro etiam Velisio veteri nomine retento, contra præsidium Vitepsciensè eum communierant. ex instituto præterea suo cum ab alijs partibus, tum maxime cis Dunana, à qua tam Velisium quàm Vitepscia, & quod postea conditum fuit, Surassum sita sunt, quod eam minimè patere vellent, inuiarum siluarum obiectu impediuerant. More enim suo agrum hosti proximum per aliquot millia passuum studiosè incultum ac desertum vt plurimum Mosci relinquunt; quò crebrarum arborum, quas in solo vacuo enasci interim necesse est, densissimarumque siluarum tamquam vallum hosti obiciant; ita se maxime tutos contra hostiles incursiones existimantes, si vndique quàm vastissimas solitudines sibi circumdederint. Surassum temporibus Sigismundi Augusti Stephanus Sbarassus Palatinus tum Vitepsciens, nunc Trocensis, veritus ne Vsiatæ & Kasplæ, quibus in Dunam influunt, capita ad coniungendam Smolenscensem & Lucensem ditionem munitione aliqua hostis occuparet, quod ea flumina ita ex aduerso in Dunam exonerant, vt Vsiata Lukos, Kaspla Smolenscæ pertineat, præueniendum eum ratus subituario opere communierat. Hoc in ipsum quasi initium siluarum incurrit. Samoscius cum duas omninò vias secundum vtramque Dunæ ripam propositas sibi videret,

ret, intelligeretque si vltra dunana progredere-
 tur, bis flumen transeundum: pontem alterum sub Velisio in
 conspectu quasi hostis faciendum; etsi de altera quæ-
 rendo reperiebat, non difficilem modò transitu esse;
 sed vix singulari homini iter per eam esse: exercitum
 post Vitoldum Ducem centum sexaginta annis nemi-
 nem ea duxisse, ea tamen ire constituit. In siluam ipse se
 infert: locisque per quæ patefacienda via erat, perlu-
 stratis, ac inde peditum aliquot cohortibus immis-
 sis, partim securibus siluas cædere, ferròque viam aperire:
 reliquos opere occupatis præsidio scloppetis expeditos
 esse, operisque & excubandi vices partiri inter se iubet.
 Erat magni laboris res, primùm arbores, quæ in solo
 vbere tot annorum spatio in immensum se effuderant,
 excindere; easdem deinde de via, quæ instituebatur,
 comportare. Eum alius excipiebat non multò leuior,
 cum præcipitia aut palustria loca pleraque essent, vel
 ponte ea sternendi, vel cratibus ac virgultis exequandi.
 singulari tamen militum ac Nicolai præsertim Vroue-
 cij studio, per viginti millia passuum ea die via patefa-
 cta, postridie illac iter exercitus faciens, ad locum Ver-
 schouinum appellatum, in quo pagus olim fuerat, to-
 tidem à Velisio passuum millibus peruenit. Propin-
 quum Verschouino locum Vitoldi pontem etiamnum
 Kosakki nominant; quòd fama acceperint, isthac pon-
 te effecto Vitoldum aliquando copias duxisse, eodem-
 que tum etiam per latissimam paludem, paucarum ho-
 rarum spatio celeriter ponte effecto, postridie minus
 emensus, quod montes crebri interiecti iter moraban-
 tur, decem à Velisio passuum millibus, summo silentio
 confedit; nulloque ne pabulandi quidem causà excur-
 rere permissio, sequenti die oppugnandi præsidij consi-
 lium cepit. Obiciebatur hoc loco noua difficultas,
 quòd hostis, quò is locus castro propior erat, eò dili-
 gentius

gentius muniendum ratus, incisus arboribus, iisque ex aduerso deiectis ac inter se commissis, aliisque insuper coaceruatis, per aliquot millium passuum spatium, omni muro firmiore munitione se seperat, siluaq; quæ ne perspicere quidem posset, etiam media die nocturnum aliquem horrorem ingredientibus incutiebat. Dat iterum negotium pediti, ut iter explicet. Eodem die Mikitam & Birullam notos Kosakkorum Duces, qui excursionem in ditionem Smolenscensem superioribus diebus facta, ab ea ad exercitum venerant, longo ambitu trans Dunam flumen ad obsidendam viam, quæ ad Lukos pertinet, mittit. Excipitur ab his Kudrauius nobilis Moscus: qui cum duobus comitibus egressus fuisset, unus eorum à Kosakkis interfectus, alter elapsus fuerat. Ex hoc postridie in castra perducto quale præsidium Velisij sit, deq; Kosakkorum manu aliqua allatam fuisse ad præsidium famam, tantum in propinquo exercitum ignorari cognoscit. quibus rebus cognitis, relictis in loco cum præsidio certarum turmarum & cohortium omnibus impedimentis, præmissisque peditibus atratis, & Vibranouiana cohorte, ac reliquo peditatu ipse ad extremum siluæ propinquo à Velisio intervallo subito excurrit; quod ea loci natura erat, ut si hostis aduentu eius cognitò, aditu prohibere eum voluisset, exigua hominum manu intra siluam cum plerisque aliis, tum eo maxime loco eum morandi summam facultatem haberet: simul si forte fama aduentus sui ad hostem nondum perlata, per incustoditas portas irrumpere, ac repente præsidium opprimere posset. Vix extra siluam eo egresso, hostes tormento exploso aduentus eius signum dant: eodemque momento accolis omnibus intra munitiones receptis, quicquid circa eas ædificiorum erat, incendunt. Samoscus militari nihilominus clamore sublato, subita equitum peditumque
excur-

excursione obiri munitiones iussit. Est Velisium spatium satis amplo, turribusq; nouem munitum. ad meridiem atque orientem Duna flumine, à septentrione riuo quodam, qui per lacum in Dunam ibidem infra castrum illabitur, ab omnibus partibus maximè verò ab occidente altissimis fossis ambitur. Castris à septentrione metatis, munitiones à superiori Dunæ parte Vngaros agere iubet; infra eos medio loco Polonos: Vrouecium cum atratis cohortibus ab occidente curare: Vltra Dunam Lukos versus Kosakkos in excubiis collocat. Perfecto paucis diebus magna celeritate opere, tormentis quater muros instituit. Ea tum nostrorum tormentorum, quemadmodum ex captiuis & tormentis ipsis fractis cognitum postea est, felicitas fuit; vt nullus ferè globus mitteretur, quin ex illorum tormentis aliquid corrumperet. Indè ignitos globos Bornemissæ, quem Vngarorum munitionibus Samoscus præfecerat, periclitari placuit: incendioq; ex Vngarorum munitionibus excitato, ac mox oppresso, idem Vrouecius cum tentare cœpisset, pars pontis interscissi, quæ reliqua ad portam castelli erat, ab atratis exusta fuit. simul duabus diuersis è turribus altiùs fumus tolli conspiciabatur. re hac animaduersa hostes primùm repentino nostrorum aduentu, cum à qua re maximè tutos se fore crediderant, tam inuias siluas exiguo temporis spatio superatas à nostris intelligentes, nihil deinceps sibi tutum, nihil nostris difficile futurum iudicarent: simul operis perfecti celeritate, tum verò præsentis periculo territi, deditionem fecerunt. Moscus Polotiensium præsidiorum expugnatione commotus, similem casum in alijs castellis, quæ Lituaniam versus ex materia omnia facta erant, veritus, cespitem muros eorum tegere instituerat. qua re, quòd cum per cespitem subitario opere non satis altè congestum ad parietem globi penetrasent,

sent, tanto & firmitus hærent, & restinguendi sui facultatem ferè nullam relinquerent, vel maximè tum lædebatur. Commeatus, pabuli, pulueris tormentarij apparatusque bellici tantum repertum fuit; vt recreato omnibus rebus his exercitu, quantum præsidio satis esset, nihilominus relinqueretur. Rex Surassi, quò interim peruenerat, dum in Duna pons componeretur, & de euentu oppugnationis Velisicnsis cognosceret, subsistere constituerat; nuncio hoc cum præfectis, qui in præsidio fuerant, à Samoscio accepto, eò lætior, quòd de ea gratulatione, castri, quod maximè integrum in potestatem suam peruenire cupiebat, detrimento nihil fortuna diminuerat, dum pons ex linitibus nota ratione componitur, ad videndum Velisium excurrit; moxque Surassum se recipit. sub idem tempus literæ à Mosco afferuntur, quibus demissius, quàm vt non simulata ab eo humilitas videretur, significabat, iam se legatos de pace cum idoneis mandatis, quibusque contro- uersias minui posse existimaret, contra & suam & maiorum suorum consuetudinem dimisisse. quia fieri tamen possit, vt minus adhuc mentem Regis perspexerit, ideoque nondum omni ex parte ea Regi satisfaciant: petere se, vt aut Rex suam de his sententiam planius per literas aperiat, aut legatis suis id facere permittat: cum primis autem antequàm legatos audiat, intra fines exercitum reducat, abq; omni in suos iniuria prohibeat. sub finem literarum à crudelitate, locorum scripturæ sacræ nonnullorum autoritate, more suo ac solito maiori laudandæ, quam obseruandæ eius studio Regem dehortabatur. Rex in eadem simulatione, qua ante vsus fuerat, persistere eum videns, tribus pontib. vniuersum exercitum in vltiorem Dunæ ripam mox traduxit. Postridie iter facienti iterum literæ à Mosco redditæ fuerunt: Legatos suos maximis itinerib. progre-
di:ex-

di expectaret venientes, ne tridui moram magno detrimento rebus suis futuram cogitaret. Regem nihil de celeritate consueta remittere cupientem tardabat difficultas viarum; quòd Moscus, eo, de quo antè diximus, instituto à Lukis etiam Lituaniam versùs centum & viginti ferè millium passuum spatio densissimas silvas aluerat. Itaq; hìc quoque siluestria erant loca, vix singulis peruia: propter crebras autem paludes interiectas magna præterea ex parte cœnosa, per quæ ægrè iumenta euaderent. Accedebat huc, quòd à primis omni pabulo, si quod fortè erat, consumpto, apud maiorem exercitus partem magna eius quoq; rei inopia laboraretur. Itineris is ordo obseruabatur, vt in primo agmine Lituani sub Palatino Vilnensi Duce & Christophoro filio limitanei militis præfecto proficiscerentur: Hos Ioannes Sborouius Castellanus Gnesnensis aulici militis præfectus, qui iam tum ad Regem venerat, sequeretur. Post illum Vngaricus tam equitatus quàm peditatus incedebat. Hos Rex cùm robore exercitus sequebatur. Regem Ioannes Sbarassus Palatinus Braslauiensis cum equitatu Polonico: Vltimum agmen Nicolaus Seniauius Russicarum copiarum præfectus claudebat. qui quòd pacatis tum Tartaris nihil tumultus ab illis expectaretur, itidem ad Regem se contulerat. tormenta aliusq; bellicus apparatus omnis vnà cum eo, quem Samoscus ab oppugnatione Velisiensi ad Regem remiserat, per Vsuiatam aduerso flumine trahebantur. Cùm Lituani ferramentis ad silvas cédendas ac aperiendam viam idoneis destituti tardius procederent, Rex delectos ex Vngarico peditatu trecentos ad explicandam celerius cum Lituani viam præmisit. à quibus magna celeritate via expedita primùm Lituani agmen xvij. Kal: Septemb: ad Vsuiatam peruenit: Rex decem ab ea millibus passuum confedit. Vsuiata in modico colle intra duos la-

cus ac flumen Vſuiatam ſita, ab occidente Vſmiana lacu, ab oriente altero Vſuiata, à meridie flumine eiusdem nominis, qui per vtrumque lacum decurrens ad Suraffum in Dunam influit, clauditur. Cœperat ad arcem admouere munitiones iuſſu Palatini Vilnenſis cum Lituānis Georgius Sokolinſcius. Huic cum Vngari ſe adiunxiſſent, atque vna nocte admirando labore ad portam tam propè, vnde telum adiici poſſet, ſoſſa perducta, continenti ſcloppetorum ictu neminem in aduerſa turri conſiſtere paterentur; nomine ſimul & ad uentu regio, quem ex latis caſtrorum ſpatiis ab caſtello in omnes ſubiectos campos deſpectum habente cognouerant, territi, qui in præſidio erant, deditiōem eodem die fecerunt. Rex ab Vſuiata Lukos verſus tendens principio eadem rurſum viarum aſperitate, perpetuis ſiluis denſiſſimè, quemadmodum antè oſtendimus, inter ſe implicatis, ad hæc ſolo cœnoſo & impeditiſſimo exceptus fuit. Poſt commodiore aliquanto via uſus fuit, aridior ac arenoso penè ſolo. Vbiq; tamen vt per loca inculta ac deſerta magnam commeatus inopiam exercitus perpetiebatur. Reliquerat Rex ad tormenta, quæ ab Vſuiata terreſtri itinere tardiùs ſubſequebantur, Nicolaum Seniauium cum Ruſſicis copiis: apud hæc eò etiam vehementiùs laboratum fuit, quò eæ propter impedimenta tardiùs incedebant. Subleuatæ tamen deinde aliqua ex parte à priuatis Samoſcij nauibus fuerunt: quas cum vltèrius terreſtri itinere trahere ſecum non poſſet, Vſuiatam commeatus ac pabuli plenas dimiſerat. ſub idem tempus Volminſcius à Chriſtophoro Radiuilo Lukos præmiſſus, aliquot ab vrbe millibus cum ſtationibus hoſtium prælio commiſſo, aliquotq; captis, cæteros in fugam vertit. Samoſcius, quòd pons, quo aliàs in tranſmittendis fluminibus exercitus utebatur, penes Regem erat, rate, quali ad Sokolam exercitum

tum traductum ostendimus, ad Velisium quas secum habebat copias traduxit. Accidebat autem, ut cum Velisio, quemadmodum dictum est, naues, quibus com-
meatus exercitui supportabatur, Vsuatam ab exercitu dimisisset, tyrones plerique, qui nuper nomina in militiam dederant, nec magnum rei militaris usum habebant, quod ab eo praesidio, quo maximè confidebant, relinqui se videbant, angustias itineris ac silvarum, per quas duci se audiebant, magnitudinem veriti animis ferè conciderent, compluresq; passim diffugerent; in quorum vnum atque alterum desertorum grauiori poena constituta, reliquos facile Samoscus retinuit. Proficisceretur via militari, quæ Smolensca Lukos ducit; ut dextrum latus Regis teneret. qua via cum Moscus quoque exercitus suos ducere soleat, quos quemadmodum supra dictum est, Lukis semper coge-
bat: omni ea pontes maximis ac robustissimis extrabibus facti erant; quia tamen vetustate plerique vitium fecerant, non exiguus in illos ipsos reficiendos labor militi impendendus erat. Excubabant ad Lukos & prata Oranensia Tartarorum Nohaiensium turmae aliquot; quas Vlanecius è principum Tartarorum genere in Moscouia natus ducebat. Eas Chilchovus sub primam oppugnationis famam Velisium miserat. Cum Bobroiedovum quinquaginta à Velisio passuum millibus accepto iam in potestatem à Samoscio castro, venissent, ac ab agrestibus, quo loco res esset, cognouissent, Tropeciam versus se recipientes, inde agmen nostrum ex itinere observare instituerunt. Scripserat Rex ad Samoscium, ut quam primum cum eo se coniungeret: qua de causa cum à Smolenscensi via ad laevam Samoscus iter conuerteret, Tartarus interim, qui iam antea semel à fronte ad Polonam flumen reiectus fuerat, iterum recurrerat; si quos lentius insequentes extremum agmen observando exciperet.

re fortè posset. Sed præterquàm quòd ea ratione, quem admodum antè ostensum est, copiæ incederent, vt extremum agmen lectissimæ cohortes, ac turmæ aliquot equitum clauderent, Kosakkos etiam, quoties eius rei facultas daretur, post agmen in insidiis confidere Samoscus iusserat: quibus si qui vestigia exercitus legerent exciperent. Id cum fortè ab ijs, qui sub Vincentio erant, factum fuisset, ac in campum quendam è siluis acciem agmen nostrum explicaret, Vlaneciusque, cum Tartari signa conspicati retro cederent, ipse ante alios progressus, vt se sequerentur, suos hortaretur, in Kosakkos incidit; ab iisdemq; circumuentus captus fuit; reliquos Tartaros fugientes siluæ texerunt. Samoscus cum ad Oranensia præta quinque circiter millium passuum interuallo à reliquo exercitu consedisset, mox ad Regem indè accessit. Præmissi de exercitu Lituanico à Radiuilo antecursores Lukos versus fuerant; qui cum ad Louatum fluuium progressi, itineris duce, qui vadum illis monstraret, destituti ad arcem pèruenire non potuissent, Mosci interim, qui in præsidio erant facultatem nacti Demetrium quendam, qui in Lituania diu versatus tum ab exercitu Lukos transfugerat, cum literis ad principem suum mittunt. deq; aduentu exercitus, & quòd pridie iam copiæ nonnullæ sub munitonibus se ostendissent, certiore eum faciunt. Exercitu per angustias siluarum in aperta omni traducto, non parum iam ad summam rei profectum, ac quasi ad vniuersam Moscouiam aditus patefactus existimabatur. Constabat enim inter omnes, si Moscus ad prohibendum transitu exercitum se conuertisset; plerisque locis, vel exigua manu nullo negotio eum distinere; atque re frumentaria in tam inuijs siluis, per quas viginti dierum spatio hæsisset, interclusum incommodo etiam afficere potuisse. Rex cum ad arcem rectè ducere con-

stiti-

stituiſſet, Samoſcium, qui ſitum naturamque loci cognosceret, præmiſit. Vielkoluki, ac ſi magna prata diceret, ab amplitudine ac frequentia vrbiſ, circumiacentis regionis totius amœnitate, atque cultu nomen acceperunt. Arciſ in modicum tumulum ſubductæ, qui omnibus ferè ex partibus lacu, altiffimâq; valle, quæ lacum vndique ambit, continetur, à meridie & oriente, à qua vna ſola parte lacus non coit, imam partem Louatus fluuius ambit: anguſta omninò ſemita inter lacus & ſuas ripas relictæ, quæ eodem, quo arx ac flumen ipſum, flexu in longitudinem ſinuatur. vallo tum circumdata erat altiffimo, qui non modò priuatorum ædificiorum, ſed templorum ipſorum, quæ frequentia in ea ſunt, pinnaculorum conſpectum accedentibus eripiebat. Ad haſ munitiones, turres Germani cuiuſdam artificis opera ſcienter diſenſas complures: vnâ verò à fronte, qua ab oriente inter lacum ac flumen patet, omnium firmiſſimam ac ampliſſimam adiecerat. Omnes autem ceſpite altiffimo: maior quidem hæc viginti duos circiter pedes lato veſtitæ erant. Louatus ſupra Ieſerifciam ex lacu quodam deriuatus, à meridie, quemadmodum oſtenſum eſt, arcem perſtringit: inde in ſeptentrionem verſus, relictæ arce, vrbeq; in duas partes ſciſſa recto curſu per lacum Ilmenum ſub Nouogardia, priori nomine in Volchouam commutato, in ſinum Finlandicum ſe exonerat; nauigationiſque hac opportunitate maximè Lukoſ locupletauerat. Vrbem amplam atq; ab vtraq; fluminis ripa latiſſimè arcu circumiectam, quamvis mœnibus ac turribus ligneis, foſſis etiam ſatis amplis munitam, quinto antè die, quàm caſtra Rex ei admoueret, inſtituto ſuo omnibus priùs rebus in arcem comportatis præſidiarius miles incenderat. Samoſcius iuſta equitum peditumque manu ac militaribus aliquot viris aſſumptis in viam, quæ ad To-

ropeciam atque vltiorem Moscouiam pertinet, pro-
uectus, ab ea ad arcem rursus deflectens Moscis se o-
stendit. Hostes conspicati, primò suas copias Torope-
cia venientes rati, extra arcem progressi, mox signis a-
gnitis summa celeritate se receperunt. quidam tamen
ac in his Farensbekius subitò in eos inuecti aliquot af-
secuti interfecerunt. Samoscus ab omnibus partibus
diligenter situ loci perlustrato, ad Regem se recepit. Ius-
serat sequi se ab exercitu alios quosdam, qui diuersa via
excurrentes, ea qua venturus esset, sibi occurrerent.
Hos à superiore arcis parte flumen transgressos Mosci
conspicati, insidias ab ea parte posuerunt: itaque cele-
riter eæ coortæ fuerunt, vt Ioannes Bornemissa summe
inter Vngaros virtutis præfectus, cum in turba ab irru-
entibus manus iniectæ ei fuissent, equusque loco humi-
do hæreret, veste relicta recipere se coactus fuerit. Mo-
scus etsi suspicabatur Smolenscam potius Regem se
conuersurum: in hanc tamen quoque partem præ cæte-
ris intentus, ad Toropetiam exercitum Chilchovo Du-
ce contraxerat: qui seu Smolensca seu Luki peterentur,
quò opus esset, suppetias suis ferret. Mandata his in o-
mnes casus dederat, vt à prælio omninò abstinerent: in
singulos modò, si quos ab exercitu digressos, aut per
agros palantes nancisci possent, intenti essent. Ipsius Lu-
kis Knesium Theodorū Obalenscium Lichovum cum
summa authoritate, secundum eum Michaëlem Chaf-
finum & Oxachovum præfecerat: quòdque ijs ipsis,
quos constituerat, præfectis non satis salutem arcis ex-
ercitusque crederet, Ioannem Viechovum primum
cubiculi ministrum, qui Lichovum cæterosque in præsi-
dio: Dementium Ceremissam, vt Chilchovum, qui ad
exercitum erat, obseruaret, per eos dies miserat. Perspe-
cta loci, quemadmodum dictum est, natura, Rex qua à
meridie fluuius arcem alluit, cum exercitu pulcherrimè
instructo

instructo sub signis accessit: abque altera parte Samoscio reliquas copias item latissime expansas adducen-
te,horribilem speciem is vniuersi exercitus vno tempo-
re accedentis,inque tot acies explicati despectus hosti-
bus præbebat. Postridie legati Moscouitici, nullis ad-
huc versus arcem munitionibus directis, in castra vene-
runt. Hi cum Smolensca Surassum venissent,quod Su-
rasso regium imperium finiebatur, ijs qui deducendo-
rum causa pro more obuiam illis missi fuerant,nolle se
vlteriùs progredi, nec in Principis sui ditione mandata
sua exponere se posse ostenderant. Cum illi id in ipso-
rum potestate fore respondissent:se quidem ad Regem
redituros: ipsi si ad Principem suum reuerti vellent, ne-
minem impediturum; tandem, vt ergo vi se pertrahe-
rent,hortati comites fuerant. risu excepti, neminemq;
vllam ijs vim allaturum edocti, ipsi sibi consilium ca-
perent, ridiculè ad extremum vi tamen adactos se se-
qui attestati,secuti fuerant.Consilio pridie Calend.Se-
ptemb. iis dato, eadem, quæ ante dixerant, iterarunt:
negarunt posse se vlla de re agere,nisi prius Rex vniuer-
sum exercitum intra fines reduxisset.Rex legatione tam
absurda repudiata,eodem in consilio Samoscio,vt quæ
cum illo de ordienda oppugnatione communicârat,
administraret, mandat. Rediit sub idem tempus in ca-
stra Drobisius. Missus hic paulò ante à Radiuilo Toro-
peciam versus,in turmam equitum à reliquo exercitu
digressam inciderat. quæ cum paucis excubitoribus a-
liquot collocatis,quieti se dedisset, tanta celeritate im-
petum Litvani in excubitores dederunt, vt vnà cum
fugientibus ad cæteros quiescentes delati, priusquam
ab illis sentiri aut arma capi possent, eos occuparent;
nonnullos cæderent: quosdam caperent: reliquos in fu-
gam conuerterent. Samoscius militem,quem penes se
habebat, primò per amnem non admodum altum, sed

vligine valde impeditum, & ad Louatum restagnantem inter crebras hostium iaculationes, quæ eò pertinebant, ponte, inde Louatum infra arcem duobus vadis traduxit: adq; riuum è regione arcis manantem castra more Polonico curribus circumiectis communiit. Ad eas, quas antè habebat, copias reliquum peditatum omnem tam Polonicum quàm Vngaricum Rex illi attribuit. Vngari cum Ioanne Bornemissa & Stephano Carolo, qui Michaëli Vadasio successerat, statim transiére: locoq; occidentem versus capto, quò ire se iuberet ad Samoscium miserunt. Cùm ille exteris præ cæteris indulgendum ratus, ipsi sibi locum legerent, se permittere ostenderet: illi rursus ad eius arbitrium rem reuicerent; ratus eum, quem institissent, locum maxime ab illis probari, eundem, vt retinerent, munitionesq; ab eo ad arcem agerent, Bornemissa tormentariæ rei præposito, mandat. Interim, quòd Polonicum quoque peditatum citius subsecuturum arbitrabatur, ad inferiorem fluminis partem, qua vrbs antea fuerat, subito nonnullos disponit, qui fossas munitionesq; ab ea quoq; parte instituerent. Verum cùm quòd alios viminum ad corbes militares petendorum causa dimisisset, impedimenta eo die omnia traducere non potuisset, atratas cohortes aliquot præsidio illis relinquere necesse habuerat: præterea reliquus etiam Polonicus peditatus tardauerat: qua re fiebat, vt pauci omnino in opere essent; ijq; cùm maius nihilominus pro numero suo opus ea nocte perfecissent, accidit, vt tyrones quidam ex ijs negligentius sub arce versarentur, in quos postridie Mosci eruptione facta, priusquàm subsidium eis ferri potuisset, vnum interfecerunt, alterum ceperunt; signoq; militari, quod lentius signifer proferebat, abrepto, in arcem propere se receperunt. Haud multò post reliquæ cohortes cum impedimentis, vniuersusq; Polonicus peditatus

tatus aduenit; opereque summa celeritate perfecto, sequenti nocte & à Polonis & ab Vngaris tormenta constituta fuerunt. Eadem nocte interuallum, quod inter Louatum flumen atque lacum orientem versus exiguum intercedere diximus, perfodere Samoscio visum fuit. quod cum lacus fossæ vicem arcis præstaret, si deriuatus fuisset, multò commodius per siccas fossas ad oppugnationem iturum militem iudicabat. Peditatui vniuerso Polonico ac atratis cohortibus Nicolaum Vrouecium præfecerat: præterea verò inter primores quosdam compararat, ut cum ipse ad alia opera abesset, eorum aliqui in vices ad munitiones curarent. Euenerat tum fors ea Petro Kloceuiio Castellano Sauichostenfi; qui ut homo ad militaria munia promptus, dum ipse ad opus inter frequentes tormentorum ictus, qui continuo ex arce in intentos operi dirigebantur, contendit, globo traiectus interiit. Sub hæc Rex Louatum ipse transgressus, ut oppugnationem inspiceret, quod per tam altum eumque recentem cespitem non posse penetrare globos videret, ne iis iaciendis tempus eximi pateretur, Samoscium monebat. Itaque in pinnacula, quibus sedilia tormentorum, quæ per vallum disposita erant, dirigebantur, iaculationibus ab Vngaris conuersis, incensa mox ea fuerunt. Etsi autem ulterius ignis non progrederetur, quod sedilibus, quæ diximus, exustis, in aggerem mox desinebat; illi nihilominus incendium conspicati, manu statim facta ad vallum successerunt: iustoque temporis spatio sub eo versati, cum tandem hostis collecto animo ad repellendos concurreret, illique nihil eorum, quorum causa in eum locum progressi fuerant, succedere sibi viderent; sub noctem ad munitiones suas per lacum se receperunt. Legati interim qui in castris erant, incendio hoc in metum adducti, iterum admitti se petebant. cuius rei altera die potestate

testate iis facta, quòd ignis iam conquieuerat, illique metu iam liberati sibi videbantur, eadem qua antea simulatione vti primò Churlandiam & Rigam Regi offerebant; his deinde Polotiam adiiciebant; tandem pro captiuis Vsuatam & Ieserisciam; ex quibus Ieseriscia sola in potestate Mosci tunc erat. multis vltro citroq; verbis factis summa hæc fuit, vt spem facerent, posse ad æquiores conditiones pacis causa Principem suum adduci, si tabellarium cum literis hac de re ad illum mittendi potestas sibi fieret: Rexq; ipse non acquiescere se conditionibus à legatis propositis per literas ei ostenderet: interim ab oppugnatione abstineret. id vt illis permitteretur, senatores quidam Litواني persuadere Regi conabantur. quòd cum omnia tam diu frustra tentari viderentur; omnibus incommodis belli se potissimùm, apud quos sedes eius esset, expositos, periculoq; proximos cogitarent; ac si capta arx esset, defendendæ eius onus, quod in tot hostilium præsidiorum vicinitate, siluarum à Lituania interiectarum magnitudine maximam difficultatem habiturum intelligebant, ad se potissimùm rediturum. Rex etsi ad omnia potius descendere paratus erat, quàm oppugnationem dimittere: vrgentibus tamen illis, Samoscium qui ad munitiones tum versabatur, assiduusq; in opere erat, vt de statu oppugnationis, quemadmodum postulatum à Lituanis fuerat, ex eo cognosceret, accersit. Duobus primariis senatoribus Lituanis adhibitis, quid à legatis petatur ostendit: quærunt ex eo senatores ij, quid de successu oppugnationis polliceatur: nisi certam spem potiundæ arcis afferat, satius esse petentibus iam dari, quod haud multò post difficultatibus ipsis cogentibus maiori cum ignominia tribuendum foret. Respondet Samoscius, vt in re, quemadmodum omnia sint belli, incerta nihil certi promittere possit; ita bene tamen

men potius cum consilio atque fortuna Regis, tum virtute militum fretum sperare: praesens verò oppugnationis tempus eximi pati, quem alium exitum habiturum quam ut si qua nunc expugnandæ eius facultas sit; ea postquam anni tempore in autumnum iam vergente consuetæ regionibus iis tempestates, effusique imbres ingruerint, nulla prorsus relinquatur? Rex quemadmodum antè in animo habebat, inducias dandas non iudicabat: ut suum interim negotium utraque parte, ea qua antè ratione administrante, literas legati ad Principem suum darent, permisit: iis suas addidit, quemadmodum petatum à legatis fuerat, quibus diem certam intra quam rescriberet, illi præfiniebat: simul Vngaros vallum subire, abque ima parte eius, cuniculum aperire, huicque puluerem subicere iubet. Itaque ponte ab eo loco, quo angustior lacus erat, subitario opere strato, reliquoque opere una nocte perfecto, pulvis sub crepusculum subiectus, ac à meridie demum incensus, turrim, quæ ab ea parte erat, corripuit; cespitemque disiecto parietem propugnaculi nudavit. quem cum Vngari mox incendissent, Mosci incendium, quod maximum exortum erat, restinguere conarentur; nec nostri à continuis in Moscos ex omni tormentorum genere iaculationibus, nec illi à conatu restinguendi ignis, magno cum incommodo suo, prius cessarunt, quam nox interveniens & nostris scloppetorum usum eriperet, & illis opprimendæ flammæ spatium daret. Ab altera parte munitiones hostium, quas per maius, quod demonstratum est, propugnaculum egerant, vineæque, intra quas tormenta constituerant, quam maxima nostrorum tormentorum vi de vallo proturbantur: cumque impigre tormentis res administraretur, vineæ omnes ferè de vallo deiectæ fuerunt, hostesque se ac tormenta subdixerunt. Plerisque cuniculum inde ad propugnaculum agendum

gendum existimantibus, Samoscio ea de causa minùs id probabatur, quòd in solo humido ac palustri, intra flumen atq; lacum medio vix cuniculo locum fore iudicabat. quòd verò propugnaculum id vltèrius nonnihil quàm reliquæ turres, ita prominere animaduertèret, vt nulla ab aliis propugnaculis tormenta rectis ictibus per frontem eius dirigi posse: omnesque qui à lateribus in eam partem acciderent, tranuersi ferri viderentur, si ad eum locum miles succederet, quòd à tormentis ledi non posset, vel per ipsum cespitem multò faciliore ac commodiore ratione ligonibus ad turrim viam patefieri posse sibi videri ostendebat. Itaq; fossam versus propugnaculum duci iubet. quam rem Luca Syrneo cum atratis cohortibus impigrè curante, cùm vltèrius progredi vellet, palis, quos iusto spatio ante vallum ingentis magnitudinis confertissimos in terram defixos obiecerant, prohibitus fuit. Postridie vineis ac tormentis hostium, quemadmodum dictum est, iam antè summotis, nonnulli ex nostris inter se cohortati nullo imperio ad propugnaculum excurrentes, scalis admotis, vallum scandere cœperunt. His à Moscis partim à fronte deiectis, partim per auersam portam, quæ ad Louatum ab oriente pertinebat, erumpentibus circumuentis, quidam ex iis grauissimè vulnerati relictì fuerunt. Samoscus, qui alia tum ad castra curabat, cùm de irruptione ea nostrorum cognouisset, subitò ad eas munitiones se retulit: conspicatusque vulneratos, quos diximus, aureis aliquot nummis depromptis, quos vt tyronum animos ad maturandum impigrè opus præmijs inuitaret, ad tormenta semper expositos habebat; certam pecuniam si qui vulneratos retulissent, pronunciat: quibus relatis, vt leui initio successum eius, quod animo proposuerat, periclitaretur, ligone vni dato, præmioque proposito, quid fieri velit, ostendit: interim si primo successisset, qui

qui eum sequerentur, paratos esse, ac ad fossam inferiorem procurrere, ibique se continere, & signum expectare iubet. Contra eruptiones hostium Vibranovium opponit: eum cum scloppetariis aliquot secundum ripam fluminis propius versus propugnaculum, atque auersam portam, per quam erupturi hostes erant, succedere: Veierum præterea ex munitionibus diligenter tormenta in erumpentes emittere iubet. Ille, quemadmodum iussus erat, accepto ligone, per fossam intra munitiones nostras ad palos usque, quos ostendimus, pervenit: inde summa celeritate per crebras hostium eiaculationes ad vallum procurrit, ei que se applicans iam extra tormentorum hostilium ictum, cespitem ligone scalpere incipit. Hostes à diuersa parte circumueniendi eius causa se effundunt. His Vibranovius, qui ad ripam fluminis, quemadmodum dictum est, cum scloppetariis aliquot collocatus fuerat, à tergo se ostendit; cumque creberrimis præterea tormentorum ictibus, qui ab omnibus partibus ex munitionibus in eos dirigebantur, peterentur, reiecti fuerunt: Vnus verò ex iis Sabinus Nossovus strenuus manu inter Moscos, & qui è præsidio Susensi magnis incommodis nostros affecerat, duobus globis frontem à Vibranovianis perstrictus, unoque à Veiero emisso sub pedibus eius transeunte percussus ad stationes à nostris pertractus fuit. ubi se collegisset, interrogatus de statu præsidij omnia dicebat, quibus spem potiundi eius nostrorum minueret: non eius generis arcem esse, quæ cum superioribus à nostris expugnatis comparari posset: vallo crassissimo cingi: turres latissimo cespite protectas nec tormentorum ictibus, nec incendiis patere: propugnaculum illud vnum munitissimæ arcis instar esse; ternis ingentis magnitudinis trabum ordinibus singula eius latera reuincta; altissimo cespite vestitum: ne cuniculis quidem ten-

L

tari

tari posse, cum propter soli palustris humiditatem, tum quod fundamentum ex firmissimis palis, ac ingentibus solidisque saxis subiectum haberet. Hæc Samoscium omnia magis in sententia confirmabant. Nam & quod cuniculo antè aggressus eam non fuisset, benè cecidisse intelligebat: & quò maior lignorum vis vnum in locum congesta esset, eò & citius incendium tolli posse, maioresque vires sumpturum iudicabat. Postridie aliam fossam secundum flumen, qua Vibranouius antea constituerat, duci iubet: subsidia in hæc contra eruptiones collocat: tormenta item trans flumen contra auersam portam transducit: simul magnam materiæ vim comportatam, stupa inuolutam, sulphureque ac pice oblitam, Stanislai Kostkæ opera ad futurum incendium præparat: quibus rebus perfectis summo mane, eodem, quo antè modo ligone dato, alterum rursum immittit: ei mox alios summittit, vt crescente tandem multitudine concurrentium, vnaque cum ea opere, iam triginta circiter hominibus capiendis os in cespitem patefieret: ac ad turrim ipsam perueniretur. Fortè eo loco fenestra olim fuerat, priusquam terra obtegeretur. per hanc Moscisci scloppetis nostros, nostri item Moscos mutuò arcebant, simulque excussis ignibus, ligna, quæ secum attulerant, inferebant: Moscisque hastis tandem per fenestram gerere rem instituentibus, eas arreptas illis extorquebant. Samoscius interim ad alia castra paululum se receperat, veritusque, ne perperam quid administraretur, ne se absente ignes inferrentur, veruerat. Postquam ad moueri ignem sensit, statim accurrit, iamque eò rem progressam videns, vt strenuè eam vrgeret, militem hortatus, tædas iam antè eum in vsum præparatas, quàm frequentissimas subiici iubet. Multorum hic è nobilitate etiam cum aliorum, tum præcipuè Christophori Rosdraseuij præfecti Lanciciensis, qui sub ipsum illati ignis

gnis principium, absente Samoscio, ad extremam fossam ac palos procurrens, omniâq; pericula magno animo excipiens, promptissimè rem adiuuabat, singulare studium enituit. Non deerant sibi tanto in periculo Mosci: coriisq; madefactis, & quibuscunq; aliis poterant rebus incendio occurrebant. Magna tædarum atq; ignium vi toto die continuò in turrim coniecta, nullum tamen adhuc incendium erumpebat. qua de re variis in consilio sententiis dictis, cum quidam adhuc cuniculos tentandos arbitrarentur, Samoscus, etsi in ancipitem curam ex diei eius euentu coniectus erat, nondum tamen planè de suscepta incendii spe deiectum se ostendebat: posse & paruam scintillam in magnum incendium tolli: suspicari se tantum ignis atq; tædarum huiusmodi lignorum ac aridorum præsertim strui admotum non sic abiturum. quod si minùs tamen nunc successisset, sequenti nihilominùs die denuò ignes inferri iussurum: omniâq; interim maiori diligentia præparaturum. Ab altera parte Vngari irruptionem, quâ ab ipsis aditus in vallum patefactus erat, flagitabant. Samoscus, quòd arduus indeq; præceps locus erat, ad Regem se relaturum ostendebat: interim in omnem casum, quis ordo irruptionis seruari deberet, si tentanda Regi videretur, disponebat. Mosci interim in tam ancipiti discrimine versari se videntes, contra os, per quòd Vngaros irrupturos metuebant, crebra tormenta collocabant: ab altera parte incendio quibuscunq; poterant modis contraueniebant. sed nulla omninò restinguendi eius ratio ostendebatur; quòd vt quisque ad opprimendam flammam turrim ingressus fuerat, foetore atq; fumo protinus exanimabatur. Cum quò diutius ignis suppressus esset, eò maiores vires cõcepisset, de secunda vigilia magna flammarum vi per cespitem subitò erumpente incendium sublatum ædem saluatoris, quæ proxima pro-

... L 2 pugna-

pugnaculo erat, corripuit; indeque per pinnacula per-
uagatum reliqua priuata ædificia populari cœpit. Sa-
moscius, quòd exercitum hostiũ in propinquo esse scie-
bat, excubias aliis nouis de exercitu adiectis mox fir-
mat: præsidia equitum supra Vngarorũ & Polonorum
munitiones disponit: in mediis castris in equis omnes
consistere iubet: ad easque Stanislaus Solkewio relicto,
ipse ad Vngarorum munitiones se confert. Interim ut
& tot hominum vitæ parceretur, nec munitiones, tor-
menta, ac apparatus bellicus reliquus, præda deniq; mi-
liti debita incendio corrumpere, ad deditionem Mo-
scos hortabatur. Obsessi in extremo rem suam versari
videntes, primario ad illum sacerdote misso conditio-
nes nihilominus, tamquam integris rebus, propone-
bant. Samoscus retento penes se sacerdote, Paulum
Iulanum cum Ioanne Christophoro Droiuio ad eos
mittit, qui quo loco res eorum sint doceant, vnãque
deditionis conditionem esse, ut clementiæ Regis se per-
mittant. Inter hæc cum illuxisset, simul Rex ac plerique
senatores ex superioribus castris accesserunt. Confluxit
& lixarum ac calonum ad spem prædæ non exiguus
numerus, iamq; pars per vallum nitebatur. quod con-
spicatus Vngarus miles, fremens expertes laborum ac
periculorum oppugnationis ad prædam conuolare:
tandemque ab hoste quoque crudelitatis ac sæuitiæ
pœnas exposcendas, illiusque etiam sanguine tot com-
militonum mortibus, multorumq; sæuissimè ab illo ex-
cruciatorum suppliciis parentandum dicens: dum in-
ani clementiæ studio iam toties illi parcitum sit: dimis-
sum ad Polotiam, Susam, Velisium, Vsuiatam, per alia
præsidia distributum: vires eius auctas, crudelitatem-
que magis confirmatam, in arcem irrumpit: promi-
scuè omnes interficit. Idem Polonus miles facit. Mife-
rat iam antea Samoscus, qui Palatinos primariosque
præfe-

præfectos deducerent. Adducti ab ijs fuerunt præfecti tres, Ioannesque Viechovus, de quo supra dictum est. de eo cum vt homine magna apud Ducem gratia, secretorumque omnium conscio diligentius Samoscus interrogasset, ille more Moscouitico ad supplicium & cruciatum se queri existimans, longius è conspectu Samoscij versus castra productus, conspicatus in proximo Georgium Farensbekium, cum quo in Moscouia notitia illi intercesserat, ad eum vitæ deprecandæ causa se proripuit. Id fugam Vngarus miles interpretatus, subito in eum impetu facto, nullo opem ei ferre valente eum interfecit. Iam ignis ad fornices, in quibus pulueres tormentarij asseruabantur, peruenerat. quo periculo oblato pars se subducebat, nonnulli à præda & cæde nullo periculi metu auocari se passi in arce remanebant. inter quæ subito ingenti fragore edito, puluis incensus fuit, magnamque cum vicinorum ædificiorum, tum hominum tam nostrorum, quam captorum stragem fecit. Eo igne tormenta simul, & quicquid in arce armorum erat, quorum ex Liuonicis manubiis magnū numerum cō Moscus congefferat, instrumentumque militare, ac reliqua præda omnis partim exusta, partim corrupta fuit. Ex maioribus tormentis vnum solum accipitris imagine, ac circa id minora nonnulla, quæ loco inferiori dirutis ædificiis contra os, per quod Vngari irrupturi erant, disposuerant, reliqua ignis fecit. Mortuos, quorum passim magni acerui iacebant, à lixis sepeliri: fossas è quibus oppugnata arx fuerat, à milite suppleri Rex iussit. Indè arcis restaurandæ muniendæque, quod sine ea regionem agrumque, ab hoste captum nulla ratione retinere se posse videret, summam curam suscipiendam sibi intelligebat. Itaque adhibito architecto Italo Dominico Rodolphino Camerte, secundum eam rationem, qua ipse opus dimensus erat, in Polonos,

Vngaros & Lituanos, æmulatione nationum eò citius perfectum iri existimans, id partitur. Erat, quemadmodum supra ostensum est, exercitus hostium ad Toropciam; qui, quemadmodum iussus erat, prælio dimicare in animo non habebat: in singulos saltem, si quos fortè ab exercitu frumentandi, aut pabulandi causa digressos, excipere posset, intentus erat; Regeq; obsessione ad Lukos occupato, quinquaginta circiter è nostris earatione oppresserat. Huic rei cum obsidione iam finita occurrendum Rex existimaret, primùm Georgium Barbelium Vngarorum equitum alæ præfectum, Polonis aliquot, ac Vngaris equitibus, scloppetariisq; ei attributis, contra hostem mittit; postea præstare ratus, si iustas copias mitteret, quæ pugnandi potestate ab hoste facta, occasione data fortunâ tentarent, Ioannem Sbarassum Palatinum Braslauiensem cum delectis ex omni Polonorum, Vngarorum, & Germanorum equitum numero mittit. Huic mandat, ut assumpto Georgio Barbelio, & qui cum illo præcesserant equitibus, propius ad hostem accedat: ac si qua rei gerendæ opportunitas detur, prælium comittat. Sbarassus sub vesperam castris egressus per totamque noctem itinere continuato, postero die Barbelium assequitur: communicatoq; cum illo ac Farensbekio consilio, quem Samoscius tunc aduersa valetudine impeditus, cum præcipua iuuentute ex comitatu suo miserat, relictis eo die ex labore iumentis sub noctem Albertum Kiralium, cum certo equitum Polonorum & Vngarorum numero de secunda vigilia præire: eum vnus miliaris intervallo cum ala equitum Barbelium sequi iubet: cum reliquo agmine mox ipse subsequitur. Kiralius noctu progressus in hostium excubias incidit, quas ad pontem, circa quem scloppetarij aliquot hostium in insidiis confederant, persecutus, ijs reiectis, quòd intempesta nocte non vltius progredi-

grediendum sibi statueret, eo loco se continuit. Mane Barbelius, ac paulò post reliquus exercitus eum consequitur. Adiectis aliis nonnullis levis armaturæ militibus denuò Kiralius præmittitur. Exercitus interim hostium, delectis ex omni suo numero quater mille circiter, qui nostros insequentes morarentur, ac demum ipsi quoque subsequerentur, Toropeciam versus, & in Moscuiam se recipiebat. Vltimi cum de aduentu exercitus nostri cognouissent, territi, continenter & non minus celeriter ipsi quoque eundo faciebant, ut fugæ confimilis profectio videretur. Antecedebant exercitum ex nobilitate quadraginta circiter equites, & ad Kiralium iam peruenerant. Hostes flumen iam transgressi erant; instructaque acie, si nostri flumen transirent, ut prælio cum illis decertarent, expectare videbantur: mille equitibus cis flumen relictis, qui nostros distinerent, ac in suum locum pertraherent. Hi partim velitando, partim cedendo ad flumen eos pertrahunt. in cuius aduersa ripa scloppetarios longo ordine disposuerant. Illis à Stanislao Sabocio, ac equitibus Germanis, qui sub illo merebant, deiectis, nostri transmissio flumine, reiectisque hostium scloppetariis, à latere in aciem hostium invehuntur. Illi primum ad resistendum se comparantes, mox alia signa ac maiorem exercitum aduenire conspicati, ne vnum quidem impetum eorum tulerunt: pars Toropeciam fuga petiuit: nonnulli via regia Moscuiam versus fugerunt; alij in proximas paludes se abdiderunt. Nostri, etsi nox iam appetebat, per quindecim tamen ferè millia passuum ultra Toropeciam hostem insecuti, ultra quingentos in fuga ea conciderunt: ducentisque captis, ac in his maximè insignibus Demetrio Ceremessino, de quo supra dictum est, ac Ioanne Nassokino Offanasi filio, quem paulò ante discessum Regis Vilnam pro legato ad Regem missum fuisse ostensum.

est, paucis è suis desideratis aut vulneratis ad exercitū redierunt. Toropecienſes præſidiarij cū propius accedere noſtros vidiffent, rati ad obſidendos ſe venire, more ſuo ſtatim opidum exuſſerant; omnibuſq; rebus comportatis in arcem ſe receperant. Interim Philo Kmita Palatinus Smolenſcenſis non exigua leuiſ armaturæ equitum manu coacta, in agrum Smolenſcenſem excurrerat, ſecundiſq; populationibus aliquot inuitatus Smolenſcam longius progreſſus fuerat. Sed cū ad decem millium exercitu coacto vehementer cū hoſtis premeret, captiuſ, quos circa ſe habebat, interfectiſ, & leuioribus aliquot tormentiſ relictis recipere ſe Orſam coactus fuerat. Iam cū Vſuiatæ Rex eſſet, Nicolaum Dorohoftaiſcium Palatinum Poloti-enſem ad Neuclam oppugnandam, miſerat; quod ea via à Lukis regredi conſtituerat; Dorohoftaiſciuſq; ipſo ac pro eo Lituani parteſ eas depoſcerent. Sita Neucla eſt ſupra Lukoſ Lituaniam verſuſ in complexu lacuſ, ex quo eiufdem nominis fluuiuſ ſe deriuat, iam antè ſub Sigifmundo Auguſto Polonorum cū Moſciſ pugna nobilitata. Cū pro numero præſidij non ſatiſ multi militeſ, iique in hoc genere belli nunquam antè hac verſati conueniſſent, ab eaq; parte qua lacuſ caſtrum alluens difficiliorem oppugnationem faciebat, loco minus opportuno obſidere eam inſtituiſſent; hoſtiſ etiam continentibuſ iaculationib. & eruptionibuſ paucitate eorum contempta, acriter ſe defenderet, huc uſq; obſidio ducebatur. Lukiſ in poteſtatem redactiſ, primū ex atratiſ quingentoſ eò Rex miſit: haud multo poſt etiam Ioannem Bornemiſſam cū Vngarorum cohortibuſ, & maioribuſ tormentiſ aliquot: tandem ſolicituſ de euentu obſidioniſ, quod iter, quemadmodum dictum eſt, facere illac conſtituerat; Samoſci-um cū iſſ quāſ habebat copiſ ire eò iuſſit. Hic, cū aliquot

aliquot iam millia progressus fuisset, nuntium redacti in potestatem præsidii in itinere accepit. Bornemissa enim, postquam eò venisset, ex priori nostrorum paucitatis contemptione hostibus erumpentibus, manu ipse cum iis congressus, nonnullisq; interfectis intra munitiones eos compulerat: Inde magna diligentia in oppugnationem incumbens, ab ea parte qua cum continente coniungitur, proximè hostium munitiones maximo militis labore fossas promouerat: veteres, à Lituario milite propius institutas, auxerat. cumq; continuo militis labore ad fossam, quæ à continente castrum ambiebat, opus promouisset, progressu in validas contignationes transversis lignis confibulatas incurrerat; quibus decem pedes in latitudinem ab ima parte ad summum usq; superiniecta humo labrum fossæ hostes munierant; indefessoque studio securibus materia tandem amota, tanto silentio ad munitiones hostiū peruenerat; ut non prius ab illis sentiretur, quàm miles ad incendendum parietem missus, mœnibus ignem subiiceret. Quare ita hostes perculsi fuerunt, ut subito ne quicquàm reclamantibus præfectis deditioem facerent: Itaque oppresso mox incendio integra in potestatem venit. Tormentorum ac reliqui instrumenti militaris pro captu castelli iustus apparatus: pulueris tormentarij præter diligentiam Moscouiticam prouidendorum præsidiorum, quod in nullo adhuc euenerat, non plus dimidiato vase repertum in eo fuerat. Rex nuncio hoc deditioem accepto iam de discessu suo ac de statu Prouinciæ captæ constituendo cogitans, ex itinere Samoscium reuocat. Duo omninò è propinquo præsidia, Toropecienſe, ac Sauolocienſe imminebant, quæ vniuersæ ditionis eius possessionem turbare ei poterant. Plebe præterea rusticana, ut in nouo imperio infida: Lituaniā versus maximis ac vastissimis solitudinibus interiectis, Toropecio

ropecio & Sauolocia infestis relictis, præsidium ipsum vndique ab hostibus & difficultatibus obsessum, ab omniq; subsidio interclusum non satis tutò ibi futurum intelligebat. Sauolocia præterquam quòd Lucensi præsidio maximo incommodo futura erat, cogitanti iam de futuri anni expeditione, necessariò etiam occurrebat. in insula enim lacus, ex quo Velika fluuius se deriuans primò Opockam, indè Ostrouiam, ac deinceps rectà Plescouiam, atque infrà eam in lacum Pelbam influit, tanquam in capite viæ Plescouiensis sita, Plescouiam, quod suscepti belli series postulare videbatur, eunti, non exiguam moram obiectura ei videbatur. Quod eò magis præcauendum illi erat, quòd si per continuas rursus siluas Polotia Plescouiam contendentem hostis, quod hactenus omisisset, itinere fortè prohibere institueret, eum locum magnam ad eam rem facultatem illi præbere: eò verò si potitus fuisset, nihil Plescouiam ferè vsque præter Ostrouiam futurum intelligeret, quod iter eius morari posset. Occurrebat omnibus hisce reb. cùm oppugnationis difficultas, quæ summa proponebatur; quòd Sauolocia maximo lacu vndiq; circumfusa, nullos omninò è terra nisi per pontem vnum accessus habebat: tum anni tempus ipsum, quod iis in locis mense iam Octobri aliàs pluuium eò maiores tempestates atque incommoda allaturum existimabatur, quò minùs imbrium proxima æstas habuisset. Mittit nihilominus Samoscium huiusmodi cum mandatis, vt consilium ipse pro tempore capiat; ac potiendæ quidem eius spe oblata, exercitum ei admoveat; ab omni spe deiectus, itinere supra se à dextera capto Lituaniam versus se recipiat. Illi aucto tormentorum numero ad reliquas copias, quas habebat, quingentos pedites Vngaros, & alam equitum quam Gabriel Bekefius Gasparis defuncti frater ducebat, attribuit.

attribuit. Perfecta interim munitione arcis Lucensis, cum Rex consuetudine sua ipse semper ad opus esset, militesq; ne quod tempus ab opere intermitterent, hortaretur: eaq; tormentis, commeatu, ac omnibus ad defensionem necessariis rebus prouisa: descriptisq; qui in presidio manere debebant, tam equitibus, quam pedibus ternis castris Neuelam inde Rex peruenit. Secuti Regem Neuelam fuerunt legati Moscici; qui excidii Lucensis ipsi spectatores fuerant, & tum ad literas, quas scriptas supra ostensum est, responsa à principe suo expectabant. Neuelæ per aliquot dies, ut Sauolociensis oppugnationis euentum expectaret, Rex substitit. Interim tabellarij & Regis & legatorum ab obsidio ne Lucensi in Moscouiam missi reuertuntur. Qui à Rege missus fuerat, longissimas literas attulit, in quibus superiorum literarum omnium argumento, more suo longa oratione repetito, quia Liunioniam à rege vniuersam repeti intelligeret, ut quo à se iure possideretur, ostenderet, à Suentoslao quodam Micislai filio, genus suum deducebat. Eum antequàm sacro baptismo Christiana religione initiatus fuisset, Iurg vocatum: ab eoque Iurgo Horodum, quam arcem & urbem aliàs Derpatum Germani appellarent, conditam: inde cunctam Liunioniam ad se vnicum Micislai eius hæredem longa successione pertinere. Priores Poloniae reges fratres appellare solitus fuerat: hunc non nisi vicinum: Inter alias conditiones, quas ad Lukos à legatis eius propositas supra ostendimus, fraternum quoque nomen Regi detulerat. Responderat tum Rex, fraternitatem eius se non morari: Liunioniam, pro qua bellum suscepit, solam petere. Iam hisce literis fraternam illi necessitudinem deferebat, ac etiam eo inuito nomen hoc ad illum usurpaturum se ostendebat. summa hæc erat, ut publicæ concordie causa titulum Liunioniæ cum rege

se com-

se communicaturum, quatuor præterea castellis eius; in quibus Kokenhausium præcipuum erat, cessurum se illi demonstraret, si Rex vicissim Lukos, Velisium & Neuelam vetustæ ditionis suæ, nuper sibi adempta redderet: ampliora mandata se legatis suis perscripsisse. Hi postridie ad Regem adducti, cum senatoribus agendi potestatem dari sibi petierunt. ter cum iis congressi tribus proximis diebus, alia sex ad priora quatuor castella adiecerunt, in quibus Rûneburgum potissimum, cætera ignobilia castella erant. Nulla alia mandata deinceps iis proferentibus, re infecta à colloquio recessum, permissumq; illis fuit, ut in Lituaniam, inde in Poloniam Regem redeuntem sequerentur, dum noua à Principe suo mandata acciperent. quod ipsis ultro petentibus eò libentius Rex permisit, quod sibi quoq; interim, quis ordinum de futuro bello animus futurus esset, cognoscendi spatium dari non moleste ferebat. Captis Lukis & Neuela, Ieseriscia, quindecim à Neuela millibus passuum, tamquam sinu nostrorum præsidiorum vndiq; cincta relinquebatur. Qui in præsidio erant ab omni defendendi sui spe interclusos se videntes, deditionis spem Regi fecerunt. Itaque missus eò Radiuilus Palatinus Vlnensis, antequam Neuela Rex discederet, in deditionem eos accepit. Interim Sauolociam cum exercitu Samoscius peruenit. Totus autem illè tractus, cum per apertos ac patentes campos frequentissimasq; villas iretur, non mediocri voluptate omnes affecit. Moscouitica enim ditio ut finitima, quemadmodum ostensum est, siluestris pleraque est; ita mediterranea bonitate agri, glebæ vbertate, fluminum ac lacuum plerisque in locis opportunitate, villarumque frequentia nulli cedit. Lucensis verò ager rebus iis cæteris ferè omnibus etiam præstat: vnde dum ad Lukos exercitus erat, in summa omniū rerum copia erat.

Oppi-

Opidum Sauolocia, quod ad Plefcouienfem Lucenfemque viam fuerat, fub primum Regis ad Lukos aduentum præfidiarius miles more fuo deleuerat; pontemque, qui ab arce ad opidum pertinebat, interciderat. Arx fita, quemadmodum antè demonftratum eft, in lacu eft. qui à Velika fluuio effufus, abque omnibus partibus latiffimè reftagnans, latiffimas tamen ab oriente & occafu aquas habet; quòd indè ex alio fuperiore lacu flumen erumpens, occafum verfus exitum habet: quà anguftiffimus eft; non minùs trecentos paffus in latitudinem patet. Samofcius præmiſſo Chriſtophoro Roſdraſeuio cum alis aliquot equitum in Plefcouienfem viam, alteram quæ ad Neuelam pertinebat, Lucam Dſialinium, ac Nicolaum Vrouecium obſidere: ac fi qui ex Neuelanis dediticiis ad præſidium id, quemadmodum facere ſolebant, adiungere ſe vellent, id ne faciant; ac in vltiorem Moſcouiam ſe recipiant, adigere eos iubet. Ipſe ab exercitu Sauolociam præcurrens ambitu capto, abque omnibus partibus arce circumita, reperit notum verfus, aliam eodem in lacu contra caſtrum inſulam eſſe; quæ à plerisque partibus lacu, ab aliis vliginoſo amne ac natiua foffa defendere-
tur: cadem breuiſſimum ad arcem traiectum eſſe. Ita-
que cum ſi eò exercitum traduceret, vtrumque ſe confe-
cuturum intelligeret, vt & contra quasuis vel maximas
copias hoſtium tutiſſimo loco conſideret: & eodem ex
loco maximam oppugnandæ arcis facultatem habe-
ret, quàm latiffimè ad maioris exercitus ſpeciem hoſti
obiiciendam ſignis explicatis ſequenti die exercitu om-
ni illum in locum tradueto, caſtra communiit. Omni-
bus maximam difficultatem oppugnatio habitura vi-
debatur, arce ab omnibus partibus propter aquas in-
acceſſa, opere præterea munita, anni tempore incom-
modiſſimo, quo pluuiis, frigore, gelu, quæ in propin-

M

qua

qua expectatione iam erant, continuo miles transfere-
tur: Samoscius non planè tamen desperandum puta-
bat. Itaq; quæ ad oppugnationem pertinerent, admi-
nistrare cœpit. Erant è regione castrorum nostrorum
tria propugnacula ingentis magnitudinis: extrema
duo ex maximis robustissimisque trabibus contigna-
ta: medium minus aliquantò: fenestris ad tormento-
rum vsus, quemadmodum & reliquorum laterum pro-
pugnacula omnia apta. Hæc quòd non cespite vestita,
sed veteri more argilla incrustata erant, magnam in
spem Samoscium adducebant, fore, vt decussa argilla
& facilimè, vt materia veteri & arida, nulloque humo-
re nutrita incenderentur: & incensa propter tantam li-
gnorum struem quàm latissimè incendium propaga-
rent. Alebat spem eius Saburoui, magna ob virtutem
inter Moscos & apud Ducem autoritate viri, arcisque
huius præfecti institutum; qui quòd vel pulverem tor-
mentarium frustra consumi, vel militem fatigari no-
lebat, summo silentio, quod non nisi in maximi metus
significatione à Moscis fieri soleret, se suosq; intra muni-
tiones continebat. quamvis sub primum exercitus ad-
uentum decem circiter pabulatoribus nostris, quos op-
prefferant, minutim concisis, atq; ex arce iis præcipita-
tis, terrorem aduentanti militi incutere ea immanitate
conatus fuerat. Samoscius ratis interim, quæ contis ad
arcem adigeretur, militiq; ad oppugnationem tendenti
transitum præberet, Nicolao Vrovecio iungendæ ne-
gotium dat. simul munitiones fossasq; à castris contra
arcem duci iubet. quibus postridie magno opere perfe-
ctis, tormenta mox constituta fuerunt: rateque interea
temporis ex altiore quodam ædificio, quod reliquis in-
censis solum hostes reliquerant, ab Vrovecio perfecta,
primum tormenta complura, ab ea parte, qua angustis-
simus lacus erat disposuit: è quibus rectis à fronte ieti-
bus,

bus propugnacula, de quibus dictum est, ferirentur: alia deinde à latere, quo meridiem arx spectat; ne & per auersam portam hostes erumpere, nostrosque pontem transgressos, ac à fronte arcem oppugnantes, circumuenire possent; & simul, si qui in superioribus propugnaculis constitissent, ut directis secundum latera ictibus tormentorum indè deiicerentur. quibus rebus administratis, oppugnationem ordiri constituit. Erat ab ima arcis radice accliuus versus eam ascensus, quem hostes vna altissimorum palorum sepe, binisq; ingentium & acutissimorum ceruorum ordinibus, iusto inter singulos spatio relicto, obseperant. Contra ea hæc Samoscius comparabat. quia lana destituebatur, centonibus stragulisque equorum per vniuersum exercitum conquisitis, quam plurimos ex iis faccos implet. Docet militem, quia loci natura à maiorum tormentorum vi, quòd ea deorsum mitti non possent, satis illum defenderet, contra scloppetos, postquam in aduersam ripam transiisset, faccos eos supra ceruos iniiceret; sub iisq; delitescens, fossas mox ab ea parte sub arce ageret; ex quibus deinde & hostem extra munitiones suas progressū reiiceret, & ignem in propugnacula inferret. His rebus ita constitutis, ratis ab eo loco, quo iusto à castris intervallo, instituta erat, cōtra arcem protracta; magnoq; militum concursu certatim in id omnibus incumbentibus, inter creberrimas, quæ ex vtrisq; munitionibus fiebant, eiaculationes, in aduersam ripam directæ fuit. sed quòd breuior, quam ut pertingere eò posset, reperiiebatur, vtrinque tum ita discessum fuit. Christophoritamē Rosdrafeui, præfecti Lanciciensis, magne virtutis & nominis viri casu non mediocre à nostris detrimentum acceptum. Hunc dum ratis applicaretur, ad tormenta, quò rectiusibi omnia administrarentur, curare Samoscius iusserat; ille cum nihilominus procurrisset, globo ex ho-

stium munitionibus supra dextrum oculum excepto concidit. inde ratis ut corrigatur, a peditibus Polonis retrahitur. quos dum hostes continentibus tormentorum ictibus ex arce petunt, qui funem regebant, perculsi eum dimittunt. Id conspicati tres alij e proximo pedites, cum tenere illam aliter non possent, in ratem insiliunt; ventoque vehementiore abrepti ad hostium munitiones secundum proxima propugnacula deferuntur. Videntes hos Mosci aquis ab exercitu omni ex parte interclusos, nauigiis plerisque, quae in arcem omnia subduxerant, inscensis, magno numero ad eos contendunt. Hi acriter primum scloppetis, inde contis se defendunt, compluresque ex hostibus deturbant: tandem cum undique circumuenirentur, proximis cymbis e quibus hostes deiecerant, arreptis, in eas desiliunt, ratemque relicta euadunt. Interim eodem vento in aduersam ripam ratis ferri coepit. inquam cum persequendae eius finem nondum hostis faceret, Samoscius equitibus aliquot summissis eam recepit. Rate eodem die resecta cum ex superioris temporis casu miles perterritus, quem antea praemiis ad promouendam eam Samoscius prouocarat, minus promptus iam ad ministeria haec cum periculo obeunda esset, Nicolaum Vrouecium necessarium suum ratem conscendere, saccoque vno ex iis, de quibus diximus, ante se colloco, dirigere in aduersam ripam eam iubet. Vrouecius impigre imperata exequitur: aliquotque gregariis militibus post se collocatis, ipse ab anteriore parte ea sola, quae demonstrata est, ratione tectus, creberrimosque globos obiecto sacco excipiens, stationibus hostium, quae in extrema ripa excubabant, fuga in arcem feripientibus, ad ripam ratem adigit. Miles & inprimis Vngarus confertim, quemadmodum iussus erat, pontem transgressus, septem a ripa obiectam securibus primum scindebat: mox inde, quo celerius labore perfunge-

fungeretur, cum alienissimo anni tempore omnia pericula frigoris ac aëris iniuriis leuiora duceret, saccis in ceruos non iniectis, nullis fossis ductis, aut vlla re earum, quæ imperatæ erant, administrata, argilla necdum decussa, ad ignem propugnaculis admouendum conuertitur. Non obscuram iam timoris & trepidationis significationem hostes dabant. verum dum hi longo temporis spatio ceruos moliuntur; quorum cum bini essent ordines, singulorum ordinum denum ad minus pedum latitudo erat: dum Georgium Sussium, qui facces ac ignes adferat, trans lacum mittunt: dum alia, quæ ei rei vsui sint, administrant, hostes recollectis interim animis, auersis omnibus portis erumpunt: integris curatisque corporibus nostros præ frigore & gelu ad rem gerendam penè inutiles circumueniunt: longissimis hastis, acutoque & falcato ferro armatis, bardeschos ipsi vocant, breuiore armorum genere, ac frameis saltem vtentes propellunt: pars cæditur: pars in turba mutuo se impellens in lacum præcipitata aquis mergitur. Samoscius & si deliberatum iam habebat, omnes potius acerbitates perferre, quam coeptam oppugnationem dimitteret: diei tamen huius successu territos plerorumque animos ratus, consilio habito, quid in quoque ad futura pericula animi esset, explorare constituit. Consilio eo habito, vix vnus repertus fuit, qui habendam rationem temporis, fortunæque concedendum, à quarum neutra iam subleuarentur, censeret. à reliquis omnibus vox nulla audita fuit, superioribus successibus suaque virtute indigna; principioque à Farensbekio facto, quiduis potius perferendum, quam infecta re ab obsidione discederent, omnes statuerunt. Misit mox Samoscius Georgium Sibricum cum literis ad Regem: ne incommodo hoc in oppugnatione, nimia militis prope ratione accepto permoueatur: ne ab obsidione se reuo-

cet: neu sua causa diutius Neuelæ subsistat, rogat; castra se posuisse ad obsidionem ducendam aptissima, cum loci natura ac munitione, tum circumiacentium regionum fertilitate & abundantia: nihil sibi vel ad maximas quasque copias hostium sustinendas loco tutissimo, vel in agro frumentis, pecore, materia, aquis abundante, ad omnium rerum usum deesse posse. Hærebāt Rex adhuc Neuelæ loco, quod superioribus stationibus & Kosakkorum direptionibus vastatus esset, quibus ex rebus commeatus ac pabuli inopiam existere necesse erat, imprimis incommodo. Sub idem verò tempus ab aëre etiam contagium quoddam, quod primum ex Orientis partibus profectum, in Italiam inde ac Galliam, aliasq; regiones perlatum fuerat, vniuersam quasi Europam peruagatum Cracouiam quoq; ac Vilnam, atque inde ad exercitum peruenerat. Erat id non tam lethali aliqua vi timendum, quam progressu atq; celeritate, qua proxima quæq; loca complectebatur, admirabile. Primò inferiorem dorsi spinam horrore plerumque occupabat: inde in capitis grauedinem & languorem, quos corripuerat, resoluebat, pectori imprimis graue, quibus tamen intra quartum vel quintum diem non decessisset, eos in febrem degenerans interimebat: lethale ferè iis, qui purgantibus medicamentis, aut venesectione utebantur. quod vtraq; respirationem grauiorem efficiebant: illa quod humorem omnem à capite in pectus magna vi trahebant: hæc, præterquam quod corpus refrigeraret, debilitaret etiam vires, quibus ad respirationem opus esset. Nomen vt nouo morbo certum nullum inuentum fuit. Rex ad eas copias, quas antè Samoscus habebat, nongentos equites Polonos, ac mille circiter pedites Vngaros cum Stephano Carolo ei adiecit, moxq; Vilnam mouit, Polotiæ eo, de quo dictum est, morbo, ipse etiam tentatus. Samoscus

scius interim, quæ ad oppugnationem pertinerent, summo rursus studio apparare instituit: ratem quamvis ex satis magnis trabibus in latitudinem contabulatam, quò latior tamen & expeditior ad arcem accessus militi esset, duplicari iubet. Nauigia cimbasq; quò pluribus circumfusus omnib. ex partib. oppugnatio administretur, viresq; præsidij quam maximè distrahantur, per vicinas villas ac stagna magna diligentia conquirat. Reliquis omnibus nauigiis subductis, vnum solum hostes reliquerant. Id cum Monachorum loci cius fuisset, ac ad maiorum retiorum vsus comparatum, octuaginta ferè hominibus capiendis idoneum esset, quia tamen vetustate vitium fecerat, rimarumq; plenum esset, neglexerant. Samoscus quia patebat partim recentib. coriis bubulis, partim musco obstructo, vt commodè nauigari eo posset, effecit. Iisdem temporibus, cum intellexisset, Ioannem Suiscium Petri F. Palatinum Plescouensem cum exercitu ad Porchoviam confidere, Martinum Volscium veteranum præfectum cum expedito equitatu exploratum eò misit. Suiscus, quò de discessu Regis audiisset, neq; per anni hoc tempus alium exercitum expectaret, dimisso exercitu Plescouiam se receperat. Itaque accidit, quod euenire necesse erat, vt in nulla periculi expectatione incuriosius omnibus agentibus, ac sine metu comitantibus complures Volscius opprimeret; missisque agrestibus, quibus parcere à Samoscio iussus erat, nobiles aliquot captiuos secum in castra adduxit. Rebus iis, quas diximus ad oppugnationem comparatas, decem omninò diebus perfectis, Samoscus maiori nauigio, quod relictum ab eo ostendimus, militaribus viris aliquot assumptis lacum inuectus, quibus partibus maximè opportuna oppugnatio futura esset, accuratius cognoscit. Tormentis tria, quæ contra castra esse diximus, propugna-

cula, quò & argilla deterfa magis incendio paterent, & materia dilacerata apertis quasi venis celerius ignem raperent, continuò quati iubet. Cùm peditatus propter tempestatum etiam iniurias, contra quas minus tectus erat, nec animorum nec virium satis habiturus videretur; nobilitas equis missis, coniuratione inter se facta, ad arcem duci se flagitabat. Coniungebant se cum his pari studio, qui sub Farensbekio militabant equites, nobiles nonnulli Germani. Samoscus in media acie, qui cum facibus ac tædis ad incendenda mœnia expediti essent, collocatis, à dextro cornu, contra quod superius propugnaculum oppositum esset, Polonos & Germanos: à sinistro ad alterum propugnaculum Vngaros, qui vtrunque à media parte ignes inferentibus, contra eruptiones præsidio essent, constituit: Polonis Vrouecium præfecit, illique in omnes casus Andream Orechouium substituit. Cum Germanis Ottonem Vxkelium Farensbekius misit. Ratem ab utroque latere faccis, de quibus ostensum est, contra transuersos minorum scloppetorum ictus muniri iubet. Ea adducta inter confertissimas hostium ei aculationes in aduersam ripam applicatur; tempestatéque sub idem tempus commutata, post continentes imbres cum serenitate maius pugnandi studium omnibus incescit. Iam primi ratem transierant: simul navigia milite, tormentis ac facibus instructa, omnibus ex partibus prouolabant: interim ex vtrisque munitionibus magno cum hostium detrimento crebræ ex nostris ei aculationes fiebant. Cùm subito regias literas conclamare hostes cœperunt. Samoscus superioribus diebus propterea, quod cum Lucensi expugnationi magna ex parte præfuisset, tanquam crudelitatis eius authoris nomen suum horrore esse hostibus intellexisset, regio nomine atque signo, quod pro Cancellariatus munere penes

nes illum erat, literas ad obsessos hoc argumento dederat. Iussisse Regem omni studio Samoscium in oppugnationem incumbere: quod si tamen ultro in deditio- nem venirent, pro clementia sua conseruandos statu-isse, abque omni iniuria prohibitos velle: quæ quò dili- gentius obseruentur, cubicularium suum se mittere. Li- teras hasce reiecerant primò. postquam quid in illis ef- set, edocti fuerant, ad sua præsidia Regem scribere de- bere responderant: hoc non eius iuris esse, in quo regiæ literæ reciperentur. Eas literas tum primùm voce, inde præfectis aliquot scloppetariorum missis flagitabant. Datae illis fuerunt literæ fideſq;. Misit simul Samoscius Ioannem Thomam Droievium, præfectum Premisli-ensem, qui arcem in fidem acciperet, Palatinosque ad se adduceret. Hic primò non Palatinos modò, verùm mi- litum etiam magnæ partis animos dubios adhuc repe- rit: tandem cedentibus timori militibus, Palatini relu- ctantes ad Samoscium adducti fuerunt. Dediticiis fi- des seruata fuit. matronæ præterea aliquot, quæ Lukis captæ fuerant, quòd ne pudicitia earum in tanta itine- ris longinquitatē ac militum multitudine negligentius haberetur, verebatur, à Samoscio condonatę: miranti- busque Moscis, ac ultro fatentibus, se eius ætatis atque formæ matronas nostris reddituros non fuisse, post- quam causam, ob quam id à Samoscio fieret, intellexe- runt, tum verò minùs etiam mirum videri debere dice- bant, si in tanta morum diuersitate, fortuna quoq; dif- similis esset. Ita arx & loci natura munitissima, & ab o- mnibus rebus ad defensionem paratissima, anni tem- pore, continuis imbribus, ac gelu hostes iuuante in- tegra recepta fuit. Globorum candentium ne in hac oppugnatione vsus esse posset, Saburovus excogitâ- rat. Aliarum enim oppugnationum euentu monitus, parietem, quæ crassior erat, interciderat; ac vno solo tra-
bum

bum ordine, quibus contextus erat, relicto, interiorem partem eius satis lato aggere, quem cratibus continebat, vestierat. fiebat inde, ut globi per tenuem parietem subito transeuntes in aggere haerent, ibique sua sponte tandem supprimerentur. Memoria inde Samoscius tenens Regem proximo anno per ea loca in hosticum ulterius progredi in animo habere, tormenta & grauiorem militaris instrumenti partem Sauolociae deponere constituit; Stephanumque Carolum cum Vngarico milite in arcem traducere omnia iussit. Hic veteri ponte, quemadmodum ostendimus, ab hostibus interrupto; rate, qua in oppugnatione miles usus fuerat, infirmiore, quam ut tantae molis tormenta promoueri per eam possent, alterius etiam pontis tam exiguo tempore efficiendi summa difficultate proposita, tormenta firmissimis, iisque pluribus rudentibus apta, quò vno rupto alij subsidio essent, per lacum ipsum, quà durissimum solum & maxime argillosum explorarat, cohortibus aliquot vngarorum in aduersa ripa collocatis, in arcem à munitionibus nostris traduxit. In praesidio Georgium Sibricum cum vngari militis parte relinquit. Farensekiū cum mille circiter equitibus latiore circuitu capto Opockam versus proficisci, conuersoque ad sinistram per Nescerdam itinere ad Polotiam rursum occurrere sibi iubet. Nam quòd infra ad Velikam amnem sita ea esset, quae natura fluminis esset, cognoscere: si etiam oppugnanda proximo anno foret, situm eius eo magis praecipuum ante habere cupiebat, quòd eodem in loco sub Sigismundo rege incommodum acceptum memoria teneret. Eadem futurae expeditionis cura itinera quoque reliqua omnia, flumina, item, si quae nauigabilia essent, pleraque, ut explorata ante haberet, operam dabat. maxime quòd lacum Vsciam esse accepisset, ex quo eiusdem nominis fluuius se deriuans in Vsciam lacum

lacum influeret, indeque mutato nomine in Dryssam lacum effusus eiusdem nominis fluuium efficeret, earumque potissimum opportunitate Sokolam a Mosco comineatu, aliisque rebus necessariis prouisam: diligentissime omnes meatus exitusque eius cognoscebat. Itinere inde ob imbrium ac frigorum iniurias, silvarumque, per quas ibatur, magnitudinem, ac pontium plerisque in locis inopiam aliquantò incommodiore, lue præsertim de qua dictum est, exercitum affligente, ut pacatis tamen circumcirca locis omnibus tuto per Polotiam, Vilnam ad Regem venit. Dum Rex hoc rerum successu expeditione Lucensi perfecta in Lituaniam se recipit, Moscus, quò animi tristitiam aduersis rebus collectam discuteret, repudiata priore vxore, quod ipsius moribus toties ei licet, quoties libet, iam sextum tum maritus delectu puellarum publico indicto nouam induxit, idemque ex proceribus etiam, & consiliariis suis quosdam facere coëgit. Delectus eius quemadmodum ex nobili quadam captiua, quæ ipsa in delectu eo fuerat, cognitum est, hæc est ratio. Proceres nobilesque omnes, qui filias aut propinquas nobiles aliqua formæ commendatione in potestate habeant, edicto proposito, certo tempore omnes adducere iubet. Ad diem præparata iam antè eum in vsum domo spatiosa & ampla, per singula cænacula duodenos lectos habentia: totidem puellæ distribuuntur. ipse vno sene comitatus omnia ordine circumit: ut quodque ingressus est, folio iam antè instructo confidet: puellæ in magno omnium principi suo placendi, ac ad eam fortunam perueniendi studio elegantissime omnes ornatae, ad genua eius ordine singulæ aduolutæ, sudario auro ac vnionibus contexto in genua iniecto discedunt. quam ex his maximè probarit, ducit: cæteras vel agris, vel pecunia donatas dimittit. Rex Vilnæ paucis diebus commoratus,

tus, Grodnam proficiscitur, ac iam de futura expeditione cogitans, quod tardius comitia sibi habenda, tributumque si quod in illis scisceretur, serius exactum iri intelligeret, ne quod gerendæ rei tempus dimittere cogeretur, priuatas interim rationes mutuæ sumendæ pecuniæ iam tum inibat. Præter Marchionem Georgium Fridericum in Prussia Ducem, Augustum Saxonæ, & Ioannem Fridericum Brandenburgensem principes Electores de mutuo in bellum hoc præstando appellat. quo factò, duas simul res consecuturum se videbat, vt & suam erga illos omnibus in rebus fiduciam ostenderet: & eorum in re aliena studio ordines inuitatos ad perficiendi pro suis commodis belli voluntatem eo magis accenderet. Credita ab illis pecunia ad certum diem, exactisque iam comitiis allata, ac vltèrius deinde die prolato, ad tempus soluta fuit. Interim Kosakki Nisovii cum Ioanne Orisovio ab altera parte in Moscoviam Starodubum vsq; populationibus progressi, omni agro longè lateque vastato, opidum ac extimas munitiones arcis quasdam incenderunt; indeq; ad Pocio-pouam excursionem facta, ab arce repulsi, præda tamen magna acta se receperunt. Proficiscentem Grodna Regem, Rigenfium nuncij secuti fuerunt. Ciuitas ea à Sigismundo Augusto in fidem iis conditionibus recepta fuerat, quæ ius ac maiestatem imperij in eam regij ferè enervare, magisq; ad ipsius etiam ciuitatis splendorem quàm vtilitatem comparatæ videbantur. Cùm Rex iis legibus sociam eam, quàm subiectam habere mallet, iam antè superioribus etiam expeditionibus, missis legatis, de certis subiectionis conditionibus cum Rege egerat: reque Drohicini tandem in hoc itinere transacta, missus à Rege Ioannes Demetrius Solikouius fuit, qui ciuitatem in fidem acceptam, iureiurando in verba Regis obstringeret. Cùm primis de portorio constituendo

endo actum fuerat. Nam cum omnis negotiatio Rigenſis Dunæ fluminis nauigatione ferè contineatur, eaque iam magna ex parte ſuperioribus victoriis Regis expedita eſſet: præterque Kokenhaufium, Aſcherotum, Lenouartum, quæ eo tempore in hoſtium poteſtate adhuc erant, quod morari eam poſſet, nihil reliquum eſſet: ſummæ æquitatis Rex iudicabat, vt quæ res tanto publico cum molimento, atq; impendio perfectæ, ad ciuitatis priuatorumque omnium fortunas maximam acceſſionem factura eſſet, eadem Reipu: commodum aliquod afferret: nec alia conditione commercia eò transferri volebat. Homines prudentes cum ſine vectigalibus & tributis non poſſe ſuſſistere Rempub. intelligerent: rectiſſimè autem in iis prouinciis ea conſtitui, quæ armis recuperentur, conuenerunt tandem, vt portorium maritimum omnium mercium conſtitueretur: cuiusque prouentuū duæ partes Regi ſine vlla conditione: tertia ciuitati in portus, ac ſtationum refectionem cederet. Relinquebatur in ambiguo de bonis, quæ Archiepiſcopalis quondam iuris fuiſſent: de vallo contra arcem à ciuitate obiecto: ac aliis rebus quibuſdam. earum omnium definitio in regis in illa loca aduentū reiecta fuit. Dum in Moſcouia cum exercitu Rex erat, Ioannes Tertius eius nominis Sueciæ Rex ad Naruam claſſem miſerat. verum integris tum adhuc ab ea parte rebus Moſcouiticis, piſcatoriis aliquot ædificiis in litore exuſtis, re infecta recipere ſe coacta ea fuerat. Interim Varſauiam ad comitia Rex venit. Ordines vt hunc rerum ſucceſſum omnib. modis vrgeant, ac non lætentur modò victoria, ſed ea etiam vtantur hortatur: ſi vniuerſam Moſcouiam, ac ampliffimum illud regnum vel appetendum vel ſperandum non arbitrentur, cuius tamen maxima ſpes iam illis oſtendatur, eouſque ſaltem in armis mancant, dum Liouoniam vniuerſam, quam ab initio iam præmium belli

N

huius

huius sibi proposuissent, dignam & laborum suorum mercedem, & ad posteros virtutis monumentum relaturi adiungant: magnum incommodum in eo esse docet, quod ipse quotannis ad comitia tributi causa obeunda in regnum reuocetur: militem continuis itineribus confici: hosti respirandi suiq; colligendi spatium interim dari: quodq; tributa tardius exigantur, multas rerum gerendarum occasiones mora hac corrumpinecesse esse. quibus incommodis quò obuiam eatur, vt biennale tributum sciscant, flagitat. Ordines tributum non recusare, à tempore, in quod flagitabatur, alieni videbantur. Priusquam autem ad vllam aliam rem accederent, capita rerum quarundam, de quibus leges perferri vellent, scripto comprehensa Regi offerebant, vtq; sancirentur, petebant. ita responsum fuit, vt quæ concedi posse existimabantur, concederentur: quædam interpretatione lenirentur: pleraq; in aliud tempus conferretur. Responso eo accepto, dierum aliquot spatio interiecto, idem quod antè iam scriptum tradiderant, nullis contra regiam declarationem rationibus aliis allatis, denuò tradunt. Rex ex senatu aliquot, parique ratione ex nuntiorum collegio aliis delectis, vt iis de rebus vtrunque moderatione adhibita dispiciant, negotium dat: quæ ab his communicatis sententiis propostæ fuerunt, scripto comprehensa denuò nuntiis traduntur. ij diebus aliquot interpositis, idem quod antea fecerant, prius scriptum suum rursus Regi oblatum vrgent. Appetebat interim finis dierum comitialium legibus definitorum. itaq; certis conditionibus res tandem conuenit: constitutionesq; iis de rebus promulgatæ fuerunt. Tributum indè primò simplex Regi permiscerunt: postea Rege partim iis, quas ostendimus de causis, tum quòd præterea militi stipendium omne nondum solutum esset: apud Principes quos diximus, & alios

lios priuatos noua nomina fierent : nouum adhæc bellum administrandum esset, nulla ratione satisfieri eo sibi posse demonstrante, duplex ea prius conditione sciuerunt; vt si pax interim conuenisset, tributa quoq; cessarent : deinde iisdem argumentis à Rege illa refutata, vt collatis rationibus, quicquid stipendiis omnibus, ac ære alieno ob bellum hoc conflato, tum si quid deinceps in apparatus belli erogatum fuisset, exolutis, reliquum ex tributo eo futurum esset, in Rauensc ærarium inferretur. Venerāt huc, quemadmodum supra demonstratum est, legati Moscouitici, per vniuersam Poloniam tamquam in triumpho ducti. Hi nouis mandatis à Principe suo acceptis, denuò hîc ad colloquia admissi, primùm Neuelenses conditiones vrgebant; quibus rei transigendæ à Lituanis Senatoribus certam spem factam sibi dicebant. quibus cùm aliis rationibus refutatis, tum quòd maioribus postea sumptibus à Rege factis, Sauolociaq; capta non integra amplius res esset; tandem more suo diu prius licitati eò descenderunt, vt ad alia, quæ antè obtulerant castella Liuoniæ, vrbibus ac castris potioribus Felino, Derpato, Mariemburgo, Parnauia, ac Narua, Principi suo receptis reliquis omnibus Regi decederent. Rex nisi omni Liuonia, hostis decederet, alia conditione pacem sibi faciendam cum eo non arbitrabatur. Hæc sententia ordinibus proposita, publicè quoq; omnibus placuit. Adhibiti colloquio cum Moscicis huic ex nobilitatis nunciis aliquot fuerunt, quòd tergiuersatione Moscicis perspecta, tota de re ipsi plenius collegas suos edocere possent. Vtrisque in sententia permanentibus, infecta re à colloquio recessum fuit. Rex ita à comitiis discessit, vt biennij tributo ab ordinibus sancito, non prius pacem se facturum cùm hoste polliceretur, quàm is vniuersa Liuonia excessisset. Sub finem comitiorum nuncij nobilitatis per Stanisla-

um Priemscium, quem à bello reuersum nobilitas maioris Poloniæ nuncium creârat, & tum nunciorum illud nobilitatis collegium initio comitiorum Marschalcum è more prodiderat, rege adito, vt remotis, quibus in senatum ingrediendi ius non esset, dicendi potestas sibi fieret, petebant; re impetrata, rogant operam dare Rex velit, vt ea expeditione bellum finiat: ita nobilitatem, maximè familias eius rusticas, quarum salutem sine suarum quisque fortunarum detrimento negligere non possit, tributis exhaustas, vt maioribus ferendis pares vix sint futuræ. Respondit Rex per Cancellarium; bellum pacis ac publicæ vtilitatis causa à se susceptum minimè ex instituto à se ali: hostem eò redactum, vt, si bellum continuetur, non adeò magno negotio confici possit: se tamen consentientibus ordinum studiis libenter concessurum: quàmprimùmque ad tradendam sibi Liuoniam hostem adduxerit, impetuque eius represso, reipub: otio ac securitati consuluerit, paci, quæ cum publica dignitate atq; vtilitate coniuncta sit, nullam moram facturum. Publicè indè more maiorum Regi valedicentes, vt de domesticis etiam rebus, ac intestinis incommodis sanandis cogitationem suscipere velit, rogant: nominatim de Regum eligendorum stabili aliqua ratione constituenda petunt; vtque iis de rebus, quàmprimùm commodo reipub: id facere possit, comitia habere velit. quò maius antea discrimen respub: adierit, cum partibus in diuersa studia scissis, in duos Principes Respu: distracta fuerit, eò nunc, postquam metu hoc liberata sit, ne idem periculum denuò subeat, diligentius prouidendum esse docent. Accedere huc controuersias, quæ inter sacrum & profanum ordinem intercedant; quarum & ipsarum non leuem rationem sibi ducendam, vtque omnes tandem tolerantur, plurimùm reipubli: interesse iudicent. O-

dit

dit Rex per eundem Cancellarium, non minori studio ad domesticas res rectè constituendas, quàm ad perficiendum ex sententia bellum se ferri: & qui bellicarum rerum laudem non aspernetur, eo maiori tamen domi benè constitutæ Reipu: quàm maximè diuturnæ memoriæ relinquendæ studio se teneri, quo sine hac ne superiorem quidem gloriam stabilem perpetuamq; esse posse perspiciat. De interregnorum ratione quoties cogitet, quanto in periculo superioribus temporibus Respub: fuerit, quibus electionum ac ambitionum studia ea tamquam fluctus quidam illam exagitarint; cum non minùs hanc, quàm in qua natus sit, omni studio sibi amplectendam, eò chariorem etiam habendam intelligat, quò maioribus honoribus atq; ornamentis susceptum se affecerit, cohorrescere se animo, agnoscereque non nisi singulari benignitate diuina in commodiorem statum eam peruenisse. Iam ut de certa electionū ratione deliberatio suscipiatur, intelligere se: si id fiat, quantum & in re ipsa difficultatis futurum: et si quod verendum videatur, occulta aliqua Reipublice vulnera ea nudet, incommodi indè metuendum sit: suam quidem operam atque authoritatem Reipu: ac ordinum voluntati non defutura. Idem de concordia inter Ecclesiasticum & civilem ordinem sese iudicare: nihil ea posse suscipi vtilius, atque ad Reipu: stabilitatem magis necessarium: sed vtramque ad rem consensu animisq; ob omni odio & affectione vacuis opus esse. Proinde sibi quidem summæ curæ ea fore: hortari autem ipsos quoq; ut animos ad deliberationes rerum harum sedatos, nulliusque alterius rei, quàm patriæ ac publicæ salutis & dignitatis studio deditos afferant. Hortatus indè quemadmodum & superioribus temporibus fecerat, ut per absentiam suam otio & tranquillitati publicæ pro se quisque studeret, ac animo ad quævis pericula

excipienda parato esset, fausta quæq; ac felicia, utque utrique, tam qui domi mansuri essent, quam qui in bellum ituri ita rem gererent, ut mox læta utrinque gratulatione, in mutuos complexus ruerent, precatus iis fuit: ad quam vocem plausu à circumfusus excitato, Cancellarius eum ipsum plausum lætum omen futuri successus, ac non diuturni belli Regem accipere intulit. Sub idem comitiorum tempus Sueciæ Rex, quibus partibus hac expeditione bellum orsurus Rex esset, per literas à Rege quærebat. Rex pro eo, quod antè ad bellum hoc maxime Sueciæ Rex hortatus se fuisset, ac mutua necessitudine celandum eum consilia sua non ratus, Plescouiam se eo anno ire in animo habere ei ostendit: petentiq; legato eius, ut militem quem in Germania intercipiendæ legationis Moscouiticæ ad Principes Christianos missæ causâ scripturus Sueciæ Rex esset, voluntate Regis per ditiones ac portus eius ducere sibi liceret, literas quarum autoritate id facere posset, dedit. Iisdem temporibus Philo Kmita qui Lucensi præsidio præfectus à Rege fuerat, ne miles otio ac desidiam interim corrumpatur, Chelmam Moscouiticam, quod castrum supra Louatum fluuium situm est, Martinum Curtium & Gabrielem Holubkonem misit: qui cum ex captiuis cognouissent, opidum iam ante Moscos more suo incendiisse; ex eo vnam domum sub castro ad excubias agendas ab hoste relictam; noctu progressi, cum antequàm illuxisset, eò peruenissent, Curtio domum præteruecto ac à tergo excubiis se obiciente, fugaque in castrum interclusa omnes concidente, Holubko castrum incendit. Ab alia parte Sibricus Sauolociensis præsidij præfectus homines agri eius omnes ad sacramentum euocarat. quinque autem antiquitus territoria ad Sauolociam pertinent. Venerant in his Voronecienses aduocato, Polonico more sibi creato. O-

pidum

pidum autem Voronecia est supra Sauolociam ad Sovcam flumen situm; propterq; fluminis eius opportunitatem, quod in Velikam flumen, indeque sub Plescouia in lacum Pelbam ac sinum Finlandicum influit, commercii ac habitatorum numero amplum olim fuit. Castrum quod adiunctum habuerat in tot vicinorum ac munitissimorum aliorum copia desertum à Moscis fuerat. Itaque cum opido nullo opere munito praesidium Sauolocienſe facile potiturum cogitarent; quo id antè incenderent; maximè autem, quod opidani ad Sacramentum conuenerant, vt ad deterrendos alios omnia cruciatus exempla in eos ederent, copiis aliquot collectis repentina excursionē opprimendi eius causa conuenerant. verum re ab aduocato cognita, cum ille in munere ac metu suo non inuigilans certiore mox Sibricum fecisset, hic profligatis Moscis, locum in quo castrum fuerat, cum Kiralio occupat; praesidioque ei imposito, corbis militaribus pro tempore communit; agrestibusque ipsis, quibus loca vicina nota erant, ducentibus, crebras inde ex hostico praedas egit. Philo Kmita Chelmenſis excursionis prouentu inuitatus eodem Sibrico ac vicinis aliis praesidiis sibi adiunctis, Priscam Russam quæ ad magnam Nouogardiam spectat, excurrit. Magna hoc loco Moscouiæ Dux salinarum vectigalia habet: frequentia item ac ampla commercia sunt. Opidum magis in salinarum ac negotiorum vsus constitutum, vtque loco à finibus remoto, nullo opere munitum sine negotio diripuit, repletumque militem praeda reduxit.


R. HEIDENSTEINII

SEC. REGII DE BELLO

MOSCOVITICO

Commentariorum

LIBER QVARTVS.



SOLVITIS ADEVM, QVEM superiori libro ostendimus, modū comitiis, Rex militem, quanto in supplementum ad bellum opus erat, Samoscium quā celerrimē scribere, maturēque in Lituaniā adducere iubet. Ipse Grodnam re-
ctā, indē Vilnam proficiscitur. Interim ad Christophorum fratrem Principem Transilvaniæ de nouo equitum ac peditum Vngarorum delectu scribit. Germani militis conquirendi Farensbekio per literas negotium datur; qui militis in inferioris Germaniæ bellis exercitati copiam se habere posse antē ostenderat. Samoscius, quō lectiorem peditatum haberet, Vrouccium ala equitum, cui præerat, missa, peditem ex sola nobilitate scribere iubet. subleuabantur apparatus hi interim, dum tributariæ pecuniæ conferrentur, partim ea pecunia, quam à principibus acceptam suprā ostendimus, quamque præter eam Marchio in Prussia Dux subsidij loco miserat; partim propria Regis ipsius, maximē tamen equitum studio, quorum magnum numerum Samoscius euocarat, eaque ad bellum hoc alacritas erat, vt plerique nulla in auctoramentum accepta pecunia ad diem nihilominus conuenirent: complures in ipsis castris demum stipendiorum partem acciperent. Grodnam

nam iam Rege progresso, nuncius cum literis à Mosco ad eum venit: mox alios cum amplioribus mandatis, quibus conuenire pacem posse existimet, affore: Interim ne vllum exercitum Rex cogat, néue vltérius progrediatur; posse eum & impensæ & labori parcere. Veniunt legati: colloquium petentibus datur. Re diu more eorum ducta, atque vtrunque disputata, eò tandem descenderunt, vt Narua, Nevschlossio, Derpato, Adseuio, Nouogrodeco Liuonico, Nevhaus à Germanis dicto, exceptis, reliquam Liuoniam vniuersam vnà cum iis locis, quæ antea receperant, Veissensteinio, Felinio, Parnauia, ac aliis omnibus Regi permitterent. Ostendebat Rex, nullam se prius pacis mentionē fieri passurum, quàm vniuersa Liuania Moscus cessisset. Urgebant legati, vt cum sui principis nomine ostenderetur, quid præstiturus esset, sibi quoq; quid de ablatis principi suo restituendis animi Rex haberet, demonstraretur. Repecebant autem vno Polotienſi agro excepto, qui pristinæ ditionis regiæ fuerat, reliqua quæ superioribus annis bello capta erant, omnia. Demonstratum fuit, ita Regem principum illa restitutum, si præter Velisium, quod nulla conditione dimissurus Rex esset, castrum quoq; Sebesium quod id penitus intra ditiones regias situm esset, quò certior ac stabilior pax esset, vel tradidisset Regi, vel demolitus fuisset; quod quominus recusaret, Regem vicissim Dryssam demoliturū, partis sumptus deinde in bellum facti nomine quadringenta aureorum millia Regi refudisset. Impetrarunt legati, vt ad principem suum referre ea sibi liceret, ac vt Regis nomine eadem ad illum scriberentur. Sub idem tempus Bochdanus Bilscius, cuius frater patruelis in amoribus Mosco erat, summamq; apud eum rerum omnium fidem obtinebat, ad Regem transiit. Miserat Moscus legatos ad Rodolphum Romanorum Imperatorem: ab eo vl-

eo ulterius deinde ad summum Pontificem Romam perueniunt, Legatione ad summum Pontificem operam suam contra Turcam Christianitati pollicitus, & de Regis in se iniuriis questus perhibebatur; & vel secreto, ut ad pacem eum hortaretur, petiisse; aut iis tamen querimoniis, ut suas partes summus Pontifex interponeret, non nolle se satis ostendisse. In Poloniam frequentibus nunciis afferebatur; cum Græcæ sectæ homines pedes summi Pontificis pro more deosculari diu recusassent, tandem tamen id ut facerent, adductos, summus Pontifex Antonium Posseuinum, qui vnâ in Moscouiam cum illis iret, iis adiunxerat. Hic Moscis per regias ditiones itinere intercluso, ideoque per Germaniam Lubecam, ut inde Naruam traicerent, se recipientibus, de legatione sua per literas certiorē Regem fecit, ac si voluntate eius id sibi liceret, per Poloniam & Lituaniā iturum se ostendit. Rex non modò illi permisit, sed ipsius quoque Mosci legatis idem se permittere respondit. Hi tamen, ne quid præter præscriptum principis sui facerent, Lubecam se contulerunt; indeq; eodem quo venerant itinere in Moscouiam ad principem suum reuersi fuerunt. Iisdem temporibus nuncius mortis Christophori Transiluaniae Principis Regis fratris allatus, cum Regi ipsi non leuem dolorem attulit: tum Moscum, qui auocato Rege rebus Transiluanicis sui interim colligendi spatium sibi datum iri cogitaret, ut pacem atque eas ipsas condiciones, quas paulò antè ab eo propositas fuisse ostendimus, iterum reuocaret, maxime animauit. Verum Transiluanicis rebus ne à cura belli auocaretur, iam antè à Rege prouisum erat. Cogitans enim vltra incertitudinem rerum humanarum ætatem fratris prouectam; ipsum continuis articulo- rum doloribus confectum: antequam Varsauiam ad comitia iret, author fratri ac prouincialibus fuerat, ut
filium

filium eius Sigismundum in omnes casus Principem designarent. Quibus de rebus cum legati Alexander Këndius, & Vladislaus Somborius Varſauiam ad Regem venissent, ex eius autoritate, domum postea illis reuersis, communibus ordinum studiis Sigismundus in Principem electus fuerat: tristibus læta Christophoro Principi fortuna temperante, interque duo funera vxoris vnum, ac minoris natu filiae alterum, principatum Sigismundi filii interiiciente. Maximam in pacis spem omnium iam propè animi venerant. Nam nec propter quadringentorum illorum milliū conditionem, si Moscus eam non accepisset, communibus ordinum bellum finire volentium studiis defuturus Rex fuerat; nec Moscus, qui vniuersam quasi Liunioniam pacis cupiditate dimiserat, illorum quæ exceperat, castrorū causa bellum accepturus existimabatur. Itaque inducias etiam ad certam diem, intra quam denuò Moscus responderet, Rex ei concesserat. Verum intellectum mox fuit, iam tum legatos, quomodo à propositis conditionibus discederent, cogitare. Vincentius erat, de quo antè mentionem fecimus, in finibus Moscouiticis, qui ad Smolenscam pertinent, ductor Kosakkorum. Hic cum transgressis fines legatis sese adiunxisset, posteaque eodem itinere Vilnam cum illis profectus, familiarius inter eundem ad eos sese applicasset, sollicitare hominem, ut ad principem suum transfugeret, coeperunt. Ille constanter primò pernegarat; cum vrgeretur, tandem Vilnae ad magistratū rem detulit; ex eius sententia simulat transitionem: quæ quò gratior principi eorum esset, nec sine pretio operæ ad illum veniret, ut aliquas magni momenti literas, quas ad eum deferret, sibi committerent, postulat. Illi polliciti, ut prius tamen aliquo argumento fidem eius exploratam haberent, ut in vna prius re conficienda operam suam sibi nauet, rogant; tempusque quo

quo profecturus Rex sit, quaq; iter facturus, exploret. Re ad magistratum delata, quò magis fides ei haberetur, iter regis ex fide descriptum datum illi fuit. quo à perfuga quasi pignore fidei accepto, literas ad principem suum perferendas ei tradunt. In iis vt magno animo sit, eum hortantur. Nam & paucas omnino à Rege copias cogi: & quòd mortuo fratre Transiluanicæ res præsentiam eius desideraturæ sint, maximè cum Turca iis imminere dicatur, minùs huic bello eum vacaturū. Per idem verò tempus, & quod Vilnæ Rex substitit, Plefcouiam, quam hoc bello petatum iri sibi persuaferat, omnibus rebus Moscus firmat. muros vetustate neglectos magnis operibus reficit: nouas ad priores munitiones adiicit: præsidia ex aliis arcibus omnibus detracta vnum hunc in locum cogit. Ab altera parte Pontus Gardianus Gallus, quem Sueciæ Rex collocata ei in matrimonium filia naturali militiæ præfectum fecerat; extrema quædam Liuoniæ castella, quæ ad Ofiliam & maritimam Liuoniam pertinent, occupat. Iam ab initio cum primum in Poloniam Rex venisset, Sueciæ Rex per oratorem suum vehementer Regem ad bellum contra Moscum hortatus, foederis ac societatis contra communem hostem mentionem intulerat. Miseratum iis de rebus ad eum Rex Ioannem Herbortum Castellanum Sanocensem: propositæque ex vltro citroq; conditiones fuerant, vt Reualiam quoq; regi traderet, vtque quæ cis Naruam flumen essent, Poloniæ Regi cederent; quæ vltra Naruam Sueciæ finitima versus oceanum glaciale communibus copiis occuparentur, ad Sueciæ Regem pertinerent. cumq; bellum interim differendum sibi Rex non iudicaret, quo tempore Poloti-
am ibat, denuò Laurentium Goslicium Vilna ad Sueciæ Regem miserat; per quem in armis iam se esse ei ostendebat, & vt ipse à suis quoq; finibus in Moscouiam cum exercitu

xercitu irruptionem faceret, eum hortatus, auxiliorum & belli communicandi rationes quasdam proposuerat: ac ostendente tum Rege Sueciæ nolle se sibi præscribi, quas in partes copias suas mitteret, omniaq; occupantis fore: Goslicius quemadmodum iussus fuerat, Liuania tamen vt abstineret, postulârat; cuius causa & maxime bellum Rex suscepisset, & quam optimo iure pertinere ad se sciret: Regemq; ius in Liuania reipub: & suum negligere non posse prædixerat. Nunc cum id accederet, vt Liuiam ferè omnem per legatos Moscus ei detulisset, quo in statu res essent, cum Sueciæ Regem, tum militiæ præfectum eius iterum per literas certior Rex fecit; vtq; Liuiam non hostis, sed suam opinione iam præcipientes, omninò ab ea sibi temperarent, ac aliis potius in partibus, si ita eis videretur, bellum cum hoste administrarent, postulauit. Vilna tormentis ac instrumento militari omni Postauam præmisso, ipse Disnam profectus fuit. Vbi de exercitu hostili ad Smolenscam coacto, eiusque in Mohilouienssem, & Sclouenssem agrum incursione cognouit. Erant in hibernis eorum locorum aliquot equitum turmæ. ex quibus cum Christophori Radiuili, & Martini Kasanoui turmæ, diuersis locis in palantes incidissent, secundisque aliquot præliis cum copiis iis conflixissent, non diu in nostro commoratae, mox intra suos fines se receperunt. Rex tamen nuntio hoc de incursionibus hostis allato, continuo Christophoro Radiuilo, qui tum Disnæ vnà erat, ad eas quas antea habebat, turmas equitum, alias Polonorum nonnullas, quæ iis in locis ad Borysthenem in hibernis erant, peditatusque ac leuium tormentorum, quæ nauibus Vitepsciam præmitteret, certum numerum attribuit. Ei mandat, vt rectà contra hostem tendat: dataque facultate prælium committat. si hostis iam recesserit, capto per Velisium medio inter Bialam

& Toropeciam itinere, ab ea quoque parte metum hosti ostendat. Eodem tempore Ioannem Thomam Droiouium præfectum Premislien. ad Turcarum Imperatorem misit. Causæ legationis hæ erant; vt quia fâto Christianitatis sicut reliqua Vngaria, ita Transilvania quoq; stipendiaria Turcæ facta esset, vereretur quæ Rex ne mortuo fratre Christophoro noui Principis imperium grauioribus conditionibus Turca premeret; postularet, vt quibus priores principes legibus principatum eum tenuissent, iisdem huic quoque eum permetteret; nec si quid contra ea fieret, Regem patriæ suisque deesse posse ostenderet. Præterea verò vt de Ianculæ Valachiæ Palatini iniuriis, quas frequentes is regiarum ditionum hominibus afferebat, quereretur; vtque illo amoto Petrus prior Palatinus in pristinum dignitatis locum restitueretur, peteret: Regemq; nec Ianculæ vicinitatem quo animo ferre, nec suorum iniurias, vt nec deberet, neglecturum profiteretur. Prius legationis caput mox obtentum; alterum in aliud tempus dilatum fuit. Sub idem autem tempus in Tartaris quoq; tumultuatum fuit. Deuletes Chiereius, qui nouissimè apud Tartaros imperitârat, plures liberos reliquerat. successerat huic in imperio, qui nunc rerum apud illos potitur, Mahometes Chiereius; qui cum præter alios fratrem haberet ætate proximum Adleum Chiereium magni & ipsi animi & apud populares virtutis opinione, interficere eum non ausus; cum aliàs instituto Turcico apud Tartaros etiam plerumque eius, qui in principatu succedit, securitatis causa cæteri principum liberi e medio tollantur; quò minus tamen cupiditati eius loci relinqueret, Galgam creârat. Is summus militiæ præfectus est; eaque authoritate, vt & viuo principe proximam secundum eum potestatem obtineat; & mortuo in imperio succedat. Adleo à Persis capto, ac interfecto,

Ita, eadem ratione Halium Chereium alterum ab eo fratrem magistratu eo tradito, successionis spe sibi deuinxerat. Verum confirmatus postea ætate filij Saditi, amoreq; paterno impulsus, deiecto fratre, filium eius in locum suffecerat; veritusque ne iniuria hac irritatus cum altero minore fratre Salomete Chereio contra se conspiraret; ad parricidij crudelitatem, quam antè seu metu seu miseratione retentus intermiserat, redierat; priusq; quàm illi moliri quid contra se possent, interficere eos conatus fuerat. Hoc periculi metu profugere illi coacti, cum diu exagitati in finibus oberrarent, à Kosakkis excepti, adq; Michaëlem Visnouecium præfectum Cirkassensem adducti fuerunt: à quo certior de iis Rex factus, vt in suum reditum retinerentur, iussit. Ipse instrumento belli grauiore primò per Disnam in Dunam, indè vltèrius per Dryssam flumen, nauigatione, quemadmodum ostendimus, iam antè explorata nauibus præmisso, Disnæq; parte aliqua exercitus recensita Polotiam venit. Ibi dum aliis copiis recensendis operam dat, Christophorus Dirsekus, qui petentibus legatis Moscouiticis, à Rege ad Moscum missus fuerat, cum literis ab eo redit. Longè alio eæ argumento, quàm superiores fuissent, scriptæ erant. quæ ab initio acta essent, multa & longa oratione repetita inuidiose omnia interpretabatur: quæ per legatos antè Regi obtulerat, irrita rursus faciebat: maximè quòd Neuelenfibus conditionibus stare Rex noluisset: quòd vt Sebesium demoliretur; bellici que sumptus nomine pecuniam ab se flagitasset, exagitabat. quòd non in eodem statu rem esse, quo Neuelæ fuerat, ac interim in oppugnanda Sauolocia maiores sumptus se fecisse Rex diceret, cuius coactu, aut rogatu Sauolociam cepisset, interrogabat. potuisse eum supersedere labore hoc, non sua voluntate factum, vt eam occuparet: Pecuniam verò quòd fla-

gitaret, scire cum, nolle se tributarium eius esse: impensas autem belli imputare, aut earum nomine pecuniam postulare inauditum inter principes esse. Sebesium se puero, dum Sigismundus Rex rerum in Polonia & Lituania potiretur, conditum, eiusque perpetuo postea, etiam cum Polotiam in potestate Reges Poloniae haberent, in possessione se fuisse: praeterea ut maxime ille Sebesium, Rex Dryssam deleteret: tamen cum visum esset, Dryssam iterum Regem restauraturum: denique semper aliquid reperturum, quod nouum à se postularet. Nobilitatis nuncios ad colloquium cum legatis adhibitos criminabatur; idque in inuidiam suam factum ferebat. Indignabatur & oratores nullos à Rege ad se mitti: Itaque se quoque nec post quinquagesimum aut quadragessimum annum oratores ullos missurum confirmabat. Multa de Liuonico iure suo aspergebat. In Regem autem ipsum acerbissime inuehebatur, modo quod non regio genere natus esset: modo crudelitatem in victos, adipis detracti argumento, de quo supra dictum est, usus: modo in eosdem indulgentiam, qua ad transitionem eos inuitaret, tum quod globis candentibus inusitata ratione Sokolam incendisset, fraudem ac dolos ei exprobrando. Rex literis hisce acceptis, ostendit legatis etsi iure gentium hostium loco habere eos posset, qui pacis petitione simulata, speculandi, circumueniendi que sui causa ad se venissent; nolle se tamen ob eorum perfidiam à perpetua mansuetudine atque lenitate sua recedere; itaque ipsi ad suum principem reuerterentur: literis eius per suum hominem se responsurum. Proficiscitur cum his Antonius Posseuinus; quem à Summo Pontifice ad Moscum missum supra demonstraui-
mus. Ei praefectos, qui Velisij capti fuerant, Rex condonauit. Sauolociam inde, filius ut in pacato non magna molestia superatis, pontibusque & latioribus viis
iam

iam antè iussu regio Sauolocensium opera munitis, peruenit. Hic & si omnium ferè aliorum opinione Plefcouiam sine vlla dubitatione hac expeditione eundum tamquam præiudicatum iam videbatur, quò rectius tamen in re præfenti omnia ftatuerentur, ad confilium de eo Rex retulit. Valuit plurimùm apud omnes ferè cùm vetus perfuafio, tum ipfa rerum gerendarum feries, bellique fufcepti ratio, quòd ea vrbe in potestatem redacta, Liunioniam fimul vniuerfam, quæ tum vnica belli caufa erat, ei accessuram inter omnes conueniret. Rex tamen, ac pauci cum eo an non magnam Nouogardiam rectius iretur, dubitabant: cuius etiam nobilitatis motus aliqui contra Moscum audiebantur. fed periculi plena res videbatur, relinquere à tergo urbem ampliffimam, in quam omnes quasi hostiles copiae conueniffent: quæ magnam & bene ad Nouogardiam gestare ad reliqua perficienda moram: & si non tam bello, quàm tempeftatibus, contagio, aliisue incommodis in hostico offenfum effet, grauem recipientibus fe metum allatura effet. Derpatum vnus Veierus eundum censebat, cùm eadem ratione, quòd præfidij eius magna parte ad Plefcouiae defenfionem deducta, facilior expugnatio eius futura videretur: tum quòd per eam ipsam ad reliquam Liunioniam vniuerfam, quæ vna bello eo petebatur, aditus futurus effet. Vicit plurium confenfus, rerumq; ipfarum continuus quasi ordo, qui primò Plefcouiam obiiciebat, eò vt iretur. Et si enim per Louatum flumen, quod à Lukis Nouogardiam tendens magna ex parte in nostra potestate erat, regressus exercitui dari videretur; quòd tamen naues omnes subtraheretur ab hostibus effent, nec aliarum fabricandarum tam exiguo temporis fpatio in prouincia noua & dubia facultas data effet: flumen præterea Louatus non per omnem anni tempus nauigabile effet; hac quoque re non

multum iuuari posse exercitus videbatur. De castellis quæ à lateribus imminebant, diu Rex dubitabat, tentandâ ne oppugnatio eorum sibi esset, priusquam Ple-scouiam iret, an in aliud tempus differenda. Ex iis Krasnohorodam, cuius oppugnationem Sigismundi Augusti exercitus frustra olim tentauerat, & alterum Veliam Moscus, quod teneri ea posse diffideret, tormentis prius apparatuque omni deportato, sub idem tempus ipse deleuit. Reliqua erant Sebesium, Opocka, Ostrova. Sebesium & si ad læuam Dunam versus à tergo relinquatur, nauigationemque fluminis infestam reddere posse videretur: tamen quod per siluas, locaque magna ex parte inuia, ac difficilia, iter illac esset, præstare visum fuit, vel in aliud tempus eam differre; vel si pax interim coiret, aliam quandam munitionem ei opponere, quam nunc maiorum rerum gerendarum tempus, siluis, viarumque difficultatibus superandis, ac ipsa tandem oppugnatione eximere. Opocka non ita viæ imminere videbatur, vt non commodè declinari posset: præterea flumen Velika supra Opockam nondum eius altitudinis erat, vt tormenta apparatusque bellicus demitti per eum possent; quam commoditatem vel maximè quidam spectabant; ac vt nauigabile esset, Ple-scouiensi tamen oppugnationi mora vlla minimè interponenda videbatur. Accedebat huc, quod ex propinquis prædiis Sauolocienti & Voronecensi facile excursiones eius prohiberi posse existimabantur. Interim opportunè accidit, vt sub idem tempus Kosakki Krasnohorodam à Mosco desertâ, subitario opere communirent, quò prædis ex hostico agendis sedem in ea collocarent. Mittit eò Rex mox copias nonnullas cum leuioribus tormentis aliquot, locumque militaribus corribus dispositis diligentius communiri, Sebesienseque & Opocense præsidia distineri inde iubet. Itaque Krasnohoroda, Sauolocia & Vo-

ronecia occupatis, è quibus non difficulter Sebesienses, & Opocenses contineri posse viderentur, illis omiſſis, Oſtrouia ſola quæ in ipſam viam Pleſcouien. incurreret, relinquebatur. Ad Chriſtophorum Radiuilum, quem contra hoſtis ad Boryſtenem excuſiones miſſum ſuprà oſtendimus, ſub idem tempus Philonem Kmitam etiam, ac Lituanicos Tartaros à Vitoldo quondam Duce agris in Lituania donatos, Michaële Haraburda illis præfecto ſe coniungere, hoſtemque ancipiti metu diſtindre, mutuiſque populationibus priores excuſiones eius vlcifci iubet. literaſque ea de re ad Radiuilum dat. Priùsquam Sauolocia Rex moueret, tabellarium cum literis ad Moſcum mittit. iis etſi nec illius criminationes quicquam de dignitate ſua detrahere poſſe ſtatueret: & armatum hoſti maledicere infra animi ſui magnitudinem iudicaret; ne tamen ille è ſilentio Regis, more ſuo maiores ſibi ſpiritus ſumeret, ad priores eius reſpondet. Quæ acta ante id in inuidiam à Moſco vocabantur, vt quæque geſta ſint, oſtendit: conditionibus Neuelenſibus cur ſtare non potuerit, demonſtrat: nihil per iniuriam, aut præter morem aliorum principum Chriſtianorum ab illo ſe poſtulaffe docet; vt Sauolociam oppugnaret, nullius precibus adductum ſe reſpondet. ſed id vt faceret, pertinacia & iniuriis eius ſe coactum; quæ nec ſe quieſcere, donec armis ius ſuum conſequatur, patiantur: nec ipſum niſi armorum metu admoto animum ad æquitatem aduertere. Quantum in ſe fuerit, ſe feciſſe, vt per Oratores eius aliquoties teſtificatus ei ſit, quò diutius cauſam duceret, quoque ad maiores impenſas tergiuerſatione ſua ſe prouocaret, eò grauiorẽ poſtea conditiones ſe ei ferre neceſſe habiturum. Sumtus in bellum factos & aliorum principum Chriſtianorum more ac exemplo ſe repetiſſe: & nihil æquitati conuenientiùs eſſe, quàm vt à quo iniuria profecta

fuerit, ab eodem omnis iniuriæ causa præstetur, quod quoniam illi graue videretur, sciret posthac non de Li-
uonia, aut belli eius sumtibus, sed summa rerum se di-
micaturum. Quod Sebesium puero se conditum di-
ceret, qua maximè ratione ius suum ostendere se con-
sideret, ea malam fidem eius maximè detegi. Nam
cum regia Polotiensis ditio ad Dunam flumen semper
pertinuerit, intraque eam nuper Sebesium excitatum
fuerit, satis argumenti esse in alieno iniuste ædificatum
fuisse. An autem ad priores conditiones, nouas subinde
Rex adiecturus fuerit, si prius iis conditionibus, quas
Rex tulisset, assentiendo periclitatus fuisset, tum certi a-
liquid asseuerare eum potuisse. Nuncios nobilitatis ex
ipsius vtilitate ad colloquium cum legatis eius adhibi-
tos fuisse, quò quæ conuenissent, maiorem firmitudi-
nem haberent. Quod Oratores ad eum non mitteret,
non esse, quod se accusaret; neque enim legem vllam
de mittendis oratoribus cuiquam perlatam, præter-
quam vel vsus, vel voluntas cuiusq; vnicuiq; impone-
ret: omninoq; iudicij potius quam necessitatis rem esse.
Quod facturum se negaret, vt nec ipse post quadragesi-
mum annum vllos ad se oratores mitteret, facile ei cre-
di: magnam hanc bono etiam viro ne dum Tyranno
viuendi vsuram esse: non missurum igitur post quinqu-
agesimum aut quadragesimum annum: at missurum for-
tassis citius: Regem quidem nihil hac in re temere sibi
præscripturum. Docet & de Liunico iure. Ad conui-
tia eius respondet, neque se eum esse qui contumeliam
vllam accipere possit, nec in Moscum, cuius turpitude
& crudelitas omnibus nota sint, rectè hanc alios inse-
ctandi personam conuenire. Regem se non tam mole-
ste ferre non natum esse, quam gaudere, quòd virtute
sua ad regnum peruenerit; quòd ea ratione ad hono-
rem hunc euocatus sit, qua summus Pontifex à Cardi-
nalibus,

nalibus, Imperator qui principem inter Christianos principes dignitatem obtinet, ab Electoribus Germaniæ: qua multi alii reges ac Principes omnibus temporibus à sui quisq; regni ordinibus. Interim præclarum sibi ducere priuato loco, nobilibus maioribus ortum, qui rebus Christianis egregiam sæpè operam nauârint, amplissimos honores gesserint, prouincias administrârint, magnaq; virtutis & pietatis laude floruerint, cùm maiores sui reges non fuerint, virtute tamen sua regnum se adeptum esse; cùm illum, nisi ita, vt esset, natus fuisset, mores eius quemuis potius alium quàm principem facturi fuissent: minimeq; illi inuidere, quòd non plurimorum de eo hominum iudicium, aut spectata virtus eius potius, quàm mulieris Glinscij Sigismundi quondam regis proditoris filia vterus, Moscouiæ dominum imposuisset. Crudelitatem in detrahendo è nonnullorum cadauerib. adipe primum non à se profectâ: deinde nihil in eo contra pietatis officium hominumq; Christianorum morem, qui vt viuus tanto rectius consulerent, ex medicorum disciplina, vel in minutissimas partes mortuos dissecarent, admissum: ridiculam autem misericordiam esse ipsius, qui cùm in viuos omnia cruciatus exempla edat, mortuorum cura se affici præ se ferat. Eiusdem generis esse, quòd clementiam & lenitatem erga victos suam criminaretur. Non satis enim sibi constare, qui modò crudelem, modò nimis lenem quereretur; indignareturque, quòd non omnes, quos in præsidiis expugnatis Rex cœpisset, excruciatos interfecisset. Quòd Sokolam inusitata ratione flammis à se deletam vitio sibi verteret, in eo non tam fraudem aliquam illum arguere Regis, quàm detegere propriam inscitiam suam; quæ vt omnib. in rebus maxima esset, ita militaris rei multa præclara inuenta adhuc eum fugere. Respondet & aliis de rebus quam copiosissimè:
quæ

quæ omnia accuratius hic commemorare, præter-
quàm quòd epistola ipsa in manus hominum peruenit,
non etiam nostri instituti est. Sub finem epistolæ ad sin-
gulare certamen cum prouocat, eamque Russicè &
Latinè scriptam ei transmittit. ne uenim sibi placeret,
quæque aliorum de se hominum iudicia essent, cogno-
sceret, libros de immanitate eius passim per Germani-
am editos vnà ei mittit. Sauolocia Voroneciam Rex
progressus militarem disciplinam prioribus legib. par-
tim emendatis, partim auctis accuratius eo loco sanxit,
legesque de ea scriptas primùm senatoribus, deinde mi-
liti, præfectis omnibus differendi de iis facultate per-
missa publicè proposuit. Quibus ab omnibus probatis
præfecti militares, ut ducem exercitus crearet, eumque
magistratum, qui solennis apud maiores in repub. fui-
set, restitueret, flagitarunt. Rex quòd partito in plures
imperio militari, superiori anno nec satis disciplinam
castrensem obseruatam, se rebus vel minutissimis qui-
busq; fatigatum, aliâq; incommoda nonnulla extitisse
ex eo meminisset, vocato priuatim ad se Samoscio, cu-
ius vtilem operam superioribus expeditionibus, multis
maximisque rebus spectatam habebat, cum se magi-
stratum hunc creaturum ostendebat. Samoscio ma-
gnitudinem eius, atque onus demonstrando, seque ab
omnibus rebus, maxime autem muneris huius expe-
ctatione imparatum accessisse ostendendo, primò ut
alij potius id traderet, aut ne sibi saltem tantum oneris
imponeret, petere, postea vehementius etiam deprecari
coepit: ubi nihil Rex remitteret, obtemperaturum se
tandem Deo, & illi seu ad gloriam seu periculum se vo-
canti recepit. Priuatim cum Samoscio re communica-
ta, idem publicè deinde facit, consilioque conuocato,
quid suæ sit sententiæ, declarat. Re ab omnibus proba-
ta, per Andream Sborouium palatii Marschalcum, qua
qui

qui superioribus temporibus imperio militari præfuis-
sent, nominatim verò Ioannes Tarnouius maxima po-
testate fuissent, generalem exercitus Ducem perpetu-
um Samoscium creat. Hic quemadmodum antea fe-
cerat, ita tum in publico quoq; præter oneris eius ma-
gnitudinem, quod per se grauissimum, maxima etiam
cum inuidia coniunctum esset; non eo etiam apparatu
instructum se venisse ostendebat; vt tantum munus su-
stinere posset, qui scriptis iis, quas Rex iussisset, copiis, co-
animo profectus domo esset, vt quemadmodum su-
prioribus expeditionibus fecisset, partem saltē ali-
quam belli susciperet: cui summa rerum administran-
da esset, oportuisse eum prius omnium ad summam
belli pertinentium rerum cogitationem suscepisse: o-
mnia explorata, cognita, parata antè domo attulisse: i-
psū inspexisse: legatos, ministrosque iam antè domi
delegisse; quos etsi haberet, non haberet tamen plures,
quā qui copiis tantum, quas ipse scripsisset, ducendis
administrandisque suppetent. Tandem quemadmo-
dum antea priuatim, ita tum publicè magistratum ac-
cepit. Constitutis rebus iis, exercitum vniuersum recen-
sere Rex instituit. Præ cæteris longè ornatissimæ in lu-
stratione hac Polonorum equitum turmæ compare-
bant. cū longè plures ex amplissimis quibusque fa-
miliis, quā vlla alia superiorum expeditionum ad bel-
lum hoc conuenissent. inter alios Samoscus ad priores
copias suas, quas superiori æstate à se conductas, hieme
in Samogitia contra hostiles in Liuoniam irruptiones
mandato Regis collocarat, aliquot ornatissimorum e-
quitum millia adiecerat. omnes hi ad ducis exemplum
vt superiori anno atrato habitu vsi fuerant; ita tum cæ-
ruleum sumpserant. Par his suo genere peditatus erat:
Vrouecianus præsertim ex sola nobilitate scriptus. Nec
multum de proximi anni studiis & apparatu Lituani
quoq;

quoque remiserant. Itineris ratione à Regē cum Samoscio constituta, à dextra Lituani iuerunt, iis aulicus miles, qui ad Gedanum fuerat, perque absentiam Ioannis Sborouii à Christophoro Niscicio regebatur; attributus erat, partem copiarum aliarum cum Stanislao Tarnouio clarissimæ familie, senatoriūque ordinis viro, quæ locum castris deligerent, Ostrouiam versus Samoscius præmisit, cum eodem Veierum & Vrouecium ire iussit. Tarnouius, quemadmodum iussus erat, castrum præteruectus in Plescouiensi via, qua præsidia in castrum ventura, nuntiique exituri expectabantur, confedit: quæque ad oppugnationem pertinebant administrare coepit. Interim Samoscius aduenit, castraque ab inferiori parte ad Velikam flumen ponit. biduo post Rex ipse consecutus fuit. Sita Ostrouia est in insula Velikæ fluminis, quòdque nullos à terra aditus habeat, inde nomen id, quod insulam Slauiica lingua significat, accepit. Muros ex lapide satis firmos: propugnacula item complura habet: vnum præcipue in septentrionali castri angulo, à qua eadem parte porta atque aditus in castrum est, insignis magnitudinis, adque nostræ ætatis propugnaculorum formam diligenter dimensum, eo positu, ut duo castri latera, vnum quod ad septentrionem, alterum quod ad orientem spectat, defendat. Cum de oppugnatione cum Samoscio Rex deliberaret, animaduertit, occidentale castri latus, ita modico flexu lunatum, ut nulli recta linea secundum id latus tormentorum ictus dirigi possent, atque ita nihil ferè ab ea parte à tormentis periculi militi metuendum videretur. Itaque duo propugnacula altera, quæ in meridiem conversa erant, tormentis verberare instituit, quòd iis à defensoribus nudatis, occidentali parte iam antè, ut ostensum est, innoxia, sine periculo ad oppugnationem iturus miles videretur. Vngaris orientalis anguli propu-
gna-

gnaculum, Polonis occidentale attribuitur; perfectisq;
biduo munitionib., & tormentis intra eas constitutis,
ex vtrisque muri quati coepti fuerunt. Ab Vngaris pro-
pugnaculo, quod oppugnabant, inde proximo muro
continuis tormentorum ictibus verberato, ruinis qui-
busdam, quæ tamen præcipitem aditum in castrum præ-
berent, patefactus ab iis murus fuit. Poloni, curante a-
pud eos tormenta Veiero, in fundamenta propugnacu-
li, & inferiores fornices tormenta conuerterant. cum
quod ab inferiori parte facilior in arcem aditus futu-
rus videretur: tum ne superiore turris parte à se occu-
pata, quod facere destinauerant, ut per fenestras eius
scloppetis inde rem gererent, ex quibus interiore castri parte
hostem propellerent, puluere fundamentis subiecto cir-
cumueniri ab hoste possent. Vngari per ruinas, quibus
ab eorum munitionibus murus apertus erat, irrumperere
mox conabantur. Represso impetu illorum à Samo-
scio, qui militem, quod ad maiores res integrior accede-
ret, sine causa vulnerari nolebat, cum rursus ab vtrisque
munitionibus summa vi tormenta contra muros dis-
ploderentur, magisque murus ruinis aperiretur, hostes eodem
die deditionem fecerunt. Iam nox appetebat. itaque cum
præfidiis adiunctis ulterius deduci non possent, atque in-
terim separatim in locum à castro traducerentur, plebs
rusticana Lucensis cædis memoria perculsa, subito ma-
gna voce ultro in verba Regis se adigit. quo clamore
aliquoties repetito, cum vim illis adferri Samoscus ratus
accurrisset, narrabant iuratos se Regi, fidosque posthac fo-
re; eoque clamorem tam altum sustulisse, quod vel ab ipsis
Moscis exaudirentur. Ceteri, in iisque Nascokinus præsidij
præfectus, eius, quem legatione ad Regem functum, post-
eaque captum supra ostendimus, propinquus, dimissi fu-
erunt. Rex antecursoribus præmissis Plescouiam mox ipse
progressus fuit. In primo agmine Balthazar Andree fra-

P

tris

tris Regis filius cum Vngaricis, Palatinus Braslauenſis
 cum Polonicis aliquot copiis incedebant. Hi vbi ad Ce-
 recham flumen, quod ab oriente in Velikam influit, ve-
 nerunt, ex Vngaris quidam flumen tranſgreſſi in tres
 partes copias ſuas diſtribuerunt. Prima ex iis rectà Ple-
 ſcouiam contendit: duę reliquę diuerſis locis in inſidiis
 conſederunt. Ex iis primi cum hoſtium excubiis con-
 greſſi, mox pedem referre cœperunt: hoſtes quod erat,
 inſidias veriti, recedentes tamē ſecuti, poſtquā ſecun-
 di ex inſidiis conſurrexiſſent, nihil amplius veriti, quod
 numero vtroſq; ſuperarent, effuſe q; inſecuti, ad tertios
 protracti fuerunt: à quib. reliqui in fugam coniecti:
 tres Boiarici generis capti, ac in caſtra adducti fuerūt.
 ex quibus, quantum in vrbe viriam eſſet, quid præſidij
 animiq; hoſtes haberent, cognitum fuit. Simili euentu
 Sigism: Roſnuius, qui cum veteranorum Polonorū co-
 piis, quas Lituanis adiunctas ſuprà oſtendimus, miſſus
 fuerat, ac deinde Germani aliquot equites, inter quos
 Rhederus Sileſius voluntarius erat, excuſſione ad urbē
 facta, captiuos aliquos adduxerunt. Samoſcius ipſe pri-
 mum Cerecha flumine, indē Pleſcouia amne trāſito, ſi-
 tus cognoscendi cauſa urbem circūuectus fuit. accidit
 hic, vt cū Vrouecio vno aſumpto, aliisq; ſubſequi ſe iuſ-
 ſis, quò accuratiùs ſitum vrbis ē propinquiore loco co-
 gnoſceret, ſub ipſos quaſi muros contra portam quan-
 dam ſucceſſiſſet, conſpicati eum hoſtes, alam equitum
 contra eum emitterent; ea q; cū intra teli iactū ad e-
 um acceſſiſſet, Samoſciusq; etſi periculum videret, non
 tamen ſe commoueret, illa etiam inſidias vereretur, iu-
 ſtum temporis ſpatium ex aduerſo neutris ſe cōmouen-
 tib. conſtiterunt. Interim qui tardārant accurrentes, im-
 petu in hoſtes facto, in urbē eos reiecerunt. Rex vbi pro-
 pius ad urbem acceſſiſſet, cognoscendi loci cauſa ipſe
 quoq; cum Samoſcio eam circumiit. Ciuitatis Pleſco-
 uien-

uiensis in annalibus Plescouiensibus, qui in Polotienſi Bibliotheca inter alios reperti, in manus noſtras perue-
nerunt, circa annum ab orbe condito VI. M. CCCC
XII. antiquiſſima mentio eſt; quo Thorium filium Ru-
rici principis Ruſſiæ Olgam ex ciuitate ea in matri-
monium accepiſſe, ex qua Suentolaus filius natus ei
ſit, memorant. Inde varia cum vicinis gentibus bella ei
interceſſiſſe narrantur: maxime tamen Ikolos populos,
quorum ab eo tempore cum imperio nomen quoq; in-
teriſſe videtur, foedere cum Novogardiensibus inito
debellaſſet: cum Sudetibus, qui ea quondam loca te-
nuerunt, in quibus Derpatum nunc eſt, & cum Germa-
nis Liunionſibus frequentibus præliis contenderunt;
cum vel à ſuis finibus eos prohiberent, vel intra eo-
rum fines bellum gererent. A Germanis capta eti-
am vrbs circa annum VI. M. DCC. L. traditur. Ab
Alexandro autem filio Iarolaſi ex ſtirpe Monomachi
haud multò poſt in libertatem ruruſum vindicata. qui
profectus à Batti principe Tartarorum, auxiliisq; Tar-
taricis adiutus cum prælio Liunionſes ſuperaveſſet, ex
pacto deinde urbem recepit. continentia tamen dein-
ceps quoque bella cum iſdem ciuitati fuerunt. Illud
ſatis apparet, eam & opibus plurimum olim valuiſſe,
& priuſquàm à patre huius Baſilio in ſeruitutem redi-
geretur, non modò propriis legibus magiſtratibusque
uſam, ſed quod eo in loco magis fortassis mirandum fu-
erit, egregie etiam iſis temperatam fuiſſe. cum primis Po-
ſadniki, quod ſi verbum verbo interpretaris, aſſeſſores
ſignificat, ex quibus ſenatus conſtitutus fuerit, nume-
rantur: in grauiorum rerum deliberationibus, legatio-
nibus audiendis, dimittendisq;: foederibus ſanciendis:
eligendis principibus: pace denique ac bello ſuſcipien-
do: legibus ferendis, populi ſumma authoritas erat.
qui in comitiis, Viccis ab iſis dictis, quæ ad omnes per-

tinerent, vniuersus iubebat: Secundum Posadnikos nobilitas erat honore iis proxima: tum verò diuersarum societatum mercatorum, quorum & magnam multitudinem eo in loco fuisse, eorumq; commerciis maximè ciuitatem creuisse apparet, præfecti: qui magistratus etiam ius ac authoritatem habuerunt. Ditionem possederunt amplissimam, ad eamq; cum Magni Luki, & Isborkum, tum quicquid intra eas est, pertinebat. Prouincias hæc per legatos Palatinos ab ipsis dictos regabant. His omnibus magistratibus finita cum potestate princeps præerat. Eum seu ad vitandas factiones domesticas, seu quòd externo regnum occupare volenti, facilius restituros se existimarent, modò Russiæ, modò à Lituanix magnis Ducibus certis conditionibus, ac vt secundum leges suas ius sibi dicerent, petebant. A Lituanis Dummunthum, Timotheum nimirum, postquam Christianus factus esset, appellatum circa annum VI. M. DCC. LXXIII. ac postea filium eius Dauidem accepisse memorantur: posterioribus etiam temporibus ab Olgerdo filium eius, qui sacris Christianorum initiari voluerit, Andreasque dictus sit, quosdam præter leges sibi imperantes ipsi remouebant. Tandem cum Russiæ magnis Ducibus conuenerunt, vt certis deinceps legibus eorum maiestatem colerent, principesque non nisi ab illis, qui tamen secundum patrias leges ciuitati imperarent, quiq; nominatim à ciuitate petiti essent, acciperent. A Basilij cæci filio Ioanne, primum Basilius Suiscius legatus, deinde Basilius filius Pleseouiensibus & Nouogardiensibus coniunctim princeps datus fuerat. Etenim sub idem tempus Nouogardienses subiugarat, Pleseouensium auxiliis adiutus, quæ illi partim ex fœdere, de quo dictum est, partim æmulatione Nouogardiensium miserant. cum paulò antè à Liouoniensibus bello petiti, à Nouogardiensibus sprete

spreti atq; destituti, ab Ioanne adiuti fuissent. Atque in eo quidem statu ad annum VII. M. XVIII. ciuitas permanfit. quo à Basilio Ioannis filio, eius qui nunc rerum potitur, patre libertate spoliata fuit. Imposuerat eis principem Basilius Ioannem Michaëlis filium Repkam, quem Naidenum postea appellârunt; vt qui non petitus, sed vltro quodammodo obtrusus eis esset. Contra hunc cum Nouogardiæ fortè Basilius esset, misit ad eum ciuitas legatos, qui querelas quasdam ad eum deferrent. Cum verò & Ioannes Nouogardiam ad Basilium accessisset, ipsius hortatu maiorem senatorum partem, quò præsentibus iis controuersias eorum minueret, euocat: in vincula deinde omnes coniicit: Plescouiensibus denuntiat, vt consilium omne abrogent: campanam insignis magnitudinis, qua ad comitia obeunda ordines conuocabantur, ad se mittant: eaque vt facturos sciat, alios plures ex omnium ordinum hominibus obsides sibi dent. Plescouienses partim amore suorum inducti, partim iis rebus præsentis periculo defuncturos se existimantes imperata faciunt: Obsides complures alios ad eum mittunt. Quibus acceptis, Plescouiam ipse Dux die mensis Ianuarij vicesimo quarto Oximæ sacro venit, cui in memoriam rei benè gestæ templum deinde ibi consecrauit: primòq; in ædem saluatoris, inde Trinitatis, in cuius tutelam nominatim ciuitas se tradiderat, descendens, Vassiani Episcopi Columnensis, qui cò cum illo venerat, captamq; tum urbem pronuntiabat, oratione confirmatus, urbem diripit: Senatum omnem, magnamq; nobilitatis partem in vincula coniicit: nouisq; coloniis immisis in Moscouiam secum abducit; vt non pauci tum essent è nobilitate, qui ne patria mouerentur, religioni ac societati alicui religiosorum fratrum se manciparent. Ab eo verò tempore in durissima seruitute ciuitas perman-

sit. Vrbs in longitudinem porrecta, qua ad occidentem
 spectat angustior, à meridie Velika flumine alluitur. qui
 eo loco non modò nomine, sed tot aliis fluminibus re-
 ceptis, re ipsa magnus, quinq; infra eum passuum milli-
 bus in Pelbam lacum influit: à Septentrione Plefcoui-
 am amnem habet, qui non magno à Nouogardia inter-
 uallo ortus, urbem cui nomen dat mediam secans, in
 Velikam illabitur. Ipsa in tres partes diuiditur, quæ sin-
 gulæ, diuersis interiectis muris inter se separantur. alte-
 ram, quæ occidentem spectat Sapskovam, tamquam
 ultra Plefcouianam appellant: tertia & media inter has
 arx est, quæ & ipsa in tres partes diuiditur: exteriorem,
 quæ ad meridiem, atq; flumen Velikam pertinet Krse-
 mnoviam: alteram Domantovam: tertiam mediam
 dictam, non ad arcem, sed ad urbem ipsam, cuius qua-
 si umbilicum tenet, appellatione relata. Septentriona-
 le latus omnium longissimum ad octo millia passuum
 in longitudinem, muro omni ex lapide factò protendi-
 tur. Ad eum Moscus Polotia Lukiq; captis, alium ab
 interiori parte terra inter binos trabum ordines, quibus
 ea contineretur, latissima interiecta, adiecerat. Propu-
 gnacula ab omnibus partibus ex eodem lapidis genere
 firmissima habet. Cumq; veteris operis propugnacula
 non satis æqualia inter se essent, indeq; fieret, quominus
 directis ex vno versus alterum tormetorum ictibus mu-
 tuo se protegerent, ex angulis eorum parietibus nouis
 proiectis, iisdemq; altissimo cespite vestitis, fenestrisq;
 per eas dispositis, vt pari inter se spatio prominerent, ef-
 fecerat: ad eadē verò propugnacula, quòd partim angu-
 stiora, partim infirmiora viderentur, quàm vt maxima
 tormenta, eorumq; vim, cum disploderentur, continere
 possent, turres alias itidem ligneas ex firmissimis trabi-
 bus magno itidem opere factas opportunis locis ab in-
 teriori parte interiecerat, magnaq; maiorum tormento-
 rum

tum vi compleuerat. Loci facies ab omnibus partibus amœnissima est, cum duorum fluuiorum confluxu, & quâ patentibus campis, quâ crebris collibus leniter assurgentibus, iisdemq; frequenti iunipero vestitis, quæ à Voronecia vsq; non secus ac si magna industria confita esset, huc excurrens, hortorum speciem loco circumdat: tum maximè monasteriorum vicinorum frequentia, quæ vltra quadraginta ex lapide omnia elegantissimè exstructa, passim per vicinum agrum constituta sunt. Celeberrimum ex iis Syatohorense est, cum religione, à qua sanctum montem locum eum appellant, tum loci munitione. In rupe enim durissima tribus circiter à Plescouia passuum millibus situm, firmissima præterea turri, mœnibusque ad castelli modum munitum est. Moscus cum, quemadmodum antè ostensum est, Lukis captis ad Plescouiam moturum Regem minimè dubitandum sibi iudicaret, omnibus rebus, quæ ad sustinendam obsessionem pertinerent, diligentissimè eam instruxerat; magnaque copia omnia comportari iusserat. Cuius rei vltra ea, quæ antiquitus ad defensionem vrbis comparata erant, hoc loco eò maiorem facultatem habet, quòd in eum locum per Naruam omnem è Germania aliisque occidentalibus regionibus bellicum apparatus conuenire necesse est. Itaque tantus omnium rerum ad bellum pertinentium apparatus in vrbe erat, vt superiori anno Moscus nec illi loco satis fidens maiorum tormentorum partem aliquam in vltiorem Moscouiam deportare institueret. quæ cum grauitate sua tardiùs promouerentur, Ilmeno lacu non procul à magna Nouogardia ea obruit. Præerat arci Basilius, & fratris eius Petri ad Vlam flumen à Nicolao Radiuilo sub Sigismundo Augusto cæsi filius Ioannes Suiscii, è Susdaliensium Ducum familia oriundi. Andreas Choroscinus, & Plesceioyus quo-

rum Ioannes consilio, Choroscinus corporis ac animi robore magnam apud Moscum authoritatem habebant; indeq; etsi ætate Basilius Ioannem antecederet, summam tamen rerum omnium huic commiserat. Equitum in vrbe vltra septem millia: peditum cum iis, qui ex opidanis militares operas inter milites obibant, ad quinquaginta millia fuisse constat: Urbanæ multitudinis totidem. Inter peditatus ductores Kosetscius cum animi magnitudine, tum procera corporis statura Duci gratissimus, authoritatis ac virtutis præcipuam ferè opinionem habebat. Kosakki Nicolao Duce in regia ditione Circassii nato, sed qui diu Mosco operam nauarat, hoc consilio aliquot eò venerant; vt ex instituto militiæ suæ per agros palantibus excipiendis, prædisq; agendis insidias ponerent. Ad id enim militiæ genus vsu assuefacti, nullis armorum vix contra cœli iniurias vestium indumentis tecti acinace & hastili vno, plerique tamen etiam scloppetis rem gerentes, ad singulos circumstendos, opprimendosq; itinera, loca, res hostiles explorandas: flumina cymbis ac trabibus trananda: densissimas siluas, ac inuia quæque penetranda cum leuitate armorum, sitis, famis, ac laborum tolerantia, tum vsu atq; exercitatione plurimum valent; cæterisque ferè omnibus præstant. verum eos Suiscius conuiuio in urbem acceptos intra mœnia retinuerat. Rex rebus iis cognitis, munitionibusque vrbis perspectis, facile intellexit, non sine ratione ab initio iam plerisque eò potissimum eundum contendentibus, assensum se non fuisse, longèque minora quàm præsens ipse cognosceret, de statu vrbis eius atque munitionibus sibi renuntiata fuisse: se nec à peditatu, quem, si summa vi urbem oppugnare vellet, triplo maiorem adducendum sibi fuisse intelligebat; nec à puluere tormentario ad oppugnandam urbem satis instructum accessisse videbat.

debat. Qui enim Susæ depositus fuerat, negligentius igni ab iis, qui in præsidio erant, habito, conflagrarat: alterius autem ut præcepta iam opinione pacis nec ab initio satis magnam copiam quæstores pararent: accedentēque insigni subuectionum difficultate, qua à flumine relinquebantur, vix eum ipsum, quem paratum habebant, aduehere potuerant. Itaque varia animo agitati præstare aliquando videbatur, si Pleiscouia relicta, vel magnam Nouogardiam rectā contenderet, quam nonnulli minus munitam putabant: vel ad vicina castella Porchouam & Vdouam se conuerteret; iisq; in potestatem redactis, obsidione ex iis urbem premeret. quorum illud inter Nouogardiam & Pleiscouiā situm magnam ad intercludendam à subsidiis & com meatu Pleiscouiam facultatem habere putabatur: hoc Iuanogrodensi arci, quæ portum Naruensem efficit, iminebat; Priori consilio cum ea, quæ antè demonstratæ sunt, rationes, & à Pleiscouia metus, tum ipsius Nouogardiensis urbis fama, quam & ipsam non exiguas ad resistendum vires habituram constabat, itineris deniq; longinquitas, præcipitante iam æstate, ac tempestatum expectatio locum non relinquebant. Alteram obsidionis rationem, ac viciniorum castellorum oppugnationem, præterquàm quòd indignam susceptæ expeditionis fama futuram putaret, hosti etiam animos addituram iudicabat. Itaque cum animi magnitudine, ac virtute militis, qua pleraque alia consecutus esset, eas quoque difficultates superare se posse non desperaret, de loco castris capiendo dispicere cœpit. Constituerat ab initio à Nouogardiensi via, qua Pleiscouia fluuius in urbem, indè infra eam in Velikam illabitur, quòd ad excludenda ab urbe subsidia, subuectionesque arcendas cum primis opportunum videbatur, castra facere. sed id ut dimitteret consilium, longitudo lateris eius, quod quem

quemadmodum ostensum est, ad octo millia passuum patet, latissimi que ab ea parte ac patentés circum circa campi faciebant. In quibus cum subsidia equitum nulla tutò collocari posse viderentur, nec verò propter continuas hostilium tormentorum ei aculationes propius castra admoueri, verebatur ne peditatus, qui in opere ac munitionibus futurus esset, si nullum illi è propinquo ab equitatu subsidium ferri posset, in tanta equitatus ac peditatus hostilis tot locis simul erumpentis multitudine, maximè si ancipiti praelio subsidiis à Nouogardia missis, & eruptione ex vrbe facta pugnandum ei foret, vndique circumueniretur. Ostendebat Samoscus, qui vt nihilominus in sententia permaneret, Regem hortabatur, circa flumen Pleseouiam sinus non nullos sibi videri, in quibus iustæ equitum copiae sub tentoriis collocari possent, quæ in tempore deinde contra excursiones hostium auxilium nostris ferrent: hac ratione castris eo loco quàm latissimè Nouogardiam versus explicatis, ab omni subsidio & com meatu, sine frequentibus excubiis, quibus si ab altera parte castra ponerentur, continuis defatigari militem necesse esset, multò commodius obsessos intercludi posse: accedere, quòd ab ea parte solum penè esset molle, ab aliis ferre omnibus rupes durissimæ id exciperent; quæ & opus moraturæ, cuniculos autem omninò exclusuræ essent. Rex tamen quòd priorem salutis, quàm victoriæ rationem habendam iudicaret, ab orientali latere oppugnare urbem statuit. quo in loco & peditatus, qui in opere futurus esset, à sinistra Velika flumine defenderetur; & castra proximè munitiones hostium promoueri possent. quòd ab ea parte frequentes colles exurgentes ab hostilium tormentorum ictibus frontem tutaturi essent: angulus præterea, in quem ab ea parte vrbs muris coibat, ipse etiam maiorem rei bene gerendæ facultatem

tatem dare videretur. Itaq; transgressus flumen Cerecham, castrisq; tum ibi metatis, iisdem Lituanicas copias, & veteranum Polonum equitem, quos à dextra ire iussos diximus, recepit. Eòdem Farensbekius Germanicum peditem, cum quo sub id tempus venerat, adduxit. in quibus etsi erant aliquot, qui in Belgio stipendia fecerant, propter tamen & temporis breuitatem, & quòd Lubecenses minus comes in concedendo delectu se præstiterant, plerique ex vicinioribus etiam Germaniæ locis, iiq; tyrones, raptim scripti erant. Iisdem temporibus Bartholomæus Budlerus à Duce Churlandie cum aliquo militum numero, qui superioribus expeditionibus cum aliis in locis bellum Rex administraret, ad Liunioniæ fines in stationibus contra hostes fuerant, in castra venit: Voluntarij præterea aliquot, cum ex Prussia, inter quos inprimis Fabianus Dhonanus: tum præter Rhederum, de quo supra dictum est, alij etiam ex externa iuuentute nonnulli fama expeditionis huius excitati. Rex cum vniuerso exercitu flumen transgressus, sub eos, de quibus dictum est, colles, castra posuit. Vngari à sinistra ad Velikam flumen, Litvani à superiore parte ad Porchoviensem viam confederunt: medio inter hos spatio Poloni triplici carrosum ordine circumiecto, ea de qua antè ostensum est, ratione, ab utraq; riui illhac labentis parte castra communiuerunt. qui inter hos & Lituanos tamquam angulus relinquebatur, Germanis attributus fuit. Venit sub idem tempus in castra à Turcarum Imperatore legatus, grauis ætate homo. Hic Tartaros, quos supra profugisse ostendimus, ex foedere, quo vtrinq; perfugæ reddi iuberentur, repetebat. Ostensum fuit, quia nondum Rex eos vidisset, nec quid dicerent, audiuiisset, vbi in Poloniam rediisset, causa cognita Principi eius responsurum. Etsi minor peditatus erat, quàm pro amplitudine susceptæ
oppu-

oppugnationis requirebatur: erat tamen & numero, & genere ipso militum ac armorum non contemnendus: equitatus autem, quemadmodum suprà ostensum est, ornatior ferè, ac instructior, quàm in vlla antehac expeditione fuisset. Itaq; per frequentissimam castrorum partem barbarus ductus, castrorum magnitudinem, equitum, quos obuios habebat, ornatum, equorumq; præstantiam, ac vniuersi exercitus speciem admiratus, faceret Deus inquit, vt isti principes, Regem ac suum Principem designans, coniuncti inter se animis essent; ne orbis quidem terrarum consensui eorum resisteret. Interim Vngarum militem propius urbem, vt locum munitionibus dirigendis caperet, progressum hostes conspicati, eruptionem mox in eum fecerunt: sed fortissimè ab Vngaris ad portas vsque eos insequentibus, nonnullis vtrinq; desideratis, in urbem reiecti fuerunt. Munitiones mox Vngari ab ea parte, qua castra habebant, contra Pochrouiensem, quam appellabant, turrim, penes Velikam flumen: Poloni non longo ab his interuallo contra Syiniensem turrim agere instituunt; prius militaribus corbis locis aliquot iusto interuallo communitis, equitumque ac peditum stationibus in iis collocatis; quæ militi in munitionibus occupato contra eruptiones hostium, si quas fortè facerent, propinquo è loco subsidium ferrent. Magno labore eo loco propter soli duritiem, quod intra cubiti altitudinem in rupem desinebat, fossæ ducebantur. Nihil tamen ea res Vngari militis impetum morabatur; qui ingentibus saxis securibus excisis, indefesso studio opus perfecit; non tam multorum iactura, quàm insigni vnus Petri Kendij iuuenis claro in Vngaria loco natus, qui cum noctu more suo vigilas Moscis citantibus, ad fremitum eorum procurrisset; è maiori tormento traiectus interiit. Cæterum Vngari, quia ab ipso flumine nul-

ne nullo ambitu capto breuiori spatio rectâ versùs vr-
bem munitiones suas dirigebant, perfectis iam fossis
aduersam turrim quaterere cœperant; exiguoque tem-
pore propugnaculo conuulso proximi muri partem
aliquam strauerant. Polonis magno impedimento e-
rat, quòd ab eo, de quo dictum est, loco, longiore in-
teruallo munitiones versùs urbem institutę illis erant:
latera quę Vngaris ab vna parte Velika flumen, ab al-
tera Polonorum munitiones tuta præstabant, ne cir-
cumuenirentur, vineis & subsidiis contra hostium im-
pressiones munienda: indè perfectis tandem muni-
tionibus, curante apud eos tormenta Veiero, prius ex
plerisque turribus, ex quibus ab omnibus ferè partibus
petebantur, defensores deiiciendi erant: quòd deniq;
in fundamenta, ac imam partem muri, iis quę antè de-
monstratę sunt, causis, tormenta conuertebant: quas ob-
res cum ab eorum parte tardius murus perruptus fuif-
et; Vngari nihilominus, quâ ab ipsis murus stratus erat,
irumpere conabantur. Samoscius cum de eo ad Re-
gem referret, ostendebat, longè & ad securitatem &
spem victorię certius sibi videri, si dum è Polonorum
quoq; munitionibus aditus in murum patefieret, irru-
ptio sustineretur: interim & pluribus locis mœnia verbe-
rarentur; ruinae, quibus contra Vngarorum munitiones
murus apertus esset, ampliores fierent, qui per eas in vr-
bem aditus esset, cognosceretur: omnibusq; rebus dili-
genter exploratis, quę ad oppugnationem pertinerent,
antè prepararentur. Timebatur ab altera parte, ne tem-
pore interposito, spatium sui muniendi, nouasq; fossas
obiiciendi hosti daretur: maximè verò quò minus consi-
lio huic locus esset, difficultas pulueris tormentarij faci-
ebat; vt necessariò prius tentandum aliquid videretur;
quam omni consumpto vnâ cū puluere urbis ipsius po-
tiundę spes decederet. Descenditur eò, vt mittantur, qui
locum

locū inspiciant, ac an quæ transgressos fossæ difficultatē sue excepturæ essent, explorent. Deliguntur ex Germanis quinquaginta circiter; quod erant inter hos, qui in aliarum urbium oppugnationibus assidue antea versati fuerant. Hortatur simul Samoscius Rex, ut quæ ad oppugnationem pertinerent, administraret. ne si de aditu non incommoda renunciata essent, vel minimum temporis spatium differretur. Interim Vngaricus Decurio quidam missu centurionis ad os, quod ab Vngaris, quemadmodum dictum est, in muro patefactum erat, profectus omnia facilia ac aperta renunciat: aditum latum: descensum expeditum: exiguas ab interiori parte fossas obiectas. Quo tempore cum è primariis Senatoribus quidam differri non nihil adhuc irruptionem suaderet, ne inter Polonicam & Vngaricam nationes æmulatione aliqua oriretur, si Vngarus prior irrupisset; ostendisset quæ; Samoscius, cur à Polonis aditus tam latus patefieri nondum potuisset, is vnamquamque selem pro se venari respondit. Samoscius itaque ad munitiones profectus, Polonis Germanos adiungit; quæque oppugnationi vsui sint, administrari iubet. Vngaris Bornemissa præficitur. Rex sub ipsam fluminis ripam, ad quam Vngarorum munitiones pertinebant, progressus, militemque ad irruptionem paratum, paucis, quæ tempus ferebat ad virtutem cohortatus, è propinquo euentum oppugnationis expectare instituit. Iam ante autem tormenta aliquot Velikam translata fuerant, abque inferiori parte muri, per quem ad oppugnationem iturus miles erat, ita collocata, ut aduerso muro à fronte deterso, relictis inde secundum vniuersum id latus interioris ictibus defensores peterentur. Eques ex instituto militari idoneis locis supra munitiones, circa urbem, atque vias, in omnes casus disponitur. Non poterat latere hostes, quid in castris pararetur; quod in omnes partes latissimus ex
vrbe

vrbe despectus erat. Itaque ipsi quoque muros frequentes complebant. Samoscius primum ex Polonico pediatu viginti expeditissimos delectos per aduersam fossam muros succedere, quisque ab eo loco in urbem aditus sit, explorare iubet. Renunciant illi fossam ab ea parte esse, supraque eam pontem aliquantò depressiorem, per quem non difficulter tamen fossa superari possit. Mittit inde è Germanis quinquaginta eos: mandat his, ut quàm proximè muros subeant; si superare ruinas possint progrediantur, signoque quod acceperant, dato, alios, quos quamprimum iis summissurus sit, expectent; si non patere per eas aditum intelligant, sine ignominia se recipiant. Interim si illis successisset, signumque quod conuenerat, datum ab iis fuisset, quæ illis subsidia summittat, disponit: primò eiusdem nationis militem, quod qui præmissi fuerant, id postularent: inde Polonum partim equitem, qui Georgio Mniscio præfecto Sanocense, Stanislao Stadnicio, Procopio Penonscio, Andrea Orsechovio, ac aliis quibusdam authoribus, equis missis, ultro operam suam detulerat: partim peditem. Primo loco Penonscium & Orsechovium cum turmalibus eorum, qui hastis rem gererent, locat. Inde Vrouecium cum pixidariis. Post hunc Stanislaum Stadnicium cum altera equitum turma. Huic rursus Vibranovium & Syrneum cum suis quenque cohortibus in subsidiis esse iubet. Ultimo & separato loco Georgiū Mniscium cum iis quos ductabat, equitibus constituit; partem ad tormenta munitionesque retinet. Germani cum ad fossam successissent, Ioannesque Garonna Gallus progressus primus aditum tentasset, graui casu ab hostibus illo deturbato, cæteri cum angustiores ruinas, quàm ut commodè transiri per eas posset esse existimarent, conferti ad fossam constiterunt. Poloni qui à tergo vrgebant, cum non dari sibi locum viderent, per me

dios illos penetrant; hostes turri lignea, munitioneque
 quam tignis in angulo turris, quæ cum muro coiens effi-
 ciebat, ea de qua supra dictum est, ratione contabulaue-
 rat, cespitemque vestiuerant, deiiciunt: in turrim magno ipsi
 labore euadunt, principesque Vibranoui ac Syrneus in
 summa turri signa figunt. Germani ad os, quod contra
 Vngarorum munitiones erat, quod per id latiore ad-
 tum esse viderent, signa conuertunt. Prescriptus idem, qui
 supra demonstratus est, ordo, & Vngaris fuerat, missus-
 que eius rei causa ad eos Franciscus Veselinus, primarius
 cubicularius regius. Verum apud Germanos primum
 eo turbato, Vngari quoque, cum Polonos iam irrumpere
 cernerent, signo prius a Rege accepto, per ruinas in tur-
 rim euaserant; primi que Thomas Dercenus, & Matthi-
 as Kerekesius signa in ea constituerant. Hos Gabriel Be-
 kesius arrepto signo, equitem, cui præerat, secum tra-
 hens, secutus fuerat; moxque pluribus aliis signis illatis,
 cum ulterius inde in urbem contendere vellent, fossa
 iam antea ab hostibus ducta, lignæque munitiones non-
 nullæ præter opinionem obiectæ impetum eorum tar-
 dabant. Hostes ab initio nostrorum in subeundis muris
 impetu perterriti, suos è propugnaculis pulsos, signa
 diuersis in locis fixa iam videntes fugam circumspecta-
 re coeperant. Interim Ioannes Suiscius passim equo Sau-
 cio volitans, modò minis, modò precibus, tandem
 ploratu & misericordia: ab altera etiam parte Episco-
 pus urbis sacra & simulacra obtendens, dum in occu-
 pandis muris nostri retinentur, fugam pauoremque suo-
 rum sistunt. Primum tormentis ac saxis petere nostros
 coeperunt: nostris vicissim tela in eos adiicientibus, com-
 pluribusque vtrinque faucibus, turri, quam à Polonis oc-
 cupatam supra ostendimus, puluerem subiiciunt; nul-
 lamque in partem milite se commouente, binis aliis vici-
 bus id repetunt. Quo turri tandem correpta nostri fer-
 re ignem

re ignē diutiùs non valentes primùm descendere: ad extremum etiam cum ex propugnaculo Velikano, quòd ē nostris tormentis tam breui tempore sterni non potuerat, ipsi transfuersis hostilium tormentorum ictibus ferirentur, recipere se coacti fuerunt. Indè in Vngaros omnes conuertuntur, qui cùm eas quas diximus illis obiectas munitiones, superare se non posse intelli-gerent, cùm diu hostium impetum sustinuissent, ac nox immineret, cæsis omnibus priùs sublati more militari se receperunt. Desiderati eo die sunt ex nobilitate Polonica vltra quadraginta: ex Vngaris non pauciores, ac præcipui inter eos nominis Gabriel Bekeſius. Magnum hostes quoque detrimentum acceperunt: cæsi complures; in quibus primarij peditum ductores, Nicolausque Cirkassius præfectus Kosakkorum: plurimi vulnerati. Itaq; literis, quas ad præsidium Vdouense dederant, quæ exiguo postea tempore interiecto interceptæ à nostris fuerunt, magnum terrorem ostendebant; vtque sine mora iis de rebus princeps certior fieret, subsidiaq; sibi mitterentur, petebant. Samoscius militi ob eius diei laborem ac aduersitatem consulendum ratus, equitem, qui cum Georgio Mniscio præfecto Sano-cense in subsidiis collocatus fuerat, integerque adhuc erat, quòd conturbato postea ordine res ad eum non peruenisset, circa tormenta munitionesq; excubare iubet: vniuerso autem peditatui ac munitionibus Vroue-cio in oppugnatione concusso, Stanislaum Penkoslauium præficit. Altero die consilio habito, ante omnia de tormentario puluere conquirendo cogitari cœptum fuit. Mittitur ad Ducem Churlandiæ, Rigenses aliaq; vicina loca. Exempla literarum Plescouiensium, quæ interceptæ fuerant, passim describenda Samoscius dat; quibus, si quis fortè grauior de aduerso oppugnationis exitu rumor in Poloniam perlatus esset, hostium incom-

modo perspecto is deleretur. Proponit eodem tempore Regi, quò minùs casus aliquis, qui obsidionem eos relinquere cogeret, interuenire posset, optimum è re nata sibi videri, si integro adhuc exercitu castella, per quæ miles distributus, longinqua obsidione, ac commeatus inopia premere urbem posset, aliquot communiantur: his perfectis, quòd voluntarius miles diu moram laturus non esset; commeatus præterea difficultatem reliquo exercitui aucturus videretur: nec dignitatis Regis futurum esset, vt voluntariis dimissis imminuto exercitu remaneret; ipse in Poloniam, ad comitia obeunda, supplementum scribendum excurreret; se cum exercitu reliquo ad urbem relinqueret. Si hiems expectaretur, voluntarios incommodis obsidionis, atque hiemis iniuriis adactos, missionem flagitatuos: reliquum militem nullis rebus preparatis, commeatu omni consumto minùs animi & virium habiturum; castella verò eo tempore vel muniendi vel exstruendi nullam rationem fore. Regi cum aliis multis de causis, omnia prius, quàm ad id consilium descenderet, tentanda videbantur; maxime tamen, quòd cum Posseuinus, qui in Moscouia erat, de animo erga pacem Mosci significaturum se ostendisset, verendum intelligebat, ne, si priusquàm ille rediret, eorum quid susciperetur, hostis defendendæ urbis spe illi aucta, si fortè de tradenda sibi Liuonia consilij quid iam suscepisset, id tum commutaret. Dum hæc geruntur, puluisq; ac apparatus bellicus expectatur, cuniculis interim munitiones hostium tentare placuit. Bini è Polonorum munitionibus versus fossam instituti, à rupe dura atq; aspera excepti perducere non potuerunt. Vngari per summum solum fossa ducta, eademq; cratibus intecta, vnum eo modo perduxerant. Is cum latere hostes non posset, qui vt minùs eum vidissent, ex eo ipso tamen, quòd ab oppugnatione tam diu cessaretur, conie-

coniecturam de consilio nostrorum capiebant, alium secundum vniuersum id latus in longitudinem, ex quo nostros obseruarent, egerant; ac tum eum puluere subiecto intercipiebant. Iisdem temporibus subsidia è Moscouia per Vdovam obsessis mitti cognitum fuit. quæ cum per Pelbam lacum, ac Velikam flumen nauibus ventura Samoscus intellexisset; primum nauibus aliquot conquisitis continuas arbores cuneis ferreis in singulas impactis, per eosq; catenis transmissis, ea qua flumen erat latitudine connectit: alias à superiori parte fluminis, qua venturus hostis erat, secundum aduersam ripam alligat; ita, vt cum hostium naues transissent, funibus adductæ regressum ab ea parte hosti clauderent: alias ab inferiori parte versus urbem ita obiicit, vt cum eum in locum peruenissent, irretitis vtrinque nauibus, nullam in partem effugium pateret. In naues, quas contraxerat, Germanos, qui earum administrandarum peritiores credebantur, imponit: Vniuersę rei Vrouecium præficit; cum eoq; secundum vtramque ripam expeditum peditem disponit. Aduenerant commodum sub id tempus Albertus Refaiscius Castellanus Varfauien- sis cum centum circiter & quinquaginta: Stephanus Bilaius cum septingentis equitibus: Nicolaus Korffius & Vilhelmus Platerus cum Liuonibus aliquot equitibus. Eos cum extra castra adhuc versarentur, Suatoram versus confidere, ac quò tutiores contra hostiles incursiones essent, fossa castra communire iubet. Hostes nauibus silenti nocte progressi, cum in insidias, ac nostras naues incidissent, ac ne primum quidem impetum nostrorū ferre potuissent, mox in ripam se eiiciunt; ibi ante lucem palantes excepti, ducentiq; circiter Boiarici generis capti, ac in castra adducti fuerunt. Haud multò post aliud à Derpatensibus subsidium obsessis mittitur. Verum id, cum appropinquant ma-

turius miles se ostendisset, celeriter se recepit. Aliquanto deinde tempore interiecto Nicolaus Chostovus inter peditum ductores secundum Koscecium precipue apud Ducem autoritatis cum septem millibus subsidio obsessis venire ab exploratoribus nunciabatur. Itaque Samoscius, quod vereretur, ne superioris subsidij casu fama ab hostibus cognito, aliud iter auerterent, totum locum eum, qui a castris Suatohoram usque, ultra duo milia patebat, excubiis complecti statuit. Erant militares ante hac excubiæ a castris ad flumen Plescouiam usque positæ: ab eo vero ad Suatohorensem viam, quod maximum intervallum esset, ne miles in tot excubias distractus nimium defatigaretur, Litvani voluntarii ultra eam ad rem operam suam Regi deferabant. Chostovus cum diu in insula quadam Pelbe lacus hæssisset, ac de priori subsidio, quod nauibus aduenerat, intercepto intellexisset, in terram exercitu exposito, noctuque devio per silvas ad sinistram itinere capto, Plescouiam contendit. noctu maior militum pars dilabi ab eo cepit, ut ex septem millibus vix trecenti penes eum manerent: ipse ut diffugientes vel vi contineret, extremum agmen cogebat. Itaque cum superiorum noctium excubiis Litvani fatigati, simul quod interea temporis nondum hostis venisset, de diligentia remisissent, præterque morem excubiarum aeris iniuriis coacti ignes excitassent, Daniel Islenovus, qui in primo agmine incedebat, cum iis, quæ supererant, copiis, civitatis locis iis, in quibus ignes cernebantur, in urbem euasit. Chostovus, qui in extremo agmine, ut dictum est, erat, ac præterquam quod totius noctis maximo in sistenda fuga suorum labore confectus erat, corporis insuper mole homo procera statura tardabatur, cum e silvis egressum lux oppressisset, herbis per aliquot horas cæteris dilapsis se texit, ibique ab equitibus Andreæ Visnouecii Palatini

latini Voliniensis, qui tum eius diei excubias excipiebant, repertus, ac ad Regem adductus fuit. Qui eum deferuerant, partim cæsi, partim magno numero capti fuerunt. Aliquot diebus post Theodorus Mesceodovus itidem cum copiis aliquot subsidio obsessis missus fuit. Hic cum iam ferè excubias Lituanicas præterisset, extremum agmen à Gabriele Cirkassio deprehensum fuit: qui cum impetum in id fecisset, & clamore sublato Bilaius quoque cum suis accurrisset, centum circiter & quinquaginta concisi, ad sexaginta capti fuerunt; ceteri ad trecentos cum Mesceodovo in urbem penetrarunt. Dum ad Plescouiam hæc geruntur, Sueciæ interim Rex in aliena victoria suam prædam facit; eoque quem in Germania ac Gedani, iis de quibus dictum est literis adiutus, militem conquisiuerat, quemque è suis præterea ditionibus contraxerat, per militiæ præfectum suum Pontum Gardyanum Naruam occupat. Opidum id ad Velikam flumen situm est, quod qua Pelbam lacum relinquit, mutato in Naruam nomine, opidoque à se appellato triginta circiter infra id passuum millibus in mare influit; eo alueo, ut ad urbem ipsam maximæ onerariæ naues appellant; eademque ulterius Plescouiam usque non incommodè agi possent, nisi supra lacum Plescouiam versus viginti circiter cubitos altæ cataractæ cursum earum interciperent. Dum in Magistrorum ordinis, priscorum Liunionæ Principum potestate erat, propterea quod omnes merces Moscouitiæ Derpatum primò deuehebantur, inde per Reualiam aut Parnauiam in mare exonerabantur, minùs vel à cultoribus frequens, vel munitum erat. Postea Ioannes superior in aduersa ripa aliam multò munitiorem è regione illi arcem Ivanogrodum ab illo, à Liunionibus Russicam Naruam ad suæ, quam Germanicam appellabant, discrimen dictam, tam propinquo ab ea spatio excitauit, ut
cum

cum veteri Narua ponte coniungi, abque utroque loco telum in alterum adici posset: ex ea cum Moscus profectus Liuonica quoque Narua potitus fuisset, cum Germanicis aliisque ultramarinis & occidentalibus nationibus commerciorum in ea sedem collocarat, omniaque eò negotia & merces transtulerat. Sub famam expeditionis ad Plescouiam regiae, quemadmodum ex aliis arcibus, ita illa etiam maiorem praesidii partem ad Plescouiam tutandam contraxerat. Gardyanus cum tormentis quaterne muros coepisset, ac Mosci, qui in Ivanogrodenfi praesidio erant, Liuonicae Naruae, cui metuebant, tuendae studio, pontem transiissent, tormentaque pleraque secum traduxissent, ac verò irrumpente iam in opidum milite, territi, retrocedere coepissent, Itali aliquot, qui cum Hieronymo Cagnolo in Suetico exercitu erant, victoriam subito conclamantes, cumque reliquo milite ad portas usque eos insecuti, magnum eorum numerum conciderunt. Hac re, caeteri, qui in arcem euaserant, territi, simul tormentis, quibus se defenderent, quae paulò antè Naruam transtulerant, destituti, exiguitateque ipsa sua de defensione desperantes, deditionem fecerunt. Eadem praesidiariorum consternatione Iamorodum quoque & Koporiam vicina castella in potestatem redegit. quibus rebus perfectis in penitiorem Liuoniam, ut per reliquas arces, quae à Moscis tenebantur, arma circumferret, cum exercitu regreditur: primoque Veisensteinium castrum alioquin natura & opere munitissimum, in ea Moscorum trepidatione, praesidii exiguitate, nulla, dum Plescouia obsideretur, auxilii spe in deditionem accepit. Inde Parnauicè exercitum admouet. Post captam Naruam literas à Principe suo ad Regem mittit, quibus is ad priores Regis literas, quibus multò antè, ut à Liuonia tanquam alieni belli praemio abstineret, amicè hortatus eum Rex fuerat, cir-

rat, circumducto die rescribebat; ac suum cuiusque iudicium, quibus in locis bellum cum hoste gerere, quasque ditiones eius inuadere vellet, esse debere significabat. Magna spes Regem tenuerat, fore, ut æquitate priorum postulationum suarum perspecta, locum eis Sueciæ Rex relinqueret; non modò quòd Liunioniam vniuersam iam olim in fidem Regum Poloniæ venisse eò minus ignorare Sueciæ Regem sciebat, quòd superioribus temporibus, cum frater eius Ericus Reualiam occuparet, nullo iure id ab eo fieri propriis literis suis testatum fecisset; verum etiam, quòd, postquam ipse maximo labore ac impensa ad legatos de pace mittendos, vniuersam Liunioniam primò cedendam, indè deferendam pene hostem adegisset: ad paratam à se victoriam Sueciæ Regem accessurum expectandum sibi non arbitrabatur. Quare etsi iniuria hac non parum commoueretur, in præsens tamen differendam iudicabat. Iisdem temporibus à regiis quoque Præfectis simili fortuna castra nonnulla Moscis in Liunia adempta fuerunt: A Duce Magno Kirempefium occupatum: Fabianum subitatio opere munitum: à Byringio Pyrchelium: Thoma Embdano Salium captum: A Dembinio Lenouardum & Ascherotum; quæ vtraque Dunæ flumini imminabant, peditatu aliquo à Rigenfibus, quibus grauis hostilium præsidiorum vicinitas erat, accepto, Scotoque milite, qui ad Regem ibat, retento, expugnata. Iamque Kokenhausium quoque castrum munitissimum, ab eodem Dembinio obsessum commeatus inopia breui in potestatem nostrorum, peruenturum videbatur. Suprà demonstrauius Christophorum Radiuilum ad vlciſcendas hostis in Mohilouensem & Sclouensem agrum excursionses cum parte exercitus Moscouiam versus missum à Rege fuisse; ei que Philonem Kmitam ac Haraburdam cum Lituanicis Tartaris coniungere se iussos. Kmi-

fos. Kmita cum duobus circiter millibus equitum, Tartarisque, qui sub Haraburdæ ductu erant, Lukis egressus, octo circiter ultra Toropeciam millibus ad Nemesam flumen, ac monasterium quoddam, aduentum Radiuili expectare instituerat. Sub idem autem tempus Moscouiæ quoque Dux, qui non procul inde Stariciæ tum erat, cum de nostri exercitus aduentu nondum cognouisset, Michaëlem Nosdrouatum, & Petrum Boratinscium cum tribus circiter millibus militum eodem consilio miserat, ut metu undique quam maximo facto, qui è suis in Regis fidem venerant, direptionibus ac populationibus vexarent. Eorum exploratores temere vagantes cum in pabulatores nostros incidissent, duo ab illis excepti, ac in castra adducti, ostendunt quindecim inde millibus passuum ad Salesam exercitum confidere. Contra quem cum Radiuilus, qui iam tum aduenerat, Bochdanum Ogniscium septingentis circiter magna ex parte levis armaturæ equitibus ex diuersis turmis ei attributis misisset, ducenti circiter præter imperium pugnandi auiditate cum stationibus hostium congressi, ad diuersos pontes, circa quos scloppetarios hostes in insidiis disposuerant, pertracti aliquot ex suis amiserunt: verum aliis subsecutis, ac Gabriele Holubkone suis, ut de equis descenderent, scloppetisq; rem gererent, mandante, summotis per hos à ponte hostibus, nostri hostium equites in fugam effusos ad quindecim ferè millia passuum insecuti, aliquot ex iis ceperunt. Radiuilus cum cognouisset ad Resouam aliam exercitus hostilis partem confedissee, versus eam via impeditissima, quæ nulli ante eum exercitui iter fuerat, cum exercitu progressus, triginta à Resoua passuum millibus substitit; inde Sukopsciam Iamam, quo nomine locum in quo diplomata iter facientibus dari solent, appellant, se conuertit; ac ad flumen Volgam castris metatis

Halim-

Halimbekum cum Tartaris, quos circa se habebat per flumen Stariciam versus contendere, populationesq; ac incendia quàm latissimè in hostico circumferre iubet. Satis constat Moscouiæ Ducem, qui, quemadmodum suprà demonstratum est, Stariciæ tum euentum obsidionis Pleseouiensis expectabat, cum aduentantem exercitum, fugas agrestium, ignes passim sublato ipse magna ex parte cerneret; ac, quemadmodum ex Possuino, qui tum apud illum erat, cognitum postea fuit, non ultra septingentos milites circa se habebat, summa in trepidatione versatum; delectum ex omni genere hominum promiscuè habuisse, fugamque iam circumspēctasse. In præsentia mittit, qui agmen nostrorum speculentur, quamprimùmque de eo sibi renuncient. Hi cum ad Okomeciam alterum diplomatum locum, in quo Tartari pernoctabant, quinque millium passuum interuallo accessissent, diligenterque à nostris excubias agi, loco præterea munito eos consedis ex agrestibus accepissent, ad latus conuerso itinere paludesque quæ iis in locis erant, transgressi, ex Nohaiensibus Tartaris ac pabulatoribus nostris aliquot oppresserunt. Interim Daniel Murfa ex iis, qui in mensæ ministerio apud Moscum versabantur, ad nostros transit: qui cum de numero exercitus eadem ferè, quæ antea fama, ac captiuorum sermonibus acceperant, ac inflatius pleraque prædicasset, orationiq; eius tanti principis inueterata potentiae fama facile fidem faceret; etsi memorabilis facinoris, si Stariciam processissent, patrandi spes nostris ostendebatur: iis tamen viribus, quibus potentissimi principis vitam ac salutem septam esse credi debebat, minimè pares se futuros rati; Dunam indeq; Dubnam magnis itineris difficultatibus conflictati se recipiunt. Ex itinere, temerè ab agrestibus rumore tradito, commeatu Toropeciam laborare, ad eam defleunt;

R

exer-

exercitumque ei admouent. verum paucis diebus post cum falsa de statu praefidij delata ad se cognouissent, se receperunt. Radiuilusque Chelmam recta, inde priscam Russam versus contendit. Collocata ad Opakam contra Nouogardiam Kosakkorum manus aliqua fuerat : quae partim praedis ex hostico agendis hostem distineret, partim subuectiones subsidiaque, si quae Nouogardia Plescouiam mitterentur, obseruaret. Hi cum continuè praedas ex hostico agerent, magnisque incommodis hostes afficerent, Tartari Moscouitici, parte eorum negligentius agente, parte ex instituto ad praedas agendas profecta, repentino aduentu, eos qui in statione relictii erant, oppresserant. Tartaris à cæteris reuersis rursus deiectis, Mosci alias suas duobus locis ad Russam & Misiciagam stationes ab Nouogardia nostris Kosakkis opposuerant. contra eos igitur, qui ad Russam erant, Radiuilus Kosakkos, quos penes se habebat, ipse subsequens, praemisit. Hi hostibus fama aduentantis exercitus iam antè territis, ac primo aduentu eorum in fugam conuersis Obalinscium ac Boiarici generis aliquot capiunt. Eo deinde ex loco ad Regem & reliquum exercitum Radiuilus reuenit. Iam antè Antonius Possentinus etiam, quem à summo Pontifice legatum ad Moscum iuisse supra ostendimus, cum mox post discessum à Volga Radiuili dimissus fuisset, ad Regem venerat, turmis aliquot equitum, quas è Nouogardia de aduentu eius certior Rex factus, obuiam illi miserat, in castra deductus. Afferebat hic, Moscum & si in ea & sua trepidatione, & belli aduersitate cum primis pacis cupidus esset, nullis tamen aliis conditionibus eam accipere obstinatum habere, quàm quas iam antè Polotiae per legatos suos proposuisset. Nam quòd hiems, quae saeuissima iis in locis frigora adferre soleret, instaret, militem, quem ne primas quidem iniurias eius toleraturum sibi persuadebat,

debat, per hiberna distributum iri: Regem superiorum annorum consuetudine ad comitia obeunda in regnū se recepturum: interim urbem obsidione, se metu solutum iri, facileque quamuis aliam sustinendi belli impetusque regij rationem deinceps se reperturum confidebat. Rege contra Posseuino ostendente, nec se prius exercitum ab vrbe deportaturum, quam vel vrbe potius esset, vel vniuersa Liunia Moscus decessisset; hortabatur nihilominus eum Posseuinus, ne omnem tamen spem pacis præcideret; locumque colloquio constitui pateretur, in quem vtrinque legati conuenirent, ac de pace inter se agerent: quod cum Rex permisisset, literas per expeditum equitem ad Moscum dat. his eo omnino animo Regem esse ostendit, vt non prius abscessurus, aut vllum belli finem facturum sit, quam vniuersa Liunia Moscus excedat. Quare ne nimium ea in re poneret, quod frigoris sæuitia coactum abscessurum tandem exercitum existimaret; videre se obfirmato ad perferendam eam omnes animo esse; tum vt obsidio sustineretur, debere eum tamen tot subiectorum sibi innoxiorum calamitatibus atque miseria commoueri; qui cum pro ipsius salute nullum periculum ac cruciatum recusent, summæ eum iniquitatis condemnari debere, nisi ipsorum vitam suis commodis ac obstinatione potiorē habeat. Eos autem neque propter frigoris vim in siluis iam latere: nec iis ipsis, quod paludibus omnibus frigore concretis, peruiæ breui nostris futuræ essent, amplius protegi posse: eorumque iis ipsis diebus, quibus in castra venisset, magnum numerum partim concisum, partim captum se vidisse. Sub id enim aduentus eius tempus, subsidia, quæ cum Mesceodovo venerant, quemadmodum supra ostensum est, excepta fuerant. Proinde ipse sibi consilium caperet: se quidem, vt serio tandem animum ad pacem applicaret, authorem ei ef-

se; egisseque hanc ob causam cum Rege, vt ne omnem tamen de pace agendi facultatem tolleret: impetrasse, vt legatos eius certum in locum, qui Mosco videretur, accedere, cumque suis legatis de pace agere se passurum Rex receperit. Moscus literis iis acceptis sine mora nuncium vnâ cum suo tabellario, literisque ad Posseuinum remittit. Pagum Sapoliam nonaginta passuum à Pleseouia millibus, in diplomatum vsus & ipsum constitutum, ad conuentionem deligit, publicæq; fidei literas, legatis suis mitti postulat. Mittuntur literæ: locus accipitur. Exercitus interim, qui ad Pleseouiam erat, maximis cum hiemis, tum obsidionis diuturnæ incommodis afficiebatur. Itaque cum & à voluntariis palam missio flagitaretur, conditionesque pacis passim sermonibus agerentur; non deerant, qui remittendum potius Mosco de Liuania aliquid censerent, quam cum exercitus incommodo diutius obsidionem ducendam. quod vt summi Pontificis autoritate persuadere Regi conaretur, Posseuinum etiam tacite hortabantur: idq; quò commodius perficeret, cum sententias senatus de conditionibus dicturus esset, eum vocari, præsentemque illo sententias dici debere censebant. Spargebatur in vulgus, Regem vt maximè Liuiam vniuersam adiunxisset, omnem in Vngaros, vel fratrum suorum filios diuisurum. Itaque stipendiarius etiam miles sermonibus tentabatur; cur pro alienis commodis suo cum periculo depugnaret: pro prouincia, ex qua nec ad ipsum, nec ad rempub: fructus vllus peruenturus esset, vt alij dicerentur, vitam sanguinemque suum ipse in discrimen adduceret. Resistebat rebus hisce summa constantia atq; animi magnitudine Rex: maximè voluntarios obtestabatur, ne suo discessu exploratæ penè victoriæ, aut honestæ pacis spem corrumpere. Præter Regem Samoſcius omni contentione in id incumberebat. Ostendebat
publi-

publicè, ad omnia priùs se descensurum, quàm infecta-
re, aut non tali pace, qualem in superioribus comitiis
Rex atque nomine Regis ipse ordinibus promississet, di-
scederet; quòd si maxime necesse esset, eòusq; tamen,
dum comitiis habitis noua ab ordinibus mandata ac-
ciperet, se perstiturum. Vt Posseuinus in senatum voca-
retur, contra morem maiorum esse differebat. Virum
enim prudentem, & inprimis grauem & si nihil curiosi-
us in aliena repub: facturum sciebat; ne tamen vel in-
terrogationibus atque studiis aliorum, vel suo pietatis
atque pacis in eam sententiam pertraheretur, vt ipse
quoque cum aliis remittendæ Mosco partis Liuoniæ
author esset, verebatur. quamuis eandem sententiam
suam hac etiam ratione apud Posseuinum deinde excu-
sabat; quòd cum ex instituto reipub: omnium aliorum
Principum legati publicè audiantur, solius summi Pon-
tificis nuncij priuatim Reges conueniant, ne exemplo
suo Priuilegium minueret, illum ipsum vitaturum fuis-
se, existimasset. Consilio deinde iis de rebus habito, duq;
omninò manendi rationes proponebantur. vt vel ex
castris atque munitionibus, quemadmodum hætenus
factum esset, obsidio vrgeretur: vel castellis extructis,
in iisque milite collocato, diuturna fame, ac commea-
tus inopia vrbs premeretur. Vtramque cum hiemis in-
iuriis, tum soli frigore iam astricti duricie, quæ nec mi-
litem sub pellibus diutiùs versari, nec opus vllum fieri
paterentur, omnes ferè refutabant. Lituani priuato e-
tiam iisdem de rebus consilio inter se habito libellum
Regi offerebant. in quo cum & ipsi manendi consilium
omne reiecissent, id petebant, vt quò hibernorum in-
commoda, quæ superioribus annis continua pertule-
rant, cuitarent, in agro Moscouitico miles haberetur.
Interim diem certam Regi præfiniebant; intra quam
nisi pax facta esset, nulla conditione diutiùs remanere.

integrum sibi esse ostendebant. Non poterant latere hæc hostem: quod propter voluntariorum nullo imperio se suosque coërceri patientium licentiam ex calonibus, ac eo hominum genere, quotidie aliqui ab hostibus excipiebantur: usque ipsi diebus Saba quidam cum eius de quo dictum est, libelli exemplo ad eos transierat. Maxima inter hæc flagrabat invidia Samoscus: illum vnum sententiæ eius esse authorem: hominem à pueritia literarum studiis deditum, atque in Italiæ Gymnasiis versatum consiliis atque obstinatione sua vniuersum exercitum perditurum: legatum cum exercitu in hostico relicturum: ipsum extra metum periculi ad Comitiam pro Cancellariatus sui munere obscunda in Poloniam rediturum. Etenim iam conuentus nobilitatis Rex edixerat. Per eos quo loco res esset, literis nobilitati ostenderat: neue vel exercitum reducere, vel ipse ab obsidione comitiorum habendorum causa discedere cogeretur, vt in iis conuentibus noua tributa, & quæ alia ad perficiendum bellum necessaria essent, scisceretur, hortatus nobilitatem fuerat, in omnes nihilominus casus, si res non teneretur, literas, quibus comitia indiceret, simul miserat. Augebat Samoscio inuidiam disciplinæ militaris tuendæ studium, iam ab eo tempore, quo militem habere cœperat, contraque illos potissimum ab eo susceptum, quorum quod illustrior fortuna esset, peccata etiam, & peccatorum ad deterrendos alios poenas illustriores esse dicebat. Fremebatur non iam quod in mulieres, quæ castra irrepserant, grauissimè animaduerti iussisset: nonnullas capitis supplicio affecisset; sed quod aulicum regium, qui in leges militares aliquid commisisset, in vinculis haberet, nec totius exercitus precibus condonare vellet: quod pueros nobiles, qui licentiùs in castris versati fuerant, ad palum alligatos publicè spectandos præberet: turmæ præfecti

fecti vicarium suspendio affecisset : ex nobilitate quosdam propter mundiciem castrorum negligentius habitam claua pulsasset. Itaque carmina etiam in eum spargebantur, quibus scholastica vita illi exprobrabatur. His ita non mouebatur, ut cum semel licentiæ fenestra aperta in alios libelli iacerentur, iactataque ea res in senatu fuisset, ostenderet, nisi prius in seipsum iniuria ea incurrisset, quæstione habita auxilium suum minimè denegaturum iis fuisse : iam cum ab iisdem ipse prius læsus esset, verendum sibi esse, ne pusilli animi putaretur, si sub aliena persona proprias iniurias vlcisci videretur ; rectiusque facturos eos ; si suo exemplo contemnendo potius ea diluerent, quàm vindicando vltro auctoritatem iis tribuerent. Signa militaria huiusmodi plerunque dabat, quibus modò desidiæ, metum, avaritiam domum properantibus vltro exprobrando : modò ad perseuerantiam & constantiam nobili homine dignam eos cohortando à desidiæ ad tolerantiam, si qui minùs alacres essent, binis ut plurimum verbis reuocaret. Tentarat sub initium motus eius veteranus miles, qui ad Gedanum fuerat, cœtus inter se agitare, quò de communi re maximè autem de stipendiis debitis deliberarent. Edixit mox, qui priuatas coitiones fecissent, contra disciplinam ac imperium militare fecisse eos iudicaturum, legeque in eos animaduersurum : quòd si quid de commodis suis agendum existimarent, vel se appellarent, vel præsentem se de iis agerent. Itaque ad tentorium eius conuenerunt. Hic cum ille angustiis ærarii demonstratis, è contra quid amor patriæ ac reipublicæ postularet, quid constantia boni haberet, concionatus fuisset : tandem non legatum se ad exercitum relicturum, sed ipsum toto obsidionis tempore remansurum pronunciaisset, utque idem ipsi facerent, vniuersos hortatus fuisset : initio à Ioanne Sborouio facto, re

liqui omnes, quòad ipse maneret, se quoq; perseveraturos promiserunt. Samoscii consilium manendi secretò amici improbabant: monebant, videret, quam in se rem susciperet, cum periculi plenam, tum quæ si secus caderet, magna cum invidia eius superiorum rerum gloriam ipsius omnem corruptura esset. Iis vnum ille respondebat, existimare se bonum Imperatorem, eundemque bonum ciuem non suæ sed publicæ dignitati studere debere: si re infecta ab obsidione abscedendum sit, è re nata commodius futurum, ad se peccati eius opinionem recidere, quàm ad regem aut rempub. vniuersam. Allato iam antè à Duce Churlandiæ & Rigensibus puluere; ante Regis discessum denuò oppugnationem tentare visum fuit. Ab ea parte, qua Poloni antea è munitionib. suis muros quassauerant, hostes crebra propugnacula lignea obiecerant, eademque fossis communiuerant. Itaq; in superiorem aliquantò partem ad dextram munitionib. translatis, inde rursum tormentis muros percutiebant. Sed eo quoq; loco nouum propugnaculum, tormenta verò adeò grandia hostes opposuerant, vt, cum quoddam septuaginta, alterum octuaginta pondo globos iacularentur, trium aggere repletarum corbium militariū, vt ex ordine positæ erant, feriem; vno ictu penetrarent. Vngari quòd aditum in rurrim, quæ ad Velikam flumen, & munitiones eorum pertinebat, satis latum patefecerant, modò ipsi per ruinas eas hostes propellebant, modò ab illis pellebantur. Conuersi etiam ad muros ea ex parte à Velika flumine dolabris & securib. subruendos fuerunt. à quibus cum primum aqua picéq; feruenti, aliisq; ignibus in eos effusis, auertere eos conati hostes fuissent, Vngari nihilominus eò processissent, vt parte muri inferiori egesta, superiore tanquàm testudine tegerentur, lediq; amplius ab illis, quæ in eos mittebantur, non possent, hostes ligna iustæ.

iuste crassitudinis, ferreis aculeis vndiq; horrentia catenis ferreis ad praelongam sudem aptata ex vrbe supra muros, ad quos Vngarus subruendos constiterat, ita vibrabant, vt ex ea iactatione verberare subtus detorto tanquam flagello, qui in opere erant, verberarentur, magnisque incommodis afficerentur. nec tamen Vngarus remisit, quoad maiorem eius muri partem strauisset. ad extremum, quod ab ea quoque parte noua propugnacula contra turrim hostes collocarent, fossasque duxerant, oppugnationis consilium omnino dimissum fuit. Erat triginta circiter a Pleseouia passuum millibus via, qua in Liuoniam & Rigam itur, imminens monasterium Pezzvra a Moscis, quasi sepulchretum dictum, Diuæ virginis, cuius eo in loco ex arbore enatam effigiem repertam colunt, religione, sanctitatisque ac miraculorum quorundam fama clarissimum; ob eamque plurimis ac amplissimis prouentibus, de Nouogroda Liuonica agris nonnullis detractis, ei que assignatis a Moscouiæ Duce ditatum. Huic Mosci præsidium imposuerant. Magno id incommodo in ea vicinitate nostris erat. Nam & pabulatores nostros frequentissime excipiebat: itinera infestabat; eoq; ipso tempore impedimenta a nonnullis præmissa, tum mercatores quosdam Rigenses excusserat. Ad quos damna ea pertinebant, quorum non erant pauci, maximè verò, qui impedimenta sua præmissuri illac erant, vt id potestatis suæ faceret, a Rege contendebant. Proponebatur ab altera parte, milite ex oppugnationis tam diuturnæ, ac irritæ laboribus nondum recreato, nouam vllam tentari non satis tuto posse. Rex multorum continuis precibus victus, Farensbekium eo mittit. Huic mandat, vt situ loci cognito, quid sui consilij sit, certiores se faciat, si non magno negotio potiturum se eo existimaret, militem tormenta que illi summissurum; si difficiliorem, quam

quàm vt eo tempore suscipi deberet, expugnationem futuram iudicaret, integra re ad se rediret. Farensbekius paucis cum equitibus eò profectus, in itinere in hostium equites longè plures qui Pezzvra contra pabulatores nostros egressi, sub id tempus redibant, incidit: quorum aliis cæsis, cæteris profligatis, prælii huius prouentu inuitatus, & quòd nec fossa adeò magna, nec propugnaculis aut situ magnopere munitum cerneret, vtque homo militaris benè de successu oppugnationis speraret, oppugnationem suscipit. Mittit illi Rex Germanum militem cum tormentis aliquot maioribus. qui cum actis prius munitionib. muri partem aliquam strauisset, per ruinas irrumperè conabatur. iamque Wilhelmus Ketlerus Ducis Churlandiæ fratris filius, Gaspar & Reinoldus Tisenhausii, ac alij quidam in turrim proximam euaserant; atque in imam eius partem per scalas se demittebant. Iis ab insequentibus fractis, ac per ruinas etiam, cum propter angustias earum, tum quòd hostes omnes conferti contra eas se obuenterant, nulla irrumpendi facultate militi relicta, qui in ima turri remanserant, ab hostibus capiuntur. Mittit iterum Rex ad eas, quas antè miserat copias Germanorū, Bornemissam cum quingentis Vngaris peditibus, & maioribus tormentis aliquot: Polonicum militem ad castra Samoscius omnem retinuit. Vngari cum ab eadem parte, à qua Germani oppugnabant, inferiori tamen loco læuam versus muros quaterè cœpissent, iamq; aliquam muri partem diruissent, Thomas Solandius manu aliqua calonum & Kosakkorum Polonorum facta auersam à Germanorum & Vngarorum munitionibus turrim, vt hostem distineret, scalis admotis scandere cœpit. iis iam repulsis cum Germani per ruinas muri, iterum irrumperè tentassent, omni hostium multitudine in eos conuersa, reiciuntur. Eodem successu cum donec Ger-

nec Germani se recepissent, cessassent, ab Vngaris quoque irruptio tentata fuit; hostibus rem miraculo, nostris incantationibus & magicis artibus tribuentibus. verum animaduerti hinc potuit, non minus sæpè in leuioribus munitionibus negligentia, quàm in firmissimis difficultate offendi: quod in his magnitudo periculi, ac ex eo natus metus virtutem militum plerumque acuit: in illis exiguitas rei contentionem animi ac curam vt plurimum remittit. Non dubitandum enim aliqui existimabant, si coniunctis viribus, ac vno tempore incubitum in oppugnationem fuisset, non adeò magno negotio expugnari potuisse: Interim dum singuli per se, primum Germani, inde Vngari successissent, & hosti in vnum locum vires omnes suas conuertendi facultatem datam: & nostrorum impetum imminutum. Recipientibus se nostris Scoti milites, qui haud multò antè ad Regem venerant, opportunis locis subsidio collocati, si qui è muris telis aut scloppetis nostros petebant, certissimis ictibus conficiebant. Antequam discederet Rex, legatos, qui de pace cum Moscis agerent, Ianusium Sbarasium Palatinum Braslauiensem ab regno Poloniae, Albertum Radiuillum, Palatii Lituanici Marschalcum à magno Lituanie Ducatu designat. His Michaëlem Haraburdam hominem ingeniosum, & Moscouiticarum rerum cum primis peritum, more maiorum, scribam adiungit. Cum de conditionibus, in quas pacem fieri placeret, ageretur, vrgebant proceres Lituanici, vt magni Luki, qui proximo anno capti ab hoste erant, quò facilius pax conueniret, hosti redderentur. Ostendebat Samoscius, etsi quantum ad Lituaniam tutandam momenti tam opportuna vrbs, ac ea fertilitate, omniumq; rerum copia abundans ager haberet, animaduerneret: quò minus tamen id fieret, non vsque adeò se repugnare, quod non ea religione eius retinendi,

tinendi, cuius nulla in comitiis mentio facta esset, qua
ercuperandę Liuonię obstrictus ordinib. esset: moleste
tamen se ferre, ante tempus hec nullo cum fructu, non
nullo autem, ne ad hostes efferrentur, periculo iactari.
Itaq; Rex priuatim re cum Samoscio communicata, pa
cisq; constituendę arbitrio ei permissio, cum quid ab eo
fieri vellet, quid cum in regnum venturus esset, ipse pro
curaturus esset, ostendisset, optimę spei & fiducia ple
nus discessit. reliqui ferę omnes ex pręteritis obsidionis
incommodis, ac imminentis hiemis difficultatib. de reli
quę obsidionis euentu iudicantes, simulq; imminuti ac
attriti exercitus opprimendi tempus nullum hostem
prętermisurum cogitantes, non secus ac si extremum,
quos relinquerent, visuri essent, periculum eorum mise
rabantur, vt non deessent ex primariis fenatoribus, qui
Regi Balthasarem, Andreę fratris sui filium cum Vnga
ro milite in castris relinquenti, ne id faceret, persuadere
conarentur. Cum Rege vniuersus comitatus aulicus ac
voluntarii ferę omnes proficiscebantur. itinere igitur
per Ostrouam & Krasnohorodam capto, indę Ludse
nium, & Rosittenium, quę hostilibus pręsidiis adhuc
tenebantur, sine impedimento prętergressus fuit. seque
bantur reliqua agmina properantiũs, omnibus ad Du
nam flumen pręuertere annitentibus. Itaque & si sub
sidia contra eruptiones a Radiuilo disposita fuissent, iis
tamen dilabentibus, aliquot nostrorum carri abrepti a
pręsidiariis Moscis fuerunt. Transmisso indę ob nau
giorum inopiam non sine difficultate ad Duneburgum
Duna flumine Vilnam Rex venit. In castris Polonicus
miles stipendiarius omnis cum Samoscio remansit;
tam is qui ab initio cum eo ad Plescouiam accesserat,
quã quem a Stariciensi excursionē cum Radiuilo re
uersum receperat. Lituani cum Martino Curtio legato
sexcenti, qui ab eadem excursionē in castra venerant,
& quod

& quò ab eius incommodis se reficerent, vt in vicinis pagis Porchouam versus collocarentur, à ductoribus impetrauerant. E voluntariis Poloni aliqui non multi tamen remanserunt.

R. HEIDENSTEINII

SEC. REGII DE BELLO

MOSCOVITICO

Commentariorum

LIBER QVINTVS.



AMOSCIVS PROPECTOE
castris Rege disciplinam inprimis
militarem, quam aliàs magna cu-
ra tuebatur, quò inter tot difficul-
tates in hostico omnia diligentius
circumspiciēda sibi videbat, eò ac-
curatori studio sanxit. Ex præfe-
ctis, qui ætate, ordine, ac vsu rei militaris ceteros antece-
debant, ad quos de secretioribus quibusq;, ac grauiori-
bus rebus referret, sex delegit. Senatorij ordinis Stanisla-
um Tarnouium Radomiensem: Stephanum Grudfinsci-
um Naklensem Castellanos: Ex aliis Ernestum Veierum,
Martinum Kasanouium, Ioannem Lesnouolscium, Sigif-
mundum Rosnium: cæteris in rebus omnes ad consiliū
adhibebat. Interim quemadmodum Rex cum illo con-
stituerat, eam in rem omni studio incumberebat, vt si pax
cum hoste non conuenisset, ad obsidionem quàm diutif-
simè continuandam fameq;, ac omnium rerum inopia
ad deditionem urbem adigendā instructa omnia ac pa-
rata haberet. De huius autem rei successu non dubitan-

S dum

dum sibi existimabat. quòd quantùm in vrbe virium, apparatus bellici, commeatus ac rei frumentariæ esset, ex Suturna scriba Suiscii; qui in excursione quadam vna cum fratre captus fuerat; seu quemadmodum ipse, postquàm in potestatem nostrorum peruenisset, præ se ferebat, transfugerat, exactè cognitum habebat: subductisque rationibus, si omnes ad importandos in urbem commeatus ac subsidia aditus præclusisset, non multùm vltra mensem Maium sustineri obsidionem posse reperiēbat. Itaque sic se comparabat, vt vel ex iisdem statuiis, quemadmodum eò vsque factum fuerat, obsidione urbem premeret; aut si hiemis sæuitia, ac commeatus, qui antè omnis ferè ab exercitu consumtus fuerat, angustia, quò minùs id facere posset, prohiberetur, recreato interim prædis ex hostico agendis milite, Pezzuræ peditatum omnem, ac tormentorum partem ad-moueret; quam ob causam & quæ antè eò missa fuerant, tormenta non deduxerat: eaq; occupata simili ratione Porchouam ac Vdouam vicina castella oppugnaret; præfidiisque iis impositis hostes intra mœnia compulso contineret. si plus difficultatis oppugnationem eorum, quam vt tentandam putaret, habituram perspexisset, ligneis castellis ex vicinarum villarum edificiis constructis, opportunissimas quasq; vias, maximè verò, quæ à Vdoua, Porchoua, & Plescouia ad Nouogardiam pertinēt, occupare. cumq; parte exercitus ipse Nouogardiam versus in Prebusio Simeonis supra Ilmenum lacum sub tectis consistere: partem dum glacie concretus lacus esset, in prisca Russa, & Ostaskoua continere: iisque ex locis omnibus tam Plescouiam, quam Nouogardiam premere, latissimeq; supra Nouogardiam versus Tueram & Moscouiam vastitatem circumferre cogitabat. Ita tamen, vt quòad liceret, primam rationem atq; Plescouiam quam diutissime retineret:

nec

nec nisi hiemis aut commeatus difficultatibus adactus ab ea moueret. Militem, quem circa Svatohoram supra Plescouiam ad Vdouense iter obsidendum loco opportunissimo collocatum antè ostensum est, minimè interim dimouendum arbitratus, ne tamen repentina impressione opprimi ab hostibus posset, maiorem perditatum, ac minora tormenta aliquot, Stanislaumque Penkoslaium ei adiungit. Si hostis incursionem in eos faciat, die vexillum militare, quo proposito quàm primum ad opem iis ferendam accurri possit: nocte ignem tollere eos iubet. Simul ne discessu regio metu omni liberatum se hostis putaret, in omnes rei gerendæ occasiones intentus erat. Que cogitanti ex superiorum temporum pabulatorum licentia, qui partito in duos imperio militari, magna præterea voluntariorum parte nullam imperij necessitatem recipiente, sine metu vel imperij vel hostis vagabantur, nec rarò sub ipsos muros succedebant, accidere posse facultatem rei gerendæ ratus: die D. Nicolao sacro, qui vel maximè à Moiscis obseruatur, idoneis locis milite in insidiis collocato, carros aliquot propinquo à mœnibus spatio agi iubet. verum diei religione quamuis obiectam prædam hostibus spernentibus idem altero die fieri imperat. Confederant partitis insidiis in vicinarum fossarum, quæ imbrium casu factæ erant, vna Vngari equites; in altera Stanislaus Solkeuius adolescens, & Ioannes Kretkouius Priemscianæ turmæ legatus cum Polonis. Hostes ad primum prædæ aspectum mox erumpunt: protracti in locum insidiarum ab Vngaris celeriter confurgentibus profligantur. Poloni, qui remotiori ab iis loco erant, propterque præruptum per oppositos colles ascensum, ambitum capere cogebantur, confligendi cum hoste facultate non data, à dextra impetu in eum facto, inclinatum in effusiores fugam præcipitant;

coniunctimq; cum Vngaris ad mœnia vsq; insequuntur. Et si qui primo loco confederant Vngari, lectissimi equites, essent, ac in his Petrus Bathoreus, Georgius Sibiricus, ac Ioannes Kallaius, omnesque generosissimis equis Thracicis veherentur: Moscouiticorum tamen equorum, quamvis ij magnam partem parui ac deformes sunt; pernicitatem, assequi vix potuerunt. primo tamen impetu triginta circiter interfecti ac duodecim Boiarici generis, in iisque maxime strenuus, ac militariis facinoribus aliquot notus Petrus Goltouiscius, capti fuerunt. Incommodo hoc accepto Suiscius aversa porta maioribus aliquot tormentis magno labore, ad imas muri & propugnaculorum fenestras demissis, locoque opportuno non procul à fossis vrbis magna scloppetariorum manu occulrata, subinde viginti circiter equites, qui nostros cis flumen Pleseouiam in stationibus positos lacefferent, atque in infidias pertraherent, emittebat. verum cum excursionem hostium nunciata Samoscus ipse cum tribus turmis equitum flumen transisset, qui in infidiis confederant, ad primum vnius equitis conspectum, quem propius ad locum infidiarum accedere Samoscus iusserat, scloppetos ad vnum omnes in cassum explosissent, sola fere vrbis propinquitas, & fossa equiti obiecta quò minus conciderentur, hostes texit. Dum hæc ad urbem geruntur, aduenerunt interim legati à Mosco ad colloquium missi Demetrius P. Filius Illecius, Romanus B. filius Olphirionis; proque scriba illis adiunctus Nicolaus Bafforekus. Iis Posseuino cum præsidio Polonico ultra Porchouam obuiam profecto, ac mox nostris quoque legatis subsecutis, paulò post initium agendi de pace factum fuit. Ab initio de Sueciæ Rege fœdere comprehendendo propositum fuit. Et si enim præreptarum arcium iniuriæ non parum animum Regis alienassent: quòd

quòd tamen superioribus comitiis Annæ Reginae precibus adductus; quæ sororis suæ Sueciæ Reginae amore; ac assiduis literis victa genua Regis amplexa, ne sine Sueco pacem faceret, orârat, daturum se operam ut pace comprehenderetur, pollicitus ei fuerat; ac Posseui- nus quoq; homo inter principes Christianos pacis conciliandæ cupidissimus, hoc idem summo studio contende- bat; ut actionum de pace initium ab eo fieret, lega- tis mandauerat. Quæ in re dum hæretur, Bochdanus quidam omnium legationis eius arcanorum conscius à legatis Moscouiticis ad Palatinum Braslaviensem transfugit; ab eoq; ad Samoscium statim mittitur. ab eo hæc legatos mandata habere Samoscius cognoscit: Si Regem exercitumq; à Plescouia discessisse intelli- gent, quacumque causa interposita colloquium tolle- rent: si obsidionem obstinatè continuari sentirent; si- ne fraude de pace agerent: Eam autem hoc ad extre- mum concluderent, ut si Rex Lukos aliaq; quæ supe- rioribus annis cœpisset, præter Velisium ac vniuersum Ducatum Polotiensem, quæ Regi concedebat, sibi red- deret, vniuersa Liuania ei decederent. Legati cum Re- gem quidem discessisse, obsidionem nihilominus vrge- ri animaduertèrent, accesserant ad conditiones aliquas pacis: sed cum ob sæuissimas hiemis iniurias, comme- atusq; omni vicino agro vastato angustias subinde in commodū aliquem rumorem de exercitu expectarent, varias interim moras interponebant; deq; leuissimis quibusq; rebus ad principem missitabant. scripserat ex- itinere ad Samoscium Posseuius, ostendisse sibi lega- tos, magna cupiditate Moscum alicuius vel exiguæ sal- tem portionis agri Liuonici ad titulum Liuaniae vsur- pandum retinendæ teneri. Samoscius Nouocastrum, Serenescum, Nouogrodecum, deserta nec magni fru- ctus castella ea conditione relicturum se illi rescripse-

rat, ut penes Regem Luki, Sauolocia, Neuela remanerent. Cum illi de Lukis nulla se mandata habere renuntiassent, sine Lukis ne palmum quidem terræ in Liuania se ei permissurum ostendit. Interim Samoscus cum copias quasdam, quæ Plescouiensibus subsidio mitterentur, Nouogardiam contrahi rumor ad exercitum perlatus fuisset; Spitkonem Iordanum virum strenuum, cuius cum aliâ, tum in pugna Derfauensi præclara opera extitit, turmis aliquot equitum ei attributis commisit. Hic stationibus hostium, quæ non procul à muris se ostenderant, cum trepidatione intra mœnia compulsis urbi ipsi, omniq̃ vicino agro magnum terrorem intulit. Eundem opportuno deinde inter Porcho- uam & Nouogardiam pago confidere iussit; cum ad subuectiones subsidiaq̃, si quæ Plescouiensibus ab hoste summitterentur, prohibenda; tum ad pabulationes laxiores nostris faciendas: maximè autem metum vndique hostibus ostentandum. Supra eum verò Kosakki, quos ad Opakam collocatos fuisse antè ostensum est, ad Saionskouium ultra Russiam à Samoscio deinde translati omnia infesta reddiderant. Iamq̃ antè eandem ob causam ex Kobilogradensi etiam castello, quod ad stricto glacie lacu Pelba, qui ad Plescouiam, Derpatum, & Kobilogradum pertinet, ex Derpatensibus præfidiariis aliqui infederant, Simonem Charlenscium deicere præsidium iusserat; indeq̃ ad Prebusium supra Plussam flumen, quâ lacu concreto iter ex Derpato, & Vdovâ versus Nouogardiam erat, eum collocarat. vnde deinde ulterius populationes proferebantur: quibus rebus fiebat, ut quod ab initio sibi proposuerat, nec ipse Plescouia propter com meatus difficultates auocaretur; quod in omnes ferè partes liberè pabulari nostri possent: & populationibus, quâ supra priscam Russiam ac Nouogardiam versus Tueram, quâ ad Volchodam flumen

flumen, ac Lahodam lacum longè lateque factis, cum opportunissimis viis occupatis vndique grauissimè hostes premerentur, indies metus eis augeretur. Miserat ad Samoscium Iordanus duos nobiles Moscos repentina excursione oppressos. Ex iis de Ioannis maioris natu principis filii morte cognitum fuit. Hunc cum pater opum suarum magnitudinem ac thesauros iactasset: ille verò iis Regis thesauros virtutem ac animi fortitudinem prætulisset; quibus etsi illis, quibus pater abundaret, inferior esset, nihilominus ditiores eius igni ferroque vastaret, magnaque parte regni eum exuisset: vel ut quidam dicerent, cum obstinatiùs à patre exercitum, quo cum regio exercitu dimicaret, flagitasset; iratus verò illi pater, scipionem in caput impigisset, non multò post, siue ictus, siue animi doloris vi, in paroxysmos epilepticos, atque inde in febrim incidisse, ex eaque deinde extinctum narrabant. quæ res supra reliquas fortunæ aduersitates eò maiorem dolorem Mosco attulit; quòd hic etsi imperio patris priori vxori, cum qua optimè illi conueniebat, nuncio remisso, aliam duxerat, sine liberis tamen decesserat: alter verò filius Theodorus iunior natu, mentis vitio ad regnum atque omnes adeò res inutilis censetur. Ab altera parte Suiscius, quòd immensam frigoris vim cerneret, febresque passim ex ea in castris vulgari è transfugis intelligeret: propter vehementiam enim hiemis, quò minus aliqui transirent, fieri non poterat; ad seruatae urbis famam, quomodo castrorum captorum, ac deleti exercitus gloriam adliceret, querebat. Erat tertia ferè pars castrorum morbis implicita; cum ut quisque frigoris ea immensi prope asperitate correptus esset: quod qui effugeret, nemo erat: feбри etiam statim corripereetur: ita tamen ut pauci omninò ex ea morerentur. Non minùs autem Samoscius, cum in tanta aë-

ris inclementia, cum hoste potius, quàm cum frigoris iniuriis conflictari militem cupere cerneret, prælio dimicandi facultatem sibi dari expetebat. Eiusque rei, ut extra muros atque munitiones hostem pertraheret, cum varias rationes quæreret, omnia consilia eius vehementer frigoris, quam diximus sæuitia impediēbat. Tanta autem eius vis erat, ut ubi quis extra tabernaculum vix pedem protulisset, omnibus ferè membris, iis potissimum quæ maxime aëri patebant, naribus, auribus, atque facie, gelu astrictis emoreretur; quodque de Moscouitici cœli natura cum miraculo nonnulli prodiderunt, eiusmodi in iis locis frigora esse, ut aquæ casu ipso dum funduntur, congelentur, id experiendo multi cognoverint. Maxime autem quod necesse erat evenire, excubiæ seuitia hac frigoris vexabantur; raræque omnino obibantur, ex quibus non plures plerumque aliqua corporis parte mutilata referuntur. Memorabilis cum primis ex turma Sigismundi Rosnii nobilis equitis casus fuit; cui cum utrumque crus planè iam frigore emortuum esset, isque in febrim inde ac mentis alienationem incidisset, interim verò medicus, ferro crura resecaisset, ubi ad se rediit, non secus ac si partem aliquam ornatus requireret, de pedibus amissis interrogare cœpit. Alius quidam ludicro penè euentu, maximum tamen & ipse periculum adiit. relictus à Basilio Surannicio in primis excubiis non procul à fossis urbis concubia nocte fuerat. cumque frigore planè obriguisset, atque equus uti fieri solet ex frigore subito gravius se concussisset, is qui nec equum, nec se in equo planè iam enectus continere posset, de equo decidit: pedesque ferramentis, quæ ab ephippio dependent, retento, sub ipsas portas equo incitato magna voce alienam opem, cum ipse explicare se non posset, implorans, pertrahitur. Mittit mox Samoscius, qui eum eripiant; quod si sine periculo facere non

non possint, ne ipsi temerè periculum adeant, mandat. Hostes qui in muro constiterant, fraudem subesse rati vtrò irridebant; satisque iam fraudum ac dolorum esse, nec ea ratione amplius se capi posse exprobrabant. Ita incolumis hic à nostris recipitur. Id autem tum tempus anni erat, quo intensissima iis in locis frigora esse, vulgari sermone Moscorum ostenditur; qui Nicolai & Christi frigora appellant, cum maxima designare volunt. Moscouia autem omni sub ipsis ferè trionibus posita, nullo ferè loco, nisi iis fortè, quæ ad glaciale mare pertinent, quàm in Plescouiensi agro vehementiora frigora existere solent. Itaque & animalia pleraque omnis generis, quæ ceteris in locis nigro aut fusco colore sunt ut corui cum primis, noctuæ, gallinæ siluestres, vrsi, lupi, lepores, aliaque eius generis, seu cœli natura, seu frigoris vi, candida hinc esse vulgò animaduersum est: Noctium verò eam longitudinem esse, ut cum longissimæ sunt, diei non quinque omnino horarum spatium sit. Magna tamen in omnibus hisce incommodis tolerandis militum constantia erat: Samoscius etiam, quantum eius fieri poterat, ratione ac diligentia ea subleuabat. Excubias quaternis vicibus permutabat: earum ternas per alios obibat. sub crepusculum autem ac primum diluculum, per Stanislaum Vlodekonom affinem suum, quem Sbarasio Palatino Braslauiense ad colloquium cum Moscis misso, sibi legarat; quod eo tempore eruptiones hostium maximè expectandæ erant. Quò pauciores autem frigoris incommodis afficerentur, pro superiorum temporum consuetudine paucos admodum, qui non tam eruptionibus hostium resisterent; quàm de aduentu eorum certiores cæteros facerent, in stationibus & excubiis collocabat. Etenim iam antè toto eo tempore, ex quo exercitus vrbi admotus fuerat, morem hunc Samoscius obseruarat, ut vel diligentissimè

excū-

excubiis dispositis, in ipsis nihilominus castris contra
repentinas eruptiones subsidia parata haberet: alboq;
circum castra misso per vices semper aliquot eam ad
rem describeret. Hinc etsi, quod in obsidionibus fieri so-
let, non raro eruptio tentata esset, sæpiusque se hostis
ostenderet; nulla tamen vnquam in castris trepidatio
orta, aut vnquam omnino ad arma, nisi semel fortè
mox à discessu regio, cùm ad acuendam militis diligen-
tiam ex industria tumultum Samoscus auxisset, con-
clamatum fuit. Ii enim, ad quos cuiusque temporis vi-
ces pertinebant, cum conscensis equis hosti obuiam
progressi fuissent, cæteris prope ignaris eum reiicie-
bant. Tum verò eò accuratius obseruandum id sibi ex-
istimabat; quò propter frigoris sæuitiam, ne ea miles
affligeretur, pauciores excubitores ponebat; cùm vt
maximè firmiores posuisset, aëris tamen iniuriis ad rem
gerendam penè inutiles futuros cerneret. Itaq; in ipsis
interim tabernaculis, quæ partim è vicinarum villarum
ædificiis, partim cauernis in terra effossis, cratibusq; ac
palea intectis, contra cœli incommoda ex tempore sui
quisque vsus causa pararat, more stationum per vices
semper aliquot excubare, equosq; quos statim inscen-
derent, atque arma expedita habere iubebat; qui eru-
ptione aliqua nunciata recētes, ac ab iniuriis aëris ille-
si, conscensis mox equis hosti occurrerent. qua re & secu-
ritati castrorum & militis quieti, atque commodis ma-
ximè consulebatur. Stationum igitur ea exteriorum in-
frequentia, ac numero adeò earum ex transfugis à Sui-
scio cognito, castrorum oppugnandorum, stationibus
prius repentina eruptione oppressis, consilium cœpit.
hunc in vsum septingentos circiter equos, quos obsi-
dionis incommoda reliquos fecerant, conquiri, ad
eosque promptissimum quenque rescribit. Binæ contra
vrbem à castris stationes erant; vna vltra Velikam fla-
men

men, quæ Pezzurensem viam obseruabat; altera cis flumen supra castra. Ex altera parte, qui ad Svatohoram erant curabant. Suiscius trecentos circiter equites electos ultra Velikam contra eos, qui ad Pezzurensem, ut ostensum est, viam, in stationib. erant, eo consilio, quem admodum ex captiuis postea cognitum est, mittit, quod illis occupatis, si quod futurum præuidebat, qui à superiori castrorum parte custodias agebant, statione sua relicta flumen glacie concretum ad ferendam suis opem transirent, castra nudatum iri, sibiq; nullo obfistente repentina eruptione ea inuadendi locum futurum cogitabat. Obuenerant diei eius stationes Sborouianæ turmæ. quæ cum trecentis equitibus constaret Thomas Orinscius cum quadraginta circiter eorum ultra Velikam flumen positus erat; cum cæteris Laurentius Scarbecus turmæ legatus supra castra cis Plescouiam flumen excubabat. Iam antè autem ea in vniuersum custodiis omnibus mandata Samoscus dederat, ut erumpenti hosti nulla pugnandi copia facta ambitu capto, versus castra statim se reciperent; non modò quò subsidium illis propinquiori è loco facilius ferri posset, verùm hostis etiam longius ab vrbe ad pugnandi necessitatem pertraheretur. Id igitur cum Orinscius fecisset, Suiscius peditatus partem statim vrbe emittit; qui quòd locus is omnis conuallib. interseptus esset, valle quadam occupata receptuque intercluso vehementer scloppetis eos premebat. Interim Samoscus Scarbecum, qui quemadmodum ostensum est, in superioribus stationibus erat, flumen mox transire, impetumque in hostes dare iubet: simulq; ipse equo conscenso, iis qui in subsidiis, de quibus antè dictum est, confederant, ut se sequantur, imperat. Scarbeco promissimè flumen transgresso, Suiscius vbi primum stationibus nudata castra animaduertit, mox reliquum pedita-

ditatum ac equitatum omnem diuersis portis ad castra oppugnanda mittit. Interim qui ex instituto, quem admodum ostensum est, in tabernaculis excubabant, sequi; à Samoscio iussi fuerant, ad certamen iam se expедierant; primi; Vngari, qui eam ad Velikam flumen castrorum partem tenebant, inde Ioannes Kretkouius, cum turma Stanislai Priemscii: Sarnacius cum Hieronymi Gostinii, quarum legati erant; post hos alii tanta celeritate procurrerunt, ut eodem quasi in vestigio, vno conflictu, atque impetu trecenti circiter ex hostibus caderent; caperentur ultra sexaginta: magna verò eorum pars vulneraretur. Suiscius qui è proximo muro euentum eruptionis expectabat, cædem hanc & fugam suorum cernens, reuocatos intra urbem mox recepit. Desiderati & ex nostris prælio eo aliquot fuerunt, cum vallè ab hostibus occupata circumuentis auxilium ferri ab aliis non potuisset. Piontkouius nobiliseques captus, ac ab hostibus abductus fuit. Orinscius cum diu fortiter hostes sustinuisset, globo è superiori loco per humerum & intestina traiecto, periit. Petrus Grudscius cum per hostes manu viam sibi patefecisset, adque nostros iam & ipsa penè castra in tutum penetrasset, è muro tormenti cuiusdam maioris ictu interemptus fuit. Ex Vngaribus equitibus Franciscus Kobor & Barrabas Balog viri militares ceciderunt. Quod nisi subsidii iis, qui cum Orinscio circumueniebantur ferendi causa, celerius à castris progrediendum nostris fuisset, facile vniuersas copias hostium ad ipsa castra pertrahi, iisque deletis debellari ferè tum potuisse, minimè dubitandum videbatur. Erat is quartus mensis Ianuarii dies. sub noctem Samoscus, quòd maxime omnes Moscos cupidissimos suorum humanorum sciret, Nicolaum Vrouecium in loco prælii excubare, ac si fortè hostibus ad tollenda corpora egressis, gerendæ rei facultas accideret in omnes occa-

occasiones intentum esse iubet. Ea nocte nullam in partem se commoucrunt. Altera Martino Lesnouolscio notæ virtutis præfecto negotium dat; qui cum quibusdam vrbe egressis, ac proxima, quæ ad eam iacebant, cadauera subtrahere incipientibus vnâ cum altero equite se ostendisset, celeriter in urbem refugerunt; semperque postea intra mœnia se continuerunt. Samoscus rei gerendæ nullum amplius locum futurum, quodque pietati ac humanitati deberi arbitrabatur, vltro hosti offerendum ratus, ad obsessos mittit: potestatem se illis mortuorum facere, ac vel per militem conferri corpora, ac tradi iis iussurum, aut si ipsi per se tollere ea velint, fide publica integrum id illis futurum ostendit. qui in muris erant, laudibus hanc eius pietatem Christianique animi sensum magnopere extollabant; reque cum Suiscio communicata, vt sequenti die circa meridiem ad se redeat, quo ea de re constitui posset, rogabant. Ad tempus Stanislaus Solkevius adolescens singulari ingenio præditus, Melchior Sauisfa stabuli Samoscij præfectus, alijque nobiles iuvenes Thracicis generosissimis equis vecti splendidissimeque omnes ornati iniussi vnâ proficiscuntur. Agnoscit ex transfugis Solkeuium quidam: ostendit hostibus, præterquam, quod propinqua cognatione Samoscium contingeret, multorum etiam secretorum conscium esse. solebat enim Samoscus, quod præter ætatem, eximiam in eo indolem ac ingenium perspicceret, in secretioribus rebus ad Regem referendis ipsius plerumque opera vti. Hac re Mosci inducti, mutato consilio, ac pietatis in defunctos officio, præsentem quod ostendebatur, commodò posthabito, verbis rem extrahunt; interim maiores scloppetos complures, & quingentos circiter scloppetarios in muro clam disponunt. Solkevius cum variè rem duci animaduerneret, vt tan-

T

dem

dem se explicent, eos hortatur : continuò vnus è scloppetariis coortus scloppeto in Sauissam irruens, irritò tamen propter armorum firmitudinem ictu cum ferit : simul cæteri scloppetos omnes vno tempore displodūt. Solkeuius, quique cum eo erant conuersis equis celeriter se recipiunt. eis è muris alios mox scloppetis, & quò longius prouecti essent, eò maioribus indè tormentis hostes persequuntur. incolumes nihilominus in castra nostri redierunt; quòd tantum globorum nimbum euassissent, omnibus mirantibus. Iam antè Ioannes Ostromecius, qui ad tormenta cum aliis curabat, huiusmodi rem ad Samoscium detulerat. In arca ferrea duodecim tubos scloppetarios, quò citius rumperentur, ex industria tenuatos, ordine disposuerat; eosdemq; subtilissimo puluere, ac arcam ipsam implebat. in medio eam scloppetì partem, quæ rota atque incumbente filice ignem ad puluerem incendendum elicit, tensam paratamque constituerat. arca ea in ligneam cistam imposita, fibulam, quæ attracta rotam luxare, ignemq; excitare solet, duabus chordis, vna ad inferiorem lignee cistæ fundum, altera ad ipsum ferreæ cistæ operculum alligarat; ea ratione, vt siue ferream arcam ex lignea quis eximeret, seu ipsius ferreæ tectum moliretur, necessario vtraque re puluis inflammaretur, tubisque atque arca ferrea fracta astantes percellerentur. Hanc si ita ad Suiscium misisset, minimè sibi obtemperaturum, quin eam excuteret seque ipse in fraudem indueret, existimabat. Noluerat tum Samoscium permittere, vt huiusmodi artibus contra hostem res gereretur. Iam publica fide ab illo prius violata, Solkeuioque ac aliis omnibus qui in consilio Samoscio aderant, vrgentibus, vt eius in se perfidiam ea ratione vlcisci sibi liceret, Ostromecio rem totam permisit. Hic captiuum hominem idoneum nactus, per aliquot dies benignè habitum

tum, tamquam magni secreti conscium facturum iuramento adigit, fidemq; eius sibi obstringit. Fingit Ioannem Mollerum quendam se esse: cum Farensbekio quondam apud Principem Moscorum militasse: postea etiam illo ad Regem se conferente, auctoritatem eius secutum; ac & si aliquo apud Regem loco esset, pristinam tamen Moscorum principis in se indulgentiam requirere: eamq; ob causam interfecto prius imperatore exercitus, cum pro artificio suo rei tormentariae remotis arbitris communicaturus cum eo esset, ad illum rursum transire in animo habere. Interim cistam eam, ut ad Suiscium perferat rogare: in eam pretiosissimas quasque suas ac alias magni momenti res se coniecisse; breui ipsum, opera prius ea, de qua dixisset, principi Moscorum nauata subsecuturum: magni autem sua interesse, ne priusquam ipse veniat, cista resignetur. In eandem sententiam ad Suiscium literas perferendas illi dat. Moscuscus duplici læticia elatus, quod & libertatem recuperaturus, & tam gratum nuncium ad Suiscium perlaturus esset, perque excubias ab Ostromecio traductus ad Suiscium peruenit. qui cum eo tempore aliis rebus occuparetur, cæteros qui ad consilium tum forte conuenerant, nullo ad cognoscendum sibi spatio sumpto, aperire statim cistam iubet. concurrunt complures rei nouitate, atque innata hominibus curiositate ducti. Ferocissimus omnium Andreas Chorostinus alter Palatinus, & æmulus Suiscij, quemadmodum postea cum ex Alexandro qui pacem facta ad Pleseouenses à legatis missus fuit, de quo infra dicetur, tum pace facta ab aliis multis compertum est, pede in cistam ligneam imposito, ferream manu sua ipse extrahere nititur. Interim fibula convulsa, puluereque inflammato, arca ferrea ac tubis disiectis, non modo astantes omnes dissipantur, verum tecti etiam pars aliqua vi ignis ac fracto-

rum ferramentorum conuellitur. præ cæteris maximè insignes, Andreas de quo dictum est Chorostinus, & Koscius periëre. Erat & de Suiscio suspicio, cum ex ægritudine per continuos aliquot dies copiam sui non fecisset: maximè autem apud nostros opinio hæc confirmabatur, quòd cum assiduè antea in muro versari, perq; stationes volitare solitus fuisset, nunquam postea se ostenderet. Verùm hac de re cõtumeliosæ postea literę scriptæ à Suiscio ad Samoscium fuerunt: ab iisq; ad singularis certaminis prouocationem descensum inde fuit. Verùm Samoscio constituto die cum demonstratis antè insignibus in designatum locum progressu hostis non prodiit. Disputabatur nihilominus interim, quemadmodum supra ostendimus, ab vtraque parte de conditionibus pacis. De Sueciæ Rege ab initio iam Mosci responderant, non recusare principem suum, quò minus pacem cum illo faciat, verùm debere cum more maiorum ad Nouogardiæ Palatinum mittere, qui de conditionibus pacis acturus cum illo esset: præter exempla institutaq; maiorum nihil omninò faciendum sibi esse. qua de sententia cum deduci non possent, inde ad summam Liuoniæ, cæterarumque arcium vtrinque reddendarum conditionem ventum fuit. Plurimum de hac controuersia fuit; cum prouinciam, quam nouem & viginti annorum bello, multoque sanguine suo vix peperissent, ac in qua multi Russici generis nati essent: plurimi etiam domiciliis constitutis inuectassent, non minus ægrè quàm si de Moscouitico solo ipso ageretur, relinquerent. Ad extremum de Derpato atque Nouogrodeko Liuonica, cum reliquis vrbibus, atq; castellis ferè omnibus cecidissent, vehementer resistebant, quòd in illam religionem suam iam inuectam, Episcopumque in ea à se constitutum: hanc Diuæ virginis matri Pezzurenfi sacram dicerent. Tandem cum
præter

præter expectationem suam, minùs ad voluntatem ipsorum ad Plescouiam res fluere; ac ne summam quidem cum aliarum rerum ferè omnium tum frigoris difficultatem ab obsidione nostros reuocare: iamque maxima hiemis parte exacta mitiora tempora instare intelligerent: maximè autem Possuinus, qui quòminus suspecta fides sua apud Moscos esset, cum illis diuersabatur, ne vllò cum fructu in re tam pia tantùm elaborasset, summa apud vtramque partem libertate in pacem incumberet, res conuenit. Pacti vt vasa sacra Derpato ac Nouogrodeko tollere sibi liceret, nec Episcopus sacerdotesue eorum contumelia afficerentur, vniuersa Liuonia, quam in sua potestate princeps eorum haberet, decesserunt: Regis nomine è contra Lukis, Sauolocia, Neuela, aliisq; castellis nōnullis, quæ superioribus annis ab hoste cepisset, Velisio ac Polotienſi agro omnirecepto, illis cessum fuit. De Narua aliisq; castellis quæ à Sueco occupata erant, diu disceptatum fuit, cum nostri Moscorum tergiuersatione, in potestatem Sueci venisse eas dicerent: Mosci nihil ad se præstationem eorum pertinere contenderent; quæ nec antè à se inter arces Liuonicas, quas Regi obtulissent, nominatæ fuissent: nec nunc tenerentur. Tandem cum in eo hæreretur, ita controuersia suspensa, vt iuri suo in Naruam reliquasque arces, quæ à Sueco tenerentur, minimè Regem defuturum legati testatum facerent; Veisensteinio autem, quod iam antè Regi Moscus obtulisset, differtè legati eius decederent, de captiuis deinde actum fuit. Cum Mosci vtrinque captiuos sine pretio reddi vellent: Regis nomine, quòd ex Moscis primarios homines complures, illi ex regiis captiuum insignem nullum ferè haberent, Sauolocia, Neuela, ac Sebesium, ac extremo loco Sebesium pro captiuis posceretur; Moscus verò non tantam hominum, quantam possessi-

onum rationem habendam sibi iudicaret, in aliud tempus, quo ad exigendum in pacem à se mutuò sacramentum legatos vtrinque missuri essent, tota hæc res dilata fuit. De tormentis ac apparatu bellico, quæ in præsidiis essent, ita conuenit; vt relictis, quæ cum quæque caperentur in arcibus fuissent, quæ vtrinque illata essent, secum quisque deferret. Iis igitur conditionibus decennalis pax perfecta fuit: Cum nec Moscum in eo amissarum prouinciarum dolore opportunioribus temporibus per motus aliquos interregni aut alias occasiones ablata recuperandi spes defereret: & Rex tanta clade atque vastitate Moscouiæ illata, quæ tam paucorum annorum spatio resarciri nullo modo posset, si Prouincia Liuania omnibus interim necessariis rebus à se firmata bellum Moscus redintegrare vellet, maiores res gerendi facultatem sibi non præcidi non moleste ferret. Legati iuramento statim eas firmarunt; de principum iuramento, vt maiores legati exigendi sacramenti causa primum à Rege ad Moscum, inde à Mosco ad Regem mitterentur, constitutum fuit. In literis fœderis conscribendis, per aliquot etiam dies controuersum fuit. quod Mosci ab initio vniuersæ Russiæ Ciarium: postea cum de eo iam decessissent, secundum Moscouiæ & Vlodimiræ aliosque complures titulos Astrakanensium tamen & Kasanensium Tartarorum Ciarium, principem suum appellari volebant; nostri præter morem maiorum nihil se illi tributuros contenderent. Iam paulò antè autem Parnauiam, quæ à Suecis obsidebatur, commeatus inopia vehementer laborare, ac vix quatuor septimanarum spatio tolerare Moscos posse, per Thomam Embdanum, aliosque quorum diligentia in cognoscendis rebus hisce utebatur, Samoscius cognouerat. à Ioanne Sborouio præterea, qui maximis vadimoniis, necessariisque suis ac familiæ suæ nego-

negotiis coactus in Poloniam redierat, certior factus fuerat, ad res novas Liiones sollicitari, rumoresq; spargi, Regem si Liuoniam recepisset, inter Vngaros vniuersam distributurum. Quod cum ii fieri non posse, nisi ipsi omnes sedibus suis euerterentur, perspicerent, non parum ea re multorum animos commoueri necesse erat. Proponebantur eodem tempore Succii nomine edicta, quibus suorum cuique bonorum, & quas pristinis temporibus, maiores cuiusque beneficiario iure tenuissent, possessionum restitutio promittebatur; adq; possessionem bonorum adeundam, ad quos ea pertinerent, inuitabantur. Inter alios Byringius, qui aliquot castella regia in potestate habebat, vt ex Moscis Parnauiā decedentibus cognitum postea fuit, literas ad Moscos dederat; quibus si diutius sustinere obsidionem non possent, vt Sueciā potius quā Poloniā Regi eam dederent, hortatus eos fuerat. In hoc igitur Liuoniā amittendā discrimine, etsi vel vi tandem, si subsidia sibi à Rege quemadmodum cum eo constituerat, summissa fuissent: aut saltem Mense Iunio, vltra quem obsessos non toleraturos, perspectum habebat, fame atque commeatus inopia in potestatem Pleiscouiam venturam Samoscus non desperabat: ad pacem tamen animum tandem aduertendum sibi iudicabat. Venerat sub idem tempus in castra à Suecis missu præfecti Naruensis mercator quidam, qui de iniuriis, quas finib. suis à milite nostro, qui supra Vdouam in Prebusio collocatus erat, illatas dicebant, quereretur. cui cum præter opinionem Suecorum benignius responsum fuisset, venit postea ad Samosciū à Ponto Gardiano Laurentius Cagnolus Italus; cuius in Narua occupanda maxime insignis opera extiterat: honorificisque verbis pro Rege Samoscio salutato, ac literis ad Regem à Ponto scriptis illi redditis, vt ad legatos Moscouiticos ipsius

voluntate proficisci sibi liceret, petebat. Samoscus et si quæ in Liuonia agerentur, non ignorabat: comitatus tamen suæ apud exterum hominem, rationem sibi habendam ratus, in præsentia humanè ad postulata ipsius respondit: non potuisse in mentem venire Regi, cum præsertim tandiu in castris fuisset, nec quisquam à Sueciæ Rege ad se venisset; deinceps legatum vllum missum iri: atque ita nec Regem vlla hac de re mandata sibi reliquisse; nec se sine Regis mandato, ac voluntate quicquam ei permittere posse: literas vel per tabellarium ad Regem missurum: aut si ipse ad eum ire vellet, præsidium se ei adiuncturum. Cagnolus responso hoc accepto, tabellarioque cum literis relicto ad Pontum se recepit. Eum, tabellario ad Regem è castris nondum profecto, perfectæ pacis nuntius in Liuoniam consecutus fuit. Iamque Alexander qui de pace facta Pleseouensibus renunciaret, à legatis Moscouiticis Sapolia missus ad Samoscum peruenerat. quem cum ad prandium Samoscus inuitaret, maximi beneficii loco habiturum se respondit, si ad urbem quam primum aditus sibi permetteretur. Nam dum ipse epulaturus ibi esset, obsessos interim sanguinem bibituros: his enim verbis utebatur: pransurum se apud eum, vbi læto pacis nuntio suis impertito, reuersus ad eum fuisset. Samoscus præsidio ei adiuncto, ad urbem perducere iussit. Cum sub Pochrouensem turrim, quæ ad Velikam flumen pertinet, ab Vngaris tormentis, quemadmodum ostensum est, quassata erat, successisset, ac quis esset ostendisset; tanta eorum, qui in muris constiterant, lætitia, atque gratulatio extitit, ut subito sublimem raptum in muros extollerent; nullaque vel suorum vel nostrorum circumfusorum verecundia prohiberi se paterentur; quominus ad pedes eius proiecti eos oscularentur, Archangelumque ac pacis nuntium lætis acclamationibus ap-

bus appellarent. ad nostros deinde conuersi fratres eos appellabant; vtque sine metu propius iam ad se accederent, libereque vagarentur, inuitabant. Altero die idem Alexander cum aliis nonnullis ex nobilitate ad Samoscium in castra redit: quia pax iam conuenisset, vt lignatio sibi libera permittatur, ipse verò quam primum exercitum deducat, petunt. Respondit Samoscius, etsi de pace transactum esset, literas tamen in quibus conditiones pacis perscriptæ essent, nondum ad se allatas: multo minus qui præsidia traderent, à principe eorum venisse. conuiuio deinceps eos excepit. Quod cum lautissime instructum fuisset, qui maxima apud nostros commeatus inopia laborari sibi persuaferant, omnium non modò necessariorum rerum, verum plurimarum quas nunquam ipsi cognouissent, apparatus eò magis admirati fuerunt. Etenim Samoscius quemadmodum superiori anno fecerat, ita iam initio etiam expeditionis huius, præter puluerem tormentarium, quo perditatus, quem conscripserat, vteretur, apparatusque bellicum, commeatus quoque maximam copiam, nonnullam etiam elegantioris victus, externorum hominum excipiendorum causa contraxerat: partemque eius, quam Gedani & Rigæ compararat, à Duce Churlandiae, ciuitateque Rigensi iumentis conquisitis, supra Kokenhausium, quod tum in hostium potestate adhuc erat, exposuerat; indeque aduerso flumine Disnam, ac vterius Sauolociam nauibus deuexerat: aliam carris deportarat. In eo verò prandio cum cistæ quoque ad Samoscium missæ mentio facta fuisset, cum de Chorostino, ea quæ supra demonstrauius, Alexander præ se ferebat; tum nisi pax interim conuenisset, ne ingenio à nostris superati viderentur, vicissim se illis trecenta aurea poma obiekturos fuisse dicebat. Id satis apparebat, nullam ferè rem ægrius eos ferre: iamque antè priusquam
paci

pacis condiciones conuenissent, Vngaris propius ad muros succedentibus, sæpiusq; cistam illis exprobrantib. adeò eo commoueri se testabantur; vt cum iidem in flumine glacie adstricto cistam aliquando illis obiecissent, crebris tormentorum ictibus doloris ac iracundiæ suæ flammæ in eam eiacularentur. eodem autem modo frequentius deinde ad Samoscium ventitabant; à quo cum semper benignè habiti fuissent, ac verò captiuorum quorundam permutandorum causa in Procopium Penonscium turmæ præfectum conuiuium tum fortè agitantem incidissent; qui antea commeatus ac rei frumentariæ difficultate coactum, vltro Samoscium exercitum reducturum existimabant; vt non modò Imperatorem ipsum, verum exercitum vniuersum in maxima copia versari videbant; sequenti die Theodorum Mesceodouum aliosque frequentes ad Samoscium mittunt; vt pace facta exercitum tandem abducatur, obsidioneque urbem liberet, petunt; quod nisi intra tri-duum faciat, nolle se pace teneri ostendunt. Respondit Samoscius, existimare se pace iam facta non ex animo hæc ab illis dici; quam non ingratam illis accidisse, gratiorem quidem, quam generi hominum ex stipendiis viuenti sciret: exercitum cum commodum futurum esset, se abducturum. Interim Palatinus Braslauiensis ipse in castra venit; nec alia conditione pacem conuenire potuisse, quam vt nulla mora interposita exercitus reduceretur, docuit. reddendarum quoque arcium eas condiciones placuisse, vt aulici ab vtroque principe ad arces, quæ restituendæ essent, quàm primum mitterentur; qui vbi aduenissent, rusticorum ac agri possessio statim traderetur. Interim ab iis, qui possessionem adirent iumenta decedentibus ad res suas deportandas præberentur; quæ si præbita essent, tum octauo ab aduentu aulicorum die, præsidio ipso quoq; decederetur. si quæ
ex vi-

ex vilioribus rebus deportari commodè non possent, eæ consignatæ interim deponerentur, ac primo inde tempore iis, quorum essent restituerentur. Videbat Samoticius magnam hisce in rebus difficultatem. Nam cum in regione continuis bellis vastata, magnam iumentorum paucitatem existere necesse esset, in Moscorum ferè potestate fore intelligebat, pro suo arbitrio restitutionem extrahere. Vt tamen quid animi haberent, periclitaretur, ac fiduciam simul suam iis ostenderet, Ostrouiam antèquàm dies reddendæ eius venisset, tradi illis iussit; ac licet ea sola in re cùm recipiendæ reliquæ Liuoniæ, tum pacis stabilitatem omnem positam intelligeret, vt obsidionis ac exercitus metu in fide Moscos contineret: ne tamen à se violati iurisiurandi legatorum initium profectum iactare possent, reuocatis omnib. ex partibus pabulatoribus, peditatum omnem cum tormentis, ac grauiore belli instrumento, Nouogrodekum versus, quo in castello deponere ea cogitabat, octo dierum itinere antecedere se iubet. inde diuersas alias turmas ad recipiendas arces Liuonicas sigillatim præmittit. eas agmen quod ægris præsidio erat, sequebatur: post id impedimenta agebantur. Ipse cum reliquo exercitu die vj. mensis Februarii Plefcouia mouit. spectabant transgredientes copias, partim ex muris atque propugnaculis vrbs, partim è ripis fluminis aliisque eminentioribus locis frequentes Mosci. maxime vltimam hanc exercitus partem admirabantur; quæ cum ad viginti quatuor millia equitum accedere videretur, magis tamen ferè splendore, ornatuque, atque eorum præstantia quàm numero ac multitudine eos in se conuertebat: ita plerisque integris, vt nihil vel parum omninò ex hiemis ac diuturnæ obsidionis incommodis decessisse illis videretur. Hoc ordine ad Seskeli-
um interim aliosque vicinos pagos supra Derpatum eo
consilio

consilio exercitum traducit; quòd eo ex loco & in Moscouiam, si pacis conditionibus à Moscis non satisfaceret, facilem se receptum habiturum, & in Parnauiam intentum se esse posse iudicabat; ac si Suecicæ copiae, quemadmodum iis denunciârat, ab ea non decessissent, ex tempore & re ipsa consilium capere. Etenim iam antè, mox à facta pace Ioannem Lesnouolscium aliquot cum turmis equitum miserat; qui vrbi ac archiepiscopo Gardianoque si obsidionem nondum soluisset, ut ab ea tanquam regii iam iuris vrbe abstineret, denunciaret. Mosci etsi Ostrouam iam recepissent: dies etiam, qua Nouogrodekum se reddituros constituerant, lapsus esset: ex industria tamen moras interponebant. seu quòd in exercitum, si fortè dilaberetur, intenti essent; seu quòd è remotioribus praesidiis ad extremas oras, sineque ipsos Moscouiae omnes sui interim conuenirent, tutoque res suas deportare possent; ne si primis recedentibus ultimi, qui Kokenhausii, Parnauiae, ac in longinquiore aliis locis erant, tardarent, iniuriis ac vexationibus nostrorum paterent. Quam moram maximo suo atque exercitus cum incommodo fieri Samoscus videns, Vroecium iam antè cum tormentis Nouogrodekum versus à se praemissum aditum in castrum querere iubet. Hic cum aditum aliquem amicitiae ad praefectum sibi fecisset, familiariter deinde comitare ad eum coeperat. Itaque aliquantò post Samoscus ipse, qui interim aduenerat, cum Palatino Braslauiensi, ac sexaginta circiter militibus sigillatim sequentibus, rogantibusque ex more portitori, centurionem venire nostris respondentibus, castrum ingreditur. Venerat sub id tempus Petrus Volkouiscus. Hic cum Palatinum Braslauiensem ex colloquio ad Sapoliam, cui ipse etiam Volkouiscus interfuerat, agnouisset, incusassetque praefectum; quòd cum centurionem se recepisse diceret, Palatinum recepisset: respondit

spondit Palatinus, non se modò verùm Samoscium ipsum adesse. Qua re turbatum eum Samoscius videns; tu quidem inquit castrum hoc iam principi tuo perdideras, nisi ex conditionibus pacis vltro id tradere deberes: nullumque ea in re dolum à se quæsitum, sed vt castrum quod principis sui esset, videret, ingressum se ostendit: vtque decederet, hortari hominem cœpit. Illo iumentorum inopiam incusante, ex iis equis qui tormenta trahebant, certum numerum ei dat; quibus subleuatus rebusque omnibus exportatis, castrò tradito excessit. Est Nouogrodekum amplitudine quidem non magnum, sed cùm vicinitate Moscouiæ clarum, tum ob eam ipsam opere, maximè autem triplici muro, crebrisque turribus ac vno insigni propugnaculo diligenter munitum. Inde Seskelium rectà Samoscius venit. vbi cùm per aliquot dies substitisset, dum an Derpatum Sigismundo Rosnio, quem ad accipiendam urbem pro legato miserat, redditum à Moscis esset, cognosceret; posteaquàm ne iumentis quidem acceptis, quæ in magna iumentorum inopia à Duce Magno ac aliis conquisita non paruo numero Samoscius eò miserat, decedere Moscos intelligeret, Derpatum ipse contendit: inque proximum ad urbem Monasterium diuertit. Inde Nicolaum Sebridouium, & Stanislaum Solkeuium filiū ad præfectum mittit; vt mox se recipiat, urbemque ac arcem vt conuentum erat, tradat, postulat; quod nisi intra tertium diem faciat, continuò se exercitum in Moscouiam reducturum ostendit. Aduenerat iam à Mosco Basilus Halouinus, ex primariis aulicis ipsius. Hic gemitum ducens meminisse se eius temporis dicebat, quo Moscis etiam ferocibus esse licuisset: moræ tamen causam esse, quod à iumentis atque carris nondum satis paratus esset: Itaque, vt ad tridui spatium vnum solum diem adiici pateretur petebat. Cùm ex propriis

iumentis ducenta circiter Samoscus illi adiecisset,
 Derpatum quoque XXIII. Mensis Februarij die re-
 cepit. Vicesimum nonum iam annum Derpatum Mo-
 scus tenuerat. Itaque vt ab ea, in qua geniti magnam
 partem essent, vel adoleuissent, maximo cum dolore at-
 que lachrymis plerique diuellebantur. Inprimis foemi-
 nae ad suorum partim maritorum, partim liberorum,
 parentum, ac propinquorum sepulturas concurrantes
 naenias suas more suo decantabant. Est enim omnis
 gens Moscouitica, si quæquam alia in sepulchrorum ac
 mortuorum cultu cum primis superstitiosa. Diuersum
 autem hac in re ab aliarum gentium institutis hoc ma-
 ximè habent, vt non statim mortuos sepeliant, sed per
 annum vnum loculis conditos in fornicato aliquo cæ-
 naculo asseruent, ac exacto demum anno multis cum
 lachrymis ac planctu terra condant. Fuit Derpatū am-
 plissima olim Liunionē vrbs, quod vel hodie adhuc publi-
 corum priuatorumq; ædificiorum cultus indicat. Agrū
 etiam Liunia Derpatensi meliorem feracioremq; nul-
 lum habet. Priusquam Germani in Liunioniam immigrā-
 tes religionem Christianam, linguamq; suam ea in loca
 inferrent à Sudetibus gente barbara omnis is tractus à
 mari suprā Pelbam lacum Plescouiam vsque teneba-
 tur: qua cum Russis frequentia bella intercessisse Mo-
 scorum annales narrant. Postquam à Christianis ora ea
 coli cœpit, Episcopis vsque ad Hermannum Vesselum
 paruit. Hunc cum post captam Naruam ac Neuhausi-
 um vna cum Derpato in deditiōem Moscus accepis-
 set, postea contra fidem datā in Moscouiam deportarat;
 non minori in viuum Episcopum perfidia, quam odio
 in mortuos vsus; quorum nimirum ibidem paulò post
 & cadauera è templo sepulchrisq; eiecit. Vrbs aliquan-
 diu deinde à Liunionibus & Moscis æquo iure habitata
 fuit: aliquanto tempore interiecto cum Liiones iniu-
 rius

riis Moscorum coacti in necem eorum conspirassent, Liunionibus ut maiori Moscorum numero non difficulter ab iis superatis, ac plerisque interemptis, cæteris in Moscouiam deportatis, Moscos solos deinde incolas habuit. Iam antè Nouogrodeko discedentes Mosci ignem fundamentis subiecerant; qui mox à nostris deprehensus, suppressusque fuit. Derpati, quòd præcipua ædificia duo sunt; arcis alterum, in quo prius Episcopus, postquam in Mosci potestatem venerat, Vladica habitabat: alterum ad principis usus factum, quod Dux ipse priuatis aliquot primariis domibus occupatis, moreque suo exornatis pro se exstruxerat; cum existimarent, in arcem Samoscium diuersurum: eorum enim moribus capitale est, in principis ædibus quenquam habitandi causa esse: arci diuersis in locis pulueres subiecerant; quorum aliqui intra viginti quatuor horarum spatium, partim intra quadraginta octo absumptis funiculis incensi post illorum digressum tollerentur. Samoscium cum in principis domum rectà diuertisset, rusticorum quorundam, qui in purgandà arce occupati erant, nece periculum redemptum fuit. Hosti nihilominus diligentissime fides conseruata fuit: ac non modò in nullos, qui reliqui è Moscis in Liunia erant, hanc ob causam vindicatum; verum cum puer etiam quidam Plescheoui Derpatensis Palatini propinquus, non tam interceptus à nostris, quàm more puerorum pueriles quasdam voluptates sectatus vltro ad eos se contulisset, vehementerque ea re Plescheouus perturbaretur, magna diligentia conquisitum reddi eum iussit. Haud alia verò ratione reliquæ etiam pleræque arcès à cæteris præfectis receptæ fuerunt; Moscis initio, prius quàm de Derpato reddito iis constaret, dexteritate potius atque ingenio nostrorum ex iis deiectis, quàm decedentibus. Derpato recepto ad regiones quoque præfe-

ctos, qui Sauolocix, Lukis, ac aliis castellis Moscouiti-
eis præerant, vt Moscis eas traderent, literæ datæ fue-
runt. Ad hanc enim diem nulla à nostris quoq; posses-
sio præter Ostrouam tradita Moscis fuerat; tum autem
ex fide omnes redditæ. Interim Gardianus quoq; post-
quam Leshnouolscius, quæ supra ostendimus, à Samo-
fcio ei denunciasset, finibus obiter pro arbitrio ei de-
monstratis, obsidioneque soluta exercitum Parnauia
abduxerat; eque campis contractum per præsidia di-
stribuerat. Eodem autē tempore de Veissensteinio quo-
que Ernestum Veierum, & Michaëlem Konarscium ad
eum Samofcius misit; qui Veissensteinium à Mosco Re-
gi cessum ostenderent, ac an possessionem eius impedi-
turus esset, quærent. Respondit iis Regem suum ipsum
legatos ad Poloniae Regem de controuersis hisce mis-
surum. Atque hic quidem exitus belli fuit; minori ani-
mo à Mosco gesti, quam quo vel in prioribus quibus-
dam usus fuerat, vel id ipsum susceperat; pristinaque e-
ius potentiae fama requirebat. Præterquam enim quod
in siluis fluminibusq; superandis exercitum impeditum,
cū facillimè id facere posset, priusquam in aperta Mo-
scouix ac viscera regni eius penetraret, transitu prohi-
bere ne conatus quidem omninò sit; nullam etiam iu-
stis viribus pugnandi potestatem vnquam ab eo factā
non paucis mirum visum est. Id ea ne de causa fecerit;
quod legatorum missionib. suis rei gerendæ tempus exi-
mere se posse, ac inanibus interim sumtib. vires Regis mi-
nutum iri sibi persuasisset; an quod superiorum tempo-
rum fortuna edoctus, parum in acie suis se committere
posse statueret: seu etiam quod solet facere Deus, vt
quos pro scelere eorum punire velit, iis consilium pri-
us, ac animum eripiat, ipsum quoq; perpetuus crudeli-
tatis comes & vindex metus nihil in rebus suis ratione
prouidere, aut fortiter suscipere siuerit non affirmarim.

Hoc

Hoc fatis constat, & ab initio, facillimo momento inter filuarum paludumq; ac fluminum eas difficultates, Regis, exercitusque impetum vehementer reprimi potuisse: ac si in summum discrimen rem adduxisset, haud ferè maiorem cladem accipi ab eo potuisse, quàm dum de summa rerum sollicitus, certamenque omne defugiens diuersis in locis singulos suos à multitudine exercitus circumuentos nostris obiicit, accepta ab eo est. Omni enim Moscouia à Borysthene supra Starodubam ac Radohostiam ad Cernihouam vsque: à Duna deinde flumine, quàm Stariciam vsque, quàm supra Nouogardiam ad Lahodam vsque lacum longè, lateq; vastata, tot praesidiis expugnatis, multis in deditionem acceptis, trecenta circiter millia hominum interiisse: ad quadraginta capta constat; vt aliquot vicibus instaurari bellum tanto hominum numero potuisse videatur. puero- rum quidem quanta multitudo capta sit, ex eo coniici potest, quòd priuatus ex nobilitate nullus ferè sit, qui non vnum atque alterum: multi qui plures in seruitute habeant. quod quidem incommodum specie, quàm superius, minus re ipsa maius est. Iuuentute enim e quibusdam prouinciis maximè autem Lucensi, Sauolociensi, Plescouiensi, ac Nouogardiensi omni ferè sublata, quæ nunc ab adultioribus coluntur, mox sobole omni deficiente vltro desertum ferè iri apparet. Opida ac castella, quæ ipse in potestate habebat, vltima hac pactione ad octodecim dimisit; Derpatum nimirum, Felinum, Laiisium, Mariemburgum, Kokenhausium, Parnauiam, Volmariam, Rumburgum, Hasselum, Nouogrodekum, Marienhausium, Ludsenium, Rossittenum, Trikatum, Berfonum, Landescum, Sefuegium. Veissensteinij autem cum id à Sueco teneretur, ius atque repetitionem: quæ verò bello antè capta à Rege tenebantur, numero non paucio-

ra, Polotiam, ac in eodem Ducatu Suffam, Sokolam, Krasnam, Vfuatam, Sitnam, Ieserisciam, Kosianum, Nescerdam: supra Vitepsciam, antiquioris possessionis Mosciæ Velisium, cuius ad centum viginti millia passuum ager patet: in Liuania Vendam, Lenouartum, Duneburgum, Pirkelium, Salium, Kirempesium, Elsenum, Fabianum; cum ipse ex iis, quæ à Rege armis parta possidebantur, Lukos, Sauolociam, Ostrouam, Neuelam, Chelmam, tum ab ipsomet deleta castella, Krasnam, Krasnohorodum, Voronecium, Veliam sola reciperet. Quibus tamen in omnibus detrimentis nullum fortassis maius censi debeat, quàm quod portubus cunctis Balthici maris amissis, à Borysthenis autem nauigatione iam antè Turcarum armis exclusus, à mari ferè omni præterquàm glaciali importuosissimo, ac periculossissimo, atq; aliarum ferè nationum occidentalium, ac meridionalium commerciis in penitiorem Moscouiam tamquam relegatus; compedesque quò minus liberè vagari possit, iniectæ ei videantur.

R. HEIDENSTEINII
SEC. REGII DE BELLO
MOSCOVITICO

Commentariorum

LIBER SEXTUS.



ACATO EVM AD MODVM, quem superiore libro demonstrauius, Mosco, nihil prius Rex habuit, quàm vt prouinciæ constituendæ causa, ipse in Liuaniam Rigam vsque procederet. Quam cum XII. Mensis Martij die ingres-

gressus fuisset, postridie Samoscus ad eum venit. Iam antè autem alij etiam senatores Polonici aliquot, ac Lituanici satis frequentes comitati eò Regem fuerant. Ad eos Ducem Churlandiæ ac ex nobilitate Liunica quàm frequentissimos literis Rex euocat, quæque ad prouinciæ eius statum pertinere videbantur, cum omnibus ijs communicatis, vt scripto sententiam suam explicarent, hortatus eos fuit. Erant, de quibus deliberabatur, capita hæc potissima: de templis cultuque diuino instaurando: de Episcopo restituendo: prouincia ordinis iudiciorumque causa in partes certas diuidenda: magistratibus ac ærario publico constituendo. de quibus cum quid quisque sentiret, ostendisset, Rex et si non ignoraret, à maioribus suis etiam sine ordinum authoritate prouincias ab iis partas priuato consilio constitutas: quò tamen gratus beneficium suum esset, si cum omnes operam studiumque suum ad eam prouinciam recuperandam contulissent, ex omnium consilio certa eius formula describeretur, in comitia totam rem distulit: legatos tantum partim ex comitatu suo, partim ex nobilitate Liunica designauit, qui prouinciam vniuersam inspicerent: agros redditusque eorum omnes, ac iura describerent, omnibusq; iis de rebus ad se referrent, quò rectius deinceps in comitiis statui de iis posset. Possessionum autem omnium quatuor genera facienda iudicabat. quorum primum esset, quod ad publicam securitatem pertineret, finitimarum arcium, quæque ad illas, vt ex propriis prouentibus muniri, omnibus necessariis ad defensionem rebus ornari, retinereque possent, adiiciendæ essent: earum alterum, quibus tum Episcopatus cultusque diuinus, tum ærarium publicum stabiliretur: tertium earum esse debere statuebat, quæ priuatis certo iure deberentur, aut cum iisdem, si hæreditariæ possessiones eorum reipub: causa

restitui iis non possent, permutarentur: Extremum quibus benè meriti & quorum præ ceteris in hoc bello opera eminuisset, virtutis causa donarentur. Inde militibus magistratus præfecturæq; quæ vacabant collatæ: quibusdam stipendia assignata fuerunt. In toto autem hoc bello id à Rege obseruatum fuerat, vt si qui in eo periissent, qui publicas possessiones iure aliquo tenerent, easdem liberis eorum quamuis infantibus, partim etiam puellis confirmaret. multis etiam ex plebe cum superioribus expeditionibus, tum maxime hac ob præclara facinora aliqua nobilitatis ius datum fuit; qui cum plerique à Samoscio in insigniorum communionem recipi se peterent, viris fortibus non inuitus tribuit, vt cum ipsi ante virtute sua nobilitate dignos se fecissent, à se gentis suæ insignibus non indigni iudicarentur; iisq; aliqua re auctis, vel minutis, aut aliquantum immutatis, qui id à se petiissent, plerosque donauit. Quibus ita constitutis cum Rigenfibus de iis rebus, quas in aduentum Regis reiectas supra ostendimus, actum fuit. Occuparat ciuitas à morte Archiepiscopi Vilhelmi, cum sedis ac templi Archiepiscopalis possessionem, tum omnia quæ ad id pertinerent, iura ac prouentus; adq; Augustanæ confessionis formulam omnia templa reuocarat. De hoc capite ita conuenit, vt D. Iacobi, & quæ proxima ad illam est, D. Mariæ Magdalenæ ædes ad catholicæ religionis vsus cum omnibus, quæ antiquitus ad eas aliquo iure spectassent, prouentibus redirent: penes ciuitatem curia, quæ Archiepiscopi fuisset, prope muros vrbs sita vnâ cum domibus canonicorum, ac arces desertis, quæ ante id collatæ non essent, permanerēt; cum verò census aliqui annui percipi olim publicè iis ex locis soliti fuissent, vt eorum nomine certam pecuniam annuam D. Iacobi ædi eiusdemque sacerdotibus ciuitas penderet. De vallo, quod contra ar-

cem

cem ciuitas obiecerat, assensum à Rege fuit, vt eo quo nunc esset loco maneret; cumq; se quoq; ab omnibus partibus arcem vallo circumdaturum ostendisset, id solum adiectum fuit, vt ad eius modum, quo arcem muniturus esset, vrbs quoque vallum æquaretur: ab eademq; arcis parte in muro vrbs porta aperiretur. Inter Churlandiæ etiam Ducem, ac ciuitatem de nauigatione, ac portorio controuersia erat; cum ille per fluuium, qui ex ditione eius infra Rigam in Dunam illabitur vsus portus Rigensis, merciumq; exportandarum ius ac immunitatem sibi defenderet; ciuitas negaret. Eos vt inter se componerent, hortatus Rex fuit; quod, si conuenire non posset, in comitiis cogniturum de ea se ostendit. Venerat Rigam & Magnus Dux. Hic eius quam possidebat, Liuoniæ partis confirmationem petebat; ad que homagium accipiendum, ac iuramentum præstandum sese offerebat. Ostensum huic, more maiorū non nisi in comitiis id fieri posse. Vltimo loco nobilitas desideria sua ad Regem detulit. Quæ cum ad vniuersæ prouinciæ statum pertinerent, responsum & huic fuit, humanitatem ipsam postulare, vt cum ordines regni tantum laboris, atq; sumtus in prouincia ea liberanda suscepissent, ne sine eorum authoritate iis de rebus statueretur. Angebatur potissimum animo Rex, ne cum Moscus, qui in finibus Liuoniæ ex præsidiis Liuonicis, quæ deduxerat, non contemnendas copias coactas habebat, Naruam iis oppugnaturus diceretur; si minus forte paratus tum Suecus esset, minusque ad resistendum virium haberet, vtrique eas perderet. Itaq; mox Petrum Visgerdum Lituanum cum literis ad Moscum mittit; ostendit, accepisse se ex legatis suis, quos Sapolia habuerit, pacem inter eos, atque ipsius legatos certis conditionibus conuenisse: eam se ratam habere: cum autem arces Liuonicas, quæ à Sueco tenerentur in conditionibus

tionibus præteritas intelligeret, si à Mosco oppugnantur, ius suum ac reipublicæ, quod semper excepisset, negligere se non posse: id se pro sua fide ac religione dissimulare non debuisse: hortari ne fortè ea res pacem turbet, ut dum maiores legati, qui pacem utrinque firmaturi sint, ac si quid dubitationis in conditionibus adhuc sit, de eo cum illo conuenturi, ad eum perueniant, omnem vim ab illis abstineat. Constituerat iisdem de rebus Regina ad sororem Sueciæ Reginam, per Christophorum Varfaucium literas dare. Cum tardaret, Rex qui in ea, cum voluntatis Mosci, tum aliarum rerum incertitudine nullam moram interponi volebat, non dubitandum sibi existimabat, quin Dominicum Alamannium Culinæ præfectum, quàm primùm ad Suecum mitteret, præ cæteris idoneum ad legationem hanc ratus, quòd ab eo iam tempore, quo primùm de matrimonio inter Regem Sueciæ Ducem tum Finlandiæ & Reginam Catharinam per Ioannem Baptistam Thencinium potissimùm actum fuerat, Alamannius, qui in familia Thencinii tum fuisset, omnium rerum conscius & sequester fuisset; indeque tam Regi quàm Reginæ notus esset; Reginæ etiam, apud quam potissimùm negotia hæc propter summam cum regno Poloniæ necessitudinem, & quòd non parum apud maritum posse existimabatur, agenda videbantur, non ingratus putaretur. Summa legationis erat, ut repetitis iis, quæ ab initio belli utrinque intercessissent, tertii anni bellum nullam aliam ferè ob rem, quàm solam Naruam ac ut communi pace Succus comprehenderetur, à Rege susceptum ostenderet: reliquam enim Liuoniam ferè omnem legatione Vilnam ad Regem missa iam antè Moscum cessisse; eò magis contra opinionem Regis accidisse, quòd dum ad Plescouiam cum exercitu Rex esset: quòd iturum se pro mutua necessitudine amicè antè ei aperuisset,

ruisset: hostemque ab omni auxilij suis in Liuania ferendi facultate exclusisset, cum ab aliis potius partibus in Moscouiam illum irrupturum expectasset, non modo Naruam, ac vicina castella, præsidario milite, quem Plescouiam, ex prædiis omnibus hostis contraxerat, nudata, commeatuque; ac omni spe auxilij destituta; sed Veissensteinium quoque, quod iam hostis cessione Regis esse sciuiisset, dissimulatis literis regiis, ac iis ferè copiis, quas Gedani magna ex parte ministri eius conquiesuerant, occupasset; Parnauiam obsedisset: potuisse Regem, si id tentaturum eum præsciuiisset, & sumtu & labore eius anni belli superfedere: iam verò & cursum rerum præclare contra Moscum geri coeptarum, & obsidionem Plescouiensem, cuius cum grauiorem partem iam superasset, facile reliquam etiam superaturus fuisset, interrompere, ac sine ipso etiam pacem facere necesse habuisset; ne dum pro eius commodis laboraret, maius in Liuania incommodum, de qua sola bellum tum erat ab eo acciperet. pro quibus iniuriis omnibus ut Regi rei que publicæ satisfaceret, postulare iussus fuit. Secretò mandatum ei fuit, ut cum hæreditatis Sigismundi Augusti: pecuniarum ei creditarum: dotis ab eodem promissæ, nec dum numeratæ, aliarumque rerum quarundam petitionem Suecus relaturus existimaretur, ostenderet quidem, aliam earum rerum petendarum rationem esse, certumque; de iis ius, ac morem iudiciorum antiquissima regni consuetudine receptum: aliam iniuriarum, quibus ab illo Rex affectus esset; quæque cum iis rebus nihil commune haberent: si tamen ita animatum videret, ut de Reualia quoque ac omni iure Liuanico simul decidere paratus esset; dotis & mutui, quod peteret, solutionem sine vlla exceptione ei promitteret: reliquarum controuersiarum disceptationem communibus arbitris Regem permissurum: ut communi etiam pace

pace comprehenderetur, apud Moscum elaboraturum ostēderet. quod si ne iis quidem conditionibus permoueri se pateretur; vel pacem cum Mosco certam opera Regis ei fore, vel mille equites in bellum Moscouiticum, sumptu suo Regem ei præstituturum reciperet: ex eorum nimirum genere, qui beneficiis Sigismundi Augusti ornati, haud inuiti in militiam eam conuenturi essent, idq; pro libertate gentis Polonicæ salua pace publica suo arbitratu facere possent: stipendio autem ac sumtu Regis tandiu futuri apud eum essent, quoad eadem pace, quam cum Rege haberet, ipsum quoq; Moscus comprehenderet. quod si eo tempore de Liuania, quam teneret, vniuersa trāfigere Suecus alienum existimaret; docere iussus fuit, non recusaturum Regem, quo minus communium amicorum interuentu quicquid inter eos esset controuersie, componi pateretur: si quid etiam debere illi videretur, præstaret: modo de Narua interim in omnes casus vtrique satis prospiceretur: ne dum ipsi inter se de ea disceptarent à Mosco occuparetur. Id ea ratione commodissimè fieri posse, si Regis præsidium in eam immitteret. Cum enim Moscus propter pacem, quæ cum Rege ei esset, si præsidium regium Narua receptum fuisset, oppugnare eam non posset; non modo Naruæ, sed aliorum etiam præsidiorum suorum Liuonicorum, quibus Narua obiecta esset, securitati sine incommodo ac molestia sua eum consulturum: simulque omnibus copiis suis coniunctis, ad defendendam Finlandiam longè futurum paratiorem; si nec arces controuersæ contra vim hostilem defendendæ ei essent, nec copiarum in diuersa præsidia distrahendæ. Interim de arbitris inter se conuenturos: & vel minutum controuersias omnes eorum interuentu iri; vel si tolli eæ non possent, Regem Naruam illi redditurum, aliasq; iuris sui persequendi rationes initurum. ne verò fraudi ei esset,

ei esset, quod propter commune periculum, Naruam sibi tradidisset, idoneè in eum casum ei cauturum. Profecto iam Alamannio, Varfaucius cum literis à Regina Rigam venit. Dedit & huic Rex eadem ferè, quæ Alamannio data fuerant, ad S Veciæ Regem mandata. Iussit autem, vt si priorem legatum aliquid constituisse intellexisset, non exposita legatione se reciperet: si infecta re dimissum comperisset, ostenderet; quod maiores legati eo ipso tempore in Moscouiam à Rege mitterentur: comitia etiam breui indicturus Rex esset, summam illum, & vt pace à Mosco comprehenderetur, & de aliis rebus suis cum ordinibus agendi facultatem habiturum: hanc causam fuisse Regi, vt etsi iam antè iisdem de rebus legatum ad eum misisset: tamen & Reginae coniugis suæ precibus, & mutua necessitudine adductus, denuò se ad illum mitteret: hancq; explicandarum omnium harum controuersiarum opportunitatem ei significaret. In conditionibus nihil, quemadmodum ostensum est, mutatum fuit: Antequàm Riga Rex discederet, maiores legatos, de quibus dictum est, in Moscouiam designauit, Ioannem Sbarasium Palatinum Braslauiensem, Nicolaum Taluossium Castellatum Samogitiæ, Michaëlem Haraburdam. Mandata hæc iis data fuerunt, vt iuramento in pacem à Mosco exacto, de Sueciæ præterea Rege eadem pace comprehendendo agerent. De Narua autem, ac aliis castellis Liuonicis, quæ à Sueco tenerentur, si tentaturus ea Moscus esset, quemadmodum per literas Rex iam ostendisset, non defuturum iis Regem, vel etiam pacem, si id fieret, ratam habiturum testificarentur. De captiuis quia antè Moscus postularat, vt vtrinq; pariter captiui redderentur, non parem vtriusque captiuorum rationem esse ostenderent, cum in Regis potestate præcipui ipsius ductores essent, ille ex Re-

giis insigniorem nullum: ex nobilitate paucos: reliquos ex promiscua plebe haberet. Itaq; vt vel Sauolociam ac Neuelam, aut alterutram saltem carū Regi pro illis permitteret, postularent; cū antè integriorib. adhuc reb. suis pro pauciorib. captiuis Vfuatam ac Ieserisciam obtulisset, quarum hæc nondum tum in potestatem Regis venisset; vel cū ipse antè Sigismundi Augusti temporibus certa pretia in singula capita exigere solitus fuisset, eodem exemplo suo suos nunc redimeret. Reuenit sub idem tempus Rigam à Mosco ad Regem Posseuinus, multis incommodis & æumnis peregrinatione caperfunctus. Laborârat hic potissimū apud Moscum de dissensione, qua à Romana Ecclesia, sicut cæteri orientales pleriq; ita Moscus quoque dissidet tollenda: adq; ecclesiæ communionem eodem reducendo: tum pro suo in rempub: Christianam studio fœderis contra Tartarum cum Rege fanciendi vtrò mentionem intulerat; quidq; animi Moscus de coniungendo contra barbaros bello haberet, explorârat. De extremo hoc ostenderat Moscus, pacem iam cum Tartaro se fecisse. Venère vnà cum Posseuino legati, ad Summum Pontificem ac Rudolphum Rom: Imper: à Mosco missi: alter item quem Constantinopolim cum muneribus, quibus cædem filij expiaret, ad patriarcham Constantinopolitanū ablegârat. Vtrisq; literæ commeatus publici datæ fuerunt. Remisit iisdem etiam ferè temporibus ad Regem Matthiam Preuostium; qui cum literis, quibus ipsius Rex respondebat, de quibus suprâ dictum est, Sauolocia ad eum missus fuerat: & mercatores, quos per tempus belli retinuerat. Ad literas paucis respondit; intelligere se, eas in medio ardore belli ad se datas, asperius aliquantò scriptas esse: iam cū pax atque amicitia vtrinq; restituta sint, ad eas, quas bellum tum nonnihil exasperârit, pacis tēpore respondere necesse sibi non arbitra-

bitrari; quòd cum etiam, qui literas attulisset, tandiu retinuerit, cum propter bellum armis viæ omnes obsessæ fuerint, fieri aliter à se non potuisse. Dimissis legatis, quos ad describendam prouinciam designatos suprà ostendimus, Vilnam Rex profectus fuit. Ibi legationem Tartaricam, audiit, quæ à Mahomete Chiereio Tauricanorum Tartarorum principe haud multò antè venerat. Petebat donatiua: de Kosakorum iniuriis & vexationibus querebatur; quæ quidem etsi extiterant non infrequentes: augebantur tamen ex industria à Tartaro; quò domestici metus, ac vicini periculi simulatione longinquam Persicam militiam effugeret, in quam à Turcarum principe sub idem tempus euocabatur. Responsum à Rege fuit, donatiua more maiorum datum iri; iisdemque quibus antea fuisset, legibus, pacem cum illo futuram. De Kosakkis idem etiam, quod antè aliquoties ostensum; manum hominum ex diuersarum gentium colluie coactam, vagam, ac nullis certis sedibus consistentem, nullius etiam in potestate esse: vt tamen quantum fieri eius posset, ab iniuriis & infestatione prohiberentur, sedulò ac cum fide operam datum iri. Insolentiùs id à barbaris acceptum fuit, responsoque audito, princeps legationis in ipso quasi discessu publicè testificatus est, vt omnia fierent, nisi tamen Kosakki in officio continerentur, pacem se non seruatuos. Iam antè minoris Poloniae, ac Russiae nobilitas, legatis missis, de tributo in suis conuentibus à se decreto certiore Regem fecerat. Hoc verò tempore priùsquàm Vilna Rex discederet à maioris quoque Poloniae, Masouiticæ item, ac Podlasicæ nobilitatis legatis aditus, de simili tributo in illis quoque conuentibus sancito cognoscit. Gratia vtriusque

que actæ, deque animo in rempublicam Regis optimè sperare iussi fuerunt; cuius constituendæ ac Liunioniæ simul, quam communi omnium consilio, ac ope partam, communi etiam ordinum iudicio Rex referuasset, ordinandæ causa intra eum ipsum annum comitia Regem habiturum in responso vltimis hisce dato adiectum fuit. Quibus de causis, quibusque cum mandatis tum ad Moscum Visgerdus Lituanus, tum ad Sueciæ Regem Alamannius à Rege missus fuerit, supra ostendimus. Moscus literis Regis, quibus, ut à Narua cæterisque Liuonicis præsidis abstineret, hortatus eum Rex fuerat, statim assensus fuit. Apud Suecum ingrata legatio fuit: nec multum in Regina etiam ad mitigandum animum eius præsidij fuit; cum præterquam quod iracundia eius omnes ad placandum eum aditus omnibus obsepserat, de iniuriis, quibus ob non præstitam dotem hæreditatemque fraternam, ac non comprehensum pace maritum affectam se existimabat, vltro quereretur. Itaque cum ea Alamannius inde renuntiaret, ex quibus istas quoque res vltra superiores iniurias magis exasperatas appareret, Rex, qui Vilna Grodnam iam venerat, senatoribus plerisque eò euocatis, ex illorum sententia comitia eò maturius indicenda statuit; in quibus de Sueci etiam iniuriis ad ordines referret. Interim in Liunioniam ad magistratus & præfectos, quo loco res essent perscriptum; utque viderent, ne per negligentiam detrimenti quid acciperetur, moniti fuerunt; cum Lituanis actum, ut si quis præter opinionem in vicina Liunia motus accidisset, suppetias ferrent: cum Duce item Prusiciæ; ut finitimo & ipso Liunioniæ principe per Reinoldum Heidensteinium eadem communicata fuerunt.

cum

cumque maiores legati ad Moscum missi, quibus mandata de pace Sueciæ Regi apud Moscum conficienda, data supra ostendimus, in itinere iam essent, ne ullam eius rei mentionem facerent, & ipsum rem suam agere permetterent, per celerem tabellarium significatum iis fuit. Grodna sub mensem Augustum Varfauiam Rex processit. eò Varfauicius quoque è Suecia eodem, quo Alamannius, legationis exitu ad eum venit. Ibidem verò dum comitiorū diem expectat, Iancola Valachiæ Palatinus in potestatem eius venit. Hic quemadmodum supra demonstratum est, è Saxonibus Transiluanicis, loco humili & obscuro ortus, Valachiæ principum genus ementitus fuerat; Achmetis autem Bassæ opera prouinciæ eius principatum nactus, cum ab initio statim, quo animo erga Regem futurus esset, ostenderat; præterq; decessorum suorum morem nullos vnquam legatos ad Regem miserat; tum postea variis iniuriis Regem, hominesq; eius affecerat: literas regias ad Turcarum Imperatorem aliquoties interceperat: resignarat: resignatas remiserat: Regem senatumq; regni omnibus modis in odium ac inuidiam adducere conatus fuerat: in finitimas aliquot villas nobilium latrociniis, ferro, ac incendiis grassatus fuerat: homines regios, qui rerum suarum repetendarum, iurisq; obtinendi causa ad illum venissent, pulsatos in carcerem coniecerat. quibus iniuriis cum Rex permotus, quemadmodum antè ostendimus, Turcarum Imperatorem de iis appellasset; utque illum à Valachia, à finibus molestiam hanc amoueret, ex dignitate alioquin sua consilium capturus, postulasset, res dilata fuerat. Hoc tempore in aulam Turcicam successore ei summisso euocatus, compilata prouincia, omnibusque rebus conuasatis, ac manu aliqua hominum facta in Cæsareæ ditionis Vngariam transfugere constituerat. quā rectā transeundum illi erat, à

Transiluanis obsessas vias existimabat. itaq; cum ambitu capto per Pokutiam Polonicæ ditionis prouinci-
am perrumpere conaretur, atq; ab ea parte Nicolaus
Iaslouccius præfectus Sniatinensis, aliiq; nonnulli ex di-
tionibus regiis fama fugæ eius exciti eum persequeren-
tur, ab iis captus Leopolimq; perductus fuit. Scripsit
mox Rex ad Nicolaum Seniauium, qui finitimæ militiæ
in Russia præerat, ac Nicolaum Herbortum præfectum
Leopoliensem, vt iure gentium supplicium de eo sume-
rent: bona publicauit: misitq; quæstorem Palatii Hia-
cynthum Mlodseuium, qui in publicum ea redigeret;
uxori & liberis alimenta annua constituit. Appetiit in-
terim tempus comitiorum. Ea in ante tertium Mensis
Octobris Rex indixerat. Nam cum in aduentum tan-
tum maiorum legatorum, quemadmodum Rex postu-
lârat, oppugnandæ Naruæ impetum suum repressurū
se Moscuis promississet, ne si maiores legati idem tenere
non potuissent, ad consilium pro tempore capiendum
imparatior esset, non committendum sibi arbitraba-
tur, quin primo quoq; tempore ad ordines de eo refer-
ret. Præterea verò prouincia Liuania magistratibus, ac
legibus fundanda, præsidiis, comæatu, instrumento
omni bellico, aliisq; contra repentinos casus ad defen-
sionem necessariis rebus prouidenda erat: munitiones
collapse instaurandę nouę instituendę, quę & in regio-
ne partim continuo tot annorum bello vastata, partim
ab hoste ita tradita, vt quæ armis ab inuitis exprimun-
tur, tradi solent, omnia deerant: & Rex ex omnium ordi-
num sententia quemadmodum supra ostendimus, con-
stituenda sibi existimabat. Adhæc nonnihil Tartari etiā,
de qua supra dictum est, bellum denuntiantis oratio e-
um commouerat. Ad quam cum crebri etiam rumores
ex Russia de tumultu allati accessissent, ita vt in procin-
ctu iam Tartari esse nuntiarentur, iā antè quidem viginti
duas

duas turmas equitum, qui ad Pleſcouiam ſtipēdia fece-
rant, ad Seniauium præfectum militiæ Ruſſicæ præmit-
tere Samofcium iuſſerat. Vt verò in præſentia arma ab
illis non ſumerentur: quia tamen facili momento impel-
li eos videret. vt in ditiones ſuas tranſirent, dignitatis ni-
hilominus ſue eſſe ſtatuebat, vt pro fama rerum à ſe ge-
ſtarū ea conſilia ſuſciperet, quibus illos ſuis quoq; reb.
timere faceret, remq; publicam non modò ab incurſio-
nibus eorum, ſed metu omni vaſtationum in perpetu-
um liberaret; rationeſq; quibus id ſalua pace Turcica
fieri poſſet, proponere, de iſſq; cum ordinib. agere in ani-
mo habebat. Stipendia præterea militi ſoluenda erant.
Etiſi enim in conuentibus particularib. tributum hanc
in rem decretum fuerat: longè minùs tamen ex illo re-
digebatur, quàm in ea ipſa, ac alia debita nonnulla ſuf-
ficeret; reſque per ſe opinione minor, exactorum præ-
terea quorundam ſeu negligentia, ſeu culpa, quòd vel
minùs quàm deberent, vel tardiùs ea inferrent, minui
dicebatur. de quibus & ipſis vt cognosceretur, neceſſa-
riò ad ordines referendum exiſtimabat. De certa inter-
regnorum ac electionum ratione ſtabilienda, etiſi quid
publico nomine ſuperioribus comitiis à ſe poſtulatam
uiſſet, & ipſe recepiſſet, memoria teneret: hoc tamen
tempore, quo ſuperiorum interregnorum vulneribus
nondum planè cicatrix obducta eſſet, ad eas res acce-
dere, quæ ſine eorum vulnerum attrectatu agitari non
poſſent, intempeſtiuum ei videbatur. Etiſi autem idem
maioribus quoq; ſenatoribus pleriſque, cum pro mo-
re per literas prius ſententias eos rogaviſſet, videretur:
quòd tamē prioribus comitiis enixè id à ſe nuntiis nobi-
litate petentib. relaturum ſe de eo recepiſſet, non poſ-
ſe ſe iam à priori promiſſione ſua recedere exiſtimabat.
eademq; cum de concordia etiam inter ſacrum & pro-
fanum ordinem tentanda ſententia ipſius uiſſet, vt ab

eius temporis ratione alienam tractationem eam existimaret; iisdem quas ostendimus, de causis, id tamen caput etiam ferendum ad ordines suscepit. Addidit his, si quid iudiciorum rationi deesse videretur, aut quam illa emendationem desiderarent, operam suam hac quoque in re reipublicæ non defuturam. quæ quia magis, ut ordinum studiis, ac suæ in eos voluntati satisfaceret, adiecerat, summam deliberationum omnium, ad ea quæ priori loco recensuimus, capita referebat. Hæc postquam primò ad senatores, inde ad conuentus nobilitatis, qui in singulis Palatinatibus ante comitia ex more haberi solent, delata fuerant; non eodem ab omnibus animo accepta fuerunt; iidemque ferè animorum motus, ac hominum sermones renati, quos in superioribus comitiis nonnullis extitisse ostendimus. Alii quòd suffragio suo in electione Regem subleuassent, cum regnum ipsum cum sibi debere existimarent, minus vel se expectatione sua, vel quæ ipsi concupissent, alios consecutos dolebant. Non pauci ad hos diuersarum partium supererant, qui in superiorum interregnum contentione victos se meminissent. Quidam qui in concionibus, ac conuentibus nobilitatis plurimum hætenus potuerant: nomen gratiamque in vulgus ac opes inde parauerant, omnia præmia in milites conferri iussitabant: iis artibus, quibus ipsi plurimum pollebant, nullum ampliùs locum relinqui molestè ferebant. Vniuersæ verò nobilitatis animi, ut qua quisque re maximè permouebatur, ita variè afficiebantur. Alii non id agi iactabant, ut de modo aliquò electionis tractaretur, sed ut successor priuato consilio imponeretur; interim cum regio imperio alienæ potentiæ vicarius ac adiutor constitueretur, Samoscium notantes: huc deuinctos beneficiis milites spectare: retentos in pace ex iisdem non paucos à Samoscio

moscio, vt oppressa per metum nobilitate per vim ac arma regnum occuparetur. Diuersum de religione sentientibus libertatis eius imminutio, circumscriptionisque metus obiici. Iudiciorum emendatione non correctionem aliquam à Rege quæri, à nonnullis disputabatur; sed quò cum in vniuersum ea sustulisset, ad se denuò ea transferret: omniaque secus omninò accipiebantur; ita vt alia eiusdem rogationis capita, quæ regiis opponerentur, detorto ad metum iniiciendum sensu in vulgus à quibusdam ederentur: erumpente nonnihil inter hæc inuidia etiam in Samoscium. Publicè quidem plerique honores Vngaris collatos exagitabant; Landskoronam ferè designantes, quam vidua Gasparis Bekeffi marito, qui in castris ad Polotiam ob virtutem iure nobilitatis Polonicæ donatus fuerat, ac fratre eius Gabriele, qui in irruptione Plescouiensi perierat, amissis, vnà cum orbis hiberis tenebat; & sub id tempus Francisco Vesselinio nupserat. Interim non deerant, qui Regi, si de successore agi vellet, operam suam vltro deferrent; cumque Rex, etsi ita de Republica se meritum sciret, vt non minùs, quàm aliorum Regum, suæ quoque familiæ ratio haberi deberet: ab hoc tamen tempore id tentare alienum, studiaque ordinum vltro potius expectanda sibi existimaret; spreto se rati, ac aliorum opera confici id posse Regem sperare, eò magis incendebantur. Nobilitas etsi quid maximis Regis in se ac Rempublicam beneficiis deberet, agnoscebat: libertatis tamen aliarumque charissimarum quarumcunque rerum metu iniecto hæsitare; cunctantiusque agere: omnia denique suspecta habere. His igitur animis cum in comitia ventum esset, Samoscus promunere Cancellarii verba nomine Regis faciens orsus à voto, quod cum ex superiorib. comitiis discederetur, ipsi fecissent, quòque vt saluus atque incolumis ab expeditione

peditione ea Rex ad se rediret, ac ipsi lætis animis in mutuos amplexus ruerent, optarant; quod à Deo contenderant, ita cumulatè iis præstitum ostendit, ut non modò incolumem saluo exercitu, sed re etiam benè gesta, immortalique gloria parta, reuersum ex hostico Regem viderent: quod in ipsorum potestate totum fuisset, ut mutuis gratulationibus, ac fraterna beneuolentia se exciperent, certorum hominum maleuolentia impeditum ait. quorū opera id factum sit, non arbitrari nunc sibi inquirendum: videre autem iam Petilios in Republica quosdam existere: optandum ne mox Catilinæ etiam aliqui existerent. quæ præfatus, domesticarum rerum nihil aliud hisce comitiis proponendum sibi Regem statuisse docet, quàm quæ ipsi non modò viuente adhuc Sigismundo Augusto, ac superioribus comitiis Andreiouiensibus, ut ferrentur, sanxissent: sed postea etiam cum sæpe alias, tum in proximis comitiis efflagitassent: Itaque illorum precibus Regem adductum de modo liberæ ac ordinatæ electionis referre. Cùm de ratione certa eligendorum Regum statuere eos debere diceret, non id dicere, ut de relinquendo iure electionis, ac patrimonio hoc libertatis, quo nihil à maioribus eorum relinqui iis potuerit præstantius, cogitarent: sed quomodo eam, quàm maximè integram conseruarent, & in perpetuum munirent. quæ cogitatio nūm necessariò ab illis suscipi debeat, non aliorum exemplis confirmandum sibi existimare: eos ipsos, si superiorum interregnorum actiones, ac grauissimum discrimen, in quod respublica adducta tum fuerit, secum perpendant, æstimaturos: nullam hinc Regis rem agi, sed propriam ipsorum: optare tamen se, ne huic suo tempori defint, superiorumque annorum benignitate diuina, qua mirabiliter Rempublicam conseruatam intelligant, ad futurorum potiùs consiliorum spem se erigant, quàm ad secu-

ad securitatem ac negligentiam abutantur. Quòd si artibus quorundam in suspensionem mentes eorum adductæ, quemadmodum ægri salutare cibos, ita ipsæ sana consilia concoquere non possint; totum in ipsorum potestate futurum; seu statuere quid hac de re velint, seu omninò eam relinquere. Eandem de altero capite, concordia inter ordines facienda, quòd secundo loco proponendum Rex iudicasset, sententiam eius esse. Optimè ipsos meminisse, quo studio & in Andreiouiensi conuentu, vt deinceps de eo referretur, egissent, & quanto per se postea idem à Rege contendissent. In communi omnium ferè regnorum, ac horum temporum fato nos præcipua tamen fortuna vsos, vt concordiam civilem egregiè hucusq; tutati simus: hanc hisce rebus ferè retineri, vt ab iniuriis & contumelia vtrinque abstineatur: iure ac causa cognita non vi aut extra ordinem quid statuatur: maximè verò, vt quod cuiusq; est, omnibus tribuatur: Id autè tam ad bona, quàm ad honores etiam ac prærogatiuas pertinere: hac vnà re iusticiam perfici: Iusticiam fundamentum esse Reipublice & qua illa contineatur concordia. Nemini dubium esse, quin duobus hisce ordinibus ecclesiastico & civili respublica hæc potissimùm subsistat. Proinde ipsi, quorum res ageretur, viderent, suscipiendamne an relinquendam huius rei deliberationem existimarent. Iudiciis numquid decisset, omnium optimè ipsos, qui in iis versarentur, iudicare posse: non posse sanè dissimulari, ita breui tempore calumnias in iis creuisse, vt non pauci grauioribus studiis relictis, totos se causidicis ac captionibus excogitandis, quibus alios irretirent, dare dicantur. Regem operam suam, si qua in re emendatione opus habeant, iis detulisse: qua, si placeret, vterentur: inuitis Regem eam non obtrusurum. Ingressus deinde in orationem de Liuonia, statuq; omni eius demonstrato, quid-
que

que cum Mosco hætenus de locis, quæ à Sueco tene-
rentur, actum esset, commemoratisque Sueci iniuriis
eò potissimum incumbit, ut quo nullum in ea vicinum
inueterascere patiantur, iis persuadeat: omnem societa-
tem imperii infidam: in prouincia nuper parta, dum a-
nimi hominum adhuc dubii, nondum legibus ac insti-
tutis caoluerint, periculi plenam: neminem prudentem
in nouam prouinciam eiusdem præsertim cum indige-
nis linguæ ac nationis vicinum admisisse; aut qui admi-
ferit, non eum statim poenituisse. Inde de Tartari minis
Kosakkorumque, qui subinde bellum Reipublicæ con-
flarent, iniuriis refert. Fuisse superioribus comitiis roga-
tionem latam, qua extraordinaria Iurisdicção ad cer-
tum tantum tempus permissa Regi fuerit: aut illos in
officio continendos, aut de bello cum Tartaris suscipi-
endo cogitandum. Extremum de stipendiis militum fu-
it. Scitum quidem superioribus conuentibus tributum;
id num in stipendium, ac nomina apud externos Princi-
pes facta dissoluenda: in defensionem Liuoniæ: bellum
Tartaricum sufficere: per quos item steterit, ut tardius
& minus quam deberet, illatū fuisset, ipsi inquirerent:
in erogando quidem & fidem, & diligentiam summam
reperturos: ita milites meritos ait, ut ante omnia ipsis
consulere debeant, qui pro gloria ac dignitate nominis
Polonici non modo cum ferocissimo hoste, vrbeq; om-
nib. rebus munitissima, sed in regione trionibus expo-
sita, cum sæuissima hieme, cum aëris cœlique iniuriis;
ac natura ferè ipsa ab omnibus rebus imparati, ac se-
minudi ferè propugnarint: Nihil hic se de Liuonia di-
cturum prouincia olim florentissima, ac nunc etiam o-
mnibus opportunitatib. abundante per ipsorum con-
stantiam parta. quantum apud externos nomen ipso-
rum virtus omnibus pepererit, eos ipsos testes esse pos-
se, qui quæ post discessum Henrici, cum Tartari metu
ac tre-

ac trepidatione omnia complerent, authoritas eorum apud exteros fuerit meminissent, & quæ nunc de virtute eorum existimatio omnium sit, intelligerent; postquam potentissimo hoste superato, amissas aliquot provincias recuperârint, nouas adiunxerint. Nec tamen pluri hæc à se fieri, quàm quem iis ipsis parandis simul respub: acquisiuisset, plurimorum fortium virorum inæstimabilem thesaurum; qui ita iam & animis parati, & in armis exercitati sint, vt nullum tantum periculum existere possit, quod non promptissimo animo pro repub: suscepturi ij sint: Horum spem ne destituerent, qui ne dignitatem nominis polonici iacere paterentur, fortunas omnes suas, sanguinem vitamque ipsam profundere non dubitârint: deniq; non alienis hominibus beneficium præstituros, sed necessariis, fratribusq; quæ virtuti ac laboribus eorum deberentur, stipendia persoluturos. Hæc esse de quibus referendum Rex existimasset, viderent nunc ipsi, num cum iis, quæ alieno nomine in vulgus à nonnullis sparsa essent, conuenirent. Conuersus deinde ad Regem, optare se, inquit, vt pro tantis eius rebus gestis, vel ea gratia ei referretur, quæ in benè morata, ac grata ciuitate pro multò minoribus non Regi, ac tam amanti reipub: Regi, sed cuicumq; exercitus Duci referri soleret: non egere tamen animi magnitudinem eius consolatione sua: plus enim in illa præsidij ad quoscunq; fortunæ impetus, ac malcuolorum iniurias perferendas esse, quàm in illis ad eam frangendam virium: Non esse dubitandum has ipsas quorundam hominum iniurias illustraturas magis laudem atque nomen ipsius: Quem enim, qui ipsius res gestas olim cognosceret, non magis, quòd in tot à quibusdam obiectis difficultatibus, tantas res gerere potuisset, quàm quòd omninò eas gessisset, admiraturum? esse animi magnitudinis eius, ne iniuriis quidem absterri se pati,

se pati, quò minùs quemadmodum perpetuò fecisset, porrò benè de repub: mereri pergeret. Milites allocutus, non debere eos existimare ostendit, tam ingrati animi notam, tantamque iniuriam in tam fortibus ac bonis ciuibus hærere posse: Vltimo loco nuntios hortatus fuit, vt cùm primis publicæ dignitati, atq; vtilitati studerent. Optare se inquit, adesse alios, integros ac bonos etiam ciues, quorum magna præter ipsos multitudo esset, qui domi liberis suis educandis ac domesticæ rei operam darent: facile se iis persuasurum, nihil v. reipub: commodis potius haberent: eorum omnium partes illos suscepisse, tantoque magis in omnes res intentos esse oportere, quibus reliqui, qui domi remansissent, non suam modò ac suorum, verum, reipub: etiam salutē commisissent. Peraçta rogatione, sententiæ à Senatoribus dici coeptæ fuerunt: vt de ratione electionis, cæterisq;, quæ proposita fuèrant, perferretur, omnes ferè statuere, duobus tantum exceptis, quorum alter, nullis hominum consiliis à Deo regna mandari; alter, non posse vlla è repub: ac ne oportere quidem ambitum excludi censebant. In nuntiorum nobilitatis concilio principiò Cancellarij oratio exagitata fuit, maxime verò, quòd iam Petilios nonnullos esse dixisset, videntum ne mox etiam Catilinæ existerent: Cùm contrà ab aliis ostenderetur, non vniuersum ordinem, sed certos homines, ac ne homines quidem sed vitia notata, à quibus qui abesse se intelligeret, orationem quoq; eam ad se non pertinere sciret, res discussa fuit. Negotium inde Suentosiao Orfescio datum, qui totius nobilitatis nomine pro benè gesta repub: gratias Regi ageret, deque sermonibus, qui contra dignitatem eius à nonnullis habiti, aut in vulgus sparsi dicerentur, ei satisfaceret. qui cùm in huiusmodi orationem ingressus fuisset, vt in aucthores eorum Regem inquirere, ac cognita causa animaduert-

maduertere debere diceret, aduerso quorundam collegarum murmure, ac mox conuitio penè exceptus fuit. De re ipsa, maximè de electionis forma certa constituenda variæ inter eos sententiæ fuerunt; quibusdam omninò ferri de eo oportere negantibus; quòd in re, qua maximè libertas contineretur, quoties aliquid fieret, quò minùs latè ea, quàm antea, pateret, libertas ipsa semper minueretur, angustioribusque quàm antea fuisset, finibus circumscriberetur: alij contrà, ita maximè libertatem electionis stabiliri disputabant, si fraudes atq; ambitus legibus excluderentur: præterea tamquam affecta iam re, ac contracta superioribus comitiis tractatione, inprimis Andreiouiensis fœderis religionè obiecta eam vrgebant: pleriq; suscipi quidem eam, non finiri tamen volebant: vt quæ de ea dicerentur, ad suos referrent, quò rectius sequentibus deinceps comitiis ex vniuersæ nobilitatis sententia statui de ea posset. Dum inter eos disputationibus hisce tempus extrahitur, interim primis octo comitiorum diebus, quibus capitulum rerum causæ noua lege iudicantur, elapsis, ad aliarum causarum cognitionem Rex accessit. Adeunt eum nuntij: ostendunt multos contra leges in regiam euocari: vt ex senatu nonnullis negotium Rex det, qui cum aliis ex suo corpore, quos ipsi iis adiuncturi sint, de euocationibus cognoscant, quæque in ea causa sint, vt aboleri debeant, aboleantur, legitimis ratis manentibus, petunt. Respondit Rex esse magistratus, ad quorum curam hæc pertineant; qui si muneri suo deesse doceantur, non recusare se, quò minus eò, vt alios illis adiungat, descendat: interim quemadmodum cœperat, porrò cognitionibus operam dare pergit. Prima Stanislai Carnkouij causa ob non relata in thesaurum instrumenta quædam causæ Brunsvicensis, quæ à Sigismundo Augusto in Germaniam missus acceperat, in iudici-

um adducta fuit. Collocata in matrimonium fuerat Henrico Duci Brunsvicensi à Sigismundo Augusto. Sophia soror eius, deq; rebus dotalibus in euentum non susceptorum liberorum restituendis pro more stipulatio interposita. Soluta morte Henrici paulò antè excessum Sigismundi Augusti sine liberis matrimonio, missus ad sororem ab Augusto Carnkouius fuit, qui res isthïc inspiceret, consilioq; viduam iuaret. quam in rem cum instrumenta pactorum dotalium tradita ei fuissent, penes se ea retinuerat. Obiit haud multò post Sigismundus Augustus: creatus fuit Rex Henricus: idem mox ex Regno excessit. Mortua interim Sophia, sorores Anna Poloniæ, & Catharina Sueciæ Reginae, successionem hæreditatem petere cœperant. Cum aliquot annos à Iulio Duce Brunsvicensi ducerentur, animaduersum postea fuit, non in ea causa hæreditatem eam esse, vt successorio iure peti deberet; sed ad Reges Poloniæ, remq; publ: pactis, ac interposita stipulatione pertinere: missusq; iuris eius persequendi causa ad Ducem Iulium, Laurentius Goslicius Decanus Plocensis, cum monumenta ea, quemadmodum iussus erat, tradere ei Carnkovius noluisset, nihilq; præter pauca quædam exempla, quæ ex tabulario Varsaviensi exceperat, proferre Goslicius potuisset, in eo ferè fuerat; vt non satis petitionem suam probare posse videretur. Itaq; cum iam non modò de re, sed existimatione etiam publica ageretur; eò acrius illa à Carnkovio primum per literas, inde petente Samoscio per Stephanum Grudinscium Castellanium Naklensem speciatim eam ob causam ad eum allegatum repetita fuerunt. Cum lenitate sua nihil profici Rex videret, per procuratorem fisci in ius vocari eum iussit. Hæc igitur dum agitur, haud multò post altera eiusdem causa in cognitionem venit. Ea res ita se habet. Carnkovius hic nobili ac claro loco natus, pluri-

plurimum in nobilitatis conuentibus, apudque nobilitatem vniuersam gratia ac authoritate poterat. à Sigismundo Augusto ad Referendarij munus prouectus sub excessum eius Plocensem Præfecturam acceperat; ac quamuis Anselmus Gostomscius Palatinus Rauensis perpetuas controuersias de ea cum illo haberet, possessionem tamen eius retinuerat. Post discessum Henrici, Stephano Rege in regnum iam ingressio, ac plerisque ad Regis authoritatem se adiungentibus, diuersarum partium legatione suscepta, ad Maximilianum Imperatorem in Germaniam iuerat: Cùm Cracouiam Rex venisset, instarentque apud eum ordines, vt in vnum atque alterum, quorum insignior ac præcipua pertinacia esset, exemplum statueret, præfectura Plocensis Stanislao Kriscio Palatino Masouie collata fuit. Comitibus postea Thorunium à Rege indictis, cùm in iis cognitionibus operam dare Rex necesse haberet, more autem maiorum ita comparatum sit, vt secundum Cancellarios referendarij munere in iis Reges vtantur, Carnkouiusque nondum rediisset, Nicolao Firleio, qui et ipse Cæsarianarum partium fuerat, vnà cum Castellanatu Becensi referendariatum Rex contulit. Aliquanto tempore interiecto, reuocatus ab amicis, maximè fratre Alberto, qui Maiori Poloniae Præfectus tum erat, literis Regis ab eodem ad fratrem impetratis, in Poloniam Carnkouius rediit: benigneque à Rege acceptus optimè de Regis erga se animo sperare iussus fuit; eiusque quam fecisset, iacturæ, à largiore liberalitate Regis cum accessione compensatione expectare. Interim Roma ad Regem scribitur, coadiutoriae Archiepiscopatus Gnesnensis confirmationem, quam certo iure sibi vindicaret, inscio Rege, exteris nonnullis principibus sequestris, à summo Pontifice eum petere. Accedebat huc, vt dum ad Poloniam Rex esset, in conuentu Lublinensi, qui primus tum

Judiciorū appellationis à nobilitate habebatur, nouas res à quibusdam tentatas, præcipuumq; earum authorem Carnkovium fuisse, certissimis indiciis ad Regem deferretur. quæ res non mediocriter rursus animum Regis illi immutauerat. Mortuo interim Iacobo Vchanscio Archiepiscopo, Stanislaum Karnkouium Episcopum tum Cuiaviensem, à quo inauguratus Rex fuerat, ut promisso suo inaugurationis tempore ordinibus à se facto satisfaceret, in illius locum Rex nominauit. Etenim cum in dissensione electionis Vchanscius, eiusq; exemplum secuti cæteri Episcopi præter Cuiaviensem omnes ferè diuersas partes secuti fuissent: ille ad inaugurationem etiam vocatus parere noluisse: itaq; à Karnkouio coronatus Rex fuisset; petiit ab eo nobilitas, ut deiecto Vchanscio Karnkovium in locum eius prouerheret. Respondit Rex, si dissensionis Vchanscij causa id peteret, malle se, quod consecuturum se non diffideret, lenitate eum adiungere: si alterius ornandi, post mortem Vchanscij, quæ homini ætate decrepita non longè abesse posset, rectius illis præstiturum, quod nunc incommodiori tempore repræsentari vellent. Carnkovius interim Sninum possessionem Archiepiscopalem tenebat; eamq; cum dimittere nollet, in ius ab Archiepiscopo ad Regem vocatus fuit. comparere iussus, respondere primum nolebat. dictum fuit, ostenderet, quo iure in possessione esset: nam si coadiutoriam ipsam sibi vindicaret, nemini dubium esse, quin de iure regio Regis solius cognitio esset: si priuato titulo bona ea occupata possideret, ad tribunalia terrestria, quæ de rebus soli ordinariè cognoscerent, remissum iri: petiit interim procurator eius diem ad monumenta producenda, quam qui petit, iure, quo utimur peremptorium terminum propria submissione ac sponte sua præfinire sibi putatur. Ad diem non integrum esse sibi illa iam proferre

ferre excipit; quòd Romæ ea sint, copiamque exhiben-
dorum non habeat. Inter hæc nuntii rursus Regem a-
deunt: rogant vt euocationes omnes in regiam, exem-
plo Sigismundi Augusti, qui citationes omnes, quæ in
causis fisci editæ fuerant, vno decreto sustulisset, indu-
cat. Postulatum, docerent, quæ eæ essent; nolle Regem
contra leges cuiquam negotium fieri: neque etiam æ-
quum esse, sine causa iudicium quenquam subterfuge-
re: quòd si vrgerent, quod antè ipsi petiissent; permitte-
re Regem, vt ex senatu & ipsorum collegio conueni-
rent, qui legitimas ab illegitimis euocationib. discerne-
rent. Illi nihil ad hæc respondent: secretū saltem cum se-
nату petunt. Potestate à Rege facta, idem in senatu fa-
ciunt: postulāt, vt quemadmodum dignitate reliquam
nobilitatem præirent, ita in adducendo ad æquitatem
Rege, tuendoque iure nobilitatis principes cæteris an-
tecederent. Responsum, ostenderent, quos contra ius
euocatos, aut qua omninò in re Ius nobilitatis minu-
tum putarent; si quid contra leges susceptum proba-
rent, non defuturum senatum munci suo. Qui verba
faciebat, publicam causam se agere; debere singulos,
qua in re priuatim iniuriam sibi fieri existimarent, pro-
nuntiare dicebat. Procedit in medium Carnkouius: se
contra leges in regiam pertractum ait. Ostensum, quod
ad primam causam pertineret, non posse eam vlla ra-
tione seiungi à Republica: repeti instrumenta ab illo fi-
dei eius commissa; quibus debitum Reipublicæ docere-
tur: repeti eo iure, quo quiuus priuatus erga eos, qui in
ministerium se illi tradidissent, vteretur: qui æquo iure
libertatis cum alia nobilitate vti vellet, cui molesta hæc
in regiam euocatio videretur, posse eum intra modum
vitæ priuatæ se continere: domi viuere: abesse à mini-
steriis regiis; quibus qui se illigasset, indignum esse eum
postulare, ne rationem quidem eorum, quæ vltro susce-
perit,

perit, reddat. deteriori quæ conditione in publica re Regem esse, quàm quemlibet priuatum in sua; qua tamen de re constitutio Sigismundi primi esset, cuius sententia eò pertineret: repudiari denique totum à publica utilitate. quæ si in rebus, quæ moram nullam patiantur, non prius respublica ius suum consequi possit, quàm longo temporis intervallo comitia habeantur, sæpè maximum periculum aditura sit. Alteram maluisse senatū ad comitia euocatam fuisse; iam verò postquam procurator eius diem ad monumenta petierit, vtrò ipsum omnem sibi præscriptionem Iudicii vitandi præcidisse. Ad hæc ille, ad ordines prouocasse se, cum ad monumenta prouocaret: hæc se viua monumenta Reipublicæ existimare. ad senatum deinde redeunt: vt à singulis se præsentibus sententiæ dicantur, petunt. Dictæ huiusmodi sententiæ ferè omnes fuerunt; non rectè facere, qui constitutionem Sigismundi Augusti de causis fisci ad regias causas omnes traherēt: esse constitutionem, qua actiones, quæ ad personam principis: ad maiestatem imperii: ius denique ac possessiones regias pertinerent, diserte à causis fisci, ac vectigaliū interuensorum discernentur: videndum quæ eæ sint, ac num omnino fieri possit, vt promiscuè omnes Rex tollat; cum hac ratione non modò suum ac reipublicæ, sed aliorum quoque ius, in causis quæ ad delationem quorundam susceptæ ad eorundem utilitatem pertinerent, quod in ipsius potestate non esset, voluntatibus petentium ista condonaturus esset. Nuntii in suo proposito nihilominus persistebant; per quos complures dies disputatione hac extracta frequenter in concilio suo tumultuabantur. Demonstrabat iis Rex, quamquàm iniquum esset, ne discerni quidem inter legitimas ac illegitimas euocationes eos velle; videre præterea etiā se nulla eos hac de re agendi à suis mandata accepisse: permittere
tamen

tamen, vt ad suos referrēt; quò in proximis conuentib. certi aliquid statui de eo posset: interim rem integram se iis seruaturum, neq; vllas alias causas, præter Carnkouianas duas, quæ in iudiciũ adductæ iam essent, cogniturũ. Erant qui ab Archiepiscopo ob templorũ sacrorum quæ violationem euocati fuerant; qui eò vehementiũs sibi metuebant, quòd rumor per dies eos sparsus fuerat, constituisse Regem seuerissimè ius de iis dicere; opinionemq; eam Rex auxerat, quòd dum in venatione non procul à possessionibus Archiepiscopi esset, Louicium ab Archiepiscopo inuitatus ad eum accesserat, familiariterque per aliquot dies cum illo fuerat. non pauci etiam aliis ex causis euocati cum nuntios, quò faciliũs iudicio se subducerent, creati se passi fuissent, omnia etiam tentanda sibi statuerant; quò antequàm periculum causæ dictionis ad se perueniret, sub Carnkouii persona iudicio omnes eriperentur. Itaque etsi liberabantur metu eo, cum præter Carnkouianas causas, nullas alias iudicaturum se Rex ostenderet; quia tamen semel ita in causam ingressi fuissent, vt existimationis de se aliorum causa non temere recipere se possent, ne hac quidem ratione ab instituto suo deduci se patiebantur. Alii sermonibus eorum permoti, vt in metu grauissimarum rerum, in quibus libertas agi prætenderetur, tempus aliquod interponi, dum certius de eo cognosci posset, non molestè ferebant. quidam cum in re nihil periculi esse intelligerent, opinionem metuebant; ne tamquam auctores libertatis destituisent, in vulgus traducerentur. Fiebat hinc, vt qui omninò ista improbabant, cum ab aliis impugnarentur, ab aliis non iuuarentur, in tanta diuersa sentientium multitudine ipsi nihil possent. Late nihilominus sententiæ contra Carnkouium fuerunt. primà iam multò antè, qua monumenta restituere iussus fuit, in qua causa ne ab ipsis quidem nuntiis magno pcre

pere contendebatur. Altera causa cùm variè adhuc duceretur, ad id nonnullis decurrendum videbatur; quòd post discessum Henrici coadiutoriam impetrasse diceretur; ei que rei fidem faceret, quòd alterius Posnaniensis Episcopatus nominationem à discessu Henrici in illum collatam, Regi ipse exhibere non dubitârat. quare cùm Varfauienti tœdere, qui ab absente Henrico quicquam petiisset, contra rempublicam facturum cum iudicatum esset, conuentionis eius vi vrgendum censebant. Rex vltimo comitiorum die decretum tulit: coadiutoriam sustulit; de possessione, quæ ab illo tenebatur, cognitionem ad ordinaria nobilitatis iudicia, in quibus quo iure eas possideret, doceret, remisit. Hunc ad modum stato comitiorum tempore extracto, ingenti cum omnium dolore, Samoscio præsertim omnes obtestante, Liunioniæ saltem Russiæque curam susciperent, ne vel illam magno labore, ac sanguine suo partam omni ope nunc destitutam rursus amitterent; vel hanc Barbaris diripiendam proderent; Constantino etiam Ostrogia Duce, Palatino Kiouienfi recentissimos quosque nuntios de Tartarorum expeditione proferente, nihil tamen actum fuit. Appellatus per eos dies frequenter à Lituanis Rex fuit, vt Liunioniam Lituanicæ formulæ faceret. Vbi nec in senatu, nec in concilio nuntiorum magnopere à quoquam illis contradicebatur: in hoc potius non deessent, qui quò Lituanis adiutoribus facilius, quod contendebant, à Rege extorquerent, non inuiti decessuri illis de ea viderentur; Surrexit Samoscus; reliquosque intuitus suo suorumque commilitonum periculis Liunioniam hosti ereptam dixit; de quo si qui ambigerent, ad Moscum ipsum se prouocare: non dubitare, se vel hostis ipsius professione id cuincere: ea igitur ne à regno seiungeretur, si à nemine contradiceretur, se tamen pro omnibus intercessurum. Venerant ad
comitia

comitia Legati Moscouitici, vt iuramentum in pacem à Rege acciperent; quemadmodum regii iam antè ipsorum Principem iureiurando obstrinxerant. Præstitum id à Rege maxima omnium ordinum corona fuit; ara in comitio ad id constituta, Archiepiscopoque, postquam tabulæ foederis à scribis lectæ fuissent, in verba ei præeunte. Præter Iuramenti exactionem, vt de captiuis vtrinque permutandis agerent, mandatum habebant. quod cum tenere non potuissent, vt in locum certum captiui comportarentur, redimendique eos potestas, quorum essent, fieret, impetrârunt. Referebant nonnihil & de finibus controuersia ex eo potissimum orta, quod de Velisiensi agro, ne à Polonicis ordinib. à quorum copiis captus erat, vindicaretur, in Sapolienfi foedere à Lituanicis scribis adiectum fuerat; vt, quemadmodum olim is ad Palatinum Vitepsciensem pertinuisset, ita posthac pertineret: Moscique ab eo tempore, quo in potestatem eorum Velisiû venisset, magnam partem Toropeciensis agri ad eum adiectam contenderent. Placuit vt vtrinque legati ad fines regendos mitterentur. De castellis Liuonicis, quæ Succus occuparat, iam antè per Boiaros Moscouiticos cum legatis, quos à Rege in Moscouiam missos dictum est, conuenerat, vt per totum pacis tempus à cis Naruanis Moscus, ab vltra Naruanis Rex vtrinque abstinerent. Excepti inde conuiuio fuerunt more maiorum, splendidissimeque habiti; hominibus elegantioris cultus ferè rudibus cum epularum magnificentiam, tum apparatus varietatem; multò magis tamen Regem ipsum admirantibus. In tam insigni publicarum rerum perturbatione, seu potius negligentia præ cæteris tamen militum conditio maxime miserabilis videbatur. Plerique enim non modò tanquam ad paratum stipendium, cuius spes facta illis erat, sed ad magnam honorum, vt bene gesta re
agro-

agrorumque spem, ii præsertim, qui nobilitate ob virtutem donati, præsidia etiam ista, quibus nobilitatem tuerentur, ac alia præmia sperauerant, omnium rerum egentes, ac nudi alienissimo anni tempore eò venerant; ut non pauci è nobilioribus etiam, ad Plescouiam occubuisse se malle dicerent, quàm ad tantam egestatem, atque omnium rerum difficultatem redigi. Iisdem autem temporibus Ioannes Suiscius etiam, quem in defensione Plescouiæ egregiam operam nauasse suprà ostendimus, à conspectu principis sui abiectus in luctu ac ægritudine erat. sed militum difficultatibus conquesta undique pecunia, cum ab aliis destitutam ferè Rempubicam à se tamen deserendam Rex non existimaret, quòd ad eius fieri potuit, occursum fuit; agenteque cum iis Samoscio tanta animorum alacritas innata iis fuit, ut nō modò diem solutionis ad Penthecostes proferri paterentur, sed dum modò certo aliquo loco collocarentur, ex quo commeatus sibi suppeterent, si interim Tartari irruptionem facerent, etiam sine stipendio, quocunque ducturus eos Samoscius esset, ituros se pollicerentur. Solutis comitiis cum iam nuntii discessissent, Rex cum senatu Liunioniæ etiam, quantam potuit, curam impendit; initioque à diuinarum rerum cura factò, quòd plerique in Prouincia ea Episcopatus temporum ac bellorum iniuria suppressi essent, Vendam, quam potissimum ad accipiendam nouam sedem Episcopi idoneam iudicabat opidis, castellisque aliquot ac possessionibus ad eam adiectis, Episcopatui attribuit; àque S. Pontifice, ut Episcopatum autoritate sua ibi fundaret, petiit. Prouincialibus etiam iura certa, ac forma prouinciæ, ut aliquam tamen sui curam habitam cernerent, pro tempore descripta fuerunt. Venerant à nobilitate legati Varfauiam: alij præterea frequentes priuati suarum quisque possessionum, è quibus se, vel maiores suos à Moscis

Moscis deiectos dicerent, recuperandarum causa. Summa publicorum postulatorum erat, vt pacta inter Sigis: August: ac prouinciæ eius ordines, quo tempore se in potestatem illius dedissent, conuenta, rata Rex haberet. Eorum hæc ferè erant capita, vt non nisi Germanicæ gentis in prouincia ea magistratus essent: Possessiones quas tum singuli haberent, aut postea consecuti fuissent, quo vnquam optimo iure possedissent, possiderent: Iura ac Priuilegia singulorum integra conseruentur. Addiderunt ad hæc ipsi, vt iudiciorum certa ratio constitueretur: ne castella demoliri, quemadmodum Rigæ à Rege imperatum iis fuerat, cogerentur: vt in captiuis suis recuperandis à Rege iuuarentur. Responsum fuit: quòd ad vetera à Sigism: August: concessa iis Priuilegia pertineret, tenere eos memoria, quid ab eo tēpore, quàmque varia intercessissent: quid etiam huius temporis esset, pro sua prudentia perspicere: debere eos se credere iudicio Regis, qui cū salutis eorum author fuisset, ornamentorum, ac commodorum prouinciæ eius non minorē curam se habere ostensurus esset. Sigillatim verò, quòd præcipuæ authoritatis in illa Prouincia magistratū Germanicæ gentis peterent, cū ab honore eo ex prouincialibus, si qui ad eum idonei futuri essent, neminē exclusum Rex vellet, eò futurum acerbius, si ipsi propriæ salutis libertatisq; authores à dignitate tam præclaræ victoriæ remotos vellent: daturum operam Regem, vt eum Prouinciæ præficeret, qui ex æquitate, ipsorumq; iure ac legibus omnia administraret: tum verò in prouinciali publico consilio constituendo, iudiciis, cæterisq; officiis præsidum, Succamerariorum, & reliquorum præcipuam vetustæ quoque nobilitatis Liuonicæ in Prouincia ea rationem habitum iri. Inter iura ac priuatas singulorum possessiones id discrimen factum: vt, quæ à superioribus Liuoniæ Principibus,

Z

legiti-

legitimisq; eius magistratibus vsq; ad Gvilhelmū Marchionem Brandenburgensem Archiepiscopum Rigensem profecta essent; iure ipso rata haberentur; quæ à posterioribus collata essent, quòd ea tempora inde consecuta fuissent, quibus multa non ordine fierent, prouinciaq; nullo ferè certo Imperio teneretur, de iis Regem ex publicis Prouinciæ commodis, cuius vt opibus ac neruis contra omnes casus muniretur, præcipua ratio habenda ei esset; & cuiusq; meritis; genere denique ipso possessionum statuturum; ad eaque cognoscenda primo quoq; tempore conuentum Prouincialibus edicturum, in quo sua quisq; Iura exhiberet. Cum autem superiori tempestate amisisse pleriq; Priuilegia sua dicerentur, eos quos, & à quibus, quoq; tempore, & sententia literas habuissent, aperire debere, eaque omnia suo idoneorumq; testium iuramento comprobare. Iudiciorum forma iis, de quib. supra ostensum est cōstitutionibus descripta, tradita illis fuit. Castellorum demolitionem hoc potissimū consilio Rex imperarat, ne vires Prouinciæ, quemadmodum superioribus temporibus factum fuerat, distraherentur; eandemque ob causam, ex suis quoque non pauca deiecturum se edixerat. Idem hic iis responsum fuit, non debere eos detrectare, in re qua publicam potissimū prouinciæ salutem Rex spectaret, quò minus eius exemplum imitarentur. In captiuos redimendos certus Boiarici generis numerus promissus iis fuit. Magnus Dux cum difficultatibus quibusdam suis, quemadmodum Rigæ à Rege monitus fuerat, ipse comitia obire non potuisset, legatos miserat; per quos eadem ferè quæ Rigæ, proposuit. quæ cum sine præsentia eius explicari non possent, ad sequentia comitia necessariò dilatus fuit. Quibus rebus confectis, crebris nuntiis de apparatu Tartarorum Varfauiam allatis, Varfauia Cracouiam

Rex

Rex proficiscitur. venientem Legatio à Tartaro adiit: quæ, nisi continuò conditiones quas ferebat Rex acciperet, iisquæ satisfaceret, bellum denuntiabat. Ad eam Sinan Bassa literas adiunxerat; quibus Turcam etiam iniurias Tartari non neglecturum ostendebat. Iam autem, quemadmodum ostensum est, iustam equitatus partem in Russiam Samoscus præmiserat; ad eam quam potest maximum numerum militum adiecit: quos addictos adhuc habebat, omnes contrahit: novos suis stipendiis alios conscribit: ex nobilitate nominatim fortissimum quemque euocat: Præter eos Constantinus Ostrogia Dux suas copias, quas non contemnendas è clientibus suis coactas habebat, promptissimè Reipublicæ offerebat. Itaque in Russiam Samoscum contra Tartaros Cracouia Rex mittit.

F I N I S.

Emendanda.

Folio 5. ver. 23. *debebam* leg: *deberem*. fol: 9. ver: 31. *Pernauiam*, leg: *Parnauiam*. fol: 14. ver: 18. *Sbarasso*, lege, *Sbarasio*. Eundem ad modum sequent: locis, leg: quibus nomen hoc occurret. Eodem fol: ver: 26. *Ciaslauiam*, leg: *Sasslauiam*. fol: 32. ver: 18. *regis*, leg: *regiis*. fol: 35. ver: 15. *Chorossino*, leg: *Choroscino*. ad eundem modum insequentib. fol: 37. ver: 17. *Milecium*, leg: *Mieletium*. eundem ad modum insequentib. locis omnibus, e nimirum ad i. addito. fol: 40. ver: 31. *Disne*, leg: *Disnæ*. eodem fol: ver: 18. 19. *Trocensis maxime & Polotiensis Palatinorum Castellani*: item *Polotiensis*, leg: *Stephani Sbarasij maxime Trocensis*, *Nicolai Dorohostaiscij Polotiensis Palatinorum*, *Georgij item Senouicij Castellani Polotiensis*. eodem fol: ver: 25. 26. *quo eo celerius*, leg: *quò celerius* eodem fol: ver: 31. *Radosouicio*, leg: *Radoskouicio*. fol: 50. ver: 7. *Nysæ*, le: *Niscia*. fol: 66. ver: 31. *crurotenus*, le: *cruretenus* fol: 69. ver: 9. *quorum*, le: *quarum*. fol: 75. ver: 2. *Nisä*, le: *Nisciam*. fol: 75. v: 31. *Drucam*, le: *Druiam* fo: 77. ver: 19. *Cernkouiam*, l: *Cernihouiam* fol: 78. *Nouogrodensem* le: *Nouogrodecensem*. fol: 82. ver: 1. *fit*, leg: *fit*. fol: 93. ver: 29. *Nasokinum*, leg: *Nasciokinum*. eodemque modo sequent: fol: 98. ver: 29. et sequent: *Hiscæ loco pharetra, & Corythi bicubitalia scloppeta ad humeros*

meros aptarat, breuiora ex cinctu suspendenda dederat, le: Hisce loco Coryti bicubitales scloppetos ad hum: apt: breuiiores ex cin: suspendēdos. fol: 101. ver: 3. & 4. maiores alias, le: alias. fol: 102. ver: 21. demendata, le: demandata. fol: 113. ver: 12. qui, le: quod. fol: 114. ver: 29. Viechouum, le: Vicichovum. fol: 125. ver: 2. Viechouus, leg: Vicichovus. fol: 126. ver: 2. comittat. lege committat. fol: 127. ver: 31. Demetrio Ceremesino, lege Damiano Cere: fol: 133. ver: 1. Sauolocia, leg: Sauolociam. fol: 149. ver: 6. quo, leg: quod. fol: 159. ver: 20. Dirsssekus, le: Derssekus. fol: 170. ver: 23. asumpto, leg: assumpto. fol: 171. ver: 11. debellasset, leg: debellasse. fol: 188. ver: 8. duo millia, leg: octo millia. fol: 190. ver: 23. Iamorodum, leg: Iamhorodum. fol: 206. ver: 3. Suturna leg: Sutura. fol: 208. ver: 10. Goltouiscius, le: Koltouiscius. fol: 212. ver: 17. referentur, le: referrentur. fol: 216. ver: 8. Gostinij, le: Gostomscij. fol: 218. ver: 6. alios, le: alijs. fol: 221. ver: 20. eas, le: ea. eod: fol: ver: 22. nominata, lege nominata. fol: 232. ver: 2. eas, le: ea. eod: fol: ver: 3. nulla, le: nullius. versu 4. præter Ostrouam, le: præterquã Ostrouia. fol: 236. ver: 30. arces, le: arcis. fol: 237. ver: 29. eas, le: cam. fol: 239. ver: 16. habuisset, le: habuisse. fol: 212. ver: 20. sufficere, le: sufficeret. fo: 255. ver: 32. Carnkouij, le: Ciarnkouij. addito i. eundēque in modum sequentib: locis, quoties hoc nomen cum litera C. occurrit. Reliqua si quæ sunt, quæ non possunt esse magna, lectoris iudicio permittuntur.

REGISTERUM.

ABCDEFGHIJKLMNOSTVXYZ

*Omnes sunt terminiones, præter Z,
quod est duernio.*

Cum gratia & priuilegio S. Regiæ M.

CRACOVIAE,

In Officina Typographica Lazari,

Anno Domini

1584.



116521

[illegible]

1875

1871

